

## TNÚHU NÍ CHÍDÓ TNÙNÍ TÉ LÚCÁ

*Nàcuáa ní ngódó tnùní tnúhu Yá Ndiǒxí*

<sup>1</sup> Te vài ñáyiú chìdo tnuní-yu nchaa nàcuáa ndùu tnúhu ñihí-yu nàcuáa ní cuu, te nchoo tnàhá-ó sà naha-o nacuáa ní cuu.

<sup>2</sup> Te ñu-ni nchaa tnúhu chìdo tnuní-yu-án cúú-xí tnúhu ní cáhá<sup>n</sup> nchaa cue téé ní xíní ndáá nàcuáa ní cuu ndéé díhna, cue téé ní cáhá<sup>n</sup> tnúhu Yá Ndiǒxí.

<sup>3</sup> Te yúhú sa ní cuu nduu quide cuendá-í nchaa nàcuáa ní cuu, núu xíǎ<sup>n</sup> ní sani iní-í tee váha-í nchaa tnúhu-a núú tütú sá cúú-xí yòhó té Těofilú chi ío váha cùu iní-í sá cúú-xí-n,

<sup>4</sup> te tèe-í cuendá cutnùní iní-n sǎ sǎ ndáá cúú-xí nchaa sá ní dánèhé ñáhá-güedě xii-n.

*Í<sup>n</sup> espíritú xínú cuèchi núú Yǎ Ndiǒxí càchí-xi sá cǎcú ì<sup>n</sup> téé cunani Juáá*

<sup>5</sup> Te cútnàhá ní xíndaha té Hèrodés ñáyiú dis-tritú Jùdeá dāvá-á<sup>n</sup> ñí xíndecu ì<sup>n</sup> dútú ñí xínani-dě Zacàriá, te ní cundihi-dé cue dútú Àbiás. Te ñadìhí-dé ní xínani-a<sup>n</sup> Èlisabét, te ñaha-á<sup>n</sup> ñí cuu-a<sup>n</sup> ñani tnáhá ndíi Àrón.

<sup>6</sup> Te ndi ndúú-yu ío ní quide ndáá-yu núú Dütú Ndiǒxí, chi ní tñí-yu nchaa tnúhu ní cáhá<sup>n</sup>-gá.

<sup>7</sup> Te ñá túú ñí ì<sup>n</sup> déhe-yu, chi duca<sup>n</sup> táhú tǎ Elisabét sá vǎ cóo dēhe-a<sup>n</sup>, te duca<sup>n</sup> ndi ndúú-yu ío ní sahnú-yu.

8 Te ì<sup>n</sup> nduu xìnu cuechi tucu té Zacàriá ndìhì nchaa cue tée cùndìhì-dé núú Yá Ndiöxí xití veñúhu.

9 Te dàvá-á<sup>n</sup> ñi xito ndeé-güedé cuendá cutnùnì iní-güedé nùu ndèdacàa-güedé quíhu núú nàá xití veñúhu-á<sup>n</sup> cahmi-güedé sá sàhá<sup>n</sup> tnámì, te ní cutnùnì sá tē Zacàriá quíhu-dé. Te duca<sup>n</sup> ñi quide-güedé, chi duca<sup>n</sup> tnàhì ní xóo cada nchaa cue dútú dàvá-á<sup>n</sup>.

10 Te ñinì sàhmi té Zacàriá sá sàhá<sup>n</sup> tnámì nùú nàá, te vài vihi ñáyiú xíndecu quehé veñúhu-á<sup>n</sup> càhá<sup>n</sup> ndìhì-yu Yá Ndiöxí.

11 Te ní xinì té Zacàriá ì<sup>n</sup> espíritú xínú cuèchi núú Yá Ndiöxí nútñi-xi xio cùha núú nàá núú càyú sá sàhá<sup>n</sup> tnámì-á<sup>n</sup>.

12 Te òré ní xinì té Zacàriá espíritú-á<sup>n</sup> te ñá ní cùtnunì iní-dé nása cada-dé chi ío ní yùhú-dé.

13 Te espíritú-á<sup>n</sup> ñi xáha<sup>n</sup>-xi:

—Zacàriá, vá yùhú-n chi Yá Ndiöxí ní tedóho-gá tnúhu ní cáhá<sup>n</sup>-n, te vitna coo ì<sup>n</sup> déhe ñadìhì-n tã Elisàbét te danàni-n-dé Juàá.

14 Te ío cudíí ìní-n, te duca<sup>n</sup> ío vài ñáyiú cudíí ìní-yu na càcu-dé.

15 Te ío cudíu-dé núú Yá Ndiöxí, te ni vã cóhó-dě ndidí te ni vã cóhó-dě ndudí sá ñi natíu, te sa cundecu ndìhì-dé Espíritú Yá Ndiöxí òré cacu-dé.

16 Te diu-dé cada te ío vài ñáyiú isràél natuhá-yu ichi Dútú Ndiöxí Yaá cúú Ndiöxí-ó.

17 Te té Juàá-á<sup>n</sup> codonùu-dé núú-gã, te cundecu ndìhì-dé Espíritú-gá, te taxi tnùnì-dé dàtná ní quide té Èliás. Te nacanu ichi-dé cue tée cùu sacuéhé cuendá cada-güedé sá vãha sá cúú-xí cuè

tée cuechi, te cuèi cue tée ío sàá iní-xi, te diu-dé cada te tñi-güedé tnúhu váha, tnúhu càhá<sup>n</sup> ñáyiu quide ndáá. Te duca<sup>n</sup> càda-dé cada túha-dé ñáyiu cuendá cunu cuèchí-yu núú Dütú Ndiöxí –càchí-xi xáha<sup>n</sup>-xi xii-dé.

18 Te té Zacàriá ní ndúcú tnúhu-dé núú espíritú-á<sup>n</sup>, te xáha<sup>n</sup>-dë:

–¿Te nása cutnùní ndáá iní-í tnúhu càhá<sup>n</sup>-n-í? Chi yúhú ío ní sahnu-í ndihí ñadìhí-í –càchí-dé xáha<sup>n</sup>-dë xii-xi.

19 Te espíritú-á<sup>n</sup> ñí xáha<sup>n</sup>-xi:

–Yúhú cúu-í espíritú nání Gàbriél, te xínu cuechi-í núú Yá Ndiöxí, te mee-gã ní táuchíu<sup>n</sup>-gã náhà-í tnúhu-gá véxi cuendá cutnùní iní-n nàcuáa cada ñaha-gã xii-ndo.

20 Te vitna cuu ñihí-n te vá càhá<sup>n</sup>-gá-n ndéé ná sàá nduu càcu déhe ñadìhí-n, chi ñá túú ní sàndáá-ni iní-n tnúhu ní càhá<sup>n</sup>-í. Te dacuití sáá nduu càda-xi nacuáa ní càhá<sup>n</sup>-í-a –càchí espíritú-á<sup>n</sup> xáha<sup>n</sup>-xi xii-dé.

21 Te nchaa ñáyiu xíndecu quehé ndétŭ-yu té Zacàriá, te xícuñúhu-yu sá ío cùyaa-dé xití veñúhu.

22 Te òré ní ndee té Zacàriá, te ñá ní cùu-gá càhá<sup>n</sup> ndihí ñaha-dë xii-yu, te òré-á<sup>n</sup> ñí cutnùní iní-yu sá ñí xiní-dé ñí espíritú xínú cuèchi núú Yá Ndiöxí xití veñúhu. Te mee-ñá ndaha-dé ní quide-dé núŭ-yu chi ñá ní cùu-gá càhá<sup>n</sup>-dé.

23 Te ní xínu nduu ñí xínu cuechi tē Zacàriá núú Yá Ndiöxí xití veñúhu, te cuánuhú-dé vehe-dé.

24 Te sátá dúcá<sup>n</sup> ñí cuu te ñadìhí-dé tá Elisàbét ní ngúhu<sup>n</sup> déhe-a<sup>n</sup>, te úhú<sup>n</sup> yóó ñà túú tnàhí-gá ní quèe-a<sup>n</sup> caca cuu-a<sup>n</sup>, te ní cachí-a<sup>n</sup>:

25 “Mee Dútú Ndiõxí duha ní cundàhú iní ñáhá-gă sá cóó ì<sup>n</sup> déhe-í cuendá sá vă cúú yíchí iní ñáhá ñăyiu xii-í”, duha ní cachí-a<sup>n</sup>.

*Î<sup>n</sup> espíritú xínú cuèchi núú Yă Ndiõxí cächí-xi sá cájú Jèsús*

26-27 Te núú ìñú yóó sã ñí ngúhu<sup>n</sup> déhe tá Elisàbét, te ní tendaha tùcu Yá Ndiõxí espíritú nání Gàbriél cuáhá<sup>n</sup>-xi ì<sup>n</sup> ñuú nání Nàzarét cuáhá<sup>n</sup> ngoto-xi ì<sup>n</sup> xíchí cuéchí nàni Mariá. Te ñuú-á<sup>n</sup> yíndèhu-xi distritú Galileá. Te xíchí-ă<sup>n</sup> sa ní cundáá tnúhu sá tnândaha-xi ndìhi ì<sup>n</sup> téé nàni Cheé ñání tnáhá ndíi Dàvíí.

28 Te espíritú-á<sup>n</sup> ñí quíhu-xi ndéé xití vehe núú ndécú tă Măriá, te ní xáha<sup>n</sup>-xi:

—¡Cóvãha-n-a<sup>n</sup>! Dútú Ndiõxí ío cùu iní ñáhá-gă xii-n te ndècu ndìhi ñaha-gá, te ío-gá xító ñàha-gá xii-n dàcúúxí dâva-gá ñáyiu dîhí —cächí espíritú-á<sup>n</sup> xãha<sup>n</sup>-xi.

29 Dico òré ní xiní tá Măriá espíritú-á<sup>n</sup>, te ní quíyùhú iní-xi sá dúcá<sup>n</sup> ñí cáhá<sup>n</sup> espíritú-á<sup>n</sup>. Te ní sani iní-xi: “¿Ná cuendá duha cãhá<sup>n</sup>-tu espíritú-a-i?”, duha ní sani iní-xi.

30 Te espíritú-á<sup>n</sup> ñí xáha<sup>n</sup>-xi:

—Măriá, vá yùhú-n chi duca<sup>n</sup> ñí nduu táhú-n ñúu Yá Ndiõxí.

31 Te vitna ngúhu<sup>n</sup> déhe-n, te na càcu-dé te danàni-n-dé Jèsús.

32 Te ío cunuu-dě, chi Dútú Ndiõxí Yaá ío cùnuu cachí-gá sá Dèhe-gá cúú-dě, te ñu-gá cada te cuu-dé ì<sup>n</sup> téé cùnuu núú ñáyiu isràél dàtná ní quide-gá ndíi Dàvíí.

33 Te taxi tnùní-dé ñáyiu isràél, te duca<sup>n</sup>-ni cùnuu-dé ñi caa ñi quíhí<sup>n</sup> —cächí-xi xãha<sup>n</sup>-xi.

34 Te tá Màriá ní xáha<sup>n</sup>-xi xìi espíritú-á<sup>n</sup>:

—¿Te nása cuu tnúhu càhá<sup>n</sup>-n te ñá túú yì-í-i? —  
càchí-xi xǎha<sup>n</sup>-xi.

35 Te ní xáha<sup>n</sup> espíritú-á<sup>n</sup>:

—Espíritú Yǎ Ndiǒxí quixi cundecu ndihí-n, te  
duca<sup>n</sup> Yǎ Ndiǒxí cada-gá ì<sup>n</sup> sá vǎha sá cúú-xí-n ná  
càcu déhe-n. Te Yá Ndiǒxí càchí-gá sá ìo cundecu  
yìñúhu-dé núú-gǎ, chi Déhe-gá cúú-dě.

36 Te tnàhá didí-n tǎ Elisàbét ñúhú dēhe-a<sup>n</sup> cuēi ío  
ní sahnú-a<sup>n</sup>, te ñiu-a<sup>n</sup> càchí-yu sá vǎ cóo déhe-a<sup>n</sup> ni  
cùu, te vitna sa ní cuu ìñú yóo ñúhú dēhe-a<sup>n</sup>.

37 Chi Yá Ndiǒxí ndácú-gǎ quidé-gǎ nchaa sá vǎ  
yǒo tnàhí ndàcu cada —cachí-xi xǎha<sup>n</sup>-xi.

38 Te tá Màriá ní xáha<sup>n</sup>-xi:

—Yúhú ná cúnú cuēchí-í núú Dǔtú Ndiǒxí, te  
mee-gǎ ná cádá ñàha-gá xii-í nàcuáa ní cachí-n —  
càchí-xi xǎha<sup>n</sup>-xi xìi espíritú-á<sup>n</sup>.

Te sátá dúcá<sup>n</sup> te espíritú-á<sup>n</sup> ñí xica-xi cuáhá<sup>n</sup>-xi.

### *Tá Màriá cuáhá<sup>n</sup> ngoto-xi tá Elisàbét*

39 Te tá Màriá ío ndíhi cuáhá<sup>n</sup>-xi ì<sup>n</sup> ñuú cáá xítí  
yucu distrítú Jùdeá.

40 Te ní sáá-xi vehe té Zacàriá, te cuánguihu-xi ní  
dándácõ váha-xi tá Elisàbét.

41 Te òré ní tecú dóho tá Elisàbét ní cáhá<sup>n</sup> tá Màriá,  
te ní candá déhe-a<sup>n</sup> xítí-a<sup>n</sup>, te òré-á<sup>n</sup> ñí ngúndecu  
ndihí-a<sup>n</sup> Espíritú Yǎ Ndiǒxí.

42 Te níhi ní cáhá<sup>n</sup>-a<sup>n</sup>, te xǎha<sup>n</sup>-a<sup>n</sup> xìi tá Màriá:

—Yá Ndiǒxí ío xìto ñaha-gá xii-n dàcúúxí dàva-gá  
tnàha dīhí-ó, te duca<sup>n</sup>-ni xìto-gá cuēi déhe-n.

43 ¿Te ná cúú yǔhú ñuu véxi coto ñaha yòhó nǎná  
Yaá cúú Xìtohó-í-i?

44 Chi òré-ni ní tecú dóho-í ní cáhá<sup>n</sup>-n te ní  
candá-ni déhe-í xítí-í sá cùdíí ìní-dé.

45 Te váha táhú yòhó sá ni sàndáá iní-n, chi dacuítíí sǎ cádá Dǔtú Ndiǒxí nàcuáa ní cáhá<sup>n</sup> espíritú ní tendaha-gǎ ní quixi ní cachí tnúhu xii-n nàcuáa cada-gǎ —càchí-a<sup>n</sup> xǎha<sup>n</sup>-a<sup>n</sup> xì tá Màriá.

46 Te ní xáha<sup>n</sup> tǎ Màriá:  
Ío càhnu cuu Dútú Ndiǒxí,

47 Ío cùdíí iní-í chi ðiu-gǎ taunihnu ñaha-gǎ xii-í núú ùhú núú ndàhú.

48 Chi ní ndacu iní ñáhá-gǎ xii yúhú, te ðicó ð<sup>n</sup> xíchí xínú cuèchi núú-gǎ cúù-í,  
te vitna te nchaandi túhú ñáyiú cachí-yu sá ïo váha táhù-í.

49 Te Yá Ndiǒxí cándòo caa nine iní-gǎ, te ío càhnu ð<sup>n</sup> sá vǎha ní quide-gǎ sá cúú-xì-í.

50 Te cùndahú iní-gǎ nchaa ñáyiú nèhe sá yíñùhu núú-gǎ.

Te duca<sup>n</sup>-ni cuèi ñáyiú sa ndècu ñuyíú-a ndihí ñáyiú vitna véxi.

51 Chi ta quide-gǎ nchaa sá vǎ yǒo tnàhí ndàcu cada véxi,  
te ta dándóo canúú-gǎ cue ñáyiú quide cahnu mee-xì.

52 Te cue ñáyiú tàxi tnuní ñá túú-gǎ dáñá-gǎ taxi tnùní-yu,  
te cue ñáyiú ndàhú ní quide nínu ñaha-gǎ xií-yu.

53 Te cue ñáyiú ndècu ndihí tnúndòho tnúhu ndàhú ní quide váha ñaha-gǎ xií-yu,  
te cue ñáyiú cuica ñà túú nǎ ní ñhí-gǎ-yu cundecu ndihí-yu.

54 Te chindee-gǎ ñáyiú isràél, ñáyiú xínu cuechi núú-gǎ, te ñá túú dàña nihnu ñaha-gǎ xií-yu,  
chi cùndahú iní ñáhá-gǎ.

55 Chi duca<sup>n</sup> nǐ xáha<sup>n</sup>-gǎ xii ndíi Àbrahám, ndíhi cue ñaní tnáhá ndíi.

Duha ní xáha<sup>n</sup> tă Màriá xii tá Elisàbét.

56 Te ní xíndecu tá Màriá dàtná úní yóó ndíhi tá Elisàbét te dàtnùní cuánuhú-xi vehe-xi.

*Ní cacu té Juàá té dacuàndute ñaha xii ñáyiu*

57 Te ní sáá nduu nǐ cacu ñ<sup>n</sup> déhe téé tá Elisàbét.

58 Te nchaa ñáyiu ndècu yatni ndíhi-a<sup>n</sup>, ndíhi nchaa ñaní tnáhá-á<sup>n</sup> nǐ níhí-yu tnúhu nàcuáa ní chindee ñaha Yá Ndiõxí xii-a<sup>n</sup>. Te ío ní cudíí ìní-yu cuèndá-a<sup>n</sup>.

59 Te núú ùná nduu sá nǐ cacu déhe-a<sup>n</sup>, te ní sáhá<sup>n</sup> ñáyiu núú ndécú-á<sup>n</sup> cuèndá cuáhă-yu señá ñíi déhe-a<sup>n</sup>. Te cuìní-yu cunani dēhe-á<sup>n</sup> Zacàriá dàtná nání tǎtá ní cùu.

60 Te ní xáha<sup>n</sup> nǎná dēhe-á<sup>n</sup>:

—Ñáhá, chi Juàá cunani-dě —càchí-a<sup>n</sup> xăha<sup>n</sup>-a<sup>n</sup> xìí-yu.

61 Te ní xáhă<sup>n</sup>-yu:

—¿Te ná cuèndá te ñá túú nì ñ<sup>n</sup> ñaní tnáhá-ndó dùca<sup>n</sup> nani-i? —cachí-yu xăhă<sup>n</sup>-yu.

62 Te ní quidé-yu ndàhá-yu núú tǎtá dēhe-á<sup>n</sup> cuèndá cuìní-yu núu nása cuìní méé-dě cunani dēhe-dé.

63 Te ní xícá<sup>n</sup>-dé ñ<sup>n</sup> tutú ní chídó tnùní-dé nàcuáa cunani dēhe-dé, te duha ní chídó tnùní-dé: “Juàá cunani-dě”, càchí-xi núú tütú ní tee-dé-á<sup>n</sup>. Te nchaa ñáyiu xíndecu-á<sup>n</sup> nǐ cuñúhu-yu nàcuáa ní cuu.

64 Te òrè-á<sup>n</sup> nǐ nacáhá<sup>n</sup> té Zacàriá sá nǐ cuu ñíhí-dé ní cùu, te ní ngüíta-dé ní cachí-dé sá ío càhnu cuu Yá Ndiõxí.

65 Te nchaa ñáyiú xĩndecu yatni ndihi-dé ní cuñúhu-yu, te nchaa ñáyiú xĩndecu nihií xití yucu distritú Jùdeá ní níhĩ-yu tnúhu nàcuáa ní cuu.

66 Te nchaa ñáyiú-á<sup>n</sup> ïo vài ní sani iní-yu, te ní xítñàhá-yu:

—¿Ná cúú sǎ cádá tǎe-ǎ<sup>n</sup> ndéé idá-gá ná cuèhnu-dé? —càchí-yu xítñàhá-yu.

Te duca<sup>n</sup> ñí xítñàhá-yu chi Dútú Ndiöxí ndécú ndìhi ñaha-gá xii-dé.

*Té Zacàriá càchí-dé sá ïo càhnu cuu Yá Ndiöxí*

67 Te té Zacàriá tǎtá tǎ lĩhli-á<sup>n</sup> ñí ngúndecu ndihi-dé Espiritú Yǎ Ndiöxí te ní cáhá<sup>n</sup>-dé nchaa tnúhu sá ñí dánèhé ñáhá-gǎ, te ní cachí-dé:

68 Ío càhnu cuu Dútú Ndiöxí nchoo ñǎyiú isràél, chi ní quixi coto ñaha-gǎ xii-o, te cùu-o ñáyiú cùu cuendá-gá, chi dàcácu nihnu ñaha-gǎ xii-o vítña.

69 Chi ní tendaha-gǎ ï<sup>n</sup> tée véxi-dé dàcácu nihnu ñaha-dě xii-o nǔú ùhú núú ndàhú. Te cùu-dé ñaní tnáhá ndìi Dàvíí tée ní xinu cuechi nǔú-gǎ ndéé sanaha.

70 Te ñiú-ni tnúhu ní cáhá<sup>n</sup> Yǎ Ndiöxí ní cáhá<sup>n</sup> cue tée ní quide ndáá ní xĩndecu núú-gǎ ñuyíú-a ndéé sanaha.

71 Te ní cachí-güedé sá táúnìhnu ñaha-gá xii-o nǔú nchàa ñáyiú cùu úhú iní ñáhá, ndìhi núú nchàa ñáyiú ñá túú cùu quiní ndee ñáhá.

72 Te ní xáha<sup>n</sup>-gǎ sá cùndàhú iní ñáhá-gǎ xii-o, te duca<sup>n</sup> càda-gá chi vá nácuànaa-gǎ tnúhu ní cáhá<sup>n</sup>-gá ndìhi-güedé.

73 Te ñiú duca<sup>n</sup> ndùu tnúhu ní xáha<sup>n</sup>-gǎ xii ndíi Àbrahám sá



74 táúnìhnu ñaha-gá xii-o núú nchàa ñáyiù cùu úhú  
 iní ñáhá,  
 cuèndá sá vǎ yùhú-ó cùnu cuechi-o núú-gǎ.

75 Te cada ndáá-ó, te cundecu yíñùhu-o núú-gǎ ndi  
 nchàa nduu cundecu-o ñuyíú-a.

Duha ní cachí té Zacàriá.

76 Te xǎha<sup>n</sup>-dě xii té líhli-á<sup>n</sup>:

Te yòhó té líhli, cáhá<sup>n</sup> ñáyiù cuèndá-n sǎ cúú-n ì<sup>n</sup> téé  
 càhá<sup>n</sup> tnúhu Dútú Ndiǒxí Yáá ío cùnuu,  
 chi quíhí<sup>n</sup>-n còdonuu-n núú Yáá cúú Xìtohó-ó  
 dàtúha-n ñáyiù cuèndá cundecu túha-yu òré  
 quexìo-gá.

77 Te cúñaha-n xii ñáyiù isràél sá cuíní-gá cada  
 càhnu iní-gá nchaa cuéchi-yu,  
 te naníhí tàhú-yu.

78 Te duca<sup>n</sup> càda-gá chi ío cùu iní ñáhá-gǎ xii-o, chi  
 ndéé andiù ñí tendaha-gǎ ì<sup>n</sup> téé véxi  
 cuu<sup>n</sup>-dé dandixi túu-dé iní-ó cuèndá cutnùní iní-ó  
 nàcuáa ndùu cuendá Yǎ Ndiǒxí.

79 Te duca<sup>n</sup> dandixi túu-dé iní nchaa ñáyiù ndècu  
 ichi cuehé ichi duha ta xǐta nihnu cuáhá<sup>n</sup>  
 cuèndá nucúnu ichí-yu ì<sup>n</sup> ichi váha.

Duha ní xáha<sup>n</sup> tǎ Zacàriá xii déhe-dé.

80 Te té líhli-á<sup>n</sup> tá sàhnu-dé, te ta chìndee chitúu  
 ñaha Yǎ Ndiǒxí xii-dé cuáhá<sup>n</sup>, te ní xíndecu-dé xití  
 yucu ndéé ní sáá nduu ñí ngúíta-dé ní cáhá<sup>n</sup>-dé  
 núú cuè ñáyiù isràél tnúhu Yá Ndiǒxí.

## 2

*Ní cacu Jèsús*

*(Mt. 1:18-25)*

1 Te dàvá-á<sup>n</sup> ñí táúchíú<sup>n</sup> tǎ Àugustú Cèsár nucódó  
 tnùnì nchaa ñáyiù nàció<sup>n</sup> yíndàha-dé.

<sup>2</sup> Te xéhé sǎ dǐhnanuu nǐ nucódó tnùnǐ ñáyíu, te dǐu-ni dàvá-á<sup>n</sup> nǐ cunuu té Cìreniú distritú Síríá.

<sup>3</sup> Te nchaa ñáyíu ní natacá-yu ñúú núú nǐ cacú-yu cuendá nucódó tnùnǐ-yu.

<sup>4</sup> Núu xǐá<sup>n</sup> ní quee té Chèè ñúú Nazàrét ì<sup>n</sup> ñúú yíndèhu distritú Galileá, te cuáhá<sup>n</sup>-dé ñúú Bèlén ì<sup>n</sup> ñúú yíndèhu distritú Jùdeá, chi xǐá<sup>n</sup> nǐ cuu ñúú ndíi Dàvíí, te dǐu-ni ñanǐ tnáhá tǎ Chèè-á<sup>n</sup> nǐ cuu ndíi.

<sup>5</sup> Núu xǐá<sup>n</sup> cuáhá<sup>n</sup>-dé ndéé ñúú Bèlén nucódó tnùnǐ-dé, te tnáhá tá Màriá xíchí nǐ cundáá tnúhu sá tnándaha ndìhi-dé cuáhá<sup>n</sup> ndìhi ñaha-dě, te sa ñúhu déhe-xi.

<sup>6</sup> Te nini cùyaá-yu ñúú Bèlén-á<sup>n</sup> nǐ sáá òré cacu déhe-xi.

<sup>7</sup> Te ní cacu déhe dǐhna-xi, te ní chidúcú<sup>n</sup>nuu-xi dóó, te ní sacá<sup>n</sup> ñáhá-xí ì<sup>n</sup> vehe núú cúú vèhe quitì, chi ñá túú ní ñhǐ-yu vehe coó-yu.

*Cue espíritú xínú cuèchi núú Yǎ Ndiǒxí ndìhi cue toli.*

<sup>8</sup> Te yatni ñúú-á<sup>n</sup> xǐndecu ì<sup>n</sup> ǔú toli ndéé-güedé mbéé-güedě ndécú-güèdì majadá niú-á<sup>n</sup>.

<sup>9</sup> Te uu<sup>n</sup>ni ní quexìo ì<sup>n</sup> espíritú xínú cuèchi núú Yǎ Ndiǒxí, te Yǎ Ndiǒxí ní quide-gá ní dáyèhé-xi ní càndéé núú xǐndecu-güedé, te ní yùhú víhí-güedě.

<sup>10</sup> Te ní xáha<sup>n</sup> espíritú-á<sup>n</sup>:

—Vá yùhú-ndó, chi nàha-í ì<sup>n</sup> tnúhu váha véxi sá cúú-xí-ndó, te ío cudíí ìní-ndó ndìhi nchaa ñáyíu.

<sup>11</sup> Chi vitna ní cacu ì<sup>n</sup> téé dàcácu nihnu ñaha xì-ndo núú ùhú núú ndàhú ñúú ndíi Dàvíí, te téé-á<sup>n</sup> cúú-dě Xítóhó Jesucristú.

<sup>12</sup> Te dàtná ì<sup>n</sup> sèñá te naníhí-ndó tǎ lìhli-á<sup>n</sup> yídúcú<sup>n</sup> nuu-dé dóó cáá-dě ì<sup>n</sup> vehe quitì —càchí-xi xǎha<sup>n</sup>-xi xì-güedé.

13 Te òré-án ñi quexìo cuéhé víhí espíritú véxi cuu<sup>n</sup> andiu ñi naníhí tnáhá-xí ndìhì espíritú-án, te ní ngüíta-xi ní chiñuhu-xi Yă Ndiöxí, te cächí-xi:

14 ¡Ío cànu cuu Yă Ndiöxí Yaá ndécú àndiu, te na cùndecu váha-ni nchaa ñáyu cùu iní méé-gă! Duha cächí cue espíritú-án.

15 Te òré cuándaa cue espíritú-án andiu, te ní ngüíta cue toli-ă<sup>n</sup> xĩtnàha-güedé:

—Na quìhí<sup>n</sup>-ó ñùu Bèlén quíní-ó nàcuáa ní cuu, chi Dútú Ndiöxí sa ní cachí tnúhu-gá —cächí-güedé xĩtnàha-güedé.

16 Te ní tñi-güedé ichi sùúni ndìhì cuáhán-güedé, te ní naníhí-güedé tá Màriá ndìhì té Chéé, ndìhì té lĩhli-án cáá-dě xítí ñ<sup>n</sup> vehe quitì.

17 Te òré ní xiní ñáhá-güedé te ní xáha<sup>n</sup>-güedé xíi-yu nàcuáa ní xáha<sup>n</sup> espíritú-án xii-güedé cuendá té lĩhli-án.

18 Te nchaa ñáyu ní tecú dóho-xi ní cuñúhu-yu nàcuáa ní cáhán-güedé.

19 Dico tá Màriá chi ñùhu nahi-ni iní-xi, te dícó-ni sàni iní-xi cuendá nchaa tnúhu-án.

20 Te cue toli-ă<sup>n</sup> ñi natñi-güedé ichi, te ta xĩtnàha-güedé cuánuhú sá ïo cànu cuu Yă Ndiöxí cuendá nchaa tnúhu ní xíndedóho-güedé, ndìhì cuendá nchaa sá ñi xiní-güedé, chi cuendá sá ndáa ní cuu nchaa nàcuáa ní tecú tnúhu-güedé.

### *Ndècá-yu Jèsús cuáhán veñúhu*

21 Te núu ùná nduu sá ñi cacu té lĩhli-án, te ní sáha-güedé señá ñi-dé, te ní dánání ñàha-güedé Jèsús xii-dé, ñi-ni nàcuáa ní xáha<sup>n</sup> espíritú xínú cuèchi núu Yă Ndiöxí xii tá Màriá ndéé cútnàhá vátá ngùhu<sup>n</sup>-gá-dé xítí-xi.

22 Te sátá nǐ tnahá nduu, ndùu ìŷ-yu nàcuáa càhá<sup>n</sup> nchaa tnúhu ní chídó tnùnǐ ndíi Moisés, te ndècá-yu té lǐhli-án<sup>n</sup> cuáhá<sup>n</sup> ñuú Jerusàlén cuèndá quee túu-dé núú Dǔtú Ndiǒxí.

23 Te duca<sup>n</sup> nǐ quidé-yu, chi duca<sup>n</sup> càhá<sup>n</sup>-xi núú tǔtú Yǎ Ndiǒxí sǎ ncháá lǎndú téé na càcu díhna quetúu-güexi núú-gǎ cuèndá cundecu-ná-güexi cuèndá-gǎ.

24 Te ní quidé-yu nàcuáa càhá<sup>n</sup> Yǎ Ndiǒxí núú tǔtú-gǎ núú càchí-xi: “Canehe-ndo úú lõmá àdi úú cǔcu quíhí<sup>n</sup> nduu táhú ñáhá Yǎ Ndiǒxí”, duha càhá<sup>n</sup>-gǎ núú tǔtú-gǎ.

25 Te dàvá-á<sup>n</sup> ndécú ì<sup>n</sup> téé nàni Mió ñuú Jerusàlén. Te ío váha iní-dé, te chiñuhu-dé Yǎ Ndiǒxí, te ndètu-dé sáá nduu chindee ñaha Yá Ndiǒxí xii ñáyiu isràél. Te ndècu ndihí té Mìó-á<sup>n</sup> Espíritú Yǎ Ndiǒxí.

26 Te sa ní xáha<sup>n</sup>-xi xì-dé sǎ vǎ cùu-ni-dé, chi dacuítí quìní-dé Crìstú Yaá tendaha Yǎ Ndiǒxí quixi ñuyíú-a.

27 Te téé-á<sup>n</sup> ndécá ñaha Espíritú Yǎ Ndiǒxí xii-dé cuáhá<sup>n</sup> veñúhu càhnu sǎ ìo cùnuu. Te cuáhá<sup>n</sup>-yu ndihí Jèsús veñúhu-á<sup>n</sup> cuèndá cadá-yu ndihí-gǎ nàcuáa càhá<sup>n</sup> tnúhu ní chídó tnùnǐ ndíi Moisés.

28 Te òré ní sáá-yu, te té Mìó-á<sup>n</sup> nǐ nguídèhé-dé Jèsús, te ní cáhá<sup>n</sup>-dé sǎ ìo càhnu cuu Yá Ndiǒxí, te ní xáha<sup>n</sup>-dè xii-gǎ:

29 Yòhó Dútú Ndiǒxí sa ní cuu dañà-n cùú-í vitna, chi sa ní quide-n nàcuáa ní cachí-n xii yúhú téé xìnu cuechi núú-n.

30 Chi sa ní xiní núú-í Yaá dàcácu nihnu ñaha xì ñáyiu núú ùhú núú ndàhú vitna.

31 Te Yaá ní tendaha-n vèxi núú ndécú nchàa ñáyiu ñuyíú-a.

32 Te cùu-gá dàtná ì<sup>n</sup> ñuhú, chi dandìxi túu-gá iní ñáyiú cuendá cutnùní iní-yu cuendá Yá Ndiöxí cuèi ñá díú ñáyiú isràél cúŷ-yu.

Te diu-gá cada, te canehe ñáyiú dava-gá ñuú sá yíñùhu núú ñáyiú isràél chi diu ñáyiú isràél cúŷ-yu ñáyiú cùu cuendá-n.

Duha ní xáha<sup>n</sup> tē Mìó xii Yá Ndiöxí.

33 Te té Chèé ndìhi nǎná Jèsús ní cuñúhu-yu tnúhu ní cáhá<sup>n</sup> té Mìó cuendá-gá.

34 Te dàtnùní té Mìó ní xícá<sup>n</sup> táhú-dě núú Yá Ndiöxí cuendá-yu, te xáha<sup>n</sup>-dě xii tá Màriá nǎná Jèsús:

—Cundedóho tnúhu na càhá<sup>n</sup>-í-a, té lihli-a ní nduu táhú-dě nacanu ichi-dé dava ñáyiú isràél ichi Yá Ndiöxí, te davá-yu vá tnǎ<sup>n</sup>-yu tnúhu cáhá<sup>n</sup>-dé, te ñáyiú-á<sup>n</sup> cuíta nihnú-yu, te cada-dé nàcuáa cutnùní iní ñáyiú sá Yá Ndiöxí ní tendaha ñàha-gá xii-dé, dico vá quíndáá iní-yu, chi daquèe tihú ñáhă-yu xii-dé.

35 Te duca<sup>n</sup> te cutnùní nàcuáa sàni iní ì<sup>n</sup> ì<sup>n</sup> ñáyiú. Dico sá cúú-xí yòhó chi ío cada ndàhú-xi iní-n, chi sùúní dàtná sá ñí nícuèhé iní-n càda-xi —cachí-dé xáha<sup>n</sup>-dě xii tá Màriá.

36 Te xiá<sup>n</sup> ndécú tnàhá ì<sup>n</sup> ñaha càhá<sup>n</sup> tnúhu Yá Ndiöxí nání-á<sup>n</sup> Aná, te tǎtá-a<sup>n</sup> ní xínani-dě Fànuél ñaní tnàhá ndíi Àsér. Te ñaha-á<sup>n</sup> sa ní sahnu vhi-a<sup>n</sup>, te cuechi-ni-a<sup>n</sup> ñí tnándaha-a<sup>n</sup> te úsá-ni cuíá ñí xíndecu-a<sup>n</sup> ndìhi yíi-a<sup>n</sup>,

37 te ní quendóo quèé-a<sup>n</sup>, te sa ñùhu-a<sup>n</sup> cúmídíco cǔmí cuíá-a<sup>n</sup>. Te ñá túú ní xǒo quee-a<sup>n</sup> veñúhu càhnu sá ìo cùnuu, chi nduu niú ní xóo chiñuhu-a<sup>n</sup> Dútú Ndiöxí, te áma ñá túú tnàhí ná ní xǒo caxi-a<sup>n</sup> ní xóo cáhá<sup>n</sup> ndìhi-a<sup>n</sup> Yá Ndiöxí.

38 Te diu-ni òré ndécũ-yu ndihì Jèsús ní quexìo-a<sup>n</sup> núũ-yu, te ní ndacá<sup>n</sup> táhú-á<sup>n</sup> núú Yă Ndiõxí cuendá sá ní xiní-a<sup>n</sup> Jèsús, te dătnùnì ní ngüita-a<sup>n</sup> càhá<sup>n</sup> váha-a<sup>n</sup> cuendá-gá núú nchàa ñáyiù, ñáyiù ndètu quiní sáá nduu dâcâcu Yă Ndiõxí ñáyiù Jerusàlén núú tnũndòho tnúhu ndàhú.

*Cuánuhú-yu ñuú Nazàrét*

39 Te sátá ñí quidé-yu nchaa nâcuáa càhá<sup>n</sup> tnúhu Yă Ndiõxí, te cuánuhú-yu ñuú Nazàrét núú ndécú tnàhí-yu, te ñuú-á<sup>n</sup> yíndèhu-xi distritú Galilea.

40 Te té lĩhli nàni Jèsús-á<sup>n</sup> tá sàhnu-dé, te ta nihí ndéé-dě cuáhá<sup>n</sup>, te duca<sup>n</sup> ïo váha ta sàá sá xìnì tnùnì-dé cuáhá<sup>n</sup>, chi Yă Ndiõxí ndécú ndihì ñaha-gá xii-dé.

*Jèsús ndécú-gă veñúhu*

41 Te ndi tnahá cuía ñí xóo quihí<sup>n</sup> té Chèé ndihì náná Jèsús vico pàscuá ñuú Jerusàlén.

42 Te cútnahá ní chítú Jèsús úxúú cuía-gă, te cuáhá<sup>n</sup>-yu ndihì-gá ñuú Jerusàlén vico pàscuá, chi duca<sup>n</sup> tnàhí quidé-yu.

43 Te òré ní yáha vico, te ní natnì-yu ichi cuánuhú-yu, te ní quendóo-gá ñuú Jerusàlén, te ni náná-gă, te ni tẽ Chèé ñá túú ní xìnì ní quendóo-gá.

44 Chi ní sani iní-yu sá ñútnahá-gá tnuú nchaa ñáyiù ní sáhá<sup>n</sup> vico cuánuhú. Te ní xúhu<sup>n</sup>-yu ì<sup>n</sup> nduu ichi ta ndùcu tnúhu-yu-gá núú nchàa ñanì tnáhă-yu, ndihì núú nchàa ñáyiù xìnì tnáhá ndihí-yu,

45 te ñá túú ní nàníhí ñáhă-yu xii-gá. Núu ní nacuicó-yu cuánuhú tucú-yu ñuú Jerusàlén cuendá yàcá<sup>n</sup> nanducu ñahá-yu xii-gá.

46 Te núú ùní nduu sá nǐ dana núú ñáhă-yu xii-gá, te ní naníhí ñáhă-yu nùcòo-gá xití veñúhu càhnu sá ïo cùnuu tnuú cue tée dàcuaha ñaha xii-yu nchaa tnúhu ní chídó tnùní ndíi Moisés, te ndèdóho ñaha-gă xii-güedé, te nándi sá ndúcu tnúhu-gá núú-güedě.

47 Te nchaa cue tée xǐndedóho ñaha xii-gá xǐcuñúhu-güedé sá ïo váha sàá sá xìní tnùní-gá, te ío váha ñihí-gá tnúhu nàdanchocáva-gá.

48 Te òré ní xìní ñáhá tǎ Chèé ndihí nǎná-gă xii-gá, te ío ní cuñúhu-yu, te ní xáha<sup>n</sup> nǎná-gă xii-gá:

—Yòhó déhe-í, ¿ná cuendá duca<sup>n</sup> nǐ quide ñaha-n xii-ndí? Te tǎtá-n ndihí yúhú ndíhú iní-ndí xícá nànducu ñaha-ndí xii-n —càchí-xi xáha<sup>n</sup>-xi xii-gá.

49 Te ní xáha<sup>n</sup> Jèsús xii-yu:

—¿Ná cuendá nànducu ñaha-ndo? ¿Náa ñá túú xìní-ndó sǎ núú chíú<sup>n</sup> Tǎtá-í tàú-í caca cuu-í-ǎ<sup>n</sup>? —càchí-gá xáha<sup>n</sup>-gă xii-yu.

50 Dico mèe-yu ñá túú ní tècú tnùní-yu nàcuáa ní xáha<sup>n</sup>-gă.

51 Te sǎtá dúcá<sup>n</sup> te cuánuhú ndihí ñáhá-yu xii-gá ñúú Nazàrét, te ío ní sándáá iní ñáhá-gă xii-yu. Te nchaa sá nǐ quide-gá-á<sup>n</sup> nǐ xúhu<sup>n</sup> nahi-ni iní nǎná-gă.

52 Te Jèsús duca<sup>n</sup>-ni ta sàhnu-gá cuáhá<sup>n</sup>, te ta sàá-gá sá xìní tnùní-gá cuáhá<sup>n</sup>, te duca<sup>n</sup> cùdú-gá núú Yǎ Ndiǒxí, ndihí núú nchàa ñáiyu.

### 3

*Té Juàá tée dàcuandute ñaha xii ñáiyu càhá<sup>n</sup>-dé tnúhu Yá Ndiǒxí xití yucu*

*(Mt. 3:1-12; Mr. 1:1-8; Jn. 1:19-28)*

<sup>1</sup> Te ní cuu sáhú<sup>n</sup> cuía sã yíndàha té Tìberiú cuéhé nàció<sup>n</sup>, te dàvá-á<sup>n</sup> nǐ cunuu té Pilatú distritú Jùdeá, te té Hèrodés ní cunuu-dě distritú Galileá, te ñaní-dé té Lìpé ní cunuu-dě distritú Itùreá ndihì ingá distritú nání Tràconité, te té Lisàniás ní cunuu-dě distritú Abìliniá.

<sup>2</sup> Te té Ànás ndihì té Caifás ní cuu-güedé dútú cùnùu. Te dàvá-á<sup>n</sup> nǐ cáhá<sup>n</sup> ndihì ñaha Yã Ndióxi xii té Juàá déhe té Zacàriá xití yucu sá quihí<sup>n</sup>-dé cáhá<sup>n</sup>-dé tnúhu-gá núú ñáyi.

<sup>3</sup> Te té Juàá ní yáha-dé nchaa ñuú cáá yàtni yúte Jòrdán, te xáha<sup>n</sup>-dě xii nchaa ñáyi:

—Chí dándìxi túu iní sá ñà túú quide váha-ndo, te dañà-ndo nchaa ichi cuehé ichi duha ndècu-ndo, te cuandute-ndo, te duca<sup>n</sup> te cada càhnu iní Yã Ndióxi nchaa yíca cuèchi-ndo —duha ní xáha<sup>n</sup>-dě xií-yu.

<sup>4</sup> Te duca<sup>n</sup> nǐ quide-dé chi ní quee ndáá-xi nàcuáa ní chídó tnùnì ndí Chàíá téé ní xóo cáhá<sup>n</sup> tnúhu Yá Ndióxi ndéé sanaha núú tütú ndí núú càchí-xi: Tècú càhá<sup>n</sup> níhi ì<sup>n</sup> téé yìhi xití yucu, te xáha<sup>n</sup>-dě xii ñáyi:

“Chí dáñá nchaa ichi cuehé ichi duha ndècu-ndo, te tñi-ndo ichi váha, te duca<sup>n</sup> càda-ndo cuendá cundecu túha-ndo, chi véxi Yaá ío cùnùu.

<sup>5</sup> Te nchaa núú cùnù nachítú, te nchaa tindúú ndihì nchaa yucu ngoyo nihnu cuendá nduu ndáá, te nchaa ichi ñá túú cuǎhá<sup>n</sup> ndáá nduu ndáá, te nchaa ichi ñá túú càváha nduu váha.

<sup>6</sup> Te nchaa ñáyi ñuyíú-a níhí-yu tnúhu sá Yã Ndióxi véxi-gá dàcácu nihnu ñaha-gã xií-yu núú ùhú núú ndàhú.”

Duha ní chídó tnùnì ndí Chàíá núú tütú ndí.



7 Te òré ní xica ñáyiú cuáhá<sup>n</sup>-yu cuendá dacuàndute ñaha té Juàá xií-yu, te ní xáha<sup>n</sup>-dě:

—¡Nchaa nchòhó cúú-ndó dàtná ì<sup>n</sup> cóó děé<sup>n</sup> chi ío cuihna ìní-ndó! ¿Te nása ní cuu núú tnàhá nchòhó ndúcú-ndó nàcuáa cácu nihnu-ndo núú tnùndòho cahnu vihi sá tá cùyatni ñaha xii-ndo véxi-i?

8 Te chí cádá vǎha vitna cuendá duca<sup>n</sup> cùtnuní sá ñí dáñá-ndó nchàa ichi cuehé ichi duha ndècu-ndo. Te vá cǎchí-ndó sǎ ío cǎhnu cuu-ndo cuendá sá cúú-ndó ñaní tnàhá ndíi Àbrahám, chi cuèi ndéé yúú te ndacu Yá Ndiòxí ndada-gá ñáyiú te cuú-yu ñaní tnàhá ndíi Àbrahám.

9 Te caá chi ndècu túha-xi sá quèhndé-xi nchaa yutnu sá ñà túú cǎváha sávidí-xi, chi nchaa yutnu-á<sup>n</sup> tèhndé-xi te cuánguee-xi núú ñùhú càyú-xi. Te duha sǎtnahá-xi ndoho nchaa ñáyiú ñá túú quède váha, chi nchaa ñáyiú duca<sup>n</sup> ñà túú quède váha cùú-yu dàtná nchaa yutnu sá ñà túú cǎváha sávidí-xi. —cǎchí-dé xǎha<sup>n</sup>-dě xií-yu.

10 Te ní xícá<sup>n</sup> tnúhu-yu núú-dě, te xǎhǎ<sup>n</sup>-yu:

—¿Te nása cada-ndí váí<sup>n</sup>? —cǎchí-yu xǎhǎ<sup>n</sup>-yu xii-dé.

11 Te xǎha<sup>n</sup>-dě:

—Te núú ndèdacàa-ndo ndecu ndíhi-ndo úú dóó te cuáñaha-ndo ì<sup>n</sup> xii ñáyiú ñá túú ndècu ndíhi, àdi núú ndècu ndíhi-ndo sá nchító-ó te cuáha-ndǒ-yu na cǎxí-yu —cǎchí-dé xǎha<sup>n</sup>-dě xií-yu.

12 Te ní quexìo ì<sup>n</sup> úú cue tée cuihna ìní-xi quède cobrá ñáhá xii ñáyiú cuendá impuèstú cuendá cuàndute-güedé, te ní xícá<sup>n</sup> tnúhu-güedé núú tǎ Juàá, te xǎha<sup>n</sup>-güedé:

—Mèstrú, ¿te nása cada-ndí cuendá cuu váha ìní Yá Ndiòxí-i? —cǎchí-güedé xǎha<sup>n</sup>-güedé xii-dé.

13 Te té Juàá ní xáha<sup>n</sup>-dě:

—Vá cuidó-ndó càda cobrá-ndó ñáyi —càchí-dé xáha<sup>n</sup>-dě xii-güedé.

14 Te tnàhá ñ<sup>n</sup> úú cue tée cùu sandadú xĩndecu-á<sup>n</sup> ñĩ xícá<sup>n</sup> tnúhú-güedé núú té Juàá, te xáha<sup>n</sup>-güedé:

—Te nchúhú ǀnása cada-ndí cuendá cuu váha iní Yă Ndiǒxí-í? —càchí-güedé xáha<sup>n</sup>-güedé xii-dé.

Te ní xáha<sup>n</sup> tẽ Juàá:

—Vá quëndéé-ndó sã néhé tnàha ñáyi-ndo, te ni vã dácàa díquí-ndǒ-yu ñ<sup>n</sup> sá ñà túú ñă quidě-yu, te nduu vétú iní-ndó nàcuáa ñùhu yáhu-ndo —càchí-dé xáha<sup>n</sup>-dě xii-güedé.

15 Te nchaa ñáyi xĩndetu sá quíxí Crìstú sàni ñ<sup>n</sup> sani úú iní-yu núu sá díú Crìstú Yaá tendaha Yă Ndiǒxí quixí ñuyíú-a cùu te Juàá àdi ñáhá.

16 Dico té Juàá ní cáhá<sup>n</sup> ndodo-dé núu-yu nchaá-yu, te xáha<sup>n</sup>-dě:

—Na càchí tnúhu ndáá-í xii-ndo sã yǔhú véxi-í sá cuendá-ni dacuàndute ñaha-í xii-ndo dàtná ní cachí Yă Ndiǒxí, dico nchìcú<sup>n</sup> ingá tée véxi, te tée-á<sup>n</sup> taxi-dé Espíritú Yă Ndiǒxí cundecu ndihí-ndo, te cùu-xi datná ñ<sup>n</sup> ñuhú, chi ndada ndoo ndada nine-xi iní-ndó. Te tée-á<sup>n</sup> ïo-gá cúnùu-dé dàcúúxí yǔhú, chi yúhú cùu-í ñ<sup>n</sup> tée duu<sup>n</sup> duu<sup>n</sup> ñá túú tàù-í nandaxi-ĩ cuèdicó ñ<sup>n</sup> chàú-dé dico quide-í chiu<sup>n</sup>-dé.

17 Te tée-á<sup>n</sup> sa véxi túha-dé sá cádá dǐ<sup>n</sup> ñaha-dé xii-o dàtná quidé ñáyi ndàda ndoo triú, chi ñáyi-á<sup>n</sup> sa nêhe túha-ná-yu yaxí<sup>n</sup>-yu òré náñàni cuendá ndada ndoo-yu, te òré ndádá ndòó-yu triú-á<sup>n</sup> te dàquee dí<sup>n</sup>-yu mihi-xi, te tàxúha-yu mee-ñă triú-á<sup>n</sup>, te mihi-xi-á<sup>n</sup> sáhmĩ-yu. Te dàtná quidě-yu mihi triú-á<sup>n</sup> duca<sup>n</sup> sãtnahá-xi cada ñaha

tée-á<sup>n</sup> xii nchaa ñáyiú ñá túú quide váha, chi daquihí<sup>n</sup> ñáhá-dě xii-yu núú ñuhú núú càyú, te ñuhú-á<sup>n</sup> ñà túú tnàhí ndàhvá –càchí-dé xăha<sup>n</sup>-dě xii-yu.

18 Te titní víhí-gă tnúhu váha ní xáha<sup>n</sup> tē Juàá xii-yu òré ní dásàhú ñáhá-dě.

19 Te ní cáhá<sup>n</sup>-dé dóho té Hèrodés cuendá sá ndécá-dě ì<sup>n</sup> ñaha nàni Herodiás ñaha ní cándeca ñani-dé té Lìpé, te ní xáha<sup>n</sup>-dě cuendá nchaa dava-gá sá cuèhé sá dúhá quide-dé.

20 Dico té Hèrodés ñá túú ní quide cuendá-dé tnúhu ní cáhá<sup>n</sup> té Juàá, chi nèhé-gá tucu ní quide-dé, chi da vecaá ní chihi-dé té Juàá.

### *Sàndute Jesús*

*(Mt. 3:13-17; Mr. 1:9-11)*

21 Te òré dácua<sup>n</sup>ndute té Juàá nchaa ñáyiú, te tnàhá Jèsús ní dácua<sup>n</sup>ndute ñaha-dé xii-gá. Te nini càhá<sup>n</sup> ndihí-gá Dútú Ndiǒxí ní nacaá<sup>n</sup> andiú,

22 te ní quee Espiritú Yă Ndiǒxí véxi cuu<sup>n</sup> túu-xi, te càa-xi datná cáá ì<sup>n</sup> lómá, te òré-á<sup>n</sup> ñi tecú ní cáhá<sup>n</sup> Yă Ndiǒxí ndéé andiú, te xăha<sup>n</sup>-gă xii Jèsús:

–Yòhó cúú-n Dèhe-í tée ío cùu iní-í, te ío cùdí iní ñáhà-í xii-n –càchí-gá xăha<sup>n</sup>-gă xii Jèsús.

### *Cue tée ní xindecu dîhna-gá ñuyíú-a dàcúúxí Xìtohó Jesucristú*

*(Mt. 1:1-17)*

23 Te ndècu Jesús dàtná ócò úxí cuíá-gă cútnàhá ní chisaha-gă chiú<sup>n</sup> ní táhú Tătá-gă Dútú Ndiǒxí cada-gá. Te ní cuu-gá déhe té Chèè chi duca<sup>n</sup> sàni iní ñáyiú ñuyíú-a. Te té Chèè-á<sup>n</sup> ñi cuu-dé déhe té Èlí,

24 te téé-án nǐ cuu-dé déhe té Mátát. Te té Mátát-án nǐ cuu-dé déhe té Lèví, te téé-án nǐ cuu-dé déhe té Mèlquí. Te té Mèlquí-án nǐ cuu-dé déhe té Jàná, te téé-án nǐ cuu-dé déhe té Chèé.

25 Te té Chèé-án nǐ cuu-dé déhe té Matàtiás, te téé-án nǐ cuu-dé déhe té Àmós. Te té Àmós-án nǐ cuu-dé déhe té Nàhúm, te téé-án nǐ cuu-dé déhe té Èslí. Te té Èslí-án nǐ cuu-dé déhe té Nagàí,

26 te téé-án nǐ cuu-dé déhe té Màát. Te té Màát-án nǐ cuu-dé déhe té Matàtiás, te téé-án nǐ cuu-dé déhe té Semèí. Te té Semèí-án nǐ cuu-dé déhe té Chèé, te téé-án nǐ cuu-dé déhe té Jùdá.

27 Te té Jùdá-án nǐ cuu-dé déhe té Jòaná, te téé-án nǐ cuu-dé déhe té Rèsá. Te té Rèsá-án nǐ cuu-dé déhe té Zorobàbél, te téé-án nǐ cuu-dé déhe té Salàtiél. Te té Salàtiél-án nǐ cuu-dé déhe té Nèrí,

28 te téé-án nǐ cuu-dé déhe té Mèlquí. Te té Mèlquí-án nǐ cuu-dé déhe té Àdí, te téé-án nǐ cuu-dé déhe té Còsám. Te té Còsám-án nǐ cuu-dé déhe té Elmòdám, te téé-án nǐ cuu-dé déhe té Ęr.

29 Te té Ęr-án nǐ cuu-dé déhe té Jòsué, te téé-án nǐ cuu-dé déhe té Elièzér. Te té Elièzér-án nǐ cuu-dé déhe té Jòrím, te téé-án nǐ cuu-dé déhe té Mátát.

30 Te té Mátát-án nǐ cuu-dé déhe té Lèví, te téé-án nǐ cuu-dé déhe té Mìó. Te té Mìó-án nǐ cuu-dé déhe té Jùdá, te téé-án nǐ cuu-dé déhe té Chèé. Te té Chèé-án nǐ cuu-dé déhe té Jònán, te téé-án nǐ cuu-dé déhe té Eliàquíim.

31 Te té Eliàquíim-án nǐ cuu-dé déhe té Mèléá, te téé-án nǐ cuu-dé déhe té Mاینán. Te té Mاینán-án nǐ cuu-dé déhe té Mátatá, te téé-án nǐ cuu-dé déhe té Nátán.

32 Te té Nátán-án nǐ cuu-dé déhe té Dàvíí, te téé-án nǐ cuu-dé déhe té Isàí. Te té Isàí-án nǐ cuu-dé déhe té

Òbéd, te téé-á<sup>n</sup> nǐ cuu-dé déhe té Bòóz. Te té Bòóz-á<sup>n</sup> nǐ cuu-dé déhe té Sàlmón, te téé-á<sup>n</sup> nǐ cuu-dé déhe té Naàson.

<sup>33</sup> Te té Naàson-á<sup>n</sup> nǐ cuu-dé déhe té Aminàdáb, te téé-á<sup>n</sup> nǐ cuu-dé déhe té Àrám. Te té Àrám-á<sup>n</sup> nǐ cuu-dé déhe té Èsróm, te téé-á<sup>n</sup> nǐ cuu-dé déhe té Fàrés. Te té Fàrés-á<sup>n</sup> nǐ cuu-dé déhe té Jùdá,

<sup>34</sup> te téé-á<sup>n</sup> nǐ cuu-dé déhe té Jàcób. Te té Jàcób-á<sup>n</sup> nǐ cuu-dé déhe té Isàác, te téé-á<sup>n</sup> nǐ cuu-dé déhe té Àbrahám. Te té Àbrahám-á<sup>n</sup> nǐ cuu-dé déhe té Tàré, te téé-á<sup>n</sup> nǐ cuu-dé déhe té Nàcór.

<sup>35</sup> Te té Nàcór-á<sup>n</sup> nǐ cuu-dé déhe té Sèrúg, te téé-á<sup>n</sup> nǐ cuu-dé déhe té Ragàú. Te té Ragàú-á<sup>n</sup> nǐ cuu-dé déhe té Pèlég, te téé-á<sup>n</sup> nǐ cuu-dé déhe té Hèbér. Te té Hèbér-á<sup>n</sup> nǐ cuu-dé déhe té Sàlá,

<sup>36</sup> te téé-á<sup>n</sup> nǐ cuu-dé déhe té Caínán. Te té Caínán-á<sup>n</sup> nǐ cuu-dé déhe té Arfàxád, te téé-á<sup>n</sup> nǐ cuu-dé déhe té Sèm. Te té Sèm-á<sup>n</sup> nǐ cuu-dé déhe té Nòé, te téé-á<sup>n</sup> nǐ cuu-dé déhe té Làméc.

<sup>37</sup> Te té Làméc-á<sup>n</sup> nǐ cuu-dé déhe té Matusalén, te téé-á<sup>n</sup> nǐ cuu-dé déhe té Ènóc. Te té Ènóc-á<sup>n</sup> nǐ cuu-dé déhe té Jàréd, te téé-á<sup>n</sup> nǐ cuu-dé déhe té Mahalàleél. Te té Mahalàleél-á<sup>n</sup> nǐ cuu-dé déhe té Caínán,

<sup>38</sup> te téé-á<sup>n</sup> nǐ cuu-dé déhe té Ènós. Te té Ènós-á<sup>n</sup> nǐ cuu-dé déhe té Sèt, te téé-á<sup>n</sup> nǐ cuu-dé déhe té Àdán. Te té Àdán-á<sup>n</sup> chi mee Yă Ndiõxí ní cadúha ndaha ñaha-gá xii-dé.

## 4

*Sácuíhná quidé yica-xi cada Jesús sá ñà túú tàú-gá cada-gá ní cùu*

*(Mt. 4:1-11; Mr. 1:12-13)*

<sup>1</sup> Te Jèsús ní naquehen<sup>n</sup>-gá ichi yuhu yúte Jòrdán cuánuhú-gá. Te sa ndècu ndihi-gá Espíritú Yă Ndiõxí, te Espíritú-á<sup>n</sup> ndécá ñàha-xi xii-gá cuáhá<sup>n</sup> ñ<sup>n</sup> xití yucu.

<sup>2</sup> Te yàcá<sup>n</sup> ní xíndecu-gá údico nduu, te sácúíhná ñ<sup>n</sup> cuíní-xi coto ndeé ñáhá-xí xii-gá te núu ndisa sá vă cáda-gă ñ<sup>n</sup> sá ñà túú tàú-gá cada-gá. Te ñá túú tnàhí ná ní xèxi-gá ndi ùdico nduu-á<sup>n</sup>, te sátá dúcá<sup>n</sup> te ní xícá<sup>n</sup> iní-gá caxi-gá.

<sup>3</sup> Te sácúíhná-ă<sup>n</sup> ñ<sup>n</sup> xáha<sup>n</sup>-xi xii-gá:

—Te núu ndisa sá cúú-n Dêhe Yă Ndiõxí, te cúñaha xii yúú-a na nduu-xi paá —càchí-xi xăha<sup>n</sup>-xi xii-gá.

<sup>4</sup> Te Jèsús ní xáha<sup>n</sup>-gă xii-xi:

—Núú tùtú Yă Ndiõxí càchí-xi: “Ñá díú mèe-ni paá candeca-xi iní ñáyiu, chi tnàhá nchaa tnúhu càhá<sup>n</sup> Yă Ndiõxí candeca-xi iní-yu”, duha càchí-xi núú tùtú-gá —càchí-gá xăha<sup>n</sup>-gă xii-xi.

<sup>5</sup> Te dătnùní sácúíhná ndécá ñàha-xi xii-gá cuáhá<sup>n</sup> ñ<sup>n</sup> núú tìndúú dùcú<sup>n</sup>, te uu<sup>n</sup>ni ní dánèhé núú ñáhá-xí xii-gá nchaandi túhú nàció<sup>n</sup> cáá ñùyú.

<sup>6</sup> Te ní xáha<sup>n</sup>-xi xii-gá:

—Yúhú cada-í, te taxi tnùní-n nchàa-ndi túhú nàció<sup>n</sup>-a ndihi nchaa sá văha ío díu-ni nchaa nàció<sup>n</sup>-a, te cachí ñáyiu sá ío cùnuu-n, chi yúhú cúú cuendá-í nchaa sá ío nchaa nàció<sup>n</sup>-a, te ndédani càa ñáyiu cùu iní-í te cúñaha-í xii-yu taxi tnùní-yu.

<sup>7</sup> Te núu ni yùhu ni iní-n chĩñuhu ñaha-n xii-í ñá, te nchaa taxi-í cuu cuendá-n —càchí-xi xăha<sup>n</sup>-xi xii-gá.

<sup>8</sup> Te Jèsús ní xáha<sup>n</sup>-gă xii-xi:

—Xocuñí yòhó sácúíhná nùú ndécù-í-a, chi vá cúú càda-í nàcuáa càchí-n chi núú tùtú Yă Ndiõxí càchí-xi: “Chĩñuhu-ndo Dútú Ndiõxí Yaá cúú

Ndiöxí-ndó, te ì<sup>n</sup>dìi díi-ni-gă cada-ndo nchàa nacuáa càhá<sup>n</sup>-gá”, duha càchí-xi núú tütú-gá — càchí-gá xăha<sup>n</sup>-gă xii-xi.

<sup>9</sup> Te sácúíhná ndécá ñàha tucu-xi xii-gá cuáhá<sup>n</sup> ñúú Jerusàlén, te ní xáha<sup>n</sup>-xi xii-gá cuásaá-gá díquí veñúhu càhnu sá ïo cùnuu, te ní xáha<sup>n</sup> tucu-xi:

—Te núu ndisa cùu-n Déhe Yá Ndiöxí te cuandèe ndava ndéé núú ñúhú

<sup>10</sup> cuendá quee ndáá-xi nàcuáa càhá<sup>n</sup>-xi núú tütú Yă Ndiöxí núú càchí-xi:

Yá Ndiöxí tendaha-gă cue espíritú xínú cuèchi núú-gă quixi-xi coto ñaha-xi xii-n.

<sup>11</sup> Te núú ndáhá-xí càundodo-n cuendá sá vă dánícuèhé yúú sáhá-n, duha càchí-xi núú tütú-gá —càchí sácúíhná xăha<sup>n</sup>-xi xii-gá.

<sup>12</sup> Te Jèsús ní xáha<sup>n</sup>-gă xii-xi:

—Te càchí tucu-xi núú tütú Yă Ndiöxí: “Vá cání ìní-n còto ndéé-n Dütú Ndiöxí Yaá cúú Ndiöxí-n nùu ndisa sá dácăcu nihnu ñaha-gă xii-n cuendá ì<sup>n</sup> sá sání ìní-n càda-n sá cúú-xí mēe-n”, duha càchí-xi núú tütú-gá —càchí-gă xăha<sup>n</sup>-gă xii-xi.

<sup>13</sup> Te sátá dúcá<sup>n</sup> te sácúíhná ñà túú-gă ní cùtnuní ìní-xi nása cada-xi Jèsús, núú xíá<sup>n</sup> ní xica-xi cuáhá<sup>n</sup>-xi ní sanaa tnaa-xi.

*Distritú Galileá ní chisaha Jèsús chiu<sup>n</sup> ní táhú Tătá-gă Dütú Ndiöxí cada-gá*

*(Mt. 4:12-17; Mr. 1:14-15)*

<sup>14</sup> Te Jèsús cuáhá<sup>n</sup> tucu-gá distritú Galileá, dico sa ndècu ndihí-gá Espíritú Yă Ndiöxí, te ñi càa xico xíá<sup>n</sup> ñi níhí-yu tnúhu nchaa nàcuáa quide-gá.

15 Te ndi tnahá ñuú cuáhá<sup>n</sup>-gá duca<sup>n</sup> cuãnguïhu-gá veñúhu-yu dànehé ñáhá-gá xií-yu, te nchaá-yu cächí-yu sá ïo càhnu cuu-gá.

*Jèsús ndécú-gã ñuú Nazàrét  
(Mt. 13:53-58; Mr. 6:1-6)*

16 Te Jèsús ní sáhá<sup>n</sup>-gá ñuú Nazàrét ñuú núú nĩ sahnu-gá. Te nduu ndètatú ñáyiú ní quihu-gá veñúhu, chi duca<sup>n</sup> tnàhí quìde-gá, te ní ngúnutnĩ-gá dácua<sup>n</sup>ha-gá tutú ndèé tnúhu Yá Ndiöxí.

17 Te ní sãñaha-güedě xii-gá tutú ndèé tnúhu ní cáhá<sup>n</sup> ndíi Chàíá téé ní xóo cáhá<sup>n</sup> tnúhu Yá Ndiöxí ndéé sanaha, te òré ní nandicá-gá núú tütú-á<sup>n</sup> te ní naníhí-gã núú cächí-xi:

18 Espíritú Yã Ndiöxí ndécú ndìhí ñaha-xi xii-í, chi ní cachí-gá sá càhá<sup>n</sup>-í tnúhu-gá sá cúú-xí ñáyiú ndàhú,  
ñáyiú vátá cündèdóho tnàhí-gá.

Te véxi-í cuendá vá ndìhú-gá iní ñáyiú ñá túú ndècu váha iní-xi,  
te cue ñáyiú sa nèhe váha ñaha-nã yucu ñávãha dácácu nihnu-í-yu.

Te cue ñáyiú cuàá nacaá<sup>n</sup>-í núú-yu,  
te ñáyiú ndòho dandoho ñaha tnaha ñáyiú-xi tauni-hnu-í-yu.

19 Te cúñaha-í xii ñáyiú sá sàá nduu càda Yá Ndiöxí ñ<sup>n</sup> sá vãha sá cúú-xí-yu.

Duha cächí-xi núú tütú dácua<sup>n</sup>ha-gá.

20 Te Jèsús ní nacadí-gá núú tütú-á<sup>n</sup>, te ní nacua<sup>n</sup>ha-gá ñ<sup>n</sup> téé xìnu cuechi veñúhu-á<sup>n</sup>, te ní ngóo-gá. Te nchaa ñáyiú yìhí veñúhu ñá núú núú-yu ndèhe ñahá-yu xii-gá.

21 Te xãha<sup>n</sup>-gã xií-yu:



—Mei vitna ní quee ndáá-xi nàcuáa càhá<sup>n</sup>-xi núú tütú Yá Ndiöxí —càchí-gá xăha<sup>n</sup>-gă xií-yu.

<sup>22</sup> Te nchaá-yu ní cáhá<sup>n</sup> váha-yu cuendá-gá, te ní cuñúhu-yu tnúhu váha càhá<sup>n</sup>-gá, te xĭtnàhá-yu:

—¿Te náa ñá díú tĕe-a cùu-dé déhe té Chèé-ă<sup>n</sup>? —  
càchí-yu xĭtnàhá-yu.

<sup>23</sup> Te Jèsús ní xáha<sup>n</sup>-gă:

—Na càchí tnúhu ndáá-í xii-ndo să ñúhú ìní-ndó cŭñaha-ndo xii-í ĩ<sup>n</sup> tnúhu cŭtexínu sá cáhá<sup>n</sup> méé-ndó, te quesaha-ndo: “Ñátátná cada tátna mee-n”, duha quesaha-ndo. Te cŭñaha tŭcu-ndo xii-í: “Sa ní níhí-ndĭ tnúhu nàcuáa ní quide-n ñúú Capèrnaúm, te cada-n tnàhá ñúú núú ñĭ sahnú-n”, duha quesaha-ndo —càchí-gá xăha<sup>n</sup>-gă xií-yu.

<sup>24</sup> Te ní xáha<sup>n</sup> tŭcu-gá:

—Na càchí tnúhu ndáá-í xii-ndo să ñĭ ĩ<sup>n</sup> tée càhá<sup>n</sup> tnúhu Yá Ndiöxí ñá túú tnàhá ìní ñáhá ñăyiu ñúú-dé.

<sup>25</sup> Te na càchí tnúhu ndáá tucu-í xii-ndo să ĩo vâi ñăyiu dĭhĭ ñăyiu quée ní xĭndecu nàció<sup>n</sup> Isràél cŭtnàhá ní xĭndecu té Èliás cŭtnàhá ñá túú ní cùu<sup>n</sup> dáú ũní cuiá dava, te dàvá-á<sup>n</sup> ĩo ní ndoho ñăyiu docó nĭtùhú nàció<sup>n</sup>.

<sup>26</sup> Dico Yá Ndiöxí ñá túú ní tëndaha-gá té Èliás quíhĭ<sup>n</sup>-dé vehe ndĕdani càa ñăyiu dĭhĭ-á<sup>n</sup>, chi vehe ĩ<sup>n</sup> ñaha ñúú Sàreptá ní xáha<sup>n</sup>-gă ní sáhá<sup>n</sup>-dé, te ñúú-á<sup>n</sup> cáá yàtni-xi ñúú Sídón.

<sup>27</sup> Te ní xĭndecu tucu ĩngá tée ní xóo cáhá<sup>n</sup> tnúhu Yá Ndiöxí ndée sanaha, te tée-á<sup>n</sup> ñĭ xĭnani-dĕ Eliseú, te dĭu-ni dàvá-á<sup>n</sup> ñĭ xĭndecu tucu vâi ñăyiu cŭhú nàció<sup>n</sup> Isràél, ñăyiu ní tnahá cuéhé să dátèhyú ni-hnu-xi yĭquĭ cŭñú-yu dico ñá túú ní ndŭha-yu, chi

ɨ<sup>n</sup>dì-ni té Nàamán tée distrítú Sìriá ní ndúha-dé —  
càchí-gá xǎha<sup>n</sup>-gǎ xií-yu.

28 Te sá dúcá<sup>n</sup> nǐ cáhá<sup>n</sup>-gá te xiǎ<sup>n</sup> ní cudéé<sup>n</sup> víhí  
nchàa ñáyiú yìhi veñúhu-ǎ<sup>n</sup> núú-gǎ.

29 Te ní queñuhú-yu Jèsús yuhu dèhvá tìndúú  
núú cáá ñúú-yu-á<sup>n</sup> cuendá yàcá<sup>n</sup> dàquée-yu-gá  
dèhvá ní cùu.

30 Dico Jèsús vii-ni ní quee-gá tnuú-yu cuáhá<sup>n</sup>-gá.

*ɨ<sup>n</sup> tée yìhi ñaha espíritú cúndìhi yucu ñávǎha  
(Mr. 1:21-28)*

31 Te Jèsús cuáhá<sup>n</sup>-gá ñúú Capèrnaúm, te ñúú-á<sup>n</sup>  
yíndèhu-xi distrítú Galileá. Te yàcá<sup>n</sup> ndécú-gǎ  
ní tnahá nduu ndètátú ñáyiú, te ní ngúita-gá  
dácuàha-gá ñáyiú.

32 Te xǐcuñúhu-yu nchaa nàcuáa dànehé ñáhá-gǎ  
xií-yu, chi càhá<sup>n</sup>-gá dàtná càhá<sup>n</sup> ɨ<sup>n</sup> tée cùnuu, te  
cùnuu ndisa-gá.

33 Te xití veñúhu yìhi ɨ<sup>n</sup> tée yìhi ñaha ɨ<sup>n</sup> espíritú  
cúndìhi yucu ñávǎha, te espíritú-á<sup>n</sup> nǐ quide-xi níhi  
ní cáhá<sup>n</sup> tée-á<sup>n</sup>, te xǎha<sup>n</sup>-dě xii Jèsús:

34 —¿Te ná cuìní yòhó Jèsús tée ñúú Nazàrét cada  
ñaha-n xii-ndí núu véxi-n núú ndécú-ndǐ-i? ¿Á<sup>n</sup>  
véxi-n dànaa ñaha-n xii-ndí? Chi yúhú xìní ñáhà-í  
xii-n sǎ cúú-n ɨ<sup>n</sup> tée ñá túú tnahí cuéchi-xi chi  
núú Yǎ Ndiǒxí ní quee-n véxi-n ñùyíú-a —càchí-dé  
xǎha<sup>n</sup>-dě xii-gá.

35 Te Jèsús ní tenàá-gá espíritú cúndìhi yucu  
ñávǎha-á<sup>n</sup>, te xǎha<sup>n</sup>-gǎ:

—¡Cadí yuhu-n, te taquèe yiqui cuñú tée-á<sup>n</sup>! —  
càchí-gá xǎha<sup>n</sup>-gǎ.

Te espíritú cúndihí yucu ñávãha-án ñí dándùá-xi téé-án ndèé ñuhu tnuú ñáiyu xĩndecu-án, te ñá túú-gã ná ní quide ñaha-xi, te ní quee ñaha-xi xii-dé.

<sup>36</sup> Te nchaa ñáiyu xĩndecu-án ñí cuñúhu-yu, te ní xítñahá-yu:

—¿Te nása ndùu-tu tnúhu càhá<sup>n</sup> téé-ã<sup>n</sup> ñá? ¡Te càhá<sup>n</sup>-dé dàtná càhá<sup>n</sup> ñ<sup>n</sup> téé tàxi tnuní víhí, chi càhá<sup>n</sup>-ni-dé te nchaa espíritú cúndihí yucu ñávãha quèe-ni-xi yiqui cuñú-yu! —càchí-yu xítñahá-yu.

<sup>37</sup> Te nchaa xichi ní níhí-yu tnúhu nàcuáa quide Jesús.

*Jèsús quidé tãtna-gá nãná ñadìhí té Xĩmú*  
(Mt. 8:14-15; Mr. 1:29-31)

<sup>38</sup> Te Jèsús ní ndee-gá xití veñúhu, te cuáhá<sup>n</sup>-gá vehe té Xĩmú. Te nãná ñadìhí té Xĩmú-án cùhú-a<sup>n</sup> ñùhu vihi-a<sup>n</sup> cahni, te ní cáhá<sup>n</sup> ndàhú-yu núú Jèsús cuèndá-a<sup>n</sup>.

<sup>39</sup> Te Jèsús ní sáhá<sup>n</sup>-gá núú ndécú-án, te ní ngúnundeyi-gá te ní xáha<sup>n</sup>-gã xii cahni-án sã ná xòcuìñí-xi, te ní xócuìñí-ni-xi, te òré-ni-án ñí ndúha ñaha cùhú-án te ní ndacóo-a<sup>n</sup> ní xinu cuechi-a<sup>n</sup> núú-güedé ndihí-gá.

*Jèsús quidé tãtna-gá vãi ñáiyu cùhú*  
(Mt. 8:16-17; Mr. 1:32-34)

<sup>40</sup> Te òré ní ngódó tnúú nchícanchii, te nchaa ñáiyu xĩndecu ndihí ñáiyu cùhú vehe-xi ndèca ñahá-yu cuáhá<sup>n</sup> núú Jèsús. Te Jèsús ní sacá<sup>n</sup> ndodo-gá ndaha-gá díquí ñ<sup>n</sup> ñ<sup>n</sup> ñáiyu cùhú-án, te duca<sup>n</sup> ñí quide-gá te ní ndúha-yu. Te ndi díí<sup>n</sup> núú cuèhé tnahá-yu ñ<sup>n</sup> ñ<sup>n</sup>-yu ni cùu.

41 Te tnàhá dava ñáyiú cùhú-án yíhí ñàha espíritú cùndìhi yucu ñávàha xií-yu ní cùu, te òré ní quee ñaha-xi xií-yu, te xíà<sup>n</sup> ní quide-xi níhi ní cáhá<sup>n</sup>-yu, te xǎhǎ<sup>n</sup>-yu xii Jèsús:

—Yòhó cúú-n Dèhe Dútú Ndiǒxí —càchí-yu xǎhǎ<sup>n</sup>-yu xii-gá.

Dico Jèsús níhi ní cáhá<sup>n</sup>-gá ní tenàá-gá nchaa espíritú cùndìhi yucu ñávàha-án, te xǎha<sup>n</sup>-gǎ sá vǎ dúcá<sup>n</sup>-gǎ cada-xi, chi sa xíní-xi sá díú-gǎ cúú-gǎ Crístú Yáá ní tendaha Yǎ Ndiǒxí véxi ñuyíú-a.

*Jèsús dánèhé-gá ñáyiú distritú Galileá*

*(Mr. 1:35-39)*

42 Te ì<sup>n</sup> nduu ní túndaá-ni ní quee Jèsús ñuú núú ndécú-gǎ-án cuǎhá<sup>n</sup>-gá ì<sup>n</sup> xichi núú ñǎ túú ñǎyiú ndècu. Te cue ñáyiú ní ngúíta-yu nànducu ñahá-yu xii-gá te ní naníhí ñáhǎ-yu, te cuení-yu ngani ñahá-yu xii-gá cuèndá sá ñà túú-gǎ ndéé quíhí<sup>n</sup>-gá ní cùu.

43 Dico ní xáha<sup>n</sup>-gǎ xií-yu:

—Dacuití quíhí<sup>n</sup>-í cúñaha-í xii nchaa ñáyiú dava-gá ñuú tnúhu sá càhá<sup>n</sup> nàcuáa ndíhu ndaha ñàha Yá Ndiǒxí xií-yu, chi chiu<sup>n</sup> tnahí-ǎ<sup>n</sup> véxi-í —càchí-gá xǎha<sup>n</sup>-gǎ xií-yu.

44 Te ní xica cuu Jèsús ní dánèhé-gá ñáyiú tnúhu-gá nchaa xití veñúhu ndǎa distritú Galileá.

## 5

*Jèsús ní quide-gá ní níhí-güedě chácá*

*(Mt. 4:18-22; Mr. 1:16-20)*

<sup>1</sup> Te ì<sup>n</sup> xito ndècu Jèsús yuhu làgúná Genesàrét, te ío cuéhé ñáyiú ní sáá, te ta dàdehnde ñaha-ná-yu

xii-gá cuáhá<sup>n</sup> sá cuení-yu cundedóho-yu nchaa  
tnúhu càhá<sup>n</sup>-gá.

<sup>2</sup> Te Jèsús ní xiní-gá úú bàrcú cue téé tñi chácá  
xĩnutnĩ-xi yatni yuhu làgúná-á<sup>n</sup>, te sa ní quene cue  
téé ñùhu xití-xi-á<sup>n</sup> xĩnaquete-güedé ñunu-güedé.

<sup>3</sup> Te Jèsús cuásaá-gá núú ñi bàrcú-á<sup>n</sup>, te bàrcú-á<sup>n</sup>  
cúú-xí bàrcú té Xímú, te ní xáha<sup>n</sup>-gã xii té Xímú-á<sup>n</sup>  
sã dánũndehe-dé-xi luha-gá xití ndute. Te dǎtnúni  
ní ngóo-gá núú bàrcú-á<sup>n</sup>, te xiá<sup>n</sup> núcõo-gá ní  
ngũita-gá dánèhé-gá ñáyiu.

<sup>4</sup> Te òré ní túhú ní dánèhé ñáhá-gã xií-yu, te ní  
xáha<sup>n</sup>-gã xii té Xímú:

—Daquihí<sup>n</sup> bàrcú-a xití làgúná mei núú cùnú-gá,  
te dàquée-ndo ñunu-ndo tñi-ndo chácá —càchí-gá  
xãha<sup>n</sup>-gã xii-dé.

<sup>5</sup> Te té Xímú ní xáha<sup>n</sup>-dë:

—Mèstrú, ni niú ní quide chiú<sup>n</sup>-ndí te ni ñi chácá  
ñà túú ní ñihí-ndí, dico vitna cuendá-ni sá yòhó  
táuchìu<sup>n</sup>-n te na dàquée-ndí ñunu-ndí vá<sup>n</sup> —càchí-dé  
xãha<sup>n</sup>-dë xii-gá.

<sup>6</sup> Te òré ní dáquëe-güedé ñunu-güedé te súúni  
vài chácá ñi ñihí-güedé, te ta ndátá-ñã ñunu-güedé  
cuáhá<sup>n</sup> ní cùu.

<sup>7</sup> Núu ní quide-güedé ndaha-güedé núú dàva-gá  
cue téé cùndihí-güedé xixúhu<sup>n</sup> ingá bàrcú cuendá  
quihí<sup>n</sup>-güedé chindee ñaha-güedé. Te cue  
téé-á<sup>n</sup> ñi sáhá<sup>n</sup>-güedé ní chindee tñaha-güedé ní  
dáchitú-güedé ndi ndùú bàrcú mee-ni chácá, te  
súúni ñi cuu véé núu cuení-na-xi quée naa-güedé  
ndihí bàrcú ní cùu.

8 Te sá dúcá<sup>n</sup> cuíní-xi quée naa bàrcú ní cùu, núu té Xímú, àdi Pelú chi úú òu-dé, ní ngüíñí xítí-dě núu Jèsús, te xáha<sup>n</sup>-dě:

—Xocuñí yòhó Jèsús núu ndécù-í-a, chi yúhú cùu-í ì<sup>n</sup> téé ío ndècu cuéchi-xi —càchí-dé xáha<sup>n</sup>-dě xii-gá.

9 Te duca<sup>n</sup> ñí cáhá<sup>n</sup>-dé chi ní yùhú-dé, te ní cuñúhu-dé ndihí nchaa cue téé ndihí-dé-á<sup>n</sup> cuendá sá ío vài chácá ñí níhí-güedě.

10 Te tnàhá té Jàcobó ndihí té Juàá cue déhe té Zebèdeú ío ní cuñúhu-güedé, te òu-ni cue téé cùndihí té Xímú-á<sup>n</sup> cúu-güedě tnàhá-güedé. Te Jèsús ní xáha<sup>n</sup>-gá xii té Xímú:

—Vá yùhú-n, chi není vitna quíhí<sup>n</sup>-n dàcahá<sup>n</sup>-n ñâyíu cuendá tuha ñàhá-yu xii-í —càchí-gá xáha<sup>n</sup>-gá xii-dé.

11 Te ní quene-güedé ndihí bàrcú ndéé ñuhu yìchí yuhu làgúná-á<sup>n</sup>. Te òré-á<sup>n</sup> ñí dándõo-güedé nchaandi túhú sá ndécú ndihí-güedé, te ní tuha-güedé Jèsús.

*Jèsús quídé tãtna-gá ì<sup>n</sup> téé tnàhá cuéhé sã dátèhyú nihnu-xi yìqui cùñú-ó*

*(Mt. 8:1-4; Mr. 1:40-45)*

12 Te òré ní quexìo Jèsús ì<sup>n</sup> ñuú, te ní quexìo ì<sup>n</sup> téé cùhú tnàhá-dé cuéhé sã dátèhyú nihnu-xi yìqui cùñú-ó, te òré ní xiní-dé Jèsús te ní sáhá<sup>n</sup>-dé núu ndécú-gã, te ní ngüíñí xítí-dě núu-gã te ní nuu núu-dě ndàa núu ñúhú te càhá<sup>n</sup> ndàhú-dé, te xáha<sup>n</sup>-dě xii-gá:

—Mèstrú, véxi-í càhá<sup>n</sup> ndàhú-í núu-n ñuu vá cùndèe iní-n càda tátna ñaha-n xii-í, chi cùtnuní iní-í sá ndácú-n —càchí-dé xáha<sup>n</sup>-dě xii-gá.

13 Te Jèsús ní dácàá-gá ndaha-gá ní tendaha ñaha-gá xii-dé, te xăha<sup>n</sup>-gă:

—Cuu cada tátna ñaha-ĩ xii-n, te vitna te ndúha-n —càchí-gá xăha<sup>n</sup>-gă xii-dé.

Te òré-ni ní xócuĩñí cuéhé tnàhá-dé.

14 Te dătnùní ní xáha<sup>n</sup> tùcu Jesús xii-dé:

—Vá yõo ì<sup>n</sup> cúñaha-n să ñí quide tátna ñaha-ĩ xii-n, núú dütú-ni cuáhá<sup>n</sup> cuendá sá ná quíni ñáhá-dě xii-n să ñí ndúha-n te cuáha-n-dě sá ndúú tăhú Yă Ndiõxí dătná ní cachi ndíi Moisés cuendá ná quíni ñáyiú sá ndáá ní ndúha-n —càchí-gá xăha<sup>n</sup>-gă xii-dé.

15 Te duca<sup>n</sup> ta xíté nuu-gá tnúhu nchaa nàcuáa quide Jesús, te ío cuéhé ñáyiú ní xóo tacá nchaa núú ñí xíndecu-gá cuendá sá cuíni-yu cundedóho-yu tnúhu càhá<sup>n</sup>-gá, ndihí cuendá sá cuíni-yu cada tátna ñaha-gă xií-yu.

16 Dico Jesús ní xóo quee nihni-gá tnuú-yu ní xóo quíhí<sup>n</sup>-gá núú ñà túú ñáyiú ndècu ní xóo cáhá<sup>n</sup> ndihí-gá Yă Ndiõxí.

*Jèsús quidé tátna-gá ì<sup>n</sup> té cùhú ñá cúú-gă candá nihnu*

*(Mt. 9:1-8; Mr. 2:1-12)*

17 Te ì<sup>n</sup> nduu dānehé-gá ñáyiú, te xínucóo ì<sup>n</sup> ũú cue té cùu fariséú, ndihí cue té dācuaha ñaha xii ñáyiú nchaa tnúhu ní chídó tnùní ndíi Moisés. Te cue té-á<sup>n</sup> ñí quee-güedé nchaa ñuú yíndèhu distritú Galileá, ndihí distritú Júdeá, ndihí ñuú Jerusalén, te nchaa ñuú-á<sup>n</sup> ñí quee-güedé cuáhá<sup>n</sup>-güedé núú ndécú-gă. Te Yă Ndiõxí chíndèe ñaha-gá quidé tátna-gá ñáyiú cùhú.

18 Te ññ cue tée nchìdo-güedé ññ tée cùhú ñá cúú-gã candá nihnu ññhu-dé xító ní quexìo ndihì ñaha-güedé, te cuíní-güedé quíhu ndihì ñaha-güedé ndéé xítí vehe, sáá-güedé ndéé núú Jèsús ndihì tée cùhú-á<sup>n</sup>.

19 Dico ñá túú ní ññhí-güedé ndèé ichi quíhu-güedé, chi cuendá ío cuéhé ññyiu ndècu, núu xíá<sup>n</sup> ní sáá-güedé díquí véhé-á<sup>n</sup> ññ caá<sup>n</sup>-güedé te ndàa díquí véhé-á<sup>n</sup> ññ dáquëe-güedé tée cùhú-á<sup>n</sup>, te ññhu-ni-dé xító ní dáquëe ñaha-güedé tnuú ññyiu ní sáá ndéé núú Jèsús.

20 Te Jèsús ní cutnùnì iní-gá sá ññ yuhu ññ iní-güedé sàndáá iní ññhá-güedé xii-gá, núu ní xáha<sup>n</sup>-gã xii tée cùhú-á<sup>n</sup>:

—Yòhó tée cùhú, sa ní quide càhnu iní-í nchaa cuèchi-n —càchí-gá xáha<sup>n</sup>-gã xii-dé.

21 Te cue tée dàcuaha ñaha xii-yu nchaa tñúhu ní chídó tñúnì ndíi Moisés ndihì cue tée cùu fariséu ní sani iní-güedé: “¿Ná cúú tée-a núu càhá<sup>n</sup> cuéhé-dé cuendá Yá Ndiöxí-í? Te vá yòo ññ ndàcu cada cahnu iní nchaa yíca cuèchi ññyiu, chi ññdìi díí-ni Yá Ndiöxí quidé càhnu iní-gá”, duha ní sani iní-güedé.

22 Dico Jèsús sa ní cutnùnì iní-gá nàcuáa sàni iní-güedé ññ ní xáha<sup>n</sup>-gã xii-güedé:

—¿Te ná cuendá duca<sup>n</sup> sàni iní-ndó-í?

23 Te sá dúhá ññ xáha<sup>n</sup>-í xii tée cùhú-a sá cádá càhnu iní-í nchaa yíca cuèchi-dé, te xíá<sup>n</sup> nchòhó ñá túú cùtnùnì iní-ndó ññ ndáá càhá<sup>n</sup>-í àdi ñá ndáá. Dico núu cúu-í-dé sá ndácòo-dé, te caca-dé te cutnùnì ndáá iní-ndó ññ ndáá càhá<sup>n</sup>-í àdi ñá ndáá, chi cundehe ññ-ndó nàcuáa cada-í.

24 Te vitna na càda-í nàcuáa cutnùnì iní-ndó nchàa-ndo sá yùhú Tée cùu ññaní tñhá-ndó



nchàa-ndo ndecu ndìhi-í tnúhu ndee ìní sá cádá cànhu iní-í nchaa cuéchi ñáyiú ñuyíú-a —càchí-gá xǎha<sup>n</sup>-gǎ xii-güedé.

Te sátá dúcá<sup>n</sup> te ní xáha<sup>n</sup>-gǎ xii tée cùhú-á<sup>n</sup>:

—Ndacóo, te ndocani-n xító ñùhu-n véxi-á<sup>n</sup>, te núhú-n vèhe-n —cachí-gá xǎha<sup>n</sup>-gǎ xii-dé.

<sup>25</sup> Te òré-ni-á<sup>n</sup> ñí ndúha tée cùhú-á<sup>n</sup> te ní ndacóo-dé, te ní ndocani-dé xító ñùhu-dé ní quexìo-á<sup>n</sup>, te ní natnii-dé ichi ta cǎhá<sup>n</sup>-dé cuánuhú sá ïo cànhu cuu Yá Ndiǒxí.

<sup>26</sup> Te nchaa ñáyiú xíndecu-á<sup>n</sup> ñí cuñúhu-yu, te tnàhá-yu ní cachí-yu sá ïo cànhu cuu Yá Ndiǒxí, te duca<sup>n</sup> ïo ní yùhú-yu, te ní xítnàhá-yu:

—Vitna ní xiní-ó ì<sup>n</sup> sá ñà túú tnàhí xìní-ó ní cùu —cachí-yu xítnàhá-yu.

### *Jèsús cáná-gǎ té Lèví*

*(Mt. 9:9-13; Mr. 2:13-17)*

<sup>27</sup> Te sátá dúcá<sup>n</sup> ñí cuu te ní quee Jèsús xía<sup>n</sup>, te ní xiní-gá ì<sup>n</sup> tée nàni Leví núcõo-dé ì<sup>n</sup> xichi quide cobrá-dé ñáyiú cuendá impuèstú, chi cobràdór cúú-dě, te ní xáha<sup>n</sup>-gǎ xii-dé:

—Néhe chìtnahá ñáhá-n xii-í —càchí-gá xǎha<sup>n</sup>-gǎ xii-dé.

<sup>28</sup> Te té Lèví-á<sup>n</sup> ñí ndàcuíñí-dé te ní dándõo-dé nchaa sá ndécú ndìhi-dé núú núcõo-dé-á<sup>n</sup>, te ní tuha-dé Jèsús.

<sup>29</sup> Te sátá dúcá<sup>n</sup> te té Lèví-á<sup>n</sup> ñí quide-dé ì<sup>n</sup> vico cànhu vehe-dé sá cúú-xí Jèsús, te ní tacá vài cue tée quide chiu<sup>n</sup> quide-dé, te nchaa-güedé cuánguihu-güedé mèsá ní ngóo-güedé ndìhi dava-gá ñáyiú ní quexìo cuendá caxi-güedé ndìhí-yu.

30 Dico cue tée cùu fariséú ndihí cue tée dàcuaha ñaha xii-yu nchaa tnúhu ní chídó tnùní ndíi Moisés ní ngúíta-güedé xícuèhé-güedé cue tée xica cuu ndihí-gá, te xáha<sup>n</sup>-güedé:

—¿Ná cuendá xéxí-ndó xíhi-ndo ndihí cue tée cuihna iní-xi quide cobra ñáhá xii ñáyiú cuendá impuèstú, ndihí nchaa dava-gá cue tée ndècu ichi cuehé ichi duha-i? —càchí-güedé xáha<sup>n</sup>-güedé.

31 Te Jèsús ní xáha<sup>n</sup>-gá xii-güedé:

—Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chi xini ñuhu ñahá-yu.

32 Te yúhú véxi-í càhá<sup>n</sup>-í ñáyiú cùtnuní iní-xi sá ndécú cuèchi-xi cuendá dàñá-yu nchaa sá cuèhé sá dúhá quidé-yu, te ñá túú vèxi-í càhá<sup>n</sup>-í ñáyiú càchí sá ñá túú ndècu cuèchi-xi —càchí-gá xáha<sup>n</sup>-gá xii-güedé.

*Cue tée ndècu tnúhu núú Jèsús cuendá ñáyiú ñá túú tnàhí ná xéxí áma càhá<sup>n</sup> ndihí-yu Yá Ndiöxí  
(Mt. 9:14-17; Mr. 2:18-22)*

33 Te ní xáha<sup>n</sup>-güedé xii Jèsús:

—Te áma ñá túú tnàhí ná xéxí cuè tée xica cuu ndihí té Juáá càhá<sup>n</sup> ndihí-güedé Yá Ndiöxí, te diu-ni duca<sup>n</sup> quide cue tée xica cuu ndihí nchúhú cue tée cùu fariséú. ¿Te ná cuendá cue tée xica cuu ndihí-n ñá túú dùca<sup>n</sup> quide-güedé nñu nchaa-ni nduu xèxi-güedé xíhi-güedé quidé-güedé-i? —cachí-güedé xáha<sup>n</sup>-güedé xii-gá.

34 Te Jèsús ní xáha<sup>n</sup>-gá xii-güedé:

—Nchòhó xini-ndó sã vã cúú cñaha-o xii cue ñáyiú ñuhu vico tnándaha sã vã cúú càxí-yu nini ndècu ndihí ñaha tée tnándaha-á<sup>n</sup> xii-yu.

35 Dico sáá nduu te vá cùndècu ndihi ñaha-gá téé tnãndaha-án xií-yu, te dàvá-án te cahni iní-yu vá cáxí-yu sá ndìhú iní-yu —càchí-gá xãha<sup>n</sup>-gã xii-güedé.

36 Te ní cani-gá ñ<sup>n</sup> cuëndú núú ñãyiu nàcuáa tecú tnùní-yu tnúhu-gá, te xãha<sup>n</sup>-gã:

—Vá yõo ñ<sup>n</sup> dãndée luha dóó sáá ñ<sup>n</sup> dóó sa ní cuu tühú víhí, chi núu yoo duca<sup>n</sup> na càda, te dóó sáá-ã<sup>n</sup> nãndiyi-xi te uu<sup>n</sup>-gá ndata-xi dõó sã ñí cuu tühú-án, te luha dóó sáá-ã<sup>n</sup> ñà túú nàtaú-xi ndée dóó sã ñí cuu tühú-án.

37 Te nì vá yõo ñ<sup>n</sup> chìhi ndidí sáá xití ñ<sup>n</sup> lamba sa ní cuu tühú víhí, chi núu yoo duca<sup>n</sup> na càda, te ndava lamba sa ní cuu tühú-án chi ío níhi yócó ndidí-án, te cuíta-ni ndidí-án te cuíta-ni lamba-án.

38 Núu xíã<sup>n</sup> xíní ñùhu-xi quée ndidí sáá-ã<sup>n</sup> xití ñ<sup>n</sup> lamba saa cuëndá duca<sup>n</sup> ñà túú ñã cuu cováha-xi.

39 Te ni ñ<sup>n</sup> ñáyiu ñá túú tnàhá iní-yu cohó-yu ndidí sáá, te núu díhna-gá ná cohó-yu ndidí sá ñí quene díhna-gá, chi càchí-yu sá xihí vãha-gá ndidí sá ñí quene díhna-gá-án dàcúúxí ndidí sáá —càchí-gá xãha<sup>n</sup>-gã xií-yu.

## 6

*Cue téé xica cuu ndihi Jesús sàhnú-güedé yoco triú nduu ndetátú ñáyiu*

*(Mt. 12:1-8; Mr. 2:23-28)*

1 Te ñ<sup>n</sup> nduu cùu-xi nduu ndetátú ñáyiu ñùhu Jesús ichi ndihi cue téé xica cuu ndihi-gá, te ta yãha-gá ndihi-güedé ñ<sup>n</sup> xichi núú cáá triú, te ní ngüíta-güedé sàhnú-güedé yoco triú-án te ndihi

ndaha-güedé quíí<sup>n</sup>-güedě quée triú tá xèxi-güedé cuáhá<sup>n</sup>.

<sup>2</sup> Te ñ<sup>n</sup> úú cue téé cùu fariséú ní xáha<sup>n</sup>-güedě xii cue téé xica cuu ndihi-gá:

—¿Te ná cuëndá duca<sup>n</sup> quide nchohó ñ<sup>n</sup> sá ñà túú tàú-ó càda-o vitna cuu-xi nduu ndetatú-ó-í? —  
càchí-güedé xáha<sup>n</sup>-güedě.

<sup>3</sup> Te Jèsús ní xáha<sup>n</sup>-gã xii-güedé:

—¿Te náa ñà túú dàcuaha-ndo núú tütú Yã Ndiõxí núú càhá<sup>n</sup>-xi nàcuáa ní quide ndíi Dàvíí cútnàhá ní xíhí ndíi docó ndihi cue téé ní xica cuu ndihi ndíi-ã<sup>n</sup>?

<sup>4</sup> Chi ní quíhu ndíi vehe Yá Ndiõxí, te ní quehe<sup>n</sup> ndíi pàá ní cuu íí ndécú-ã<sup>n</sup> ñí dácãhñu ndíi cue téé xica cuu ndihi ndíi ní xexi ndíi ndihi-güedé, te ñà túú tàú ndíi sá dúcá<sup>n</sup> càda ndíi ñí cùu, chi mee-ñí cuè dútú tàú-güedé caxi-güedé pàá-á<sup>n</sup> ní cùu —cachí-gá xáha<sup>n</sup>-gã xii-güedé.

<sup>5</sup> Te ní xáha<sup>n</sup> tùcu-gá:

—Te yúhú Téé cùu ñaní tnáhá-ndó nchàa-ndo, tnàhá-í ndécú ndíi-í tnúhu ndee ñí sá cùu-í nchaa ñáyíu nàcuáa cadá-yu nduu ndetatú-ó-á —càchí-gá xáha<sup>n</sup>-gã xii-güedé.

*Ñ<sup>n</sup> téé ní yíchí ñ<sup>n</sup> xio ndaha-xi*

*(Mt. 12:9-14; Mr. 3:1-6)*

<sup>6</sup> Te ñngá nduu ñíu-ñí nduu ndetatú ñáyíu cuánguihu Jèsús xití veñúhu dānehé-gá ñáyíu. Te xía<sup>n</sup> ndécú ñ<sup>n</sup> téé cùhú ní yíchí nihnu ñ<sup>n</sup> xio ndaha cùha-dé.

<sup>7</sup> Te cue téé dàcuaha ñaha xii ñáyíu nchaa tnúhu ní chídó tnùní ndíi Moisés, ndihi cue téé cùu fariséú ndéhé-güedě ñúu cada tátna ñaha Jèsús xii téé

cùhú-á<sup>n</sup> nduu ndetátú-güedé-á<sup>n</sup> cuèndá níhí-güedé nàcuáa cada-güedé cacá<sup>n</sup> cuéchi-güedé cuèndá-gá.

<sup>8</sup> Dico Jèsús sa ní cutnùní iní-gá nàcuáa sàni iní-güedé, te ní xáha<sup>n</sup>-gã xii téé cùhú ndaha-xi-á<sup>n</sup>:

—Ndàcuiñí te ngúnutnîi-n cuádava tnuú-ndí-a — cächí-gá xãha<sup>n</sup>-gã xii-dé.

Te téé-á<sup>n</sup> nî ndacuiñí-dé te ní ngúnutnîi-dé cuádava tnuú-güedé ndihi-gá.

<sup>9</sup> Te dättnùní Jèsús ní xicá<sup>n</sup> tnúhú-gã núú cuè ñáyiú xĩndecu-á<sup>n</sup>, te xãha<sup>n</sup>-gã xií-yu:

—Cuèní-í cachí tnúhu-ndo nã cúú sã vãha cada-o ndùu ndetátú-ó. ¿Hí<sup>n</sup> chiù<sup>n</sup> váha àdi hí<sup>n</sup> chiu<sup>n</sup> cuehé, sá cádá tátna-o ñáyiú cùhú àdi sá cáhni-ó-yu? — cächí-gá xãha<sup>n</sup>-gã xií-yu.

<sup>10</sup> Te dättnùní ní ndacoto-gá núŷ-yu nchaá-yu, te ní xáha<sup>n</sup>-gã xii téé cùhú ndaha-xi-á<sup>n</sup>:

—Ndocani ndaha-n —cächí-gá xãha<sup>n</sup>-gã xii-dé.

Te ní ndocani-dé ndaha-dé, te òré-ni ní ndúha.

<sup>11</sup> Te cue téé xĩndecu-á<sup>n</sup> sũúní nî cudéé<sup>n</sup>-güedé sá dúcá<sup>n</sup> nî quide tátna Jèsús téé cùhú-á<sup>n</sup>, te ní ngüíta-güedé ndátnúhu-güedé núu nása cada ñaha-güedé xii-gá.

*Jèsús cãxi-gá úxúú tnàhá cue téé dacuàha ñaha xii ñáyiú tnúhu-gá*

*(Mt. 10:1-4; Mr. 3:13-19)*

<sup>12</sup> Te sátá dúcá<sup>n</sup> nî cuu te ní xica Jèsús cuáhá<sup>n</sup>-gá xití yucu cuèndá yacá<sup>n</sup> cáhá<sup>n</sup> ndihi-gá Tátá-gã Dútú Ndiòxí, te ní niú ní cáhá<sup>n</sup> ndihi ñaha-gã.

<sup>13</sup> Te sátá nî túndaá, te ní cana-gá nchaa cue téé xica cuu ndihi-gá, te ní cáxi-gá úxúú tnàhá-güedé, te cue téé-á<sup>n</sup> nî xáha<sup>n</sup>-gã sá díú-güedé cuu-güedé cue téé quíhí<sup>n</sup> cáhá<sup>n</sup> tnúhu-gá núú ñáyiú.

14 Te duha xñnani ndi ùxúú cue tée-án. Té Xǐmú, àdi Pelú chi úú òu-dé, ndihì ñaní-dé té Ndrǐxí, ndihì té Jàcobó, ndihì té Juàá, ndihì té Lìpé, ndihì té Bartolòmé,

15 ndihì té Màteú, ndihì té Mǎxí, ndihì té Jàcobó déhe té Àfeú, ndihì ìngá té Xǐmú tée ní cundihì cue tée canànistá,

16 ndihì té Jùdás ñaní té Jàcobó, ndihì té Jùdás Iscàrioté tée ní sáá nduu ñí sáha cuèndá ñáhá xìi Jesús núú cuè tée cùu úhú ìní ñáhá xii-gá, duha xñnani cuè tée ní cáxi Jèsús ní xica cuu ndihì-gá.

*Jèsús dánèhé-gá cuéhé víhí ñáyiú  
(Mt. 4:23-25)*

17 Te Jèsús cuánuu-gá yucu núú ñí sáá-gá-án, te ní ngava-gá ìn núú ndàá ndihì cue tée xica cuu ndihì-gá, te xía<sup>n</sup> ñí ngúnutnii-gá. Te xía<sup>n</sup> ndécú dàva-gá cue tée xica cuu ndihì-gá ndihì vài ñáyiú ndètu ñahá-yu xii-gá, te ñáyiú-án vèxi-yu nchaa ñuú cáá òìstritú Jùdeá, ndihì ñuú Jerusalén, te ndècu ñáyiú véxi ndàa yuhu lamár yatni ñuú Tìrú, ndihì ñuú Sìdón. Te nchaa ñáyiú-án ñí quexió-yu cuìní-yu cundedóho-yu nchaa tnúhu càhá<sup>n</sup> Jèsús, ndihì cuèndá sá cuìní-yu ndúha-yu nchaa cuéhé tnàhá-yu.

18 Te tnàhá ñáyiú yìhì ñaha espíritú cúndihì yucu ñávǎha.

19 Te ncháa-yu cuìní-yu dacàa-yu ndahá-yu tendàhá-yu Jèsús ní cùu cuèndá sá ñí níhì-yu tnúhu sá ndècu ndihì-gá tnúhu ndee ìní quidé tǎtna-gá nchaa ñáyiú cùhú.

*Cuèndá ñáyiú ío váha táhú-xi  
(Mt. 5:1-12)*

20 Te Jèsús ní ndacoto-gá núú cuè téé xica cuu ndìhi-gá, te ní xáha<sup>n</sup>-gă:

—Váha táhú nchaa nchòhó cue ñáyiú ndàhú, chi nduu táhú-ndó cùndecu-ndo núú táxí tnùnì Yă Ndiǒxí.

21 'Váha táhú nchaa nchòhó ñáyiú ío cùnì cund-edóho tnúhu Yă Ndiǒxí chi ío vii ío váha cuu iní-ndó.

'Váha táhú nchaa nchòhó ñáyiú ndàhyú sá ndìhú iní-ndó, chi sáá nduu te cudíí iní-ndó nì caa ní quíhí<sup>n</sup>.

22 'Váha táhú nchaa nchòhó ñáyiú na cùu úhú iní ñáhá tnàha ñáyiú-xi, chi sáá nduu te vá dáñá-gă-yu quíhu-ndo vèñúhu, te cúcuèhé ñáhă-yu xii-ndo, te cachí-yu sá ñà díú ñáyiú váha cùu-ndo, te duca<sup>n</sup> càda ñahá-yu xii-ndo sã cuèndá yúhú Téé cùu ñaní tnáhá-ndó nchàa-ndo.

23 Te òré duca<sup>n</sup> na càda ñahá-yu xii-ndo te cudíí víhí-ní iní-ndó cùndecu-ndo, chi sáá nduu ndùu táhú-ndó sã ío váha càa ndecu andiú cundecu ndìhi-ndo nduu na nasaá-ndó yàcá<sup>n</sup> cundecu-ndo, chi diu-ni duca<sup>n</sup> nì xóo cada ñaha cuè ñaní tnáhă-yu xii cue téé ní xóo cáhá<sup>n</sup> tnúhu Yă Ndiǒxí ní xíndecu ndéé sanaha.

24 'Te ndàhú ní cuu nchaa ñáyiú cuica ñà túú sàndáá iní ñáhá xii Yă Ndiǒxí, chi vitna ío váha ndècú-yu, dico sáá nduu te nduu ndàhú-yu.

25 'Te ndàhú ní cuu tucu nchaa ñáyiú ñá túú tnàhí ná cúmăní xii-xi vitna, chi sáá nduu quìnì-yu tnúndòho tnúhu ndàhú.

'Te ndàhú ní cuu nchaa ñáyiú cùdíí iní-xi ndècu ichi cuehé ichi duha vitna, chi sáá nduu te ndàhyú-yu sá ndìhú iní-yu.

26 'Te ndàhú ní cuu nchaa ñáyiú na càhá<sup>n</sup> váha dava-gá ñáyiú cuèndá-xi, chi duca<sup>n</sup> ñí xóo cáhá<sup>n</sup> váha-yu cuèndá nchaa cue téé ní xóo dandàhú ñáhá xii ñáyiú ndéé sanaha, chi ní cachí-güedé sá càhá<sup>n</sup>-güedé tnúhu Yá Ndiõxí te ñá ndáá —càchí-gá xãha<sup>n</sup>-gã xii-güedé.

*Cuu iní-ó nchaa ñáyiú cùu úhú iní ñáhá xii-o*  
(Mt. 5:38-48; 7:12)

27 Te Jèsús ní xáha<sup>n</sup>-gã xii nchaa ñáyiú xĩndecu-á<sup>n</sup>:  
—Nchaa nchòhó ñáyiú xĩndedóho ñaha càchí tnúhu-í xii-ndo sã cúú iní-ndó ñáyiú cùu úhú iní ñáhá xii-ndo, te cada-ndo sã vãha sá cúú-xi-yu cuèi nándi sá ná cáda ñáhá-yu xii-ndo.

28 Te cáca<sup>n</sup> táhú-ndó núú Yã Ndiõxí cuèndá ñáyiú càhá<sup>n</sup> úhú ñáhá xii-ndo, ndihí cuèndá ñáyiú tèe ñaha cuéchi neñúú xii-ndo.

29 Te núu ní canihá-yu xii-ndo ñí<sup>n</sup> xito te cuení tucú-yu canihá-yu, te dañá-ndo na cànihá-yu, àdi núu na quèndeé-yu dóó ndíxí ndòdo-ndo, ndihí dúhnú-ndó, te dañá-ndo na cànehé-yu quíhí<sup>n</sup>.

30 Te núu xìcá<sup>n</sup>-yu ñí<sup>n</sup> sá nándihí-yu núú-ndó te cuãñaha-ndo, àdi quèndeé-yu ñí<sup>n</sup> ndachìu<sup>n</sup>-ndo, te vá nándàcá<sup>n</sup>-ndó núú-yu.

31 Te nchaa sá vãha cuení-ndó càda tnaha ñáyiú-ndo, te cada-ndo tnáhá-ndó ndihí-yu.

32 'Chi núu nchòhó ná cùu iní-ndó mèe-ni ñáyiú cùu iní ñáhá xii-ndo, te vá càchí-ndó sã ño váha quède-ndo, chi tnáhá nchaa ñáyiú ndècu ichi cuehé ichi duha duca<sup>n</sup> xĩquidé-yu.

33 Àdi mee-ni ñáyiú quède ñaha sá vãha xii-ndo quède váha-ndõ-yu, te vá càchí-ndó sã ño váha



quìde-ndo, chi tnàhá nchaa ñáyiu ndècu ichi cuehé ichi duha duca<sup>n</sup> xǐquidé-yu.

<sup>34</sup> Àdi mee-ni ñáyiu sàni iní-ndó nàcoto ñaha xii-ndo cuañaha-ndo ì<sup>n</sup> sá xìcá<sup>n</sup>-yu núú-ndó, te vá cání ìní-ndó sǎ ìo quìde váha-ndo, chi tnàhá ñáyiu ndècu ichi cuehé ichi duha dàsa<sup>n</sup> nuú-yu ì<sup>n</sup> sá néhé vǎha-yu, te ndètu cahnu-ná-yu nacoto ñaha ñáyiu ní sáha nùú-yu-á<sup>n</sup>.

<sup>35</sup> Dico nchòhó xíní ñùhu-xi cuu iní-ndó ñáyiu cùu ùhú iní ñáhá xii-ndo, te cada-ndo sǎ vǎha sá cúú-xǐ-yu, te cuañaha nùu-ndo ì<sup>n</sup> sá ná ndìhi-yu te núu xìcá<sup>n</sup>-yu núú-ndó, te vá cùndètu-ndo nacoto ñahá-yu xii-ndo. Te duca<sup>n</sup> te ío-gá cuéhé ñhí-ndó cùndècu ndìhi-ndo, te cuu ndisa-ndo dèhe Dútú Ndiǒxí, chi ío càhnu iní-gá sá cúú-xí nchaa ñáyiu ñá túú ndàcá<sup>n</sup> táhú nùú-gǎ cuendá nchaa sá vǎha quìde-gá, ndìhi sá cúú-xí nchaa ñáyiu ndècu ichi cuehé ichi duha.

<sup>36</sup> Te cunduù càhnu iní nchòhó tucu dàtná càhnu iní Tǎtá-ó Dútú Ndiǒxí.

*Vá càhá<sup>n</sup> cuéhé-ó cuendá tnàha ñáyiu-o  
(Mt. 7:1-5)*

<sup>37</sup> Te vá càhá<sup>n</sup> cuéhé-ndó cuendá sá quidé tnàha ñáyiu-ndo, te duca<sup>n</sup> te Yá Ndiǒxí ñá túú nà tnúhu cúñaha-gǎ xii-ndo. Te vá cùñaha-ndo xii ñáyiu sá quìhí<sup>n</sup>-yu ì<sup>n</sup> xichi núú ùhú núú ndàhú ndohó-yu cuendá nchaa sá ñà túú vǎha quìde-yu, te duca<sup>n</sup> te Yá Ndiǒxí vá cùñaha-gǎ xii-ndo sǎ tnàhá-ndó quìhí<sup>n</sup>-ndó ì<sup>n</sup> xichi núú ùhú núú ndàhú ndohò-ndo. Te chí cádá càhnu iní nchaa sá quídè-yu, te duca<sup>n</sup> te Yá Ndiǒxí cada càhnu iní ñáhá-gǎ xii-ndo tùcu.

38 Te chí cuãñaha xì ñáyiú núú ná cúú sã xíní ñùhú-yu, te dàtná chitu ì<sup>n</sup> yicá súúní xidó coyo-ná, duca<sup>n</sup> tàxi Yá Ndiõxí xii-ndo. Te nánicuáa na càda-ndo cada váha-ndo sã cúú-xí tnàha ñáyiú-ndo, te ñiú-ñi duca<sup>n</sup> càda ñaha Yá Ndiõxí xii-ndo —càchí Jèsús xãha<sup>n</sup>-gã xií-yu.

39 Te dàtnùní ní cani-gá ì<sup>n</sup> cuendú núú-yu nàcuáa tecú tnùní-yu tnúhu-gá, te xãha<sup>n</sup>-gã:

—Ì<sup>n</sup> téé cuáá chi ñá ndácú-dě cuita nehe-dé ingá téé cuáá, chi núú duca<sup>n</sup> na càda-güedé te ndi ndùú-güedé ngaunihnu-güedé déhvä.

40 Te ni ì<sup>n</sup> landú yíhí scuèlá ñá túú cùnuu-gá-güexi dàcúúxí mèstrú-güexi, te ndéé núu na cútúha váha-güexi, te dàtnùní nútnahá-güexi téé dànehé ñáhá xì-güexi.

41 Te na càchí tnúhu-í xii-ndo sã nchàa cuéchi quide ñáyiú cùu-xi datná ì<sup>n</sup> mihi líhli. ¿Te ná cuendá ndéhé-ndó ì<sup>n</sup> sá ñà túú vãha quide tnaha ñáyiú-ndo, te mee-ndo vîhi-gá quidé-ndó-í? Te sá dúcá<sup>n</sup> quide-ndo te cada iní-ndó sã ndéhé-ndó dàtná ì<sup>n</sup> mihi líhli ñùhu núú tnàha ñáyiú-ndo, te mee-ndo ñùhu ì<sup>n</sup> mihi cahnu-gá núú-ndó.

42 Te núu na nàcanu ichi-ndo tnaha ñáyiú-ndo cuendá sá ñà túú quide váha-yu ndécú-yu te mee-ndo vîhi-gá quidé-ndó ñá, te cada iní-ndó sã xãha<sup>n</sup>-ndo xií-yu sá nátàva-ndo mihi líhli ñùhu núú-yu, te mihi càhnu ñuhu núú méé-ndó ñà túú quide cuendá-ndó. ¿Te sá dúcá<sup>n</sup> quide-ndo te ío dàndahú-ndó mèe-ndo sá quidé ndää-ndó te ñà ndää sá quidé ndää-ndó! Te xìni ñuhu-xi díhna-gá dañà-ndo nchàa sá ñà túú vãha quide-ndo, te dàtnùní duca<sup>n</sup> te cutnùní váha iní-ndó nàcuáa nacanu ichi-ndo tnàha ñáyiú-ndo.

*Ndi ðí<sup>n</sup> núú yutnu xìní-ó nă yutnu cùu-xi cuendá sá sǎvidí-xi*

*(Mt. 7:17-20; 12:34-35)*

<sup>43</sup> Te ñá túú nì ðí<sup>n</sup> yutnu váha te quini-ó cùu<sup>n</sup> sávidí sá ñà túú vǎha, te nì ðí<sup>n</sup> yutnu sá ñà túú vǎha, te quini-ó cùu<sup>n</sup> sávidí váha, chi mee-ni sávidí sá ñà túú vǎha cùu<sup>n</sup>.

<sup>44</sup> Te ndi ðí<sup>n</sup> núú yutnu xìní-ó nă yutnu cùu-xi cuendá sá sǎvidí-xi, chi ñá túú xìní-ó cùu<sup>n</sup> ngúxí ðí<sup>n</sup> tnu iñu, te nì ñà túú xìní-ó cùu<sup>n</sup> ndéhé yoho yàha stilé díquí ðí<sup>n</sup> yoho yàha cutexínu.

<sup>45</sup> Te nchaa ñáyíu váha iní-xi càhá<sup>n</sup>-yu tnúhu váha, chi ðíu-ni tnúhu váha tnàhí-á<sup>n</sup> ñúhú iní-yu, te nchaa ñáyíu ñá túú vǎha iní-xi càhá<sup>n</sup> cuéhé-yu, chi ðíu-ni tnúhu cuéhé tnàhí-á<sup>n</sup> ñúhú iní-yu, chi nchaa sá ñúhú iní-yu te xíá<sup>n</sup> càhá<sup>n</sup>-yu.

*Í<sup>n</sup> vehe ndècu cimientú-xi ndihí ðí<sup>n</sup> vehe ñá túú cìmientú-xi*

*(Mt. 7:24-27)*

<sup>46</sup> Te ná cuendá càhí-ndó sǎ yǎhú cùu-í Yáá cùú Xǐtohó-ndó te ñá túú quède-ndo nchaa nacúáa càhá<sup>n</sup>-í-i?

<sup>47</sup> Te na càhí tnúhu-í xii-ndo cuendá ñáyíu tùha ñaha xii-í, chi ñáyíu-á<sup>n</sup> sácũndedóho-yu nchaa tnúhu càhá<sup>n</sup>-í te tní<sup>n</sup>-yu.

<sup>48</sup> Te ñáyíu-á<sup>n</sup> cúũ-yu dàtná ðí<sup>n</sup> téé ní dácáá ðí<sup>n</sup> vehe, chi téé-á<sup>n</sup> ðíhna-gá ní xete-dé ndéé ní tnahá-dé yúú cáxí<sup>n</sup> te dàtnùnì ní tava-dé cimientú-xi, te òré ní cuu<sup>n</sup> dáú, te ní ndee ndute ñuhu, te ní ndacá<sup>n</sup>-xi ndéé núú cáá vèhe-á<sup>n</sup>, dico ñá túú ní ndàcu-xi cuido-xi, te duca<sup>n</sup> chi téé ní dácáá vèhe-á<sup>n</sup> nǐ tava-dé cimientú-xi núú yúú cáxí<sup>n</sup>.

Duha sǎtnahá-xi cùu nchaa ñáyiu sàcúndedóho tnúhu càhá<sup>n</sup>-í te tñí<sup>n</sup>-yu.

<sup>49</sup> Te ñáyiu sàcúndedóho tnúhu càhá<sup>n</sup>-í te ñá túú tñí<sup>n</sup>-yu, ñáyiu-á<sup>n</sup> cúũ-yu dàtná ì<sup>n</sup> téé ní dácáá ì<sup>n</sup> vehe, te ñá túú ní tàva-dé cimientú-xi, te òré ní cuu<sup>n</sup> dáú, te ní ndee ndute ñuhu, te ní ndacá<sup>n</sup>-xi ndéé núú cáá vèhe-á<sup>n</sup>, te íi-ni ní xido-xi vehe-á<sup>n</sup> cuendá sá ñà túú ní quène cimientú-xi. Duha sǎtnahá-xi cùu nchaa ñáyiu sàcúndedóho tnúhu-í te ñá túú cuìní-yu tñí<sup>n</sup>-yu —càchí-gá xǎha<sup>n</sup>-gǎ xií-yu.

## 7

*Jèsús quidé tǎtna-gá ì<sup>n</sup> téé xìnu cuechi núú ì<sup>n</sup> téé cùu capitá<sup>n</sup>*

*(Mt. 8:5-13)*

<sup>1</sup> Te sátá ñí yáha ní cáhá<sup>n</sup> Jèsús ndìhi ñáyiu, te cuáhá<sup>n</sup>-gá ñúú Capèrnaúm.

<sup>2</sup> Te yacá<sup>n</sup> ndécú ì<sup>n</sup> téé cùu capitá<sup>n</sup>, te cùhú ì<sup>n</sup> téé xìnu cuechi núú-dě téé ío-gá cúú ìní-dé, te sa ndècu-ná-dé sá cùú-dé.

<sup>3</sup> Te òré ní níhí tǎe cùu capitá<sup>n</sup>-á<sup>n</sup> tñùhu cuendá Jèsús, te ní tendaha-dě ì<sup>n</sup> úú cue téé cùu sacuéhé núú ñáyiu isràél cuáhá<sup>n</sup>-güedé cáhá<sup>n</sup> ndàhú-güedé núú-gǎ núu vá cündèe ìní-gá quíhí<sup>n</sup>-gá cada tátna-gá téé xìnu cuechi núú-dě-á<sup>n</sup>.

<sup>4</sup> Te ní quexìo-güedé núú ndécú Jèsús, te ní ngüíta-güedé càhá<sup>n</sup> ndàhú víhí-güedé núú-gǎ, te xǎha<sup>n</sup>-güedé:

—Téé cùu capitá<sup>n</sup> ní cachí-dé véxi-ndí núu vá cündèe ìní-n quíhí<sup>n</sup>-n càda tátna-n ì<sup>n</sup> téé xìnu cuechi núú-dě chi cùhú-dé, te tàú ndisa-n càda-n nacúáa càhá<sup>n</sup> capitá<sup>n</sup>-á<sup>n</sup>,

<sup>5</sup> chi té-ǎ<sup>n</sup> ío cùu iní ñáhá-dě xii nchaa nchúhú ñáyiu isràél te ðiu-dé ní táúchíú<sup>n</sup>-dě ní sáá veñúhu-ndí —càchí-güedé xǎha<sup>n</sup>-güedě xii-gá.

<sup>6</sup> Te sátá dúcá<sup>n</sup> te Jèsús ní xica-gá cuáhá<sup>n</sup>-gá ndihí-güedé, te òré tá cùyatni-gá vehe núú ndécú tée cùhú-á<sup>n</sup> cuáhá<sup>n</sup>, te tée cùu capitá<sup>n</sup>-á<sup>n</sup> ñí xáha<sup>n</sup>-dě xii ì<sup>n</sup> ùú cue tée càhá<sup>n</sup> ndihí-dé:

—Quíhí<sup>n</sup>-ndó cǔñaha-ndo xii Yaá cúú Mèstrú sá càchí-í sá ñà túú ñà cani iní-gá, chi ñá túú tàú-í sá quǐhu-gá ndéé xití vehe-í,

<sup>7</sup> chi ñí sá cùnú ndúcú mèe-í-gá ñá túú ní cùyí-í. Núu xǎ<sup>n</sup> cǔñaha-ndo xii-gá sá ná càhá<sup>n</sup>-ni-gá sá ndúha tée xínu cuechi núú-í-a te ndúha-dé.

<sup>8</sup> Chi yúhú ndécú cué tée tàxi tnuní ñáhá xii-í, te duca<sup>n</sup> yúhú tucu ndècu cue sandadú táxí tnùn-í. Te òré xǎha<sup>n</sup>-í xii ì<sup>n</sup>-dé quíhí<sup>n</sup>-dé ì<sup>n</sup> chiu<sup>n</sup> te cuáhá<sup>n</sup>-dé, te òré xǎha<sup>n</sup>-í xii ìngá-dé quixi-dé te véxi-dé, te òré xǎha<sup>n</sup>-í xii tée xínu cuechi núú-í cada-dé ì<sup>n</sup> chiu<sup>n</sup> te quide-dé. Duha càchí-í cǔñaha-ndo xii-gá —càchí-dé xǎha<sup>n</sup>-dě xii cue tée càhá<sup>n</sup> ndihí-dé-á<sup>n</sup>.

<sup>9</sup> Te sátá dúcá<sup>n</sup> ñí xáha<sup>n</sup>-güedě xii Jèsús, te ní cuñúhu-gá nchaa tnúhu ní càhá<sup>n</sup> tée cùu capitá<sup>n</sup>-á<sup>n</sup>, te ní nchócótó-gǎ núú nchàa ñáyiu nchícú<sup>n</sup> ñáhá xii-gá cuáhá<sup>n</sup>, te ní xáha<sup>n</sup>-gǎ:

—Na càchí tnúhu ndáá-í xii-ndo sǎ vǎtá quíní-gá-í ñí ì<sup>n</sup> ñáyiu isràél, ñáyiu ío váha sàndáá iní-xi Yá Ndiǒxí dàtná sàndáá iní ñáhá tée-ǎ<sup>n</sup> xii-gá —càchí-gá xǎha<sup>n</sup>-gǎ xii-yu.

<sup>10</sup> Te òré ní ndexío cue tée nèhe tnúhu-á<sup>n</sup> ñí sáhá<sup>n</sup> núú Jèsús, te sa ní ndúha tée cùhú-á<sup>n</sup>.

*Jèsús dándòto-gá déhe ì<sup>n</sup> ñaha quèè*

11 Te sátá dúcá<sup>n</sup> ñi cuu te ní xica Jèsús cuáhá<sup>n</sup>-gá ñ<sup>n</sup> ñuú nání Nàín, ndihí cue téé xica cuu ndihí-gá, ndihí vài ñáyiu.

12 Te òré ní sáá-gá yuhu ñuú-á<sup>n</sup>, te ní xiní-gá nchídó-güedě ñ<sup>n</sup> ndíyí cuáhá<sup>n</sup> chindúxi ñaha-güedě, te ndíyí-á<sup>n</sup> cúú dēhe ñ<sup>n</sup> ñaha quèé, te ñ<sup>n</sup>dìi duca<sup>n</sup>-ni déhe-a<sup>n</sup> ndècu ni cuu te ní xihí-dé. Te ío cuéhé ñáyiu cuáhá<sup>n</sup> chindúxi ñaha.

13 Te òré ní xiní ñáhá Jèsús xii-a<sup>n</sup> ndàhyú-a<sup>n</sup> te ní cundàhú iní ñáhá-gă, te ní xáha<sup>n</sup>-gă:

—Vá ndàhyú-n —càchí-gá xăha<sup>n</sup>-gă xii-a<sup>n</sup>.

14 Te ní dáyátní-gă cąjá ñúhú ndíyí-á<sup>n</sup> te ní dácàá-gá ndaha-gá te ní tendaha-gă cąjá-á<sup>n</sup>, te ní ngüñí cue téé nchìdo ñaha-á<sup>n</sup>. Te ní xáha<sup>n</sup>-gă xii ndíyí-á<sup>n</sup>:

—Tée cuechi, yúhú càchí-í sá ndácõo-n —càchí-gá xăha<sup>n</sup>-gă xii ndíyí-á<sup>n</sup>.

15 Te téé ní xihí-á<sup>n</sup> ñi nucúnucóo-dé te ní ngüíta-dé càhá<sup>n</sup>-dé, te Jèsús ní nacuáha cuendá ñáhá-gă xii-dé ndaha náná-dě.

16 Te sá dúcá<sup>n</sup> ñi quide Jèsús ní xiní-yu te ío ní yùhú-yu, te ní xítناهá-yu:

—Ío càhnu cuu Yá Ndiõxí chí ñ<sup>n</sup> téé càhá<sup>n</sup> tnúhu-gá ní quexìo núú ndécú-ó —càchí-yu xítناهá-yu.

Te ní xítناهá tucú-yu:

—Yá Ndiõxí véxi-gá chindee ñàha-gá xii nchaa nchoo ñáyiu cùu cuendá-gá —càchí-yu xítناهá-yu.

17 Te nchaa ñuú distritú Jùdeá, ndihí dava-gá ñuú ní níhí-yu tnúhu nàcuáa ní quide Jèsús.

*Cue téé ní tendaha té Juàá cuáhá<sup>n</sup> núú ndécú Jèsús (Mt. 11:2-19)*

18 Te cue tée xica cuu ndihí té Juàá ní xáha<sup>n</sup>-güedě xii-dé nchaa sá nǐ quide-gá, núu ní cana-dé úú tnàhá-güedé

19 cuendá cúñaha-dě quíhí<sup>n</sup>-güedé nducu tnũhu-güedé núú Jèsús, te núu sá díú-gă cúú-gă Crìstú Yaá ní tendaha Yă Ndiöxí véxi ñuyíú-a àdi sá cúndètu nahi-ni-güedé mei Yàá-á<sup>n</sup>.

20 Te òré ní quexìo cue tée ní tendaha tǔ Juàá núú ndécú Jèsús, te xăha<sup>n</sup>-güedě xii-gá:

—Té Juàá tée dàcuandute ñaha xii ñáyiu ní tendaha ñàha-dé xii-ndí véxi-ndí cacă<sup>n</sup> tnúhú-ndǐ núú-n, núu sá díú-n cùu Crìstú Yaá quixi ñuyíú-a, àdi sá cúndètu-ndí mei Crìstú cächí-dé —cächí-güedé xăha<sup>n</sup>-güedě xii-gá.

21 Te mei òré ní quexìo-güedé-á<sup>n</sup> nǐ quide tátna Jèsús vâi ñáyiu cùhú, te davá-yu càhú víhí tnàhá-yu, te ndí díí<sup>n</sup> ndí díí<sup>n</sup> núú cuèhé tnàhá-yu ì<sup>n</sup> í<sup>n</sup>-yu, te cue ñáyiu yìhí ñaha espíritú cúndèhí yucu ñávâha ní queñuhu-gá espíritú-á<sup>n</sup> yìqui cùñú-yu, te ío vâi ñáyiu cuáá ní nacaá<sup>n</sup>-gá núŭ-yu.

22 Te Jèsús ní xáha<sup>n</sup>-gă xii-güedé:

—Chí cuánùhú te cani-ndo cuendú núú tǔ Juàá nchaa sá nǐ xiní-ndó quide-í, ndihí nchaa nàcuáa ndùu tnúhu ní cáhá<sup>n</sup>-í ní xíndedóho-ndo. Te cúñaha-ndo xii-dé sá quidé tátna-í núú cuè ñáyiu cuáá, te quide tátna-í cue ñáyiu yacua, ndihí cue ñáyiu tnàhá cuéhé sǎ dátèhyú nihnu-xi yìqui cùñú-yu, ndihí cue ñáyiu doho, nchaa ñáyiu-á<sup>n</sup> quide tátna-í te ndũha-yu, te ndéé cue ñáyiu sa ní xíhí dándòto-í cúñaha-ndo xii-dé, te cúñaha tùcu-ndo xii-dé sá nděcuu-í dánèhé-í nchaa ñáyiu

ndàhú tnúhu sá sánú ìchi ñaha xií-yu nàcuáa naníhí tànhú-yu.

23 Te cúñaha tùcu-ndo xii-dé sá ïo váha táhú nchaa ñáyiú ñá túú quide sáá iní nchaa tnúhu càhá<sup>n</sup>-í, duha cúñaha-ndo xii-dé —càchí-gá xáha<sup>n</sup>-gã xii-güedé.

24 Te sátá ñí yáha-güedé cuánuhú-güedé, te ní ngüíta Jèsús ní càhá<sup>n</sup>-gá núú ñáyiú cuendá té Juáá, te xáha<sup>n</sup>-gã xií-yu:

—Nchòhó ní sándéhé-ndó ñ<sup>n</sup> tée ndècu xití yucu, te tée-á<sup>n</sup> ñà túú sàni ñ<sup>n</sup> sani úú iní-dé, chi ñá túú quide-dé dàtná quidé nchaa ité náhnú cuáhá<sup>n</sup>-xi duha cuáhá<sup>n</sup>-xi dàcá<sup>n</sup> òré quéné tächí.

25 Te ñí ñà túú ní sándéhé-ndó ñ<sup>n</sup> tée ñìhnu dóó vâha dóó vii càa. Te nchòhó xìní-ndó sã ñáyiú sàcuíhnu dóó vâha dóó vii càa ñá túú ñá cúmání xií-yu, te nchaa ñáyiú-á<sup>n</sup> ndécü-yu vehe cue tée cùnūu yindaha ñaha xii ñáyiú.

26 Dico nchòhó chi ní sándéhé-ndó ñ<sup>n</sup> tée càhá<sup>n</sup> tnúhu Yá Ndiõxí. Te ndáá sá díú tēe càhá<sup>n</sup> tnúhu-gá cúú-dě dico cùnūu-gá-dé dàcúúxí dàva-gá cue tēe càhá<sup>n</sup> tnúhu-gá.

27 Te diu cuendá té Juáá-á<sup>n</sup> càhá<sup>n</sup>-xi núú tùtú Yá Ndiõxí nàcuáa ní xáha<sup>n</sup>-gã xii Crìstú, te duha ní xáha<sup>n</sup>-gã:

Tendaha-í ñ<sup>n</sup> tēe càhá<sup>n</sup> tnúhu-í codonūu-dé núú-n cuendá dàtúha-dé ñáyiú cuendá quíndáá iní-yu tnúhu-n.

Duha ní xáha<sup>n</sup>-gã, te duca<sup>n</sup> ñí ngódó tnùní núú tùtú-gá.

28 Te na càchí tnúhu-í xii-ndo sã ñí ñ<sup>n</sup> cue tēe ñuyíú-a ñá túú cùnūu-güedé dàtná cùnūu té Juáá tēe dàcuandute ñaha xii ñáyiú. Te nchaa



ñáyiú sa ta ndǐhu ndaha ñàha Yá Ndiǒxí vitna cuáhá<sup>n</sup> cúnùu-gá-ni tucú-yu dàcúúxí tē Juàá cuēi cùú-yu ñáyiú ñá túú cùnùu dacúúxí dàva-gá ñáyiú yìndaha-gá —càchí Jèsús xǎha<sup>n</sup>-gǎ xií-yu.

<sup>29</sup> Te sá dúcá<sup>n</sup> ñí cáhá<sup>n</sup> Jèsús, núu nchaa ñáyiú ní dácúándùte té Juàá ní cachí-yu sá ïo váha quìde Yá Ndiǒxí, te ñiú-ni duca<sup>n</sup> ñí cáhá<sup>n</sup> cue tée cuìhna ìní-xi quìde cobrá ñáhá xì ñáyiú cuèndá impuèstú, cue tée ní dácúándùte-dé.

<sup>30</sup> Dico cue tée cùu fariséú, ndìhi cue tée dàcuaha ñaha xii ñáyiú nchaa tnúhu ní chídó tnùnì ndíi Moisés, cue tée ñá túú ní dàcuandute té Juàá ñá túú ní tnàhá ìní-güedé cada-güedé nchaa sá vǎha cuìní Yá Ndiǒxí.

<sup>31</sup> Te Xítohó Jesucristú ní xáha<sup>n</sup>-gǎ xií-yu:

—Na càchí tnúhu-í xii-ndo nàcuáa sǎtnahá-xi cùu ñáyiú ndècu vitna.

<sup>32</sup> Chi ñáyiú-án cùú-yu dàtná cue landú sácõo núú yǎhu dàdiqui-güexi te níhi càhá<sup>n</sup>-güexi, te xǐtnàha-güexi: “Ní tiú-ndí yaá ndìhi vǐlu te ñá túú ní cuìní-ndó càta-ndo. Te ío yica ìní ní xita yuhu-ndí te ñá túú ní ndǎhyú-ndó”, càchí-güexi xǐtnàha-güexi. Te duca<sup>n</sup> sǎtnahá-xi cùu ñáyiú ndècu vitna.

<sup>33</sup> Te té Juàá tée ní xóo dacuàndute ñaha xii ñáyiú ío ndàhú ní xóo caxi-dé, te ni ñà túú ní xõo coho-dé ndudí ndéhé yoho yàha stilé sá sà ní nduu-xi ndidí, te ní cachí-ndó sǎ ñí xíndecu ndìhi-dé espíritú cùndìhi yucu ñávǎha.

<sup>34</sup> Te sáta ñí quexìo yúhú Tée cùu ñaní tnàhá-ndó nchàa-ndo, te xèxi-í xìhi-í ndécù-í te càchí-ndó sǎ cùú-í tée xèxi vihi te xìhi vihi-í. Te càchí tucu-ndo sǎ cùú-í tée xica cuu ndìhi cue tée cuìhna ìní-xi quìde

cobrá ñáhá xì ñáyiú cuèndá impuèstú, ndihì nchaa dava-gá cue téé ndècu ichi cuehé ichi duha, duha càchí-ndó.

<sup>35</sup> Te ñáyiú ní tnahá tnúhu ndihì Yá Ndiöxí, ñáyiú-á<sup>n</sup> quidě-yu nàcuáa cutnùní sá méé-gă ío ndècu ndihì-gá sá xìní tnùnì-gá –càchí-gá xăha<sup>n</sup>-gă xií-yu.

*Jèsús ndécú-gă vehe ì<sup>n</sup> téé cùu fariséú téé nàni Xímú*

<sup>36</sup> Te ì<sup>n</sup> téé cùu fariséú ní cáhá<sup>n</sup>-dé Jèsús vehe-dé caxi-gá, te òré ní quexìo-gá te cuànguihu-gá mèsá.

<sup>37</sup> Te xía<sup>n</sup> núcöo-gá ní sáá ì<sup>n</sup> ñadhí te ñu-ni ñaha ñúú-á<sup>n</sup> cúú-á<sup>n</sup>, te ndècu-a<sup>n</sup> ichi díí ìní, te sá ñí níhí-a<sup>n</sup> tnúhu sá cuăngaxi Jèsús vehe téé cùu fariséú-á<sup>n</sup>, núu nèhe-a<sup>n</sup> ì<sup>n</sup> yoo chítu àcítí sàhá<sup>n</sup> tnámí.

<sup>38</sup> Te ní ngóo-a<sup>n</sup> ì<sup>n</sup> xio ñíñi Jesús, te ní ngúíta-a<sup>n</sup> ndàhyú-a<sup>n</sup> te ndihì ndute núú-a<sup>n</sup> ní naquete-a<sup>n</sup> sáhá-gă. Te ñatnùnì ní nadayìchí-a<sup>n</sup> ndihì idi díquí-a<sup>n</sup>, te ní teyuhu-a<sup>n</sup> sáhá-gă, te ní chihì ñaha-a<sup>n</sup> àcítí sàhá<sup>n</sup> tnámí-ă<sup>n</sup>.

<sup>39</sup> Te sá dúcá<sup>n</sup> ñí quide-a<sup>n</sup> ní xìní téé cùu fariséú téé ní cáhá<sup>n</sup> ñáhá xì-gá-á<sup>n</sup> ñúu ní sani iní-dé: “Te núu dìcò ndisa téé càhá<sup>n</sup> tnúhu Yá Ndiöxí cúú tēe-a ña, te sa cutnùnì iní-dé yoo cùu ñaha tnándeé ñáhá xì-dé, àdi ná ñáyiú cùu-a<sup>n</sup>, te dìcò ì<sup>n</sup> ñaha ndècu ichi díí ìní cúú-á<sup>n</sup>”, duha ní sani iní-dé.

<sup>40</sup> Te Jèsús ní xáha<sup>n</sup>-gă xii-dé:

–Xímú, ndècu ì<sup>n</sup> tnúhu cachí tnúhu-í xii-n –càchí-gá xăha<sup>n</sup>-gă xii-dé.

Te téé cùu fariséú-á<sup>n</sup> xăha<sup>n</sup>-dě xii-gá:

–Cachí tnúhu, Mèstrú –càchí-dé xăha<sup>n</sup>-dě xii-gá.

<sup>41</sup> Te Jèsús ní xáha<sup>n</sup>-gă:

—Ní xíndecu ìí<sup>n</sup> téé ní xóo dasa<sup>n</sup> nùu díhú<sup>n</sup>, te ní xítaú úú tnhá-güedé núú-dě. Te ìí<sup>n</sup>-dé ní sáha-dé úhú<sup>n</sup> cièndú díhú<sup>n</sup> denàriú, te ingá-dé ní sáha-dé údico úxí.

<sup>42</sup> Te ñá ní ñhí-güedě nacháhu-güedé núú-dě, te téé ní sánùu ñaha-á<sup>n</sup> ñí quide càhnu iní-dé ñí ndúú-güedé. Te vitna cachí-ò tucu te núu nděda càa-güedé cúú iní ñáhá-gă-güedé xii-dé —càchí-gá xáha<sup>n</sup>-gă xii-dé.

<sup>43</sup> Te ní xáha<sup>n</sup> tē Xímú-á<sup>n</sup>:

—Sànuu sá tēe tàú vại-gá díhú<sup>n</sup> ìo-gá cúú iní-dé téé ní sánùu ñaha díhú<sup>n</sup>-ă<sup>n</sup> —càchí-dé xáha<sup>n</sup>-dě xii-gá.

Te ní xáha<sup>n</sup> Jèsús:

—Sá ndàá càhá<sup>n</sup>-n —càchí-gá xáha<sup>n</sup>-gă xii-dé.

<sup>44-46</sup> Te Jèsús ní ndacoto-gá núú ñadìhí-á<sup>n</sup>, te ní xáha<sup>n</sup>-gă xii té Xímú-á<sup>n</sup>:

—¿Ndèhe-n nacuáa quide ñadìhí-a ñă? Chi cuànguìhu-í vehe-n, dico ñá túú ní tàxi-n ndute ndoo sáhà-í, te ñí ñà túú ní tàyuhu ñaha-n, te ñí ñà túú ní chìhi-n acití díquì-í, dico ñadìhí-a ní naquete-a<sup>n</sup> ndìhí ndute núú-a<sup>n</sup> sáhà-í, te ní nadayìchí-a<sup>n</sup> ndìhí idi díquì-a<sup>n</sup>, te nuu núu tàyuhu-a<sup>n</sup> sáhà-í, te ní chìhi-a<sup>n</sup> acití sáhá<sup>n</sup> tnámí sáhà-í.

<sup>47</sup> Te na càchí tnhúhu-í xii-n sǎ ìo cùu iní ñáhá-á<sup>n</sup> xì-í, te núu xíá<sup>n</sup> cútnùní iní-ó sǎ cuèí ìo vại sá cuèhé sá dúhá ñí quide-a<sup>n</sup>, dico Yá Ndiòxí sa ní quide càhnu iní ñáhá-gă xii-a<sup>n</sup>. Chi Yá Ndiòxí quidé càhnu iní-gá ñáyíu cuèí vại àdi sacú cuéchi-yu, te núu sacú cuéchi-yu te sacú cúú iní ñáhă-yu xii-í —càchí-gá xáha<sup>n</sup>-gă xii-dé.

<sup>48</sup> Te ní xáha<sup>n</sup>-gă xii ñadìhí-á<sup>n</sup>:

—Sa ní quide càhnu iní-í nchaa cuéchi-n —  
càchí-gá xáha<sup>n</sup>-gã xii-a<sup>n</sup>.

49 Te cue téé xĩnucóo ndihí-gá xĩtnàha-güedé:

—¿Ná téé cùu téé-a núu nándi sá quidé-dě, te ndéé  
nchaa yíca cuéchi ñáyiú quide cahnu iní-dé-i? —  
càchí-güedé xĩtnàha-güedé.

50 Te Jèsús ní xáha<sup>n</sup> tùcu-gá xii ñadìhí-á<sup>n</sup>:

—Sa ní cácu nihnu-n nũú ùhú núú ndàhú vitna  
chi ní sándáá iní ñáhá-n xii-í, te vitna cuanùhú te  
ñá túú-gã ná cani iní-n —càchí-gá xáha<sup>n</sup>-gã xii-a<sup>n</sup>.

## 8

### *Ñáyiú dìhí ní chindee ñàha xii Jesús*

1 Te sátá dúcá<sup>n</sup> ñĩ cuu te Jèsús ní xica-gá  
cuáhá<sup>n</sup>-gá titní víhí ñùú náhnú, ndihí ñuú lĩhli  
dànehé-gá ñáyiú nàcuáa ndíhu ndaha ñàha Yá  
Ndiõxí xii-yu. Te cuáhá<sup>n</sup> ndihí-gá ndi ùxúú tnàhá  
cue téé xìca cuu ndihí-gá,

2 ndihí ì<sup>n</sup> úú ñáyiú dìhí ní quide tátna-gá ní  
xíhí ñaha espíritú cündìhí yucu ñávãha, ndihí ñáyiú  
tnàhá dava-gá cuéhé ùhú ní cùu. Te xía<sup>n</sup> tnàhá tucu  
ì<sup>n</sup> ñaha nàni Mariá Magdalèná, te ñaha-á<sup>n</sup> ñĩ xíhí  
ñaha ùsá espíritú cündìhí yucu ñávãha xii-a<sup>n</sup> ni cùu,  
te ní quee ñaha-xi.

3 Te tnàhá ì<sup>n</sup> ñaha nàni Juáná ñadìhí ì<sup>n</sup> téé nàni  
Chúza téé ní cunuu ñĩ xinu cuechi vèhe té Hèrodés,  
ndihí ingá ñaha nàni Susaná nchaa ñáyiú-á<sup>n</sup> ñĩ  
chindee ñáhá-yu xii-gá ndihí nchaa sá ndécú  
ndìhí-yu, te dũu-ni duca<sup>n</sup> ñĩ quide vài-gá tucu ñáyiú  
nchìcú<sup>n</sup> ñáhá xii-gá cuáhá<sup>n</sup>.

*Nàcuáa quide tée cuángacá<sup>n</sup> triú  
(Mt. 13:1-9; Mr. 4:1-9)*

<sup>4</sup> Te ío vâi ñâyiu ndaa ñuú ní tacá-yu núú ndécú Jèsús, te ní nguíta-gá ní cani-gá ì<sup>n</sup> cuèndú núu-yu cuèndá tecú tnùnì-yu tnúhu-gá, te xáha<sup>n</sup>-gã xií-yu:

<sup>5</sup> —Ì<sup>n</sup> tée cuángacá<sup>n</sup>-dé triú. Te òré ní nguíta-dé dǎngoyo-dé triú-á<sup>n</sup> te dava ní quene ndava ní ngava ndéé ichi, te ní xénihnu ñâyiu, te ní xiní tǐlaá te ní nadatàcá-güedi.

<sup>6</sup> Te dava ní ngava ñuhu yadi núú yíhí vîhi yúú, te ní xínu-xi dico núú sàcú-ni nduu te ní yíchí-xi, chi ñá túú cǒhyo yîhi.

<sup>7</sup> Te dava ní ngava núú yúcu ndǐquí<sup>n</sup> tnu ìñu, te ì<sup>n</sup>nuu-ni ní xínu-xi ndǐhi tnu ìñu-á<sup>n</sup>, te tnu ìñu-á<sup>n</sup> ñǐ dánáá-xí nchàa triú sá ñǐ xínu-á<sup>n</sup>.

<sup>8</sup> Dico dava triú-á<sup>n</sup> ñǐ ngava-xi núú ndécú ñuhu cocó<sup>n</sup>, te xiá<sup>n</sup> ní xínu-xi te ní sahnú-xi, te ío váha ní cuu, chi núú ì<sup>n</sup>-ní triú te ní nguíhi yoco-xi ì<sup>n</sup> cièndú triú-xi —càchí-gá xáha<sup>n</sup>-gã xii-yu.

Te níhi ní cáhá<sup>n</sup>-gá ní xáha<sup>n</sup> tùcu-gá xií-yu:

—Nchaa nchòhó ñâyiu ní xíndedóho tnúhu ní cáhá<sup>n</sup>-í-a, te ío váha chí cuăha cuèndá —càchí-gá xáha<sup>n</sup>-gã xií-yu.

*Nàcuáa quèe-xi tnúhu ní cáhá<sup>n</sup> Jèsús  
(Mt. 13:10-17; Mr. 4:10-12)*

<sup>9</sup> Te cue tée xica cuu ndǐhi Jesús ní xicá<sup>n</sup> tnúhú-güedě núú-gã núu nása quèe-xi cuèndú ní cani-gá núú ñâyiu.

<sup>10</sup> Te ní xáha<sup>n</sup>-gã xii-güedé:

—Nchòhó chi sa càchí tnúhu Yá Ndiöxí xii-ndo ì<sup>n</sup> sá vǎtá quǐní-gá-ndó, chi càchí tnúhu-gá nàcuáa cada-gá ndǐhu ndaha-gã ñâyiu, dico dava-gá ñâyiu

càni-í mee-ni cuèndú núŷ-yu, chi cuèi na quèní-yu nchaa nàcuáa cuu dico nì vá cútnùní iní-yu ná cuèndá duca<sup>n</sup> cùu, àdi cuèi na cùndedóho-yu dico nì vá tècú tnùní-yu –càchí-gá xáha<sup>n</sup>-gă xii-güedé.

*Jèsús càhá<sup>n</sup>-gá nàcuáa quèe-xi tnúhu cuèndá té cuángacá<sup>n</sup> triú*

*(Mt. 13:18-23; Mr. 4:13-20)*

<sup>11</sup> Te xáha<sup>n</sup> tùcu-gá xii-güedé:

–Duha quèe-xi cuèndú ní cani-í núú-ndó, chi triú ní sacá<sup>n</sup> tée-án cúú-xí dàtná tnúhu Yá Ndiöxí.

<sup>12</sup> Te triú sá nĩ quene ndava ní ngava ndéé ichi-án, xíă<sup>n</sup> cúú-xí dàtná ñáyiú ní quée iní-xi tnúhu Yá Ndiöxí, dico sácúíhná cuăhá<sup>n</sup>-xi xòceni-xi tnúhu-gá iní-yu cuèndá sá vă quèndáá iní-yu, te vá nánihí tàhú-yu.

<sup>13</sup> Te triú sá nĩ ngava ñuhu yadi núú yíhí vèhi yúú, xíă<sup>n</sup> cúú-xí dàtná ñáyiú ní xíndedóho tnúhu Yá Ndiöxí te dǐí iní ní tní-yu tnúhu-gá, dico òré ná dàcahá<sup>n</sup> ñáhá yùcu ñávăha xií-yu nándi cadá-yu, te dàña nihnú-yu tnúhu-gá chi ñá nihí ndéě-yu canchicú<sup>n</sup> nihnú-yu nàcuáa càhá<sup>n</sup> tnúhu-gá.

<sup>14</sup> Te triú sá nĩ ngava núú yúcu ndǐquí<sup>n</sup> tnu ñnu-án, xíă<sup>n</sup> cúú-xí dàtná ñáyiú ní tecú dóho-xi tnúhu Yá Ndiöxí, dico cuèé cuèé ní nacuanaá-yu tnúhu-gá, chi cuèndá mee-ni să cúú-xí mèé-yu ñuhu iní-yu, ndihí cuèndá sá ïo sàni iní-yu cuu cuicá-yu, ndihí cuèndá sá ïo cùdǐí iní-yu nchaa sá ïó ñuyíú-a núú xíă<sup>n</sup> àú<sup>n</sup> nă cuu ní xíndedóho-yu tnúhu-gá.

<sup>15</sup> Dico triú sá nĩ ngava núú ndécú ñuhu coco<sup>n</sup>, xíă<sup>n</sup> cúú-xí dàtná ñáyiú váha iní-xi ní xíndedóho tnúhu Yá Ndiöxí chi ñá túú dàña nihnú-yu, te

ni yùhu ni iní-yu quidé-yu nchaa nàcuáa càhá<sup>n</sup> tnúhu-gá.

*Nàcuáa quidé-yu iti*

*(Mr. 4:21-25)*

16 "Te ñá túú nì ì<sup>n</sup> ñáyiú tènñuhú-yu ì<sup>n</sup> iti te dàdáhu-yu, àdi chiváha-yu ì<sup>n</sup> caha càamá, chi tàxi ndecú-yu núú ñnu cuèndá cutnùnì núú nchàa ñáyiú ndècu vehe.

17 Te ni ì<sup>n</sup> tnúhu sá ñă tècú tnùnì ñáyiú vitna vá càchí-ó sã vã tècú tnùnì-yu chi dacuèi sá tècú tnùnì-yu, te ni ì<sup>n</sup> tnúhu sá càchí-ó cùu yuhu vitna vá cúu yùhu chi dacuítí sã quée tũu-xi núú ñáyiú.

18 "Te chí cùndedóho váha tnúhu na càhá<sup>n</sup>-í-a, Nchaa ñáyiú sàndáá iní ñáhá xii Yá Ndióxí ío-gá cuita quindáá-gá iní ñáhă-yu xii-gá quíhí<sup>n</sup>, te nchaa ñáyiú ñá túú sàndáá iní ñáhá xii-gá uu<sup>n</sup>-gá cuita cuu sàá-gá iní-yu núú-gă quíhí<sup>n</sup> –càchí-gá xáha<sup>n</sup>-gă xii-güedé.

*Cue ñaní Jèsús ndihí năná-gă*

*(Mt. 12:46-50; Mr. 3:31-35)*

19 Te ní quexìo náná Jèsús ndihí cue ñaní-gá vehe núú ndécú-gă, te ñá ndácũ-yu cáhá<sup>n</sup> ndihí ñáhá-yu xii-gá chi ío cuéhé ñáyiú ndècu núú ndécú-gă.

20 Te ì<sup>n</sup> ñáyiú xĩndecu-á<sup>n</sup> ñĩ dáyăha-yu tnúhu núú-gă, te xăhă<sup>n</sup>-yu:

–Ní quexìo náná-n ndihí cue ñaní-n xĩnutnĩ-yu quehé, te cuinì-yu cáhá<sup>n</sup> ndihí ñáhá-yu xii-n –càchí-yu xăhă<sup>n</sup>-yu xii-gá.

21 Te ní xáha<sup>n</sup>-gă:

–Nchaa ñáyiú sàcùndedóho tnúhu Yá Ndióxí te quidé-yu nchaa nàcuáa càhá<sup>n</sup> tnúhu-gá, ñáyiú-á<sup>n</sup>

cúũ-yu dàtná nǎnà-í ndihì dàtná cue ñaní-í —  
càchí-gá xáha<sup>n</sup>-gǎ xii ñáyiú ní dáyǎha tnúhu  
núú-gǎ-á<sup>n</sup>.

*Jèsús ngání-gǎ táchí ndihì ndute làgúná*

*(Mt. 8:23-27; Mr. 4:35-41)*

<sup>22</sup> Te ñ<sup>n</sup> nduu ní quée Jèsús bàrcú ndihì cue téé  
xìca cuu ndihì-gá, te ní xáha<sup>n</sup>-gǎ:

—Chí ná quíhí<sup>n</sup>-ó ndàa ingá xio yuhu làgúná —  
càchí-gá xáha<sup>n</sup>-gǎ xii-güedé.

Te cuáhá<sup>n</sup>-güedé ndihì-gá.

<sup>23</sup> Te ñini ñùhu bàrcú ichi cuáhá<sup>n</sup>-xi núú ndute  
ní xídí Jèsús. Te ní ngüíta-xi níhi vìhi quene táchí  
te ta nàdachitú-xi ndute xití bàrcú-á<sup>n</sup> cuáhá<sup>n</sup>, te sa  
cuíní-nǎ-xi quée naa bàrcú-á<sup>n</sup> xití ndute ni cùu.

<sup>24</sup> Te ní sáhá<sup>n</sup>-güedé núú cáá Jèsús xídí-gá, te ní  
xáha<sup>n</sup>-güedé xii-gá:

—¿Mèstrú, ndiquíú ìní chi tà quée naa-o cuáhá<sup>n</sup>!  
—càchí-güedé xáha<sup>n</sup>-güedé xii-gá.

Te Jèsús ní ndiquíú ìní-gá te ní ndacóo-gá te  
ní tenáá-gá táchí-ǎ<sup>n</sup> ndihì ndute làgúná-á<sup>n</sup>, te ní  
ngüíñí-ni táchí-ǎ<sup>n</sup> te ní nucúndecu nahi-nǎ ndute  
làgúná-á<sup>n</sup>.

<sup>25</sup> Te ní xáha<sup>n</sup>-gǎ xii-güedé:

—¿Náa ñá túú sàndáá ìní ñáhá ndìsa-ndo xii-í ǎ<sup>n</sup>?  
—càchí-gá xáha<sup>n</sup>-gǎ xii-güedé.

Te ní cuñúhu-güedé sá dúcá<sup>n</sup> ñí quide-gá ní  
xiní-güedé, te ní yùhú-güedé, te ní xítàha-güedé:

—¿Te ná téé cùu téé-a núu ní cáhá<sup>n</sup>-ni-dé te  
ní ngüíñí táchí te ní nucúndecu nahi-ni ndùte  
làgúná-a-i? —càchí-güedé xítàha-güedé.



*Tée yìhi ñaha cue espíritú cùndìhi yucu ñávãha  
(Mt. 8:28-34; Mr. 5:1-20)*

<sup>26</sup> Te ní sáá-gá ndihi-güedé yucu cue téé ñuú Gàdará, te yìhi ndáá-ni ndàa ìngá xio làgúná-án cáá dìstrítú Galileá.

<sup>27</sup> Te òré ní quene Jèsús xítí bàrcú te ní dáyátní ñaha ìn téé ñuú-án xii-gá, te yìhi ñaha títí espíritú cùndìhi yucu ñávãha xii-dé. Te ní cunaha ñà túú-gã sácũhnu-dé dóó-dě, te ni ñà túú-gã sácũndecu-dé vehe-dé, chi da nchaa núú yíndũxi ndíyì quide vehe-dé.

<sup>28</sup> Te òré ní xiní-dé Jèsús te ní ngüíñí xítí-dě núú-gã, te cue espíritú yíhí ñaha xii-dé-án nǐ quide-xi níhi ní cáhá<sup>n</sup>-dé, te xãhá<sup>n</sup>-dě xii-gá:

—¿Ná cuendá véxi-õ Jèsús Déhe Dútú Ndiõxí sàdí-n ìchi-í-i? Te càhá<sup>n</sup> ndàhú-í núú-n sã và dándõho ñaha-n xii-í —càchí-dé xãhá<sup>n</sup>-dě xii-gá.

<sup>29</sup> Te duca<sup>n</sup> nǐ cáhá<sup>n</sup>-dé cuendá sá Jèsús ní xáhá<sup>n</sup>-gã xii nchaa espíritú cùndìhi yucu ñávãha yìhi ñaha sá ná quèe ñaha-xi xii-dé. Te nchaa xíã<sup>n</sup> ní xóo dacàhá<sup>n</sup>-xi ìní-dé nándi sá nǐ xóo cada-dé nũu ní xóo dacùtu ñaha-güedé cadená xii-dé cuendá sá ñà túú-gã ná cada-dé, te ní xóo cundee ñáhá-güedě, dico cuèi duca<sup>n</sup> dico ní xóo dandáva-ni-dé cadená, te cue espíritú cùndìhi yucu ñávãha-án nǐ xóo dacùnu ñaha-xi xii-dé ní xóo quíhí<sup>n</sup>-dé xítí yucu.

<sup>30</sup> Te Jèsús ní xicá<sup>n</sup> tnúhú-gã núú-dě, te xáhá<sup>n</sup>-gã:  
—¿Nása nàni-n-i? —cachí-gá xáhá<sup>n</sup>-gã.

Te ní xáhá<sup>n</sup>-dè:

—Vài Sandadú nàni-í —càchí-dé xãhá<sup>n</sup>-dě xii-gá.

Te duca<sup>n</sup> nǐ xáhá<sup>n</sup>-dè xii-gá cuendá sá ìo cuéhé espíritú cùndìhi yucu ñávãha yìhi ñaha xii-dé.

31 Te nchaa espíritú-án ñí cáhá<sup>n</sup> ndàhú-xi núú Jèsús sá vǎ téndàha ñaha-gá xii-xi quíhí<sup>n</sup>-xi núú ùhú núú ndàhú.

32 Te òu-ni yatni yucu núú ndécú Jèsús-án yíhí vǎi cuchí xǐxexi-güedi, te nchaa espíritú-án ñí cáhá<sup>n</sup> ndàhú-xi núú-gǎ sá ná dàña-gá quíhu-xi yíqui cùñú nchaa cùchí-án, te Jèsús ní xáha<sup>n</sup>-gǎ sá cúú quíhu-xi yíqui cùñú-güedi.

33 Te ní quee ñaha nchàa espíritú-án xii tée-án, te ní quíhu-xi nchaa cùchí-án, te cùchí-án ñí xinu-güedi duha ní quee-güedi ndàa núú dèhvǎ yuhu làgúná-án, te ní ngaunihnu-güedi xití ndute te ní ndíhi-güedi ní cáhá.

34 Te òré ní xiní cue tée xìto cuchí-án nàcuáa ní cuu te ní yùhú-güedé ní xinu-güedé, te ní sáhá<sup>n</sup>-güedé ní caní-güedé cuèndú núú cuè ñáyiu ndècu xití ñuú, ndíhi núú cuè ñáyiu ndècu xití yucu.

35 Te nchaa ñáyiu ní níhí tnùhu ní quee-yu cuáhá<sup>n</sup> ndéhě-yu nàcuáa ní cuu. Te òré ní quexió-yu núú ndécú Jèsús, te ní xiní-yu tée ní xíhi ñaha cuè espíritú cùndíhi yucu ñávǎha-án núcõo-dé núú sàhá Jèsús, te nihnu-ná-dé dóó-dě, te núcõo-dé dàtná ì<sup>n</sup> ñáyiu váha, te ní yùhú-yu òré ní xiní ñáhǎ-yu xii-dé.

36 Te nchaa ñáyiu ní xiní nàcuáa ní cuu ní ndúha tée yíhi ñaha cue espíritú cùndíhi yucu ñávǎha-án ní cùu ní caní-yu cuèndú núú nchàa ñáyiu ní quexió-án nàcuáa ní cuu ní ndúha tée-án ndíhi nàcuáa ní cuu cuèndá nchaa cùchí-án.

37 Te sá dúcá<sup>n</sup> ñí níhí-yu tnúhu nàcuáa ní cuu, núu nchaa ñáyiu ñuú Gàdará ío ní yùhú-yu te ní ngúíta-yu càhá<sup>n</sup> ndàhú-yu núú Jèsús sá ná nùhú-gá

nũu ndèé ichi véxi-gá. Te sá dúcá<sup>n</sup> ñí cáhá<sup>n</sup>-yu núu cuáhá<sup>n</sup>-gá núú ndécú bàrcú. Te òré ndée-gá bàrcú-á<sup>n</sup> nũhú-gá

<sup>38</sup> ní ngũíta téé ní xíhi ñaha cuè espíritú cúndìhi yucu ñávãha càhá<sup>n</sup> ndàhú-dé núú-gã nũu vá cúndèe iní-gá quíhí<sup>n</sup> ndìhi ñaha-gã xii-dé, dico Jèsús ní quide ndee ìní ñáhá-ni-gã xii-dé, te ní xáha<sup>n</sup>-gã:

<sup>39</sup> —Cuanùhú vehe-n, te cani-n cuèndú núú nchàa ñáyiu sá ïo càhnu cuu nchaa sá vãha ní quide ñaha Yã Ndiõxí xii-n —càchí-gá xáha<sup>n</sup>-gã xii-dé.

Te téé-á<sup>n</sup> ñí xica-dé cuánuhú-dé te ní ngũíta-dé ní cani-dé cuèndú núú nchàa ñáyiu xĩndecu ñihí ñúú sá ïo càhnu cuu nchaa sá vãha ní quide ñaha Jèsús xii-dé.

*Cuèndá déhe yoco tẽ Jàirú, ndìhi cuèndá ì<sup>n</sup> ñadìhí ní tnándeé dóó Jèsús*

*(Mt. 9:18-26; Mr. 5:21-43)*

<sup>40</sup> Te òré ní ndexìo Jèsús ndàa ìngá xio yuhu làgúná, te ñáyiu xĩndecu xíá<sup>n</sup> sa ndètu cahnu ñaha-ná-yu, te ïo vãha ní cáhá<sup>n</sup> ndìhi ñàhá-yu xii-gá òré ní nasáá-gá.

<sup>41</sup> Te ì<sup>n</sup> téé tàxi tnuní veñúhu ní quexìo-dé núú ndécú Jèsús, te téé-á<sup>n</sup> nání-dě Jàirú, te ní ngũíñí xítí-dě núú-gã càhá<sup>n</sup> ndàhú-dé, te xáha<sup>n</sup>-dě xii-gá:

—Véxi-í càhá<sup>n</sup> ndàhú-í núú-n nũu vá cúndèe iní-n quíhí<sup>n</sup>-ó vèhe-í cada tátna-n dèhe yoco-ï —càchí-dé xáha<sup>n</sup>-dě xii-gá.

<sup>42</sup> Te duca<sup>n</sup> ñí xáha<sup>n</sup>-dě chì ndècu ì<sup>n</sup> dii-ni déhe yoco-dě, te ndècu-xi datná úxúú cuíá-xi, te càhú víhí tnàhá-xi cùhú-xi te cuìní-xi cuú-xi. Te Jèsús ní xica-gá cuáhá<sup>n</sup>-gá ndìhi téé-á<sup>n</sup>, te ïo vãi ñáyiu

nchìcú<sup>n</sup> ñáhá xii-gá cuáhá<sup>n</sup>, te dàdehnde ñaha-ná-yu xii-gá ní cùu.

43 Te tnuú nchaa ñáyiu-á<sup>n</sup> ñútnàhá ì<sup>n</sup> ñaha cùhú, te ñaha-á<sup>n</sup> sà ní cuu úxúú cuíá sǎ cùhú-a<sup>n</sup> ngòyo ñaha níñí xii-a<sup>n</sup>, te ío cuéhé dǐhú<sup>n</sup> nǐ cuu dǎndoñuhu-a<sup>n</sup> chi ní nadico-a<sup>n</sup> nchàa sá ndécú ndìhi-a<sup>n</sup> cuendá ní níhí-a<sup>n</sup> dǐhú<sup>n</sup> nǐ quehe<sup>n</sup> nchaa ñáyiu ní quide tátna ñaha xii-a<sup>n</sup>, dico ni ì<sup>n</sup>-yu ñá túú ní ndàcú-yu ndúha-a<sup>n</sup>.

44 Te ní sáhá<sup>n</sup> ndehe yatni-a<sup>n</sup> ndàa sátá Jèsús, te ní tnándeé-a<sup>n</sup> luha yuhu dǒó-gǎ te òré-ni-á<sup>n</sup> nǐ ndúha-a<sup>n</sup>.

45 Te Jèsús ní xicá<sup>n</sup> tnúhú-gǎ núŭ-yu, te xáha<sup>n</sup>-gǎ:  
—¿Ndèdacàa-ndo ní tnándeé ñáhá xii-í? —càchí-gǎ xáha<sup>n</sup>-gǎ xií-yu.

Te nchaa<sup>n</sup>-yu ní xáhǎ<sup>n</sup>-yu sá nǐ ì<sup>n</sup>-yu ñá túú ní tnándeé ñáhá xii-gá. Te té Pèlú ndìhi cue té cùndìhi-dé ní xáha<sup>n</sup>-güedě xii-gá:

—Mèstrú, ndèhe-n sá vái ñáyiu nchìcú<sup>n</sup> ñáhá xii-n, te xio xio dàdehnde ñahá-yu, te xicá<sup>n</sup> tnúhú-gǎ-n yòo ní tnándeé ñáhá xii-n —cachí-güedé xǎha<sup>n</sup>-güedě xii-gá.

46 Dico Jèsús ní xáha<sup>n</sup>-gǎ xií-yu:

—Dico diu ì<sup>n</sup>-ndo nǐ tnándeé ñáhá xii-í, chi ní cutnùní iní-í sá ì<sup>n</sup> ñáyiu cùhú ní tnándeé ñáhá xii-í te ní ndúha-yu —càchí-gǎ xáha<sup>n</sup>-gǎ xií-yu.

47 Te sátá nǐ xiní ñaha-á<sup>n</sup> sǎ nǐ cutnùní iní Jèsús sá nǐ tnándeé ñáhá-á<sup>n</sup> xii-gá, te yùhú yùhú-a<sup>n</sup> ní sáhá-a<sup>n</sup> ní ngüíñí xítí-á<sup>n</sup> núú-gǎ, te ní náhmá-a<sup>n</sup> núú-gǎ, ndìhi núú nchàa ñáyiu ná cuendá duca<sup>n</sup> nǐ quide-a<sup>n</sup> ní tnándeé-a<sup>n</sup>-gǎ, ndìhi cuendá sá òré-ni-á<sup>n</sup> nǐ ndúha-a<sup>n</sup>.

48 Te Jèsús ní xáha<sup>n</sup>-gǎ xii-a<sup>n</sup>:

—Yòhó ñaha cùhú, ní sándáá iní ñáhá-n xii-í nũu ní ndúha-n, te cuanùhú vitna te ñá túú-gǎ ná cani iní-n —càchí-gǎ xáha<sup>n</sup>-gǎ xii-a<sup>n</sup>.

49 Te càhá<sup>n</sup> dúcá<sup>n</sup>-ní Jèsús ní sáá ì<sup>n</sup> téé xìnu cuechi vehe té Jàirú téé tàxi tnuní veñúhu, te xáha<sup>n</sup> téé xìnu cuechi-á<sup>n</sup> xii-dé:

—Sa ní xíhí déhe-n, vá chíchiù<sup>n</sup>-gá-n Mèstrú —càchí-dé xáha<sup>n</sup>-dë.

50 Te sá dúcá<sup>n</sup> xáha<sup>n</sup> téé xìnu cuechi-á<sup>n</sup> xii té Jàirú ní tecú dóho Jèsús, núu ní xáha<sup>n</sup>-gǎ xii-dé:

—Vá ndìhú iní-n, quíndáá iní ñáhá-ní-n xii-í te ndúha déhe-n —càchí-gǎ xáha<sup>n</sup>-gǎ xii-dé.

51 Te òré ní sáá-gǎ vehe té Jàirú te ñá ní dàña-gǎ quíhu ñáyiú cùtexínu, núu té Pèlú-ni ndìhí té Jàcobó-ni, ndìhí té Juáá-ni, ndìhí tǎtá ndìhí nǎná-ni xíchí ñí xíhí-á<sup>n</sup> cuǎngúhu ndìhí-gǎ xití vehe.

52 Te nchaa ñáyiú sa xíndecu vehe-dé-á<sup>n</sup> xǐndáhyú-yu sá ndìhú iní-yu cuèndá sá ñí xíhí-xi. Te Jèsús ní xáha<sup>n</sup>-gǎ xií-yu:

—Vá ndàhyú-ndó, chí dícó-ni xidí-xi ñá túú ní xíhí-xi —càchí-gǎ xáha<sup>n</sup>-gǎ xií-yu.

53 Te ní sácú ndeé ñáhǎ-yu xii-gǎ, chí sá cúú-xí mèè-yu chí ní xíhí ndisa xíchí-ǎ<sup>n</sup>.

54 Te Jèsús ní tnì-gǎ ndaha xíchí ñí xíhí-á<sup>n</sup>, te níhi ní cáhá<sup>n</sup>-gǎ, te xáha<sup>n</sup>-gǎ:

—Xíchí cuéchí, ndacóo —càchí-gǎ xáha<sup>n</sup>-gǎ.

55 Te xíchí-ǎ<sup>n</sup> ñí ndoto-xi, te òré-ni ní ndacóo-xi, te Jèsús ní xáha<sup>n</sup>-gǎ sá ná cuǎñáhá-yu sá cáxí-xí.

56 Te tǎtá-xi ndìhí nǎná-xi súúní ñí cuñúhu-yu sá dúcá<sup>n</sup> ñí dándótó ñaha Jesús xii-xi, te ní xáha<sup>n</sup>-gǎ xií-yu sá vǎ yòo ì<sup>n</sup> cúñáhá-yu sá dúcá<sup>n</sup> ñí quide-gǎ.

## 9

*Jèsús téndàha-gá ndi ùxúú cue téé xìca cuu ndihi-gá  
quihí<sup>n</sup>-güedé cáhá<sup>n</sup>-güedé tnúhu-gá*

*(Mt. 10:5-15; Mr. 6:7-13)*

<sup>1</sup> Te Jèsús ní cana-gá ndi ùxúú cue téé xìca cuu ndihi-gá, te ní sáñaha-gă xii-güedé tnúhu ndee ínì cundecu ndihi-güedé cuendá queñuhu-güedé nchaa espíritú cúndihi yucu ñávãha yìhi ñaha xii ñáyiú, ndihi cuendá sá cádá tátna-güedé nchaa ñáyiú cùhú.

<sup>2</sup> Te ní xáha<sup>n</sup>-gă xii-güedé sá quihí<sup>n</sup>-güedé danèhé-güedé ñáyiú nàcuáa cada Yá Ndiöxí ndíhu ndaha ñàha-gá xií-yu, te duca<sup>n</sup> càda tátna-güedé cue ñáyiú cùhú.

<sup>3</sup> Te cùmání-gă caca-güedé quihí<sup>n</sup>-güedé, te ní xáha<sup>n</sup>-gă xii-güedé:

—Ñá túú tnàhí ná canehe-ndo cùu ichi-ndo, ni tàtnu, ni ñùnu, ni sã cáxí-ndó, ni dǐhú<sup>n</sup>. Te ni vã cánèhe-ndo ìngá ichi dóó-ndó, chi ñiu-ni dóó níhnú-ndó-ǎ<sup>n</sup> xíá<sup>n</sup> tnàhí-ni.

<sup>4</sup> Te ndědani càa vehe na saá-ndó, te xía<sup>n</sup> cundecu-ndo ndèè ná sàá nduu ndèe-ndo.

<sup>5</sup> Te núu ñá túú cuíní-yu quehe<sup>n</sup> cuendá ñáhă-yu xii-ndo, te ndee-ndo ñùú-á<sup>n</sup>, te naquidi-ndo ticá chúhmá ñǐ tnǐi sáhá-ndó cuendá sá ná cùtnuní ínì-yu sá ñà túú quide váha-yu —càchí-gá xáha<sup>n</sup>-gă xii-güedé.

<sup>6</sup> Te sátá dúcá<sup>n</sup> ñǐ xáha<sup>n</sup> Jèsús xii-güedé, te ní quee-güedé cuáhá<sup>n</sup>-güedé nchaa ñúú dácuàha-güedé ñáyiú tnúhu Yá Ndiöxí, tnúhu sá càhá<sup>n</sup> nàcuáa naníhí tàhú-yu, te duca<sup>n</sup> ta quide tátna-güedé nchaa ñáyiú cùhú cuáhá<sup>n</sup>.

*Nàcuáa ní cuu ní xíhí té Juàá téé dàcuandute ñaha xii ñáyíu*

*(Mt. 14:1-12; Mr. 6:14-29)*

<sup>7</sup> Te té Hèrodés téé cùu gobiernú ní níhí-dě tnúhu nchaa nàcuáa quide Jesús, te quìyuhú iní-dé te sàni iní-dé yoo cùu-gá. Te duca<sup>n</sup> ñí sani iní-dé chi dava ñáyíu cächí-yu sá tẽ Juàá téé ní xóo dacuandute ñaha xii ñáyíu ní ndoto cùu-gá.

<sup>8</sup> Te davá-yu cächí-yu sá tẽ Èliás cúú-gă, te davá-yu cächí-yu sá ì<sup>n</sup> téé ní xóo cáhá<sup>n</sup> tnúhu Yá Ndiõxí ndéé sanaha vìhi ní ndoto cùu-gá, cächí-yu.

<sup>9</sup> Dico té Hèrodés ní cachí-dé:

—Yúhú ní táúchíú<sup>n</sup>-í ní xehndé-güedé díquí tẽ Juàá. ¿Te yoo cùu téé dii cuèndú-xi nihí-a sá sùúni cuèhé nùú sã quidé-dě váí<sup>n</sup>? —duha ní cachí-dé.

Te té Hèrodés ndúcú-dě nàcuáa cada-dé cuèndá quini-dé Jèsús.

*Jèsús dácàxi-gá úhú<sup>n</sup> mĩ cue téé te ð<sup>n</sup> ñáyíu ðíhí ndíhí landú*

*(Mt. 14:13-21; Mr. 6:30-44; Jn. 6:1-14)*

<sup>10</sup> Te nchaa cue téé ní táúchíú<sup>n</sup> Jèsús cuáhá<sup>n</sup> cáhá<sup>n</sup> tnúhu Yá Ndiõxí núú ñáyíu ní ndexìo-güedé núú-gă te ní ngüíta-güedé nácàni tnúhu-güedé nchaa nàcuáa ní quide-güedé. Te dătnùní ní xica-gá medii-ni-gá ndécá ñàha-gá xii-güedé cuáhá<sup>n</sup> ì<sup>n</sup> xi-chi núú ñà túú ñáyíu ndècu, yatni núú cáá ñúú Bètsaidá.

<sup>11</sup> Dico òré ní níhí ñáyíu tnúhu sá cuáhá<sup>n</sup> Jèsús, te nchìcú<sup>n</sup>-yu-gá cuáhá<sup>n</sup>, te òré ní quexió-yu núú-gă, te ní quehe<sup>n</sup> cuèndá ñáhá-gă xií-yu, te ní dánèhé ñáhá-gă xií-yu nàcuáa ndíhu ndaha ñàha Yá Ndiõxí xií-yu, te ní quide tátna-gá nchaa ñáyíu cùhú.

12 Te òré sa ní cuaa te ní natacá ndi ùxúú cue téé xìca cuu ndìhi-gá núú-gǎ, te ní xáha<sup>n</sup>-güedě xii-gá:

—Sa ní cuu dandàca-n nchaa ñáyiú-a, chi sa ní cuaa, te na quíhí<sup>n</sup>-yu nchaa vehe càa yatni iha, ndìhi nchaa xití ñuú cáá yatni iha cuaá<sup>n</sup>-yu sá cáxí-yu, te ñuú-ni yàcá<sup>n</sup> ndetatú-yu, chi núú ndécú-ó iha ñá túú tnàhí ná lò —càchí-güedé xáha<sup>n</sup>-güedě xii-gá.

13 Te Jèsús ní xáha<sup>n</sup>-gǎ xii-güedé:

—Mee-ndo chǐ cuǎñaha sǎ ná càxí-yu —càchí-gá xáha<sup>n</sup>-gǎ xii-güedé.

Te ní xáha<sup>n</sup>-güedě xii-gá:

—Ñá túú nǎgá ndécú ndìhi-ndí, chi úhú<sup>n</sup> duha-ná pàá, ndìhi úú-nǎ chácá ndécú ndìhi-ndí, te ñuú-ni núú quíhí<sup>n</sup>-ndí cuaa<sup>n</sup>-ndí sá cáxí-yu —càchí-güedé xáha<sup>n</sup>-güedě xii-gá.

14 Te xǐnu dàtná úhú<sup>n</sup> mǐl mee-ni cuè téé, te ñuú ñáyiú ñíhí ndìhi landú. Te Jèsús ní xáha<sup>n</sup>-gǎ xii cue téé xìca cuu ndìhi-gá:

—Chí cǔñaha na ngõ ndi údico úxí ndi údico úxí-yu ñ<sup>n</sup> ñ<sup>n</sup> xichi —càchí-gá xáha<sup>n</sup>-gǎ xii-güedé.

15 Te duca<sup>n</sup> ñǎ quide-güedé, te ní ngóo-yu nchaá-yu.

16 Te dàtnùní ní quehe<sup>n</sup>-gá ndi ùhú<sup>n</sup> pàá-án, ndìhi ndi ndùú chácá-án. Te ní ndacoto-gá andiú, te ní ndacá<sup>n</sup> táhú-gǎ núú Yǎ Ndiõxí, te dàtnùní ní táhú cuèchi-gá pàá-án ndìhi chácá-án, te ní sáha-gá nchaa cue téé xìca cuu ndìhi-gá ní dácǎhñu ñaha-güedě xii-yu.

17 Te nchaá-yu ní xexí-yu ní ndahá xití-yu. Te sátá ñǎ túhú cóhõ-yu te ní nadatàcá-güedé nchaa sá



nĩ quendóo, te ní chítú ùxúú tnàhá tídihi mee-ni sã nĩ quendóo.

*Té Pèlú xãha<sup>n</sup>-dě xii Jèsús sá ðíú-gã cúú-gã Crìstú  
(Mt. 16:13-19; Mr. 8:27-29)*

<sup>18</sup> Te ì<sup>n</sup> nduu ndècu mee Jesús ndihì cue téé xìca cuu ndihì-gá, te càhá<sup>n</sup> ndihì-gá Yã Ndiõxí, te sátá nĩ yáha ní cáhá<sup>n</sup> ndihì-gá Yã Ndiõxí, te ní xícá<sup>n</sup> tnúhú-gã núú-güedě, te xáha<sup>n</sup>-gã xii-güedě:

—¿Yoo cùu yúhú càchí ñáyiu-va? —càchí-gá xáha<sup>n</sup>-gã xii-güedě.

<sup>19</sup> Te ní xáha<sup>n</sup>-güedě xii-gá:

—Davá-yu càchí-yu sá cúú-n ndii Juàá téé ní xóo dacuàndute ñaha xii ñáyiu, te davá-yu càchí-yu sá cúú-n tẽ Èlías, te davá-yu càchí-yu sá ì<sup>n</sup> téé ní xóo cáhá<sup>n</sup> tnúhu Yã Ndiõxí ndéé sanaha nĩ ndoto cùu-n, duha càchí-yu —càchí-güedě xáha<sup>n</sup>-güedě xii-gá.

<sup>20</sup> Te ní xícá<sup>n</sup> tnúhú tùcu-gá núú-güedě, te xáha<sup>n</sup>-gã xii-güedě:

—Te nchòhó, ¿yoo sàni iní-ndó cùu-í-i? —càchí-gá xáha<sup>n</sup>-gã xii-güedě.

Te té Pèlú ní xáha<sup>n</sup>-dě xii-gá:

—Yòhó cúú-n Crìstú Déhe Dútú Ndiõxí —càchí-dé xáha<sup>n</sup>-dě xii-gá.

*Jèsús càhá<sup>n</sup>-gá sá cáhni ñaha-güedě xii-gá  
(Mt. 16:20-28; Mr. 8:30-9:1)*

<sup>21</sup> Te ní xáha<sup>n</sup>-gã xii-güedě sá vã yõo ì<sup>n</sup> cúñaha-güedě yoo cùu-gá.

<sup>22</sup> Te ní xáha<sup>n</sup>-gã xii-güedě:

—Yúhú Téé cùu ñaní tnàhá-ndó nchàa-ndo ío cuéhé sã ndóhò-í, chi daquèe tíhú ñáhá cuè téé cùu sacuéhé nũú ñáyiu isràél, ndihì cue dútú cúnùu, ndihì cue téé dàcuaha ñaha xii ñáyiu nchaa tnúhu

ní chídó tnùní ndíi Moisés, te sáá nduu te cahni ñaha-güedě xii-í, dico nduu úní sá cùú-í te ndoto-í —càchí-gá xáha<sup>n</sup>-gã xii-güedé.

23 Te dàtnùní ní xáha<sup>n</sup>-gã xii nchaa ñáyiu:

—Nchaa ñáyiu cuìní chitnahá ñáhá xii-í, te xìni ñuhu-xi vá cádá-gã-yu sá sání ìní méě-yu, te ì<sup>n</sup> nduu ì<sup>n</sup> nduu cada ndee ìní-yu cundecu túha-yu ndohó-yu cuèndá-í, te cuèi na ndòhó-yu dàtná ndoho-í.

24 Te nchaa ñáyiu cuìní sá ñà túú tnàhí ná yáha cundecu ñuyíú-a cuíta nihnú-yu. Dico nchaa ñáyiu ñá túú yùhú cuèi nándi sá ná yãha-yu cundecú-yu ñuyíú-a sá cuèndá-í, te ñáyiu-á<sup>n</sup> naníhí tàhú-yu.

25 Te cuèi nchaandi túhú sá ìó ñuyíú-a na ñihí ñáyiu cundecu ndihí-yu, dico núu ðiu nchaa xíã<sup>n</sup> ná càda cuíta nihnú-yu te ñá túú vèdana nàndíhi-xi sá dúcá<sup>n</sup> ndècu ndihí-yu nchaa xíã<sup>n</sup>.

26 Te nchaa ñáyiu na cùcaha<sup>n</sup> núú-xi cáhá<sup>n</sup> váha cuèndá-í ndihí cuèndá nchaa tnúhu-í, te tnàhá yúhú Tée cùu ñaní tnàhá-ndó nchàa-ndo cucaha<sup>n</sup> núù-í núú-yu òré quixi tucu-í ndihí cue espíritú xínú cuèchi núú Tātà-í Dútú Ndiõxí, te mee-gã cada cutnùní ìní nchaa ñáyiu sá ìo càhnu cuu-í.

27 Te na càchí tnúhu ndáá-í xii-ndo sã ìó dava nchòhó ñáyiu ndècu iha vitna vá cùú-ni-ndo, chi cundecu-ni-ndo ndéé quiní-ndó sáá nduu ndíhu ndaha ñàha Yá Ndiõxí xii ñáyiu —càchí-gá xáha<sup>n</sup>-gã xii-yu.

*Ní nadáma dóó Jèsús ndihí núú-gã  
(Mt. 17:1-8; Mr. 9:2-8)*

28 Te ní cuu dàtná úná nduu sá dúcá<sup>n</sup> ñí cáhá<sup>n</sup> Jèsús, te cuásaá-gá ì<sup>n</sup> yucu cáhá<sup>n</sup> ndihí-gá Yã

Ndiöxí, te ndèca-gá té Pèlú, ndihí té Jàcobó, ndihí té Juàá cuáaá.

29 Te nini càhá<sup>n</sup> ndihí-gá Yá Ndiöxí ní nadáma núú-gă ndihí dóó-gă, te dóó-gă-á<sup>n</sup> sũúní nĩ nduu cuixí<sup>n</sup> víhí, te súúní dàtása<sup>n</sup>-xi.

30 Te òré-ni-á<sup>n</sup> nĩ xiní-güedé úú tnàhá cue téé càhá<sup>n</sup> ndihí-gá, te ì<sup>n</sup>-dé cúú-dě té Moisés, te ingá-dé cúú-dě té Èliás,

31 te súúní dàtása<sup>n</sup>-xi ni càndéé núú ndécú cue téé úú-á<sup>n</sup> ndihí-gá, te xĩndatnúhu-güedé nàcuáa ndoho Jèsús cuú-gá ñúú Jerusàlén dàtná ní cachí méé-gă.

32 Te té Pèlú ndihí úú-gá-güedé cuiní víhí-güedě cúdú-güedé, dico ní sahní iní-güedé ñá túú ní xídí-güedé, te ní dánèhé núú ñáhá-xí xì-güedé sá sũúní vâha càa núú ndécú Jèsús, ndihí úú cue téé càhá<sup>n</sup> ndihí-gá-á<sup>n</sup>.

33 Te òré sa ndùcu ndee cue téé úú-á<sup>n</sup> caca-güedé núhú-güedé, te ní xáha<sup>n</sup> tẽ Pèlú xii-gá:

—Mèstrú, ¡váha ní cuu sá ndécú-ó ìha vitna! Te na dàcaa-ndí úní tnàhá vehe tnuvixi<sup>n</sup>, ì<sup>n</sup> cuu cuèndá-n, te ì<sup>n</sup> cuu cuèndá té Moisés, te ì<sup>n</sup> cuu cuèndá té Èliás —càchí-dé xãha<sup>n</sup>-dě xii-gá.

Dico té Pèlú chi ni mèe-dé ñá túú ní cùtnuní iní-dé nása ndùu tnúhu ní cáhá<sup>n</sup>-dé.

34 Te nini càhá<sup>n</sup>-dé ní quexìo ì<sup>n</sup> vícò núú ndécú-güedě-á<sup>n</sup> nĩ dádãhu ñaha-xi xì-güedé, te ní yùhú-güedé sá dúcá<sup>n</sup> nĩ quexìo vícò-ã<sup>n</sup> nĩ dádãhu ñaha-xi.

35 Te xití vícò-ã<sup>n</sup> nĩ tecú ní cáhá<sup>n</sup> Yá Ndiöxí, te xáha<sup>n</sup>-gă xii-güedé:

—Tée-a cùu-dé Déhe-í, téé ío cùu iní-í, te tnì-ndo nchàa tnúhu càhá<sup>n</sup>-dé —duha ní xáha<sup>n</sup>-gă xii-güedé.

36 Te sáta dúcá<sup>n</sup> nĩ cáhá<sup>n</sup> Yă Ndiöxí, te ní quide cuendá-güedé sá mèdii-ná Jèsús ndécú-gă xiá<sup>n</sup>. Te vá yõo ì<sup>n</sup> nĩ xáha<sup>n</sup>-güedě năcuáa ndùu nchaa sá nĩ xiní-güedé-á<sup>n</sup>.

*Jèsús quidé tătna-gá ì<sup>n</sup> tée cuechi yìhi ñaha espíritú cündìhi yucu ñávãha*

*(Mt. 17:14-21; Mr. 9:14-29)*

37 Te ingá nduu-ă<sup>n</sup> cuănuu-gá yucu-á<sup>n</sup> ndìhi-güedé, te ío cuéhé ñăyiu cuáhá<sup>n</sup> tnahá ñáhá xii-gá.

38 Te ì<sup>n</sup> tée ñùhu tnahá tnuú-yu-á<sup>n</sup> nĩ cáhá<sup>n</sup> níhi-dé, te xăha<sup>n</sup>-dě xii-gá:

—Mèstrú, ío cáhá<sup>n</sup> ndàhú-í núú-n nũu vá cündèe iní-n càda tátna-n dēhe-í, chi ì<sup>n</sup>dìi duha-dé ndécú,

39 te yìhi ñaha espíritú cündìhi yucu ñávãha xii-dé, te òré ná nàtnii ñaha-xi xii-dé, te dàcana saa ñaha-xi, te ndàda ruú<sup>n</sup> ñáhá-xi xii-dé, te tàva-xi tíñú yuhu-dé. Te ío dândoho ñaha-xi xii-dé, chi ndéé núú ñà cúu-gă, te dàña ñaha tnaa-xi xii-dé.

40 Te sa ní cáhá<sup>n</sup> ndàhú-í núú cuè tée xìca cuu ndìhi-n queñuhu-güedé-xi, dico ñá túú ní ndàcu-güedé —càchí-dé xăha<sup>n</sup>-dě xii-gá.

41 Te Jèsús ní xáha<sup>n</sup>-gă xii nchaa ñáyiu:

—jNchaa nchòhó ñáyiu ndècu ñuyíú-a ío sàá iní-ndó, chi ñá túú cuiní-ndó quindáá iní-ndó Yă Ndiöxí! Te ní cuu vâi nduu quide ndee iní-í nchaa sá quidé-ndó, ¿te ná ndéé ama vá dúcá<sup>n</sup>-gă cada-ndo-í? —càchí-gă xáha<sup>n</sup>-gă xií-yu.

Te ní xáha<sup>n</sup>-gă xii tée cùhú déhe-xi-á<sup>n</sup>:

—Taxi déhe-n ìha —cachí-gă xáha<sup>n</sup>-gă xii-dé.

42 Te òré cuáhá<sup>n</sup> tée cuechi-ă<sup>n</sup> nũú-gă, te espíritú cündìhi yucu ñávãha-á<sup>n</sup> nĩ dándùá ñáhá-xi xii-dé,

te sàhni yihí ñáhá tùcu-xi xii-dé ní cùu, dico Jèsús níhi ní càhá<sup>n</sup>-gá ní tenàá-gá espíritú-án, te ní quee ñaha-xi xii-dé, te ní nacuáha cuèndá ñáhá-gǎ xii-dé tǎtá-dě.

<sup>43</sup> Te nchaá-yu ní cuñúhu-yu sá dúcá<sup>n</sup> ñi cuu, te ní cachí-yu sá ïo càhnu cuu Yá Ndiõxí.

*Jèsús càhá<sup>n</sup> tucu-gá sá cùú-gá  
(Mt. 17:22-23; Mr. 9:30-32)*

Te ñini xícuñúhu-yu nàcuáa ní quide Jèsús, te ní xáha<sup>n</sup>-gǎ xii cue tée xìca cuu ndihi-gá:

<sup>44</sup> —Nchòhó cundedóho váha-ndo tnũhu na càhá<sup>n</sup>-í-a, te vá ná cuànaa-ndo, chi yúhú Tée cùu ñaní tnáhá-ndó nchàa-ndo sáá ï<sup>n</sup> nduu te cuáha cuèndá ñáhá-güedě xii-í núú cuè tée cùu úhú iní ñáhá —càchí-gá xáha<sup>n</sup>-gǎ xii-güedé.

<sup>45</sup> Dico cue tée-á<sup>n</sup> ñà túú ní tècú tnùní-güedé nàcuáa ndùu tnúhu ní xáha<sup>n</sup>-gǎ xii-güedé, te duca<sup>n</sup> ñi yáha-güedé, chi duca<sup>n</sup> tnàhí ní cachí-gá sá vǎ tècú tnùní-güedé, te ní yùhú-güedé cáca<sup>n</sup> tnúhú-güedé núú-gǎ nása ndùu tnúhu ní xáha<sup>n</sup>-gǎ xii-güedé.

*Cue tée ndùcu tnúhu núú tnáhá nũu  
ndédacàa-güedé ío-gá cúnùu*

*(Mt. 18:1-5; Mr. 9:33-37)*

<sup>46</sup> Te cue tée xìca cuu ndihi-gá ní ngüíta-güedé ndátnũhu-güedé nũu ndédacàa-güedé ío-gá cúnùu,

<sup>47</sup> dico Jèsús ní cutnùní iní-gá nàcuáa sàni iní-güedé nũu ní cana-gá ï<sup>n</sup> té lĩhli, te ní sanu tní ñaha-gǎ ï<sup>n</sup> xio dĩñi-gá.

<sup>48</sup> Te ní xáha<sup>n</sup>-gǎ xii-güedé:

—Nchaa ñáyiú na quèhe<sup>n</sup> cuèndá ï<sup>n</sup> té lĩhli dàtná té lĩhli-a cuèndá sá ñúhú iní ñáhǎ-yu xii-í ñá,

te cada iní-yu sá yǔhú ní quehe<sup>n</sup> cuendá-yu, te nchaa ñáyiú na quèhe<sup>n</sup> cuendá ñáhá xì yúhú, te cada iní-yu sá tnàhá Tătà-í Dútú Ndiǒxí Yaá ní tendaha ñàha xii-í véxi-í ñuyíú-a ní quehe<sup>n</sup> cuendá-yu. Te nchaa ñáyiú ío ndàhú iní-xi mee-ni xìnu cuechí-yu, ñáyiú-á<sup>n</sup> ïo-gá cúnùú-yu –càchí-gá xáha<sup>n</sup>-gǎ xii-güedé.

*Ñáyiú ñá túú cùu úhú iní ñáhá cùndìhi ñahá-yu xii-o*

*(Mr. 9:38-40)*

49 Te té Juàá ðiu-ni ì<sup>n</sup> téé xìca cuu ndìhi-gá ní xáha<sup>n</sup>-dě xii-gá:

—Mèstrú, ní xiní-ndí ì<sup>n</sup> téé càcunehe ñaha-dé xii-n, te ndèñuhu-dé espíritú cùndìhi yucu ñávàha yìhi ñaha xii ñáyiú, te nchúhú ñá túú ní dàña-gá-ndí duca<sup>n</sup> càda-dé, chi ñá túú xìca cuu ndìhi ñaha-dé xii-o –càchí-dé xáha<sup>n</sup>-dě xii-gá.

50 Te Jèsús ní xáha<sup>n</sup>-gǎ xii-dé:

—Daña-ndo na càda nahi-dé ní cùu, chi ñáyiú ñá túú cùu úhú iní ñáhá xì-o te cùndìhi ñahá-yu –càchí-gá xáha<sup>n</sup>-gǎ xii-dé.

*Jèsús càhá<sup>n</sup>-gá dóho té Jàcobó ndìhi té Juàá*

51 Te òré sa ta cùyatni ndaa Jesús andìu, te ní xica-gá cuáhá<sup>n</sup>-gá ñuú Jerusalén, chi duu<sup>n</sup> duu<sup>n</sup> ní sani iní-gá sá quìhí<sup>n</sup>-gá.

52 Te ní tendaha-gǎ cue téé yòdo nuu cuáhá<sup>n</sup>, te ní quexìo-güedé ì<sup>n</sup> ñuú, te ñuú-á<sup>n</sup> yíndèhu-xi distritú Sàmariá, te ndùcu-güedé ì<sup>n</sup> vehe cada túha-güedé òré quexìo-gá.

<sup>53</sup> Dico ñáyiú Sàmariá ñá túú ní cuíní-yu cuáñaha nùú-yu vehe, chi cuendá sá ñí cutnùní iní-yu sá ìchi yáha-ni-gá quíhí<sup>n</sup>-gá ñuú Jerusalén.

<sup>54</sup> Te sá dúcá<sup>n</sup> ñí quidé-yu ñá túú ní cuíní-yu cuáñaha nùú-yu vehe ndetatú-gá, núu ní xáha<sup>n</sup> tē Jàcobó ndihí té Juàá cue tée xìca cuu ndihí-gá xii-gá:

—Mèstrú, ¿cuíní-n càcá<sup>n</sup> táhú-ó nùú Yá Ndióxi cuendá dangáva-gá ñuhú danàa-gá ñáyiú ñuú-a dàtná ní quide té Èliás tée ní xóo cáhá<sup>n</sup> tnúhu Yá Ndióxi ndéé sanaha-ǎ<sup>n</sup>? —càchí-güedé xáha<sup>n</sup>-güedé xii-gá.

<sup>55</sup> Te Jèsús ní nchócótó-gǎ núú-güedé, te níhi ní cáhá<sup>n</sup>-gá dóho-güedé, te xáha<sup>n</sup>-gǎ:

—Nchòhó, chi ñá túú vǎha iní-ndó te núu duca<sup>n</sup> càhá<sup>n</sup>-ndó.

<sup>56</sup> Chi yúhú Tée cùu ñaní tnáhá-ndó nchàa-ndo véxi-í sá dácacu nihnu-í ñáyiú, te ñá díú vèxi-í sá dácuíta nihnu-í-yu —càchí-gá xáha<sup>n</sup>-gǎ xii-güedé.

Te sátá dúcá<sup>n</sup> ñí xáha<sup>n</sup>-gǎ, te ní xica-gá cuáhá<sup>n</sup>-gá ndihí-güedé ìngá ñuú.

*Ñáyiú cuíní chitnahá ñáhá xii Jesús ní cùu  
(Mt. 8:19-22)*

<sup>57</sup> Te ñùhu Jesús ichi ndihí-güedé, te ì<sup>n</sup> tée ní xáha<sup>n</sup>-dē xii-gá:

—Mèstrú, cuíní-í canchicú<sup>n</sup> ñáhà-í xii-n ndēni ní cuu na quíhí<sup>n</sup>-n —càchí-dé xáha<sup>n</sup>-dē xii-gá.

<sup>58</sup> Te Jèsús ní xáha<sup>n</sup>-gǎ xii-dé:

—Nchaa ñúcuii chi ndècu yaú cúú vèhe-güedi saquihí-güedi, te nchaa quiti ndàva caa tacá-güedi díquí yutnu, dico yúhú Tée cùu ñaní tnáhá-ndó nchàa-ndo chi ñá túú ndèè cáá vèhe-í ñuyíú-a ndetatú-í —càchí-gá xáha<sup>n</sup>-gǎ xii-dé.

59 Te dătnùní ní xáha<sup>n</sup> tùcu-ğá xii ìngá-dé:

—Yòhó taquìxi chitnahá ñáhá-n xii-í —càchí-ğá xáha<sup>n</sup>-ğă xii-dé.

Dico téé-á<sup>n</sup> ñí xáha<sup>n</sup>-dě xii-ğá:

—Mèstrú, dañá na nùhú-í cundetú-í cuú tătà-í te chindúxi-í-dé, te dătnùní quixi-í chitnahá ñáhá òuca<sup>n</sup>-ná-í xii-n —càchí-dé xáha<sup>n</sup>-dě xii-ğá.

60 Te Jèsús ní xáha<sup>n</sup>-ğă xii-dé:

—Daña ñăyiu ñá túú sàndáá ìní ñáhá xii-í ná chíndúxi tnàha meé-yu, chí ñăyiu-á<sup>n</sup> cúŷ-yu dătná ñăyiu ní xihí cuèi ndècu-ní-yu núú ñuyíú-a. Te yòhó taquìxi, chí quíhí<sup>n</sup>-n dànehé-n ñăyiu nàcuáa cada Yá Ndiòxí ndíhu ndaha ñàha-ğá xií-yu —càchí-ğá xáha<sup>n</sup>-ğă xii-dé.

61 Te ní xáha<sup>n</sup> tùcu ìngá-dé xii-ğá:

—Mèstrú, cuìní-í chitnahá ñáhà-í xii-n, dico díhna-ğá dañá na nùhú-í cada ndee ìní-í nchaa ñăyiu ndècu vehe-í, te dătnùní quixi-í —càchí-dé xáha<sup>n</sup>-dě xii-ğá.

62 Te Jèsús ní xáha<sup>n</sup>-ğă:

—Nchaa ñăyiu ní sàndáá ìní ñáhá xii-í, te núu vá cànchícú<sup>n</sup> nihnu ñàhá-yu ñi yùhu ñi ìní-yu, te cùú-yu dătná ì<sup>n</sup> téé ní tñi ndaha làtú cutu-dé, chí téé-á<sup>n</sup> núu na ndàcoto-dé ndàa sátá-dě òré xítú-dě, te vá quíhí<sup>n</sup> ndáá làtú-dé duca<sup>n</sup> sàtnahá-xi cùú-yu. Te cue ñăyiu chí vá cúú ndăá-yu nàcuáa ndíhu ndaha-ğá dawa-ğá ñăyiu— càchí-ğá xáha<sup>n</sup>-ğă xii-dé.

## 10

*Jèsús téndàha-ğá únídico úxí cue téé quíhí<sup>n</sup> cáhán  
tnúhu-ğá núú ñăyiu*



1 Te sáta dúcá<sup>n</sup> ñi cuu, te ní cáxi tucu Xítoho Jesucristú únídico úxí cue tée codonu-güedé quíhí<sup>n</sup>-güedé cáhá<sup>n</sup>-güedé tnúhu-gá nchaa ñuu, ndihi nchaa dava-gá xichi núu quíhí<sup>n</sup>-gá, te ndi ndúú ndi ndúú-güedé tendaha ñaha-gá xii-güedé quíhí<sup>n</sup>-güedé.

2 Te cùmání-gă caca-güedé, te ní xáha<sup>n</sup>-gă xii-güedé:

—Nchòhó xìní-ndó sã òré ná sàá yóo cuu nchaa sá xítú ñăyiu, te ío vâi cuu. Te na câchí tnúhu ndáá-í xii-ndo sã dâtná vâi sá xítú ñăyiu cùu, duca<sup>n</sup> ío vâi ñăyiu cùmání cundedóho tnúhu Yá Ndiôxí te ío sacú ñăyiu dâcuaha ñaha xii-yu tnúhu-gá, núu xíá<sup>n</sup> xíní ñùhu-xi cácá<sup>n</sup>-ndó núú Yá Ndiôxí cuendá sá ná dâcáhá<sup>n</sup>-gá iní ñăyiu cáhá<sup>n</sup>-yu tnúhu-gá núú ñăyiu cùmání cundedóho tnúhu-gá.

3 Te nchòhó cúú-ndó dâtná cue mbéé cue quiti cuáhá<sup>n</sup> núu yíhí cuè quiti déé<sup>n</sup>. Chi tendaha ñaha-í xii-ndo quíhí<sup>n</sup>-ndó núú xíndecu nchaa ñăyiu cuihna iní-xi.

4 Te vá cánèhe-ndo ñunu cuhu<sup>n</sup> ndachiu<sup>n</sup>-ndo, ni núú cúhú<sup>n</sup> dîhú<sup>n</sup>-ndó, te ni vâ cádá tûha-gá-ndó chàú-ndó chi dîu-ni chàú yíhí-ndó-ă<sup>n</sup> xíá<sup>n</sup>-ni quíhi-ndo, te vá ío cuyaa-ndo cáhá<sup>n</sup> ndihi-ndo ñăyiu ñùhu ichi.

5 Te òré ná quèxio-ndo ï<sup>n</sup> vehe, te duha cúñaha-ndo xii ñăyiu dii vèhe-xi-á<sup>n</sup>: “Yá Ndiôxí chindee ñaha-gá xii-ndo ío váha cuu iní-ndó cùndecu-ndo”, duha cúñaha-ndo xii-yu.

6 Te núu ñăyiu-á<sup>n</sup> ñi nduu táhŭ-yu sá cùndècu váha iní-yu núú Yá Ndiôxí, te cuu-xi sá vâha sá cúú-xi-yu tnúhu cúñaha-ndo-ă<sup>n</sup>, dico núu ñá túú ní

càhá<sup>n</sup> váha ndíhi ñàhá-yu xii-ndo, te cúñaha-ndo sã vã cúú-xí sã vãha sá cúú-xí-yu. Dico núu ní cáhá<sup>n</sup> váha ndíhi ñàhá-yu xii-ndo,

7 te ðiu-ni vehe-á<sup>n</sup> cada vehe tnaa-ndo, te ñá túú-gã ndéé nducu-ndo vèhe cundecu-ndo, te caxi-ndo nchàa sá ná tàxí-yu, chi nchaa cue téé quide chiu<sup>n</sup> dacu:ítí tàú-güedé sá ñihí-güedé sá cáxí-güedé cuendá nchaa chiú<sup>n</sup> quide-güedé.

8 Te núu ní sáá-ndó ì<sup>n</sup> ñúú núú ñí quehe<sup>n</sup> cuendá ñáhã-yu xii-ndo, te caxi-ndo nchàa sá ná tàxí-yu.

9 Te cada tátna-ndo cuè ñáyíu cùhú xĩndecu ñúú-á<sup>n</sup>, te cúñaha-ndo xíí-yu sá sà ní sáá nduu ndíhu ndaha ñàha Yá Ndiõxí xíí-yu.

10 Dico núu ní sáá-ndó ì<sup>n</sup> ñúú núú ñà túú ní quehe<sup>n</sup> cuendá ñáhã-yu xii-ndo, te tní<sup>n</sup>-ndo ìchi cuita cáhá<sup>n</sup>-ndó cuãhá<sup>n</sup>, te cúñaha-ndo xíí-yu:

11 “Ndéé tícá chúhmá ñí tní<sup>n</sup> sáhá-ndí ñúú-ndó nàquidi-ndí, te duha quide-ndí cuendá cutnùní iní-ndó sã ñà túú quide váha-ndo ndècu-ndo. Dico cunaha-ndo sã sà ní sáá nduu ndíhu ndaha ñàha Yá Ndiõxí xii-ndo ni cùu”, duha cúñaha-ndo xíí-yu.

12 Te na càchí tnúhu-í xii-ndo sã ná sàá nduu càda ndáá Yá Ndiõxí cuéchi nchaa ñáyíu, te ñáyíu ñúú-á<sup>n</sup> ïo-gá ndohó-yu dàvá-á<sup>n</sup> dàcúúxí ñáyíu ñúú Sòdomá —càchí-gá xáha<sup>n</sup>-gã xii-güedé.

*Cuendá ñáyíu dava ñúú ñá túú sàndáá iní tnúhu Xítoho Jesucrístú*

*(Mt. 11:20-24)*

13 Te Jèsús xáha<sup>n</sup>-gã xii ñáyíu dava ñúú ñá túú sàndáá iní tnúhu-gá:

—¡Ndàhú nchòhó cue ñáyíu ñúú Coràzín! ¡Te ndàhú nchòhó cue ñáyíu ñúú Bètsaidá! Chi núu ðicó

ñuú Tìrú, ndihì ñuú Sìdón ní quide-í nchaa sá vǎ yǎo tnàhí ndàcu cada datná ní quide-í ñuú-ndó-án nǐ xiní-ndó ñá, te sá ndéé ama-gá cuihnú-yu dóo ndàhú, te cunucóo-yu núú yáá cuèndá sá ndíxí cuèchi iní-yu sá ñà túú quide váha-yu ni cùu.

<sup>14</sup> Dico sáá nduu te ío-gá dandòho ñaha Yá Ndiǒxí xii-ndo dàcúúxí ñǎyiu ñuú Tìrú, ndihì ñáyiu ñuú Sìdón.

<sup>15</sup> Te nchòhó ñáyiu ñuú Capèrnaúm quide iní-ndó sǎ sà cuánda-ndo àndiu, dico ñáhá chi núú ùhú núú ndàhú cundecu-ndo –duha ní xáha<sup>n</sup>-gǎ xii nchaa ñáyiu ñuú-án.

<sup>16</sup> Te xǎha<sup>n</sup> tùcu-gá xii cue téé tendaha-gǎ quíhín cáhá<sup>n</sup> tnúhu-gá-án:

–Nchaa ñáyiu na cùndedóho nchaa tnúhu cáhá<sup>n</sup>-ndó, te cada iní-yu sá yǔhú càhá<sup>n</sup>-í ndèdóho-yu, te nchaa ñáyiu na dàquee tihú ñáhá xii-ndo, te tnàhá yúhú daquèe tihǔ-yu, te nchaa ñáyiu duca<sup>n</sup> na dàquee tihú ñáhá xii-í, te tnàhá Tǎtà-í Dútú Ndiǒxí Yáá ní tendaha ñàha xii-í véxi-í ñuyíú-a dàquee tihǔ-yu –càchí-gá xáha<sup>n</sup>-gǎ xii-güedé.

Te duca<sup>n</sup> te ní xica-güedé cuáhá<sup>n</sup>-güedé.

*Ní nasáá cue téé únídico úxí ní tendaha Jèsús ní sáhá<sup>n</sup> ní cáhá<sup>n</sup> tnúhu-gá núú ñáyiu*

<sup>17</sup> Te cue téé únídico úxí-án nǐ nasáá-güedé te súúní cùdíí iní-güedé, te xǎha<sup>n</sup>-güedé xii Jèsús:

–Mèstrú, ndéé espíritú cùndihì yucu ñávàha sàndáá iní ñáhá-xí xii-ndí òré cǎcú nèhe ñaha-ndí xii-n –càchí-güedé xǎha<sup>n</sup>-güedé xii-gá.

<sup>18</sup> Te Jèsús ní xáha<sup>n</sup>-gǎ:

—Ndáá càhá<sup>n</sup>-ndó chi yúhú ní xíní-í cútnàhá ní xíta nihnu yucu ñávãha, chi dàtná ní ngava ì<sup>n</sup> tasa<sup>n</sup> nĩ ngava-xi ñuyúú-a.

<sup>19</sup> Te dàtná quidé-ndó òré xěnihnu-ndo ì<sup>n</sup> cóó, àdi ì<sup>n</sup> nchacua duca<sup>n</sup> cada-ndo daquee tíhú-ndó yùcu ñávãha, te ñá túú nã cada ñaha-xi xii-ndo, chi ní taxi-í tnúhu ndee ìní ndécú ndìhi-ndo.

<sup>20</sup> Dico vá cúde ìní-ndó cuendá sá sàndáá ìní ñáhá cuè espíritú cündìhi yucu ñávãha xii-ndo, chi cúde ìní-ndó cuendá sá sà yodo tnuní-ndó nũú tütú Yã Ndiõxí Yáá ndécú àndiù —cachí-gá xáha<sup>n</sup>-gã xii-güedé.

*Jèsús cúde ìní-gá*  
(Mt. 11:25-27; 13:16-17)

<sup>21</sup> Te òré-án sũúni nĩ quide dũ ìní ñáhá Espíritú Yã Ndiõxí xii Jèsús, te ní xáha<sup>n</sup>-gã xii Yá Ndiõxí:

—Yòhó Tãtà-í Dútú Ndiõxí, ío chĩñuhu ñaha-í xii-n chi diù-n tàxi tnuní-n àndiù ndìhi ñuyúú-a, te dànehé-n cuè ñáyiù nchaa tnúhu váha, te diù-ni ñáyiù-á<sup>n</sup> cúũ-yu ñáyiù ñá túú cùtnuní ìní-xi nchaa tnúhu càhá<sup>n</sup> cue téé túha, te nchaa tnúhu càhá<sup>n</sup>-n-ã<sup>n</sup> ñà túú ní dàtúu-n nũú ñáyiù càchí sá ìo túha, te ío váha sàá díquí-xi. Te duca<sup>n</sup> quide-n, chi duca<sup>n</sup> cuìní-n cùnduu —cachí-gá xáha<sup>n</sup>-gã xii Yá Ndiõxí.

<sup>22</sup> Te xáha<sup>n</sup> tùcu-gá xii cue téé ní nasáá-á<sup>n</sup>:

—Mee Tãtà-í Dútú Ndiõxí ní cachí-gá sá cùnùu-í núú nchaa-ndi túhú sá ìó. Te vá yõ ì<sup>n</sup> xìní nàcuáa sàni ìní yúhú Déhe Dútú Ndiõxí, chi ì<sup>n</sup>dii díí-ni mee-gã xíní-gá nàcuáa sàni ìní-í. Te duca<sup>n</sup> ì<sup>n</sup>dii-ni yúhú xíní-í nàcuáa sàni ìní mée-gã, te nchaa ñáyiù càchí ìní-í sá quìní-yu nàcuáa sàni

iní Tătà-í Dútú Ndiöxí te xǐtnũhu-í-yu, te vá yõ ñ<sup>n</sup>-gá xìní nàcuáa sàni iní-gá chi ðiu-ni ñáyiu duca<sup>n</sup> xǐtnũhu-í-á<sup>n</sup> xìní-yu —càchí-gá xáha<sup>n</sup>-gã xii-güedé.

23 Te ní nchócótó-gã núú xǐndecu mee-ni cuè téé xìca cuu ndihí-gá, te ní xáha<sup>n</sup>-gã xii-güedé:

—Váha táhú nchòhó ndihí nchaa ñáyiu ndèhe nchaa nacuáa quide-í vitna.

24 Chi ío cuéhé cue téé ní xóo cáhá<sup>n</sup> tnúhu Yá Ndiöxí ndéé sanaha, ndihí cue téé ní xǐndaha ñàha xii ñáyiu ní cuiní-güedé cundehe-güedé nchaa sá ndéhé-ndó quide-í vitna, te ñá túú ní xìní-güedé, te ní cuiní-güedé cundedóho-güedé nchaa tnúhu càhá<sup>n</sup>-í ndédóho-ndo vitna, te ñá túú ní xǐndédóho-güedé —càchí-gá xáha<sup>n</sup>-gã xii-güedé.

*Nàcuáa ní quide ñ<sup>n</sup> téé ðistrítú Sàmariá*

25 Te ñ<sup>n</sup> téé ðàcuaha ñàha xii ñáyiu nchaa tnúhu ní chídó tnùní ndíi Moisés ní ndacuñí-dé xító ndéé-dé Jèsús nũ nása cunduu tnúhu cáhá<sup>n</sup>-gá, te xáha<sup>n</sup>-dë xii-gá:

—Mèstrú, ¿ná cúú sã cáda-í cuendá nduu táhù-í cundecu-í ndihí Yá Ndiöxí ni caa ni quíhí<sup>n</sup>-í? —càchí-dé xáha<sup>n</sup>-dë xii-gá.

26 Te Jèsús ní xáha<sup>n</sup>-gã xii-dé:

—Cuiní-í cachí tnúhu-n nãsa càhá<sup>n</sup>-xi núú tütú ndíi Moisés —càchí-gá xáha<sup>n</sup>-gã xii-dé.

27 Te xáha<sup>n</sup>-dë xii-gá:

—Ndíi Moisés càchí ndíi núú tütú ndíi: “Cuu iní-ndó Dútú Ndiöxí Yaá cúú Ndiöxí-ndó ni yuhu ni iní-ndó, te cani iní-ndó càda-ndo datná cuiní méé-gã, te mee-ni tnũhu váha cani iní-ndó nàcuáa cuu vii cuu váha-ndo nũú-gã, te coo iní-ndó cùu iní-ndó-gã. Te cuu iní-ndó tnàha ñáyiu-ndo dàtná

cúú ìní-ndó mèe-ndo”, duha càchí ndíi núú tùtú ndíi —càchí-dé xáha<sup>n</sup>-dě xii-gá.

28 Te Jèsús ní xáha<sup>n</sup>-gă:

—Váha-ni càhá<sup>n</sup>-n, te núu cada-n nàcuáa càhá<sup>n</sup>-n ă<sup>n</sup>, te nduu táhú-n cùndecu-n ndihì Yá Ndiǒxí ní caa ní quíhí<sup>n</sup> —càchí-gá xáha<sup>n</sup>-gă xii-dé.

29 Te sá dúcá<sup>n</sup> nǐ xáha<sup>n</sup> Jèsús xii-dé nǔu ndùcu-dé nàcuáa cada-dé cácu nihnu-dé núú tǔǔhu ní cáhá<sup>n</sup>-dé, te ní xícá<sup>n</sup> tǔnúhú-dě núú-gă, te xáha<sup>n</sup>-dě:

—¿Yoo cùu tǔaha ñáyiu-í-í? —càchí-dé xáha<sup>n</sup>-dě xii-gá.

30 Te Jèsús ní cani-gá ì<sup>n</sup> cuèndú núú-dě nàcuáa tecú tǔnì-dé tǔnúhu-gă, te xáha<sup>n</sup>-gă:

—Ì<sup>n</sup> téé ní ndee-dé ñúú Jerusàlén ñúhú-dě ichi cuánuu-dé cuáhá<sup>n</sup>-dé ñúú Jerìcò, te ní quee ñadúhú ichi-dé ní dúhú-güedě dóó níhnu-dě, ndihì nchaa sá néhé-dě, te ní caniha vìhi-güedé, te nchìto ñiu-ná-dé ní dáñá ñàha-güedé te cuáhá<sup>n</sup>-güedé.

31 Te mei òré cátù-dé-á<sup>n</sup> ñúhú ì<sup>n</sup> dútú ichi-á<sup>n</sup>, te òré ní xiní ñáhá dǔtú-ă<sup>n</sup> xii-dé, te ì<sup>n</sup> xio-ni ní xócòo ndee-dé ní yáha-dé.

32 Te ñúhu tucu ì<sup>n</sup> téé cùu levítá ichi-á<sup>n</sup>, te òré ní xiní-dé téé-á<sup>n</sup> cátù-dé, te ñiu-ni duca<sup>n</sup> nǐ guide-dé ì<sup>n</sup> xio-ni ní xócòo ndee-dé ní yáha-dé.

33 Dico ì<sup>n</sup> téé distritú Sàmariá ñúhú tucu-dé ichi-á<sup>n</sup> te òré ní xiní-dé téé-á<sup>n</sup> cátù-dé, te ní cundàhú iní ñáhá-dě.

34 Te ní sáhá<sup>n</sup>-dé núú cátùu téé-á<sup>n</sup>, te ní guide tátna-dé nchaa núú nǐ nícuèhé xii téé-á<sup>n</sup> nǐ chíhi-dé yúcu, te ní dácútú-dě. Te dǎtnùní ní dácáá ñàha-dé sátá quiti-dé, te ndèca ñàha-dé cuáhá<sup>n</sup> ì<sup>n</sup> vehe núú sácòo cue ñáyiu sàcúhu<sup>n</sup> ichi, te yàcá<sup>n</sup> ní xito ñàha-dě.

35 Te ingá nduu òré ní nucúhu<sup>n</sup> téé Samaritànú-án ichi, te ní tava-dé úú díhú<sup>n</sup> denàriú, te ní sáha-dé téé cùu xítóhó vehe-án, te ní xáha<sup>n</sup>-dě: “Coto saú-n tée-a, te núu ñá ní tnàhá díhú<sup>n</sup> sã nĩ taxi-í, te cuèi na dàndoñuhu-gá-n dĩhú<sup>n</sup>-n cuèndá-dé, te òré ná quixi tucu-í te nacháhu-í”, duha ní xáha<sup>n</sup> tée Samaritànú-án xii tée dii vèhe xián.

36 Te vitna cáhá<sup>n</sup>, te núu ndédacàa cue téé úní-án cúú-güedé téé váha cùu iní-güedé tnàha ñáyiú-güedé —càchí-gá xáha<sup>n</sup>-gã xii tée dàcuaha ñaha xii-í ñáyiú-án nchaa tnúhu ní chídó tnùní ndíi Moisés.

37 Te téé-án nĩ xáha<sup>n</sup>-dě xii-gá:

—Tée ní cundàhú iní ñáhá xii tée ní dánĩcuèhé ñáhá cuè ñaduhú-án, téé-án cúú-dě téé cùu iní tnàha ñáyiú-xi —càchí-dé xáha<sup>n</sup>-dě xii-gá.

Te Jèsús ní xáha<sup>n</sup>-gã:

—Cuàhá<sup>n</sup> te diu-ni duca<sup>n</sup> càda-n tnahá-n —càchí-gá xáha<sup>n</sup>-gã xii-dé.

### *Jèsús ndécú-gã vehe tá Mǎrta ndĩhi tá Mǎriá*

38 Te Jèsús ñúhú-ni-gã ichi cuáhán-gá ndĩhi cue téé xica cuu ndĩhi-gá, te ní sáá-gá ì<sup>n</sup> ñuú líhli, te xián nĩ quee ì<sup>n</sup> xíchí nání Mǎrta ní cáhá<sup>n</sup> ñáhá-xi xii-gá vehe-xi.

39 Te tá Mǎrta ndècu ì<sup>n</sup> cúhú-xi nàni-xi Mariá, te xíchí-án nĩ ngóo-xi núú Jèsús ndédóho-xi nchaa tnúhu càhá<sup>n</sup>-gá.

40 Te tá Mǎrta-án ndĩhi vihi-ni iní-xi quide-xi chiu<sup>n</sup>-xi, te ní sáhán-xi núú Jèsús, te ní xáha<sup>n</sup>-xi:

—Mèstrú, ¿náa ñá túú tnàhí sàni iní-n sã nĩ dándõ ndaha ñaha cúhù-í nchaa chù<sup>n</sup>-án? Cúñaha sàú ná quixi-xi chindee ñaha-xi —cachí-xi xáha<sup>n</sup>-xi xii-gá.

41 Dico Jèsús ní xáha<sup>n</sup>-gă:

—Yòhó Mǎrta, ñùhu tneñu vihi-n, te ndìhú iní-n sǎ ïo vǎi chiu<sup>n</sup>-n ñuhu,

42 dico xìni ñuhu vihi-gá-xi cundedóho-n tnùhu càhá<sup>n</sup>-í, chi tá Mǎriá-a sa ndèdóho-xi tnùhu-í, te vá yǒo ì<sup>n</sup> ndacu xocàni tnùhu-í sá ñi ngúndecu ndìhi-xi —càchí-gá xáha<sup>n</sup>-gă xii-xi.

## 11

*Jèsús dánèhé-gá cue téé xica cuu ndìhi-gá nàcuáa càhá<sup>n</sup> ndìhi-güedé Yǎ Ndiǒxí*  
(Mt. 6:9-15, 7:7-11)

1 Te ì<sup>n</sup> nduu càhá<sup>n</sup> ndìhi Jèsús Yǎ Ndiǒxí ì<sup>n</sup> xichi, te sátá ñi yáha ní càhá<sup>n</sup> ndìhi-gá Yǎ Ndiǒxí, te ní xáha<sup>n</sup> ì<sup>n</sup> téé xica cuu ndìhi-gá xii-gá:

—Mèstrú, danèhé ñáhá xì-ndí nása càhá<sup>n</sup> ndìhi-ndí Yǎ Ndiǒxí dàtná ní quide ndíi Juàá ní dánèhé ndíi cue téé ní xica cuu ndìhi ndíi —càchí-dé xáha<sup>n</sup>-dè xii-gá.

2 Te Jèsús ní xáha<sup>n</sup>-gă:

—Òré càhá<sup>n</sup> ndìhi-ndo Yǎ Ndiǒxí, te cachí-ndó: Yòhó tǎtá-ndí Dútú Ndiǒxí Yaá ndécú àndiù, nchaa ñáyiu na càhá<sup>n</sup>-yu sá cúú-n Yàá ío yiñùhu. Te xicá<sup>n</sup> táhú-ndí núú-n sǎ ná sàá nduu ndíhu ndàhá-n-yu.

Te cada-n dàtná càchí iní-n ñùyíú-a dàtná quidé-n àndiù.

3 Te xicá<sup>n</sup> táhú-ndí núú-n sǎ táxí-n sǎ cándèca iní-ndí ì<sup>n</sup> nduu ì<sup>n</sup> nduu.

4 Te cada càhnu iní-n nchaa yícá cuèchi-ndí, chi tnàhá nchúhú quidé càhnu iní-ndí nchaa sá quidé ñàha tnaha ñáyiu-ndí.



Te vá dáñá-n dàcahá<sup>n</sup> ñáhá yùcu ñávãha xii-ndí  
 cada-ndí sá ñà túú vãha, chi coto ñaha-n  
 xii-ndí cuendá sá vã dúcá<sup>n</sup> càda ñaha-xi,  
 duha cáhá<sup>n</sup>-ndó  
 —càchí-gá xáha<sup>n</sup>-gã xii-güedé.

<sup>5</sup> Te Jèsús ní xáha<sup>n</sup> tùcu-gá:

—Te núu ndëdacàa nchohó ndécú ì<sup>n</sup> téé tnàha  
 tnúhu ndìhi-ndo, te dava niú cuáhá<sup>n</sup>-ndó vehe-dé,  
 te òré ní quexìo-ndo, te xáha<sup>n</sup>-ndo xii-dé: “Véxi-í  
 nũu vá cündèe iní-n tàxi nuu-n úní tnàhá pàa,

<sup>6</sup> chi ì<sup>n</sup> téé xìní tnáhá ndìhi-í ñúhú-dě ichi ní  
 quexìo-dé vehe-í, te ñá túú tnáhi ná cuãñaha-í  
 caxi-dé”, quesaha-ndo cũñaha-ndo.

<sup>7</sup> Te téé-á<sup>n</sup> cãhá<sup>n</sup>-dé ndéé xití vehe-dé, te  
 cúñaha-dě xii-ndo: “Vá dásàtú nihá-n chi ndèdí  
 yuyèhe-í, te càa-í ndìhi cue landú-í, te vá cúú  
 ndàcòo-í taxi-í sá cuìní-n”, quesaha-dě cúñaha-dě  
 xii-ndo.

<sup>8</sup> Te na càchí tnúhu-í xii-ndo sã cuëj cùu-dé  
 téé tnàha tnúhu ndìhi-ndo, dico duca<sup>n</sup> cũñaha-dě  
 xii-ndo, dico dacuití sã ndácõo-dé taxi-dé sá  
 cuìní-ndó cuendá sá vã dásàtú-gá-ndó ìní-dé.

<sup>9</sup> Te yúhú càchí-í xii-ndo sã cãcá<sup>n</sup>-ndó nũu  
 ná cuìní-ndó nũú Yá Ndiõxí te taxi-gá. Te  
 vá dáñá ndéé-ndó cãcá<sup>n</sup>-ndó nũú-gã nũu ná  
 cuìní-ndó, te duca<sup>n</sup> te níhi-ndó. Te cada iní-ndó  
 sã ñí quexìo-ndo vehe ì<sup>n</sup> tnaha ñáyiu-ndo te ní  
 cáhá<sup>n</sup>-ndó, te ñáyiu-á<sup>n</sup> ñí tedóho ñàhá-yu xii-ndo  
 te ní nacaá<sup>n</sup>-yu yuyèhe. Te duca<sup>n</sup> càda iní-ndó chi  
 Yá Ndiõxí tedóho ñaha-gã xii-ndo, te taxi-gá sá ná  
 càcá<sup>n</sup>-ndó nũú-gã.

<sup>10</sup> Chi nchaa ñáyiu duca<sup>n</sup> xíquide te Yá Ndiõxí  
 tédóho ñaha-gã xií-yu ñíhi-yu sá cuìní-yu. Te diu-ni

duca<sup>n</sup> tùcu nchaa ñáyiú na càcá<sup>n</sup> núú-gǎ ì<sup>n</sup> sá cuíní-yu, chi sǎñaha-gǎ sá xìcá<sup>n</sup>-yu núú-gǎ. Te ñiú-ni duca<sup>n</sup> tùcu níhí nchaa ñáyiú ñá túú òdǎña ndeé xìcá<sup>n</sup> núú Yá Ndiòxí sá cuíní-yu, chi ñihí-yu.

11 Te nchòhó cue téé cùu tátá ñá túú cùndee iní-ndó cuǎha-ndo cuè déhe-ndo ì<sup>n</sup> yúú caxi-güexi òré xìcá<sup>n</sup>-güexi ì<sup>n</sup> pàá núú-ndó càxi-güexi, te ni ñà túú cùndee iní-ndó cuǎñaha-ndo ì<sup>n</sup> cóo caxi-güexi òré xìcá<sup>n</sup>-güexi ì<sup>n</sup> chácá núú-ndó càxi-güexi.

12 Te ni ñà túú cùndee iní-ndó cuǎñaha-ndo ì<sup>n</sup> nchacua caxi-güexi òré xìcá<sup>n</sup>-güexi ì<sup>n</sup> ndíú núú-ndó càxi-güexi.

13 Te nchòhó cuèi ndèé dau sàá iní-ndó, dico sǎha-ndo cuè déhe-ndo sǎ vǎha xèxi-güexi òré xìcá<sup>n</sup>-güexi núú-ndó. Te núu nchòhó duca<sup>n</sup> quide-ndo, ìte uu<sup>n</sup>-gá duca<sup>n</sup> quide Tátá-ndó Dütú Ndiòxí Yaá ndécú àndiú, chi taxi-gá Espíritú-gá cundecu ndìhi-ndo te núu na càcá<sup>n</sup>-ndó núú-gǎ! —càchí-gá xáha<sup>n</sup>-gǎ xii-güedé.

*Càchí-güedé sá ndécú ndìhi Jesús yucu ñávǎha  
(Mt. 12:22-30; Mr. 3:20-27)*

14 Te Jèsús ndèñùhu-gá espíritú cùndìhi yucu ñávǎha yìhi ñaha xii ì<sup>n</sup> téé ní quide ñihí-xi, te òré ní ndee ñaha espíritú-á<sup>n</sup> xii téé-á<sup>n</sup>, te ní nacáhá<sup>n</sup>-dé. Te ío ní cuñúhu ñáyiú sá dúcá<sup>n</sup> ñí quide-gá.

15 Te davá-yu ní xítñàhá-yu:

—Tée-a ndèñùhu-dé nchaa espíritú cùndìhi sácúhñá yìhí ñaha xii ñáyiú, chi ñiú-ni sácúhñá-á<sup>n</sup> chíndèe ñaha-xi xii-dé, te ñiú-ni-xi tàxi tnuní-xi nchaa espíritú-á<sup>n</sup> —càchí-yu xítñàhá-yu.

16 Te davá-yu xìto ndeé ñáhă-yu xii-gá, te xăhă<sup>n</sup>-yu sá ná cádá-gă ì<sup>n</sup> sá vă yôo tnàhí ndàcu cada ñuyíú-a cundèhé-yu nàcuáa cutnùní iní-yu núu ndáá sá Yă Ndiöxí ní tendaha ñàha-gá xii-gá véxi-gá ñuyíú-a.

17 Dico mee-gă sa ní cutnùní iní-gá nchaa nàcuáa sàni iní-yu, núu ní xáha<sup>n</sup>-gă xií-yu:

—Te nchòhó xìní-ndó să nŭu ì<sup>n</sup> tée yìndaha ì<sup>n</sup> nació<sup>n</sup> vá cúú ì<sup>n</sup>nuu-dé ndìhì cue tée cùndìhì-dé, te vá cúđĩ-dé cunu-dě. Te ḍi-u-ni duca<sup>n</sup> sătnahá tucu-xi cùu cue ñáyiu x̣ìndecu ì<sup>n</sup>-ni vèhe, chi núu vá cúú ì<sup>n</sup>nuú-yu cundecú-yu, te vá cúđĩ-yu cundecu càhnú-yu.

18 Te duca<sup>n</sup> sătnahá-xi cùu sàcuíhná, chi núu vá cúú ì<sup>n</sup>nuu-xi ndìhì nchaa espíritú cùndìhì-xi te vá cúđĩ-xi cundecu-xi taxi tnùní-xi. Te duha càhá<sup>n</sup>-í chí nchòhó càchí-ndó să sàcuíhná chíndèe ñaha-xi xii-í quèñùhu-í nchaa espíritú cùndìhì-xi yìhì ñaha xii ñáyiu.

19 Te núu yúhú quidé cuendá-ndó să sàcuíhná chíndèe ñaha-xi xii-í, te xìnì ñuhu-xi cada cuendá-ndó yòo chindee ñaha xii cue tée xìca cuu ndìhì-ndo queñuhu-güedé nchaa espíritú cùndìhì-xi yìhì ñaha xii ñáyiu. Te mee-güedé càchí-güedé sá nchòhó ñá túú càhá<sup>n</sup> ndáá-ndó să dúcá<sup>n</sup> càhá<sup>n</sup>-ndó.

20 Te ndáá sá Yă Ndiöxí chíndèe ñaha-gá xii-í quèñùhu-í nchaa espíritú cùndìhì sàcuíhná yìhì ñaha xii ñáyiu, te xíă<sup>n</sup> cutnùní iní-ndó să sà ní sáá nduu ndìhu ndaha ñaha Yă Ndiöxí xii-ndo.

21 'Te núu ì<sup>n</sup> tée ío ndee, te súúní ñǎ cáá-dě, te ndèé-dé vehe-dé cuendá sá vă cuíta, te ní quide

túha-dé titní sá dĕé<sup>n</sup>, te ío váha nèhe váha-dé nchaa ndachìu<sup>n</sup>-dé.

<sup>22</sup> Dico núu quexìo ingá tée ío-gá ñí cáá te ndee-gă-dé, te ngúíta-dé nàá-dé ndìhi tée ndèè vehe-xi-á<sup>n</sup>, te cada cànarí ñáhá tĕe-á<sup>n</sup> xii tée ndèè vehe-xi-á<sup>n</sup>, te quendeé-dé nchaa sá dĕé<sup>n</sup> cùndèe iní-dé, te taxi tnùnì-na-dé nchaa xíă<sup>n</sup>, ndìhi nchaa sá ndécú ndìhi-dé, te dàcáhñu-dé nchaa cue tée cùndìhi-dé nchaa sá ná ñìhí-dé.

<sup>23</sup> Te nchaa ñáyìu ñá túú cùndìhi ñaha xii-í, te cùu úhú iní ñáhă-yu, te nchaa ñáyìu ñá túú chìndee ñaha xii-í, te dàquee tíhŭ-yu chìu<sup>n</sup> quide-í.

*Espiritú cùndìhi yucu ñávăha sá nánchòcáva xito cùu uú*  
(Mt. 12:43-45)

<sup>24</sup> Te òré ná quèe ñaha ì<sup>n</sup> espíritú cùndìhi yucu ñávăha xii ì<sup>n</sup> ñáyìu, te cuáhá<sup>n</sup>-xi ndùcu-xi ì<sup>n</sup> xi-chi núú cùndècu-xi te ñá ñìhí-xi, te ní sanì iní-xi: “Váha-gá núhú tucu-í núú ñí xíndecu-í”, duha ní sanì iní-xi.

<sup>25</sup> Te cuánuhú-xi, te òré ní nasáá-xi, te ní xiní-xi sá cáá ìní ñáyìu-á<sup>n</sup> dàtná cáá-ñă ì<sup>n</sup> vehe ní natíhú, chi ní nduu vii-ná, vá yŏo-gá ndécú.

<sup>26</sup> Te sátá dúcá<sup>n</sup> te ní xica-xi cuáhá<sup>n</sup>-xi cuándúcú-xí ũsá tnàhá espíritú cùndìhi-xi sá nèhé víhí-gă xíquide, te òré ní ñìhí-xi cue espíritú-á<sup>n</sup> te ndèca ñaha-xi cuáhá<sup>n</sup> cuendá ngúndecu ndìhi-xi ñáyìu-á<sup>n</sup>, te ñáyìu-á<sup>n</sup> uu<sup>n</sup>-gá nándi yáha-yu dàcúúxí ndèè díhna –càchí-gá xáha<sup>n</sup>-gă xií-yu.

*Cuendá ñáyìu cùu váha ndisa iní-xi*

<sup>27</sup> Te ñini càhá<sup>n</sup> Jèsús tnúhu-á<sup>n</sup> núú ñáyìu ní cáhá<sup>n</sup> ñìhi ì<sup>n</sup> ñadìhí tnuú-yu, te xăha<sup>n</sup>-a<sup>n</sup> xii Jèsús:

—¡Sá vǎha táhú ñadìhí ní dácácú ñàha xii-n, te ní dácúéhnú ñàha-a<sup>n</sup>! —cachí-a<sup>n</sup> xǎha<sup>n</sup>-a<sup>n</sup> xii-gá.

28 Te Jèsús ní xáha<sup>n</sup>-gǎ:

—¡Váha-gá táhú nchàa ñáyiú sàcúndedóho nchaa tnúhu càhá<sup>n</sup> Yǎ Ndiǒxí te sàndáá iní-yu! —càchí-gá xáha<sup>n</sup>-gǎ xii-a<sup>n</sup>.

*Ñáyiú ñá túú sàndáá iní ñáhá xii Jesús cuiní-yu cada-gá ñ<sup>n</sup> sá vǎ yǒo tnàhí ndàcu cada*

*(Mt. 12:38-42; Mr. 8:12)*

29 Te ta tàcá vǎi ñáyiú te dàdehnde tnaha-ná-yu, te ní ngúíta Jèsús xáha<sup>n</sup>-gǎ xií-yu:

—Nchòhó ñáyiú ndècu ñuyíú vitna, chi ío sàá iní-ndó, te cuiní-ndó càda-í ñ<sup>n</sup> sá vǎ yǒo tnàhí ndàcu cada cuendá cuiní-ndó cùtnuní iní-ndó nǔu ndisa sá Yǎ Ndiǒxí ní tendaha ñàha-gá xii-í véxi-í. Dico ñá túú nǎgá cada-í quini-ndó, chi sa nìhí-ndó tnúhu nàcuáa ní yáha ndíi Jònás téé ní xóo cáhá<sup>n</sup> tnúhu Yá Ndiǒxí ndéé sanaha, te ñu-ni duca<sup>n</sup> yǎha yúhú tucu.

30 Chi nchaa ñáyiú ñuú Nñivé ní cutnùní iní-yu sá Yǎ Ndiǒxí ní tendaha ñàha-gá xii ndíi Jònás ní sáhá<sup>n</sup> ndíi ñuú-yu. Te duca<sup>n</sup> sàtnahá-xi cùu yúhú Téé cùu ñaní tnáhá-ndó nchàa-ndo, chi sáá nduu te cutnùní iní-ndó sǎ Yǎ Ndiǒxí ní tendaha ñàha-gá xii-í véxi-í ñuyíú-a.

31 Te na sáá nduu càda ndáá Yǎ Ndiǒxí cuéchi nchaa nchòhó ñáyiú ndècu ñuyíú-a, te dàvǎ-á<sup>n</sup> quini-ndó ñ<sup>n</sup> ñadìhí ñàha ní xíndaha ñ<sup>n</sup> nació<sup>n</sup> cáá ndàa xio cuha núú quéné nchǐcanchii. Te ñàha-á<sup>n</sup> ïo xica ñí xíndecu-a<sup>n</sup>, te ní sáhá<sup>n</sup>-a<sup>n</sup> ní xíndedóho-a<sup>n</sup> nchaa tnúhu ní cáhá<sup>n</sup> ndíi Salòmón, chi ndíi-á<sup>n</sup> ïo ní sáá sá xìní tnùní ndíi. Te ñàha-á<sup>n</sup> cáhá<sup>n</sup>-a<sup>n</sup> dàvǎ-á<sup>n</sup> sǎ nchòhó ñáyiú ndècu vitna ñá túú ní quide

ndáá-ndó. Dico vitna iha ndècu ndihi ñaha-ndo xii yúhú, te ñu-í ío-gá cúnùu-í dàcúúxí ndi Salòmón.

<sup>32</sup> Te ñu-ni nduu càda ndáá Yá Ndiõxí cuéchi nchaa nchòhó ñáyi ndècu ñuyíú-a vitna, dàvá-á<sup>n</sup> tnàhá cue ñáyi ní xíndecu ñuú Nñivé cundecú-yu núú Yá Ndiõxí, te tnàhá-yu cachí-yu sá ñà túú ní quide ndáá-ndó. Chi ñáyi ñuú Nñivé-á<sup>n</sup> ñi ndixi túu iní-yu sá ñà túú quide váha-yu ndécú-yu te ní natuhá-yu ichi Yá Ndiõxí cutnàhá ní cáhá<sup>n</sup> ndihi ñaha ndí Jónás tnúhu-gá xii-yu. Dico vitna iha ndècu ndihi ñaha-ndo xii yúhú téè cáhá<sup>n</sup> tucu tnúhu Yá Ndiõxí, te ñu-í ío-gá cúnùu-í dàcúúxí ndi Jónás.

*Núú-ó cùu-xi datná ñ<sup>n</sup> ñuhú*  
(Mt. 5:15; 6:22-23)

<sup>33</sup> Te ñà túú ñi ñ<sup>n</sup> ñáyi tènùhú ñ<sup>n</sup> linterná, te taxi ndecú-yu ñ<sup>n</sup> núú yídǎhu, àdi chiváha-yu xití ñ<sup>n</sup> tídihi, chi tàxi ndecú-yu ñ<sup>n</sup> núú ñnu cuendá nchaa ñáyi quíhu vehe cutnùní núú-yu.

<sup>34</sup> Te núú-ndó cùu-xi datná ñ<sup>n</sup> ñuhú, chi ñ<sup>n</sup> sá ná quíní-ndó te ndixi túu iní-ndó ñà cúú xǎ<sup>n</sup>, te núu càváha núú-ndó, te duca<sup>n</sup> cutnùní iní-ndó ñà cúú sǎ ndécú núú-ndó, á<sup>n</sup> te núu cùhú, te vá cutnùní iní-ndó ñà cúú sǎ ndécú núú-ndó. Te sá dúcá<sup>n</sup> cùhú núú-ndó te cada iní-ndó sǎ ndécú-ndó dàtná ñ<sup>n</sup> núú néé.

<sup>35</sup> Te ío cada cuendá-ndó vǎ cání cuèhé iní-ndó cuendá tnúhu Yá Ndiõxí cuendá cutnùní iní-ndó nàcuáa cundecu-ndo, chi núu na càni cuehé iní-ndó cuendá tnúhu-gá, te cùu-ndo datná ñ<sup>n</sup> ñáyi ñà túú cutnùní núú-xí.

<sup>36</sup> Te núu càndoo canine iní-ndó, te mee-ni sǎ vǎha ñùhu iní-ndó, te cutnùní váha iní-ndó tnúhu

ndáá dàtná cútnùnì váha núú-ndó òré càyú ñuhú,  
duca<sup>n</sup> cùtnunì iní-ndó —càchí-gá xáha<sup>n</sup>-gã xií-yu.

*Jèsús càhá<sup>n</sup>-gá cuèndá cue téé cùu fariséú ndihì  
cue téé dàcuaha ñaha xii-í ñáyiu*

*(Mt. 23:1-36; Mr. 12:38-40; Lc. 20:45-47)*

<sup>37</sup> Te òré ní ndihì tnúhu ní cáhá<sup>n</sup> Jèsús, te ñ<sup>n</sup> téé cùu  
fariséú ní cáhá<sup>n</sup> ñáhá-dě xii-gá vehe-dé caxi-gá, te  
cuánguihu-gá vehe-dé, te ní ngóo-gá mèsá.

<sup>38</sup> Te téé cùu fariséú-á<sup>n</sup> ïo ní cuñúhu-dé, chi Jèsús  
ñá túú ní ndàha-gá nàcuáa sàni iní-güedé nduu vétú  
iní Yă Ndiöxí òré ní ngóo-gá caxi-gá dàtná quidé  
mèe-güedé.

<sup>39</sup> Te Jèsús ní xáha<sup>n</sup>-gã xii-dé:

—Nchòhó cue téé cùu fariséú xìnì-ndó sã ïó  
ñáyiu nàquete sátá-ni tàsá<sup>n</sup> ndihì sátá-ni còhó, te  
xítí-xi càndehe caduha-ni. Te duca<sup>n</sup> sàtnahá-xi cùu  
nchohó, chi ndaha-ni-ndo nàquete-ndo, te iní-ndó  
ñà túú ndùu ndoo, te nándi dándahú-ndó tnàha  
ñáyiu-ndo, te quèhe<sup>n</sup>-ndo sá ndécú ndihí-yu, te  
nándi-gá nchaa sá cuèhé sá dúhá ñùhu iní-ndó  
quide-ndo.

<sup>40</sup> ;Te nchòhó cúú-ndó cuè téé ïo ñí iní-xi! ;Te náa  
ñá túú cùtnunì iní-ndó sã Yă Ndiöxí Yaá ní cadúha  
yiqui cuñú-ó ñiu-ni-gá ní chihi-gá iní-ó-á<sup>n</sup>?

<sup>41</sup> Te nchaa sá vâha ndècu ndihì-ndo cuáha-ndo  
nchàa ñáyiu xini ñuhu na cundecu ndihí-yu, te núu  
duca<sup>n</sup> na càda-ndo, te cuu-ndo ñáyiu sa ní nduu  
ndoo ní nduu nine iní-xi.

<sup>42</sup> ;Te ndàhú ní cuu nchaa nchòhó cue téé cùu  
fariséú! Chi sãha-ndo Yă Ndiöxí núú ùxí xichi  
yúcu nání mენტá, ndihì yúcu rùdá, ndihì nchaa  
dava-gá núú yúcu quèe comidá, dico ñá túú quide  
ndáá-ndó, te ni ñà túú ñùhu iní-ndó Yă Ndiöxí.

Dico tnúhu càhá<sup>n</sup>-í-a tàú-ndó càda-ndo, te ni vǎ dáñá ndèe-ndó càda-ndo nchaa dava-gá sá vǎha.

43 'ǐTe ndàhú ní cuu nchòhó cue tée cùu fariséú! Chi cuìní-ndó cùnucóo-ndo nǔú sácõo cue tée ío cùnuu xití veñúhu, te cuìní-ndó mèe-ni ndihì tnúhu yĩñùhu cáhá<sup>n</sup> ndihì ñaha ñǎyiu xii-ndo nchaa núú xícá cùu-ndo.

44 'ǐTe ndàhú ní cuu nchòhó cue tée dàcuaha ñaha xii ñáyiu nchaa tnúhu ní chídó tnùnì ndíi Moisés, ndihì nchòhó cue tée cùu fariséú chi ío dándahú-ndó mèe-ndo sá quidé ndǎá-ndó te ñá ndǎá sá quidé ndǎá-ndó! Chi cùu-ndo datná ì<sup>n</sup> ñáyiu ní xihí te ní nguíndǔxi, te ñá túú cùtnuní-gá ndèe yíndǔxi-yu, te cuèi nà yáha ñáyiu dico ñá túú cùtnuní sá yíndǔxi ndíyi. Te duca<sup>n</sup> sǎtnahá-xi cùu nchohó, chi nchaa ñáyiu ndèhe ñaha xii-ndo ñá túú cùtnuní iní-yu nchaa sá cuèhé sá dúhá sàni iní-ndó —càchí-gá xáha<sup>n</sup>-gǎ xii-güedé.

45 Te ní xáha<sup>n</sup> ì<sup>n</sup> tée dàcuaha ñaha xii-yu nchaa tnúhu ní chídó tnùnì ndíi Moisés xii-gá:

—Mèstrú, te sá dúcá<sup>n</sup> càhá<sup>n</sup>-n te tnàhá nchúhú xícùèhé-n ǎ<sup>n</sup> —càchí-dé xáha<sup>n</sup>-dě xii-gá.

46 Te Jèsús ní xáha<sup>n</sup>-gǎ:

—ǐNdàhú ní cuu tnàhá nchaa nchòhó cue tée dàcuaha ñaha xii ñáyiu nchaa tnúhu ní chídó tnùnì ndíi Moisés! Chi quíde-ndo datná quidé ñáyiu dàcuído ì<sup>n</sup> tnaha ñáyiu-xi ì<sup>n</sup> sá ïo vée, te mèe-yu ni lùha ñá túú cuìní-yu cuidó-yu. Te duca<sup>n</sup> sǎtnahá-xi quíde nchohó chi dǎnehé-ndó ñáyiu nàcuáa cadá-yu, dico mee-ndo chi ni lùha ñá túú cuìní-ndó càda-ndo nacuáa dǎnehé-ndǒ-yu.



47 'iTe ndàhú ní cuu tucu-ndo! Chi càdúha-ndo nùú nǐ nguíndǔxi cue téé ní xóo cáhá<sup>n</sup> tnúhu Yá Ndiǒxí ndéé sanaha cuèndá sá cúnàha-ndo núú yíndǔxi cue ndíi, te ðiu-ni cue ñaní tnáhá-ndó nǐ sahani-güedé cue ndíi.

48 Te nchòhó sa nàha-ndo nacuáa ní quide cue ñaní tnáhá-ndó, te càchí-ndó sǎ nǐ quide váha-güedé sá dúcá<sup>n</sup> nǐ sahani-güedé cue ndíi-á<sup>n</sup>, te vitna càdúha-ndo nùú nǐ nguíndǔxi cue ndíi.

49 'Te Yá Ndiǒxí ío sàá nchaa sá xíní tnùnigá, te ní cachí-gá sá dácàhá<sup>n</sup>-gá iní cue téé cuèndá cáhá<sup>n</sup>-güedé tnúhu-gá núú ñǎyiu, te cada-güedé nchaa nàcuáa cuínigá, te dava-güedé cahni ñahá-yu xii-güedé, te dava-güedé ío dandòho ñahá-yu xii-güedé duha ní cachí-gá.

50 Te nchaa ñáyiu ñuyíú vitna tnàhá-yu nacháhu-yu núú Yǎ Ndiǒxí cuèndá sá nǐ sahani-güedé cue téé ní cáhá<sup>n</sup> tnúhu-gá ndéé cútnàhá ní ngáva ñuyíú.

51 Te ndéé ndíi Àbél téé ní sahani-güedé ndéé díhna nuu, ndíhi ndéé ndíi Zacàriá téé ní sahani-güedé ndéé núú nǐ ndíhi-ná ndácá<sup>n</sup> cuèndá ñahá Yǎ Ndiǒxí núú ñáyiu ndècu ñuyíú vitna, te ðiu ndíi-á<sup>n</sup> nǐ sahani-güedé mei tnúú veñúhu càhnu sá ío cùnuu, ndíhi xító núú sácòdó sǎ ndúú tǎhú Yǎ Ndiǒxí.

52 'iTe ndàhú ní cuu tucu nchaa nchòhó cue téé dàcuaha ñaha xii ñáyiu nchaa tnúhu ní chídó tnùní ndíi Moisés! Chi quide-ndo datná quidé ì<sup>n</sup> téé tàxi tnùní ì<sup>n</sup> vehe, chi nacadí-dé te ñá dáñá-dě quíhu ñáyiu te ni mèe-dé ñá túú quíhu-dé. Te duca<sup>n</sup> sǎtnahá-xi quide-ndo, chi dàcuaha-ndo tnúhu Yá Ndiǒxí te ñá túú cuíní-ndó quíndáá iní-ndó te ni

ñà túú dànehé-ndó ñǎyiu cuení tñi# tnúhu-gá nàcuáa tàú-xi cunduu cuendá naníhí tàhú-yu —càchí-gá xáha<sup>n</sup>-gǎ xii-dé.

<sup>53</sup> Te òré ní ndee Jèsús vehe téé cùu fariséú-á<sup>n</sup>, te cue téé dàcuaha ñaha xii ñáyiu nchaa tnúhu ní chídó tnùní ndíi Moisés, ndíhi cue téé cùu fariséú ní cudéé<sup>n</sup>-güedě núú-gǎ, te ní ngüíta-güedě nándi sá xicá<sup>n</sup> tnúhú-güedě núú-gǎ cuendá cuení-güedě nñu vá cuíta-gá ñ<sup>n</sup> tnúhu càhá<sup>n</sup>-gá

<sup>54</sup> cuendá duca<sup>n</sup> ñíhí-güedě nàcuáa cada-güedé cacá<sup>n</sup> cuéchi-güedé cuendá-gá.

## 12

### *Jèsús càhá<sup>n</sup>-gá cuendá cue téé dándahú méé-xi*

<sup>1</sup> Te òré-á<sup>n</sup> ñǎ tacá titní mǎl ñáyiu núú ndécú Jèsús, te súní dícó ngõnchihi tnàha-ná-yu. Te ndèdóho-yu ní xáha<sup>n</sup> Jèsús xii cue téé xica cuu ndíhi-gá:

—Cada cuendá-ndó vǎ cǎnchícú<sup>n</sup> nihnu-ndo nàcuáa quide cue téé cùu fariséú, chi cue téé-á<sup>n</sup> ño dándahú-güedé méé-güedě sá quidé ndǎá-güedé dico ñá ndǎá sá quidé ndǎá-güedé.

<sup>2</sup> Te nchaa tnúhu sá cúú yùhu ni cuu vá cúú yùhu-gá, chi nchaa dacuítíi sǎ quée tñu-xi núú ñáyiu.

<sup>3</sup> Chi nchaa tnúhu càhá<sup>n</sup> dayuhu-ndo quèé túu-xi núú chítú nñú tàcá, te nchaa tnúhu càhá<sup>n</sup> méé-ndó vèhe-ndo dacuítíi sǎ ñíhí ñáyiu tnúhu.

### *Yá Ndiõxí xíní ñùhu-xi yuhú-ó-gǎ*

*(Mt. 10:26-31)*

<sup>4</sup> Te nchòhó cue téé ío váha tnàhá tnúhu ndíhi-í ná càchí tnúhu-í xii-ndo sǎ vǎ yùhú-ndó cué ñáyiu

cuëi na càhni ñahá-yu xii-ndo, chi ðiu-ni yiqui cùñú-ndó ndàcú-yu cahní-yu, te ñá túú nǎgá ndacú-yu cada ñahá-yu xii-ndo.

<sup>5</sup> Te na càchí tnúhu-í xii-ndo sǎ Yǎ Ndiǒxí tàú-ndó yùhú-ndó-gǎ, chi mee-gǎ ío cùnuu-gǎ, te ðiu-gǎ quídé-gǎ sǎ vǎ cùndècu-gǎ ñáyiú ñuyíú, te daquìhí<sup>n</sup> ñáhá-gǎ xií-yu núú ùhú núú ndàhú, núú xiǎ<sup>n</sup> càchí tnúhu-í xii-ndo sǎ Yàá-á<sup>n</sup> tàú-ndó yùhú-ndó-gǎ.

<sup>6</sup> Te nchòhó xìní-ndó sǎ ndéé úhú<sup>n</sup> tnàhá tílaá cùyǎhu-ði núú ùú díhú<sup>n</sup>, dico Yá Ndiǒxí ñá túú cùnaa-gǎ ni ì<sup>n</sup>-güedi, chi nèhe cuendá ñáhá-gǎ xii-güedi.

<sup>7</sup> Te nchòhó ndéé ì<sup>n</sup> ì<sup>n</sup> idi díquí-ndó yìndehu, núú xiǎ<sup>n</sup> càchí-í sǎ vǎ yùhú-ndó, chi cùnuu-gǎ-ndó dàcúúxí tílaá cuëi vǎi vihi-güedi.

*Ñáyiú na dàtúu núú dàva-gǎ ñáyiú sǎ ndécú ndìhí-yu Xítóhó Jesucristú*

*(Mt. 10:32-33; 12:32; 10:19-20)*

<sup>8</sup> Te na càchí tnúhu-í xii-ndo sǎ nǔu na dàtúu-ndo nǔú dàva-gǎ ñáyiú sǎ ndécú ndìhí ñaha-í xii-ndo. Te duca<sup>n</sup> te tnàhá yùhú Tée cùu ñaní tnáhá-ndó nchàa-ndo datúu-í núú nchàa cue espíritú xínú cuèchi núú Yǎ Ndiǒxí sǎ nchòhó ndécú ndìhí ñaha-ndo xii-í.

<sup>9</sup> Dico núú na cùñaha-ndo xì ñáyiú sǎ ñà túú ndècu ndìhí ñaha-ndo xii-í, te ðiu-ni duca<sup>n</sup> càda yùhú Tée cùu ñaní tnáhá-ndó nchàa-ndo, chi cùñaha-í xii cue espíritú xínú cuèchi núú Yǎ Ndiǒxí sǎ ñà túú ndècu ndìhí ñaha-í xii-ndo.

<sup>10</sup> Te ndédani càa ñáyiú na càhá<sup>n</sup> cuèhé cuendá yùhú Tée cùu ñaní tnáhá-ndó nchàa-ndo, te cada càhnu iní ñáhá Yǎ Ndiǒxí xií-yu. Dico ñáyiú na

càhá<sup>n</sup> cuèhé cuendá Espíritú Yă Ndiöxí, te ñáyi-u-á<sup>n</sup> vǎ cádá càhnu iní ñáhá-gǎ xií-yu.

11 Te òré ná càndeca ñaha-güedé xii-ndo quĩhí<sup>n</sup> veñúhu, àdi núú cuè téé cùchiu<sup>n</sup>, te ni vǎ cání iní-ndó nũu nása cunduu tnúhu cúñaha-ndo xii-güedé, te ni vǎ cání iní-ndó nũu ná tnúhu nadànchocáva-ndo nũu ná tnúhu na cũñaha-güedé xii-ndo,

12 chi òré-nǎ te mee Espíritú Yă Ndiöxí dacàhu iní ñáhá-xí xii-ndo tnúhu cúñaha-ndo xii-güedé — càchí-gá xáha<sup>n</sup>-gǎ xii-güedé.

### *Cuendá ì<sup>n</sup> téé cuica*

13 Te ì<sup>n</sup> téé ñũhu tnahá tnuú ñáyi-u-á<sup>n</sup> nǐ xáha<sup>n</sup>-dě xii Jèsús:

—Mèstrú, cúñaha xii ñaní-í sá ná chídava-dé sá nǐ dándõo tǎtá-ndǐ cuu cuendá-ndí —càchí-dé xáha<sup>n</sup>-dě xii-gǎ.

14 Te Jèsús ní xáha<sup>n</sup>-gǎ xii-dé:

—¿Te ná cuendá duca<sup>n</sup> càhá<sup>n</sup>-n? Te ñá díú chiú<sup>n</sup>-á<sup>n</sup> vǎxi-í cada-í, chi ñá díú tǎe cùchiu<sup>n</sup> cuu-í —càchí-gá xáha<sup>n</sup>-gǎ xii-dé.

15 Te xáha<sup>n</sup>-gǎ xii nchaa ñáyi-u xĩndecu-á<sup>n</sup>:

—Nchaa nchòhó ñáyi-u ndèdóho nchaa tnúhu càhá<sup>n</sup>-í ío váha cada cuendá-ndó, te vá cání iní-ndó nǎndi nducu-ndo cùndecu ndihí-ndo, chi cuèi vǎi vihi na nihí-ndó cùndecu ndihí-ndo, dico vá chĩndèe ñaha-xi cudíi-ndo cùndecu-ndo ñuyíú-a —càchí-gá xáha<sup>n</sup>-gǎ xií-yu.

16 Te dǎtnùní ní ngüíta-gǎ cání-gǎ ì<sup>n</sup> cuendú núú-yu cuendá tecú tnùní-yu tnúhu-gǎ, te xáha<sup>n</sup>-gǎ:

—Ì<sup>n</sup> téé cuica sũúní nǐ cuu nchaa tatá ní xitu-dé núú ñúhú-dě.

17 Te ní ngüíta-dé sání ìní-dé: “¿Te nása cada-í? Te ñá túú ndèè nataxúha-í nchaa sá ñí xitu-í”, duha ní sani iní-dé.

18 Te dătnùní ní sáha váha tucu-dé cuendá nàcuáa cada-dé, te ní cachí-dé: “Duha na cùnduu, dangoyo-í yacá-í, te ndada càhnu-gá-í, te xítí-xi nataxúha-í nchaandi túhú sá ñí xitu-í, ndìhi nchaa dava-gá sá ndécú ndìhi-í.

19 Te sátá dúcá<sup>n</sup>, te cachí-í: Ío vài sá ndécú ndìhi-í, te cudíi-xi cuéhé cuíá, te vitna ndetatú-í, te coho-í te caxi-í cada-í, te nándi-gá cada-í cuendá cudíi ìní-í cundecu-í, duha quesaha-í”, càchí-dé.

20 Dico Yá Ndiöxí ní xáha<sup>n</sup>-gă xii-dé: “Yòhó, ñá túú nàndìhi sá sání ìní-n, chi yúhú càchí-í sá niú vitna cuú-n, te nchaa sá ndécú ndìhi-n ¿yoo cuu sá vâha xii-a<sup>n</sup>-i?”, càchí-gá xáha<sup>n</sup>-gă xii-dé.

21 Duha yáha nchaa ñáyiú nándi sàni iní-xi cundecu ndìhi-xi ñuyíú-a, dico ñáyiú-á<sup>n</sup> ïo ndàhú-yu chi ñá túú nă nduu táhŭ-yu núú Yă Ndiöxí cundecu ndìhi-yu —càchí Jèsús xáha<sup>n</sup>-gă xií-yu.

*Yá Ndiöxí xító-gă nchaa ñáyiú sàndáá iní ñáhá xii-gá*

*(Mt. 6:25-34)*

22 Te ní xáha<sup>n</sup> Jèsús xii cue téé xìca cuu ndìhi-gá:

—Te na càchí tnúhu-í xii-ndo sã vă ïo cani iní-ndó nŭu nása cundecu-ndo, àdi nása níhí-ndó sã cáxí-ndó, àdi nása níhí-ndó dŏó cuihnu-ndo.

23 Chi cùnuu-gá méé-ndó dâcúúxí sã nchító-ndó, te duca<sup>n</sup> yìqui cuñú-ndó cùnuu-gá-xi dâcúúxí dŏó sâcũhnu-ndo.

24 Te chí cuăha cuendá nàcuáa quède cue tícácá, chi ni ñà túú chìhi-güedi tatá cuu ítú natahu-güedi

te ni ñà túú ndèé núnǎ yacá-güedi, te ñihí-güedi xèxi-güedi, chi Yá Ndiǒxí xító ñaha-gá xii-güedi. ꞑTe nchòhó cúnùu-gá-ndó dàcúúxí nchàa cue quiti ndava!

<sup>25</sup> Te cuèi nándi sá sání vìhi iní-ndó ndècu-ndo, dico ñá ndácú-ndó càda-ndo nacuáa cuehnu-ndo cuèdicó ì<sup>n</sup> yiqui-gá.

<sup>26</sup> Te núu ni sǎ lúhá xǎ<sup>n</sup> ñá ndácú-ndó càda-ndo, ꞑte ná cuèndá ío sàni iní-ndó cuèndá nchaa sá cuìní-ndó ñihí-ndó cùndecu ndihí-ndo?

<sup>27</sup> Te chí cádá cuèndá nàcuáa sàhnu ì<sup>n</sup> tnu itá, chi ni ñà túú quède chiu<sup>n</sup>-xi, te ni ñà túú quèhe<sup>n</sup>-xi idi. Te na càchí tnúhu-í xii-ndo sǎ ndíi Salòmón ío vii ní cáa nchaa sá ñí xíndecu ndihí ndíi, dico vii-gá tucu càa nchaa itá dàcúúxí nchàa sá ñí xíndecu ndihí ndíi.

<sup>28</sup> Te cùhú sǎ ío vitna tnaa-ni cùdíi-xi te sàhmí-yu, te cuèi duca<sup>n</sup> dico ío vii càdúha Yá Ndiǒxí nchaa cùhú-ǎ<sup>n</sup>. ꞑTe nchòhó ío cùnùu-ndo dàcúúxí nchàa cùhú-ǎ<sup>n</sup>, núu xǎ<sup>n</sup> ío xító ñaha-gá xii-ndo, te dicó yica cùu iní-ndó sàndáá iní-ndó-gǎ!

<sup>29</sup> Te vá ío canchicú<sup>n</sup> nihnu-ndo sǎ cóhó sǎ cǎxí-ndó, te ni vǎ dándihú-ndó ìní-ndó nùu nása cada-ndo ñihí-ndó.

<sup>30</sup> Chi nchaa ñáyiu ñá túú sàndáá iní ñáhá xii Yá Ndiǒxí duca<sup>n</sup> mèe-ni sá cóhó sǎ cǎxí-yu xica nchicú<sup>n</sup> nihnú-yu. Dico mee Tǎtá-ó Dǔtú Ndiǒxí sa nàha-gá nándi cùu sá xíní ñùhu-ndo, te taxi-gá.

<sup>31</sup> Te cada-ndo nchàa nacuáa càhá<sup>n</sup> Yǎ Ndiǒxí Yaá yíndàha ñaha xii-ndo, te duca<sup>n</sup> te taxi-gá nchaa sá xíní ñùhu-ndo.

*Cuèndá sá vǎha nduu táhú-ó nùú Yǎ Ndiǒxí  
(Mt. 6:19-21)*

32 Te vá yùhú nchòhó cue tée ndècu ndìhi-í cuèi ío sacú-ndó, chi Tătá-ó Dűtú Ndiöxí ní cachí-gá sá ndúú tǎhú-ndó cùndecu-ndo núú ndécú-gǎ taxi tnùní-ndó tnàhá-ndó.

33 Te chí dícó nchaa sá ndécú ndìhi-ndo, te chí cuǎha nchaa ñáyiú ndàhú díhú<sup>n</sup>-ndó ñáyiú xìni ñuhu, te cada váha-ndo cùndecu-ndo, te duca<sup>n</sup> te nduu táhú-ndó sǎ ïo-gá váha núú Yǎ Ndiöxí cundecu ndìhi-ndo, te xiǎ<sup>n</sup> vá cúú tùhú tnàhí-gá-xi, te ni vǎ ndíhí ñìhnu-gá-xi, te ni ñàdúhú vǎ ndácú-güedě duhu-güedě, te ni tǔquidi vá quée-dí.

34 Te núú xiǎ<sup>n</sup> cúú cuèndá-ndó ñá, te diu-ni xiǎ<sup>n</sup> ñùhú ìní-ndó, á<sup>n</sup> te núú mee-ni sǎ ndécú ñùyíú-a ndècu ndìhi-ndo, te diu-ni nchaa xiǎ<sup>n</sup> ñùhú ìní-ndó.

### *Xìni ñuhu-xi quìhi iní-ó cùndecu-o*

35-36 Te ío quìhi iní-ndó cùndecu-ndo, te cada-ndo dàtná quidé dàva cue tée xìnu cuechi sacúndecu túha-güedé cuèi nání òré-á<sup>n</sup> ndétú-güedě pàtróon-güedě ná òré nasáá-dé sá cuàhá<sup>n</sup>-dé vico tnǎndaha. Te núú niú te sa cúú cáyú-ni ñuhú-güedé sá cùndètu ñaha-güedé, chi òré ná nàsáá-dé dacàsa<sup>n</sup>-dé yuyèhe, te ndíhi-ni nacaá<sup>n</sup>-güedé ndíhu-dé.

37 Te váha táhú nchaa cue tée xìnu cuechi-á<sup>n</sup>, chi ndècu túha-ni-güedé ndétú-güedě ndée òré ní nasáá pàtróon-güedě, te na cǎchí tnúhu ndáá-í xii-ndo sǎ òré ná nàsáá pàtróon-güedě-á<sup>n</sup> te chihi ñaha-dě mèsá xii-güedé, te ndacá<sup>n</sup> ndee-dé dóo níhnú-dě núú yíquí-dě, te ngüíta-dé cani-dé cóhó-güedě cuèndá caxi-güedé.

38 Te diu-ni duca<sup>n</sup> càda-dé cuëi dava niú, àdi tacuíhndá-gá, te núu ñá túú xidí-güedé òré nasáá-dé, te cue téé xínu cuechi-á<sup>n</sup> ïo váha tnahá-güedé.

39 Te núu dicó ï<sup>n</sup> téé cùu xítóhó ï<sup>n</sup> vehe xini-dé ná òré quihu ñadúhú vehe-dé ñá, te quihi iní-dé te vá cùdú-dé, te vá dáñá-dě nacaá<sup>n</sup>-güedé yuyèhe-dé quihu-güedé duhu-güedě.

40 Te nchòhó tucu nchaa-ni nduu quihi iní-ndó cùndecu túha-ndo, chi na cuáhá<sup>n</sup> nduu ñá túú yìhi iní-ndó, te quixi tucu yúhú Téé cùu ñaní tnahá-ndó nchàa-ndo —cachí-gá xáha<sup>n</sup>-gă xii-güedé.

*Cue téé quide ndáá ndihi cue téé ñá túú quide ndáá (Mt. 24:45-51)*

41 Te té Pèlú ní xicá<sup>n</sup> tnúhú-dě núú Jèsús, te xáha<sup>n</sup>-dě:

—Mèstrú, ¿te tnúhu ní cáhá<sup>n</sup>-n-ă<sup>n</sup> cùu-xi mee-ni cuendá nchúhú ă<sup>n</sup> cuendá nchaa ñáyiú? —càchí-dé xáha<sup>n</sup>-dě xii-gá.

42 Te Jèsús ní xáha<sup>n</sup>-gă:

—Càhá<sup>n</sup>-í cuendá ñáyiú quide váha dàtná quidé ï<sup>n</sup> téé tàxi tnuní ñáhá xii cue ñáyiú xínu cuechi ndecu vehe patróó<sup>n</sup>-xi, chi téé-á<sup>n</sup> ïo váha tècú tnuní-dé, te quide-dé nchaa nàcuáa càhá<sup>n</sup> patróó<sup>n</sup>-dě, te dàcaxi-dé cue ñáyiú xínu cuechi oré tàú-xi caxí-yu.

43 Te núu duca<sup>n</sup> quide váha téé tàxi tnuní ñáhá xii cue ñáyiú xínu cuechi-á<sup>n</sup> ñá, te ío váha tnahá-dé òré nasáá patróó<sup>n</sup>-dě nùu ndéé cuáhá<sup>n</sup>-dé.

44 Te na càchí tnúhu ndáá-í xii-ndo sã tõe quide ndáá táxi tnuní ñáhá xii cue ñáyiú xínu cuechi-á<sup>n</sup> cùñaha-nă patróó<sup>n</sup>-dě xii-dé sá ncháándi túhú-nă sá ndécú ndihi-dé quindaha-dě.



45 Dico núu téé tàxi tñuní ñáhá xìi cue ñáyiú xìnu cuechi-á<sup>n</sup> ná càni iní-dé sá cùyàa patróó<sup>n</sup>-dě vá násàá ndĩhi-ni-dé ñá, te ngüíta-dé cani-dé nchaa ñáyiú xìnu cuechi, cuěi téé cuěi ñadĩhí, te ngüíta-dé caxi-dé coho-dé, te dàxíni-dé méé-dě,

46 te nduu ñà túú yìhi iní-dé te nasáá pàtróó<sup>n</sup>-dě, te dandòho ñaha patróó<sup>n</sup>-dě-á<sup>n</sup> xii-dé, te daquihí<sup>n</sup> ñáhá-dě xii-dé núú ndécú ñáyiú ñá túú ní quide ndáá.

47 "Te dava cue téé xìnu cuechi xini-güedé nàcuáa cuìní pàtróó<sup>n</sup>-güedě cada-güedé te ñá túú quide-güedé, te ni ñà túú cuìní-güedé cundecu túha-güedé cundetü-güedé pàtróó<sup>n</sup>-güedě, te nchaa cue téé duca<sup>n</sup> xíquide dandòho ñaha patróó<sup>n</sup>-güedě, chi ñáni v̄hi-güedé.

48 Te dava cue téé xìnu cuechi ñá túú xini-güedé nàcuáa cuìní pàtróó<sup>n</sup>-güedě cada-güedé, te ní quide-güedé sá néñùú-güedé #<sup>n</sup> sá ñà túú tàú-güedé cada-güedé ñá, te cue téé-á<sup>n</sup> sacú-gá dandòho ñaha patróó<sup>n</sup>-güedě, chi sacú-gá ñáni-güedé. Te ñáyiú cùtnuní iní-xi nàcuáa cuìní Yă Ndiõxí cadá-yu, te ðiu-ni duca<sup>n</sup> tàú-yu cadá-yu nàcuáa cuìní-gá. Te ñáyiú v̄ai-gá tècú tñuní nàcuáa càhá<sup>n</sup>-gá, te ðiu-ni duca<sup>n</sup> v̄ai nchaa sá càhá<sup>n</sup>-gá tàú-yu cadá-yu.

*Ñá túú cùu #<sup>n</sup>nuu ñáyiú  
(Mt. 10:34-36)*

49 "Te yúhú véxi-í ñuyíú-a cuendá cutnùní iní ñáyiú nàcuáa cada ñaha Yă Ndiõxí xií-yu, ¡te cuìní-í sá ndĩhi-ni cada-gá nàcuáa sàni iní-gá!

50 Te yúhú ío vâi tnúhu sàni iní-í, jchi sáá nduu te ío ndoho-í, te ðiu-ni xíă<sup>n</sup> cuhu<sup>n</sup> iní-í ndéé ná sàá nduu dùca<sup>n</sup> yáha-í!

51 Te nchòhó vá cání ìní-ndó sã yúhú véxi-í ñuyíú-a te cundecu ndihî tnàha váha-ni ñáyiu, te ñáhá chi da ngüíta-yu vá cúú ì<sup>n</sup>nuú-yu cundecú-yu.

52 Te ndéé není vitna ngüíta ñáyiu vá cúú ì<sup>n</sup>nuú-yu cundecú-yu, te na càda-o cuendá te núu úhú<sup>n</sup> ñáyiu xĩndecu ì<sup>n</sup>-ni vèhe, te vá cúú ì<sup>n</sup>nuu-gá-yu, chi úní-yu ndatnúhu-yu te nàá-yu ndihî úú-gá-yu, àdi ñáyiu úú-á<sup>n</sup> ndatnúhu-yu te nàá-yu ndihî ñáyiu úní-á<sup>n</sup>.

53 Te dava cue téé cùu tátá vá cúú ì<sup>n</sup>nuu-gá-güedé ndihî déhe ducu<sup>n</sup>-güedé, te ni dàva cue ñáyiu cùu náná vá cúú ì<sup>n</sup>nuu-gá-yu ndihî déhe yòcò-yu, te ni sãnu-yu vá cúú ì<sup>n</sup>nuu ndihî-gá-yu. Te duca<sup>n</sup> càdá-yu chí davá-yu quĩndáá iní ñáhã-yu xii-í, te davá-yu vá quĩndáá iní ñáhã-yu –càchí-gá xáha<sup>n</sup>-gã xii-güedé.

*Ñáyiu cùtnuní iní-xi nàcuáa quide-xi ñuyíú ndihî andiü*

*(Mt. 16:1-4; Mr. 8:11-13)*

54 Te Jèsús ní xáha<sup>n</sup>-gã xii nchaa ñáyiu xĩndecu-á<sup>n</sup>:  
–Te nchòhó òré ndéhé-ndó ndànchita vícò ndàa xio quée nchícanhii, te càchí-ndó sã cúú<sup>n</sup> dãü, te ðiu duca<sup>n</sup> ndisa quide-xi.

55 Te òré ná quène táchí ndàa xio datni nacuáa quène nchícanhii, te càchí-ndó sã ïo cada ihni-xi, te ðiu duca<sup>n</sup> ndisa quide-xi.

56 Te nchòhó ío váha cùtnuní iní-ndó nàcuáa quide-xi andiü ndihî ñuyíú, ¿te ná cuendá

quidé-ní-ndó sã ñã təcú tnùní-ndó nàcuáa quide Yá Ndiõxí vitna? Te sá dúcá<sup>n</sup> quide-ndo-á<sup>n</sup> ño dándahú-ndó mée-ndo sá ño váha cùtnuní iní-ndó, chi ñã ndáá sá cùtnuní iní-ndó.

*Nducu-o nàcuáa nucúndecu ndìhì váha-o ñãyiu cùu úhú iní ñáhá*  
(Mt. 5:25-26)

<sup>57</sup> Te nchòhó, ñná cuendá ñã túú dándixi túu-ndo iní-ndó càda-ndo mee-ni sá vãha sá tàú-ndó càda-ndo-i?

<sup>58</sup> Te núu ìó ì<sup>n</sup>-ndo ñĩ sacá<sup>n</sup> cuéchi ñãyiu cuendá-ndó cuendá ì<sup>n</sup> sá ñĩ quide-ndo, te cuáhá<sup>n</sup>-ndó ndìhì-yu núú tõe cùchiu<sup>n</sup>, te ñini ñũhu-ndo ndìhì-yu ichi, te nducu-ndo nàcuáa cada-ndo nàcáhá<sup>n</sup> cáhnú ìní tnáhá-ndó ndìhì-yu cuendá sá vã cándèca ñaha-gá-yu quíhì<sup>n</sup> núú tõe cùchiu<sup>n</sup>, chi núu duca<sup>n</sup> na càdá-yu te tõe cùchiu<sup>n</sup>-á<sup>n</sup> nachihì ñaha-dě ndaha cue tõe cùu poleciá, te cue tõe-á<sup>n</sup> chihì ñaha-güedě vecaá xii-ndo.

<sup>59</sup> Te na càchí tnúhu-í xii-ndo sã ñũu na ngáva-ndo vecaá, te vá cãcu-ndo te núu vá náchãhu-ndo nchàa sá tàú-ndó –càchí-gá xáha<sup>n</sup>-gã xií-yu.

## 13

*Xìni ñũhu-xi natuha-o ichi Yá Ndiõxí*

<sup>1</sup> Te ñũu-ni òrè-á<sup>n</sup> ñĩ ngúnutnì<sup>n</sup> ì<sup>n</sup> úú ñãyiu núú Jèsús cáni-yu cuendú núú-gã nàcuáa ní quide ñaha té Pilatú xii cue tõe distritú Galileá cue tõe ní sahnì quiti nduu táhú Yá Ndiõxí, te mei òrè ní sahnì-güedé cue quiti-á<sup>n</sup> ñĩ táuchíu<sup>n</sup> tẽ Pilatú cue sandàdú-dé ní sahnì-güedé cue tõe Galileá-á<sup>n</sup>, te ní

xica níñí-güedě núú ñúhú ndìhì níñí cue quiti-án, te ní nadácánuu-xi.

<sup>2</sup> Te Jèsús ní xáha<sup>n</sup>-gă xií-yu:

—Te núu nchòhó sání iní-ndó sǎ sà dúcá<sup>n</sup> ñí yáha cue téé distrítú Galileá-á<sup>n</sup> te cùu-güedé cue téé ndècu vihi-gá cuéchi-xi dàcúúxí cuè téé ñuú-güedé ñá.

<sup>3</sup> Te na càchí tnúhu-í xii-ndo sǎ ñǎhá. Te núu nchòhó vá ndíxí cuèchi iní-ndó cuèndá nchaa sá cuèhé sá dúhá quide-ndo ndecu-ndo ña, te tnàhá nchaa nchòhó cuíta nihnu-ndo te núu vá nátnì-ndo ichi Yá Ndiǒxí.

<sup>4</sup> Te núu nchòhó sání iní-ndó sǎ ñǎyiu sáhú<sup>n</sup> úní ní xíhí ní táú ñáhá vèhe ducú<sup>n</sup> Silòè ío-gá ndécú cuèchi-yu dàcúúxí nchàa ñǎyiu xíndecu ñuú Jerusàlén ñá,

<sup>5</sup> te na càchí tnúhu tucu-í xii-ndo sǎ ñǎhá. Te núu nchòhó vá ndíxí cuèchi iní-ndó cuèndá nchaa sá cuèhé sá dúhá quide-ndo ndecu-ndo ña, te tnàhá nchaa nchòhó cuíta nihnu-ndo te núu vá nátnì-ndo ichi Yá Ndiǒxí —càchí-gá xáha<sup>n</sup>-gă xií-yu.

### *Yutnu ngǔxí ñá túú cùu<sup>n</sup> sávidí-xi*

<sup>6</sup> Te Jèsús ní canì tucu-gá ì<sup>n</sup> cuèndú núu-yu nàcuáa tecú tnùnì-yu tnúhu-gá, te xáha<sup>n</sup>-gă:

—Ì<sup>n</sup> téé nùtnì ì<sup>n</sup> yutnu ngǔxí núú ñúhú-dě, te cuáhá<sup>n</sup> ndéhé-dě ñuú ní cuu<sup>n</sup> sávidí-xi ni cùu, te ni ì<sup>n</sup> ñá túú ní cùu<sup>n</sup>.

<sup>7</sup> Te ní xáha<sup>n</sup> tǎe-á<sup>n</sup> xii téé ndèé ñuhu-dé: “Nàha-n sá vitna ní cuu úní cuía quíxí còto-í yutnu ngǔxí-a te ñá túú xìnì-í ni ì<sup>n</sup> sávidí-xi. Te quehndé-n vitna, chi àú<sup>n</sup> ñá cuu nùtnì-xi quide tneñu-xi núú ñuhu-á<sup>n</sup>”, càchí-dé xáha<sup>n</sup>-dě xii téé ndèé ñuhu-dé-á<sup>n</sup>.

8 Te téé ndèé ñuhu-á<sup>n</sup> ñí xáha<sup>n</sup>-dě: “Pàtróó<sup>n</sup>, daña na cuìhnu-xi cuiá vitna-ná, te na nàdatayá-í ñuhu núú sàhá-xi, te chihi-í sahá<sup>n</sup>.”

9 Te duca<sup>n</sup> te cudana cuu<sup>n</sup> sávidí-xi, àdi núu ñá túú ní cùu<sup>n</sup> sávidí-xi ña te téhndé-nă-xi”, cächí-dé xăha<sup>n</sup>-dě xii pàtróó<sup>n</sup>-dě —cächí-gá xáha<sup>n</sup>-gă xii-yu.

*Jèsús quidé tătna-gá ì<sup>n</sup> ñadìhí ní nduu cueyi sătá-xi nduu ndètátú ñáyiu*

10 Te ì<sup>n</sup> xito cùu-xi nduu ndetátú ñáyiu, te yìhi Jèsús ì<sup>n</sup> veñúhu dànehé-gá ñáyiu.

11 Te xía<sup>n</sup> ndécú ì<sup>n</sup> ñadìhí ní cuu sáhú<sup>n</sup> úní cuiá sǎ cùhú-a<sup>n</sup> yìhi ñaha espíritú cùndìhi yucu ñávăha xii-a<sup>n</sup>, te xǎ<sup>n</sup> ní ndada cueyi-xi sătá-a<sup>n</sup>, te ñá dáñă-gă-xi nucúnutnîi ndáá-a<sup>n</sup>.

12 Te òré ní xiní ñáhá Jèsús xii-a<sup>n</sup> te ní cana ñaha-gă, te xáha<sup>n</sup>-gă:

—Yòhó ñaha cùhú, ndúha-n cuéhé tnàhá-n —cächí-gá xáha<sup>n</sup>-gă xii-a<sup>n</sup>.

13 Te ní dácàá-gá ndaha-gá ní tendaha ñàha-gá xii-a<sup>n</sup>, te òré-ni-á<sup>n</sup> ñí ndúha-a<sup>n</sup> te ní nucúnutnîi ndáá-a<sup>n</sup>, te ní ngüíta-a<sup>n</sup> ní cachí-a<sup>n</sup> sá ïo càhnu cuu Yá Ndiǒxí.

14 Dico téé tàxi tnuní veñúhu ní cudéé<sup>n</sup>-dě sá dúcá<sup>n</sup> ñí quide Jèsús ní quide tătna-gá ñaha cùhú-á<sup>n</sup> nduu ndètátú-yu, te ní xáha<sup>n</sup>-dě xii-yu:

—Íó ínú nduu tàú-ó càda chiu<sup>n</sup>-o, te ndědani càa nduu-á<sup>n</sup> quixi-ndo cùtătna-ndo, dico ñá díú nduu cuu-xi nduu ndetátú-ó —cächí-dé xăha<sup>n</sup>-dě xii-yu.

15 Te ní xáha<sup>n</sup> Jèsús:

—Nchòhó chi ïo dândahú-ndó mèe-ndo sá quidé ndăá-ndó dico ñá ndàá sá quidé ndăá-ndó, çnăa

ñá túú nàndaxi-ndo ndicutu-ndo àdi búrru-ndo dàcoho-ndo-güedi ndute nduu ndetatú-ó ǎn?

16 Te ñadihí-a cùu-a<sup>n</sup> ñani tnáhá ndi Àbrahám, te dicó-ni sá yùcu ñávãha quide duha cuhú-a<sup>n</sup> ní cuu sáhú<sup>n</sup> úní cuiá, ¿te náa ñá túú xìni ñuhu-xi cutátna-a<sup>n</sup> cuèi cùu-xi nduu ndetatú-ó ǎn? — càchí-gá xáha<sup>n</sup>-gã xii-dé.

17 Te sá dúcá<sup>n</sup> ñí cáhá<sup>n</sup> Jèsús, núu nchaa cue téé cùu úhú iní ñáhá xii-gá ní cucaha<sup>n</sup> núú-güedě, dico nchaa dava-gá ñáyiú chi xícudí iní-yu xíndéhě-yu nchaa sá vã yõo tnáhí ndàcu cada quide-gá.

*Cuèndá ndíquí<sup>n</sup> yutnu nàni mostázá*

*(Mt. 13:31-32; Mr. 4:30-32)*

18 Te ní xáha<sup>n</sup>-gã xií-yu:

—Na càni-í ì<sup>n</sup> cuèndú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndiõxí xii-ndo.

19 Ì<sup>n</sup> téé ní quehe<sup>n</sup>-dé ndíquí<sup>n</sup> yutnu nàni mostázá te nèhe-dé cuáhá<sup>n</sup> ní sacá<sup>n</sup>-dé núú ñúhú-dě te ní xínu-xi, te ní sahnú-xi ní cuu dùcú<sup>n</sup>-xi, te cue qui<sup>t</sup>i ndàva núú tàchí cádüha-güedi tacá-güedi núú díté-xi —càchí-gá xáha<sup>n</sup>-gã xií-yu.

*Nàcuáa quide levadurá*

*(Mt. 13:33)*

20 Te ní xáha<sup>n</sup> tucu Jesús xií-yu:

—Te na càchí tnúhu tucu-í xii-ndo nàcuáa cada tucu Yá Ndiõxí òré ndíhu ndaha ñàha-gá xii-ndo.

21 Ì<sup>n</sup> ñadihí ní quehe<sup>n</sup>-a<sup>n</sup> levadurá ní chihi-a<sup>n</sup> úní arròbá yuchi triú, te levadurá-á<sup>n</sup> ñí quide-xi ní ndaa ñihí yusa<sup>n</sup>-á<sup>n</sup> —càchí-gá xáha<sup>n</sup>-gã xií-yu.

*Yuyèhe cuiñi*

*(Mt. 7:13-14, 21-23)*

22 Te ichi ñùhu Jesús cuáhá<sup>n</sup>-gá ñúú Jerusalén, te nchaa ñúú náhnú, ndìhì nchaa ñúú lĩhli ta yãha-gá duca<sup>n</sup> ta dànehé-gá ñáyiu tnúhu-gá cuáhá<sup>n</sup>.

23 Te ì<sup>n</sup> ñúú-á<sup>n</sup> ñĩ xáha<sup>n</sup> ì<sup>n</sup> téé xii-gá:

—Mèstrú, cuíní-í cáca<sup>n</sup> tnúhu-í ì<sup>n</sup> tnúhu núú-n, ¿ndáá sá ïo sacú ñáyiu nàníhí tàhú-ã<sup>n</sup>? —càchí-dé xãha<sup>n</sup>-dě xii-gá.

Te Jèsús ní xáha<sup>n</sup>-gã xii-dé ndìhì nchaa ñáyiu:

24 —Cada-ndo sã nánihí tàhú-ndó, te tñi-ndo ìchi Yá Ndiõxí, te ichi-gá-á<sup>n</sup> cúú-xí dàtná ì<sup>n</sup> yuyèhe cuiñi, te càchí tnúhu-í xii-ndo sã ïo cuéhé ñáyiu cachí iní-yu quíhu-yu yuyèhe cuiñí-á<sup>n</sup> dico vá ndácũ-yu.

25 Te na càni tucu-í ingá cuèndú núú-ndó nàcuáa tecú tnùní-ndó tnũhu càhá<sup>n</sup>-í. Te òré ná ndàcuiñí téé cùu xítohó vehe, te nacadí-dé yuyèhe, te nchaa nchòhó ñáyiu na quèndóo quehé dacàsa<sup>n</sup>-ndo yuyehe, te quesaha-ndo cũñaha-ndo xii-dé: “Tãtá, nacaá<sup>n</sup> yuyèhe na quíhu-ndí”, quesaha-ndo cũñaha-ndo xii-dé. Dico téé cùu xítohó vehe-á<sup>n</sup> cũñaha-dě xii-ndo: “Ñá túú xìní-í nchòhó ndèé ñáyiu cùu-ndo”, duha cúñaha-dě xii-ndo.

26 Te dàtnùní ngũíta nchòhó cúñaha-ndo xii-dé: “Nchúhú ní xexi ndìhì ñaha-ndĩ, te ní xihi ndìhì ñaha-ndĩ xii-n, te nchaa ichi ní xóo dacuàha ñaha-n xii-ndí”, quesaha-ndo cũñaha-ndo xii-dé.

27 Dico cachí tucu téé cùu xítohó vehe-á<sup>n</sup> cũñaha-dě xii-ndo: “Sa ní cachí-í sá ñà túú xìní-í ndèé ñáyiu cùu-ndo. Te chí xócuñí nchòhó ñáyiu ndècu ichi cuehé ichi duha núú ndècu-í”, quesaha-dě cúñaha-dě xii-ndo.

28 Te na sàá nduu dùca<sup>n</sup> cada-xi te quini-ndó tẽ Àbrahám, ndihi té Isàác, ndihi té Jàcób, ndihi nchaa cue téé ní xóo cáhá<sup>n</sup> tnúhu Yá Ndiõxí, te nchaa cue téé-á<sup>n</sup> ndécú-güedě núú ndécú-gã táxí tnùní-gá, te nchòhó quee tíhú-ndó nũú-gã sá tnúhu ñá túú ní cuini cada ndáá, te dává-á<sup>n</sup> ndãhyú-ndó te cuu rúhñú-nã núhu-ndo sã sätú iní-ndó cuendá sã ndóhó-ndó.

29 Te dává-á<sup>n</sup> quíhu nchaa ñáyiú ndi cùmí xio ñuyíú núú ndécú Yá Ndiõxí táxí tnùní-gá caxí-yu ndihi-gá, te cundecú-yu ndihi-gá.

30 Te dava ñáyiú nchìcú<sup>n</sup> ñá túú cùnuu ndecu ichi Yá Ndiõxí vitna, ñáyiú-á<sup>n</sup> sáá nduu te ío cunúú-yu. Te dava ñáyiú cùnuu ndecu ichi-gá vitna, ñáyiú-á<sup>n</sup> sáá nduu te vá ío-gá cunúú-yu —càchí-gá xáha<sup>n</sup>-gã xií-yu.

*Jèsús ndàhyú-gá cuendá ñáyiú ñuú Jerusàlén  
(Mt. 23:37-39)*

31 Te diu-ni nduu-ã<sup>n</sup> ñí quexìo ì<sup>n</sup> úú cue téé cùu fariséú núú ndécú-gã, te xáha<sup>n</sup>-güedě xii-gá:

—Quee-n ìha quíhí<sup>n</sup>-n nũu ndèé quíhí<sup>n</sup>-n, chi téé cùu Herodés cuini-dé cahni ñaha-dě xii-n —càchí-güedě xáha<sup>n</sup>-güedě xii-gá.

32 Te Jèsús ní xáha<sup>n</sup>-gã:

—Chí cuahá<sup>n</sup> te cúñaha-ndo xii téé nèhe mañá-á<sup>n</sup> sã càchí-í sá ná cùndedóho váha-dé ì<sup>n</sup> tnúhu cáhá<sup>n</sup>-í, chi cùmání ì<sup>n</sup> úú-gá nduu cundecu-í xocani-í nchaa espíritú cùndihí yucu ñávãha yìhí ñaha xii ñáyiú, te cada tátna-í nchaa dava-gá ñáyiú cùhú, te duca<sup>n</sup> te ndihí chìu<sup>n</sup>-í, duha cúñaha-ndo xii-dé.

33 Dico dacuítíí sã cùhù<sup>n</sup>-í ichi ì<sup>n</sup> úú-gá nduu, te duca<sup>n</sup> te sáá-í núú quíhí<sup>n</sup>-í, chi vá cúú tnàhí cuú ì<sup>n</sup>



tée càhá<sup>n</sup> tnúhu Yá Ndiöxí ingá ñuú, chi mei ñuú Jerusàlén cuú-güedé —càchí-gá xáha<sup>n</sup>-gã xii-güedé.

<sup>34</sup> Te ní xáha<sup>n</sup>-gã xii ñáyu ñuú Jerusàlén:

—Nchòhó chi sàhni-ndo nchaa cue tée càhá<sup>n</sup> tnúhu Yá Ndiöxí, cue tée ní tendaha-gã véxi, te mee-ni ndìhi yúú sáhní-ndó-güedé. ¿Te titní xito ní cuiní-í nadatàcá ñáhà-í xii-ndo dàtná nádàtacá ì<sup>n</sup> nchuxi cuè déhe-di sàquihí-güedi xití ndíxí<sup>n</sup>-di, dico ñá ní cuiní-ndó, te duca<sup>n</sup>-ni sàni iní-í ndéé vitna!

<sup>35</sup> Te chí cündèdóho tucu ingá tnúhu na càhá<sup>n</sup>-í-a: Yá Ndiöxí dañà ñàha-gá xii-ndo. Te na càchí tnúhu tucu-í xii-ndo sã vã quini ñáhá-gã-ndó xii-í, dico sáá nduu te quini ñáhá tùcu-ndo, te nduu-ã<sup>n</sup> cachí-ndó sã ïo càhnu cuu yúhú Yaá ní tendaha Dütú Ndiöxí véxi ñuyíú-a —càchí-gá xáha<sup>n</sup>-gã xii-yu.

## 14

### *Jèsús quidé tãtna-gá ì<sup>n</sup> tée ñùhu cuiñu*

<sup>1</sup> Te duha ní cuu ì<sup>n</sup> nduu, nduu ndètatú ñáyu chi ì<sup>n</sup> tée cùu fariséú cùnùu ní cáhá<sup>n</sup>-dé Jèsús vehe-dé caxi-gá, te cue tée ndècu vehe-dé ndéhé-güedé ñu nása cada-gá.

<sup>2</sup> Te xía<sup>n</sup> ndécú tnàhá ì<sup>n</sup> tée cùhú ñúhú-dě cuiñu.

<sup>3</sup> Te Jèsús ní xicá<sup>n</sup> tnúhú-gã núú cuè tée dàcuaha ñaha xii ñáyu nchaa tnúhu ní chídó tnùnì ndí Moisés, ndìhi núú cuè tée cùu fariséú, te xáha<sup>n</sup>-gã:

—¿Cuu cada tátna-o ì<sup>n</sup> ñáyu cùhú nduu ndètatú-ó ã<sup>n</sup> ñáhá? —càchí-gá xáha<sup>n</sup>-gã xii-güedé.

<sup>4</sup> Dico cue tée-á<sup>n</sup> ñà túú tnàhí ni cãhá<sup>n</sup>-güedé. Te ní dácaá-gá ndaha-gá ní tendaha-gã tée cùhú-á<sup>n</sup>

nĩ quide tátna ñaha-gă xii-dé, te ní xáha<sup>n</sup>-gă sá ná nùhú-dé vehe-dé.

<sup>5</sup> Te ní xícá<sup>n</sup> tnúhú-gă núú nchàa cue téé-á<sup>n</sup>, te xáha<sup>n</sup>-gă:

—¿Te núú nchòhó ná ngáúnhnu ì<sup>n</sup> búrru-ndo àdi ì<sup>n</sup> ndicutu-ndo déhvá, te vá ná tàva ndíhi-ni-ndo-di cuèi cùu-xi nduu ndetatú-ndó-ă<sup>n</sup>? —càchí-gă xáha<sup>n</sup>-gă xii-güedé.

<sup>6</sup> Te ñá túú ní nĩhí-güedé tnúhu na dànhocáva-güedé.

### *Ñáyiu càhá<sup>n</sup>-yu quíhí<sup>n</sup> vico tnándaha*

<sup>7</sup> Te ndèhe Jesús nàcuáa xĩquide nchaa ñáyiu ndècu vico sá sũúni nĩ nacáxi-yu xilé sácõo nchihi cue téé cùnuu-gă conchihí-yu òré cuánguìhú-yu mèsá caxí-yu, núú ní xáha<sup>n</sup>-gă xií-yu:

<sup>8</sup> —Òré ná càhá<sup>n</sup> ñáhá ì<sup>n</sup> ñáyiu xii-ndo ì<sup>n</sup> vico tnándaha, te vá cóó-ndó nũú xilé sácõo cue téé cùnuu-gă, chi núú duca<sup>n</sup> na càda-ndo, te cudana quexìo dava-gă ñáyiu cùnuu-gă dàcúúxí nchòhó.

<sup>9</sup> Te ñáyiu ní càhá<sup>n</sup> ñáhá xii-ndo-á<sup>n</sup> quixí-yu te cúñàhá-yu xii-ndo: “Chí cuñàhá xilé núcõo nchihi-ndo-ă<sup>n</sup> ná cònchihi ñáyiu ní quexìo-a”, quesàhá-yu cúñàhá-yu xii-ndo. Te cuìní-ndó ñáhá cuèi cùcaha<sup>n</sup> núú-ndó ndàcuíñí-ndó quíhí<sup>n</sup>-ndó ngõo-ndo nũú xilé xĩnutnì ndéé núú nĩ ndihí-ná ndàa sátá-xi.

<sup>10</sup> Te yúhú càchí-í sá òré ná càhá<sup>n</sup> ñáhă-yu xii-ndo, te ngõo-ndo nũú xilé xĩnutnì ndéé núú nĩ ndihí-ná ndàa sátá-xi chi cuèndá òré ná quèxio ñáyiu ní càhá<sup>n</sup> ñáhá xii-ndo, te cúñàhá-yu xii-ndo: “Nchòhó cue ñáyiu càhá<sup>n</sup> ndihí-í, chí yàha núú xilé sácõo cue téé cùnuu-gă coo-ndo”, duha cúñàhá-yu

xii-ndo. Te duca<sup>n</sup> te cada nínu ñaha nchàa ñáyiú yìhi ndìhi-ndo mesá.

11 Te nchaa ñáyiú na càda nínu mee-xi, te ñáyiú-á<sup>n</sup> ñà túú cùu nínu-yu, te nchaa ñáyiú ñá túú quide nínu mee-xi, ñáyiú-á<sup>n</sup> cúú ñínu-yu —càchí-gá xáha<sup>n</sup>-gă xií-yu.

12 Te dătnùní ní xáha<sup>n</sup>-gă xii téé ní cáhá<sup>n</sup> ñáhá xii-gá:

—Te yòhó òré cuìní-n càda-n ì<sup>n</sup> vico, te vá càhá<sup>n</sup>-n mèe-ni cue téé càhá<sup>n</sup> ndìhi-n, ni cuè ñaní-n, ni cuè ñáyiú cùu ñaní tnáhá-n, ni cuè ñáyiú cuica ndècu yatni ndìhi-n, chi ñáyiú-á<sup>n</sup> duca<sup>n</sup> càdá-yu ì<sup>n</sup> nduu cáhá<sup>n</sup> ñáhă-yu xii-n te ndéyăhu-ni sá ñí quidé-n-yu.

13 Te ñáhá chi òré ná càda-n ì<sup>n</sup> vico, te cáhá<sup>n</sup>-n ñăyiú ndàhú, ndìhi ñáyiú ñá cúú càca, ndìhi ñáyiú yacua, ndìhi ñáyiú cuàá.

14 Te núu duca<sup>n</sup> na càda-n, te cuu-xi ì<sup>n</sup> sá văha xii-n, chi ñáyiú-á<sup>n</sup> vă ñìhí-yu nacoto ñàhá-yu xii-n, dīco na cùú-n te sáá nduu ndòto-n ndìhi nchaa ñáyiú ní quide ndáá ní xindecu ichi Yá Ndiòxí, te dāvá-á<sup>n</sup> taxi-gá sá ndúú tàhú-n —càchí-gá xáha<sup>n</sup>-gă xii-dé.

*Nàcuáa xiquide ñáyiú òré càhá<sup>n</sup> ñáhá ì<sup>n</sup> téé cada vico*

*(Mt. 22:1-10)*

15 Te sá dúcá<sup>n</sup> ñí cáhá<sup>n</sup> Jèsús ní tecú dóho cue téé yìhi mesá-á<sup>n</sup>, núu ní xáha<sup>n</sup> ì<sup>n</sup>-dé xii-gá:

—Ío váha táhú nchaa ñáyiú na càxi nchaa sá cuăha ñaha Yă Ndiòxí nduu na sàá-yu cundecú-yu núú ndécú-gă táxi tnùní-gá —càchí-dé xăha<sup>n</sup>-dē xii-gá.

16 Te Jèsús ní xáha<sup>n</sup>-gă xii-dé:

—H<sup>n</sup> téé quide-dé vico, te ní dátècú tnúhu-dé cuéhé víhí ñǎyiu quíhí<sup>n</sup>-yu caxí-yu.

17 Te òré sa ní cuu-ná sá caxí-yu, te ní xáha<sup>n</sup>-dě xii téé xìnu cuechi núú-dě sá quíhí<sup>n</sup>-dé cǔñaha-dě quíhí<sup>n</sup>-yu caxí-yu, chi sa ndècu túha nchaa sá caxí-yu.

18 Dico nchaá-yu ní xáhǎ<sup>n</sup>-yu xii-dé sá ná cádá càhnu iní téé càhá<sup>n</sup> ñáhá-ǎ<sup>n</sup>, chi ñá túú cùyáchí-yu quíhí<sup>n</sup>-yu vico-án. Te téé ní cáhá<sup>n</sup> ndíhi téé xìnu cuechi-án díhna ní xáha<sup>n</sup>-dě: “Íchí ñǎ saa<sup>n</sup>-í h<sup>n</sup> pedàsú ñuhu, te quíhí<sup>n</sup> ndéhè-í tnavíí, núu xǎ<sup>n</sup> càhá<sup>n</sup> ndàhú-í núú-n sǎ cǔñaha-n xii téé càhá<sup>n</sup> ñáhá-ǎ<sup>n</sup> xii-í sá ná cádá càhnu iní-dé chi ñá túú cùyáchí-í”, càchí-dé xǎha<sup>n</sup>-dě.

19 Te ìngá-dé ní xáha<sup>n</sup>-dě: “Ní saa<sup>n</sup>-í úhú<sup>n</sup> yùndá ndìcutu sa xìtu, te cue quiti-án quíhí<sup>n</sup>-í coto ndeé-í-güedi vitna, núu xǎ<sup>n</sup> càhá<sup>n</sup> ndàhú-í núú-n sǎ cǔñaha-n xii téé càhá<sup>n</sup> ñáhá-ǎ<sup>n</sup> xii-í sá ná cádá càhnu iní-dé chi ñá túú cùyáchí-í”, càchí-dé xǎha<sup>n</sup>-dě.

20 Te ìngá tucu-dé ní xáha<sup>n</sup>-dě: “Íchí ñǎ tnándaha-í nǔu xǎ<sup>n</sup> vá cùyáchí-í quíhí<sup>n</sup>-í”, càchí-dé xǎha<sup>n</sup>-dě.

21 Te òré ní nasáá téé xìnu cuechi-án, te ní nacani tnúhu-dé núú pàtróó<sup>n</sup>-dě nchaa nàcuáa ní xáhǎ<sup>n</sup>-yu. Te ní cudéé<sup>n</sup> tēe cùu patróó<sup>n</sup>-ǎ<sup>n</sup>, te ní xáha<sup>n</sup>-dě xii téé xìnu cuechi núú-dě-án: “Yáchí cuàhá<sup>n</sup> nanducu-n nchàa ñáyiu ndàhú, ndíhi nchaa ñáyiu ñá cúú càca, ndíhi nchaa ñáyiu yacua, ndíhi nchaa ñáyiu cuàá, te nděni ní cuu na nàníhí<sup>n</sup>-yu te candecá-n-yu quixi”, càchí-dé xǎha<sup>n</sup>-dě.

22 Te sátá ñǎ nasáá téé xìnu cuechi-án, te ní xáha<sup>n</sup>-dě xii pàtróó<sup>n</sup>-dě: “Pàtróó<sup>n</sup>, sa ní quide-í chiu<sup>n</sup> ní táhú-n, dico ndècu-gá núú cóo-yu”,

càchí-dé xǎha<sup>n</sup>-dě.

<sup>23</sup> Te tée cùu patróó<sup>n</sup>-dě-á<sup>n</sup> nǐ xǎha<sup>n</sup>-dě: “Cuàhá<sup>n</sup> tucu ndèni ní cuu te cada yica-n na quìxí-yu quíhu-yu cuèndá ná chítú vehe-í.

<sup>24</sup> Te na càchí tnúhu-í xii-n sǎ nì ì<sup>n</sup> ñáyiú ní cáhá<sup>n</sup>-í díhna vá cúú-gǎ caxí-yu sá sà ní quide túha-í caxí-yu ni cùu”, cachí tée-á<sup>n</sup> xǎha<sup>n</sup>-dě xii tée xínu cuechi núú-dě —càchí-gá xǎha<sup>n</sup>-gǎ xii tée-á<sup>n</sup>.

*Ndoho-o cùndecu-o ichi Xítóhó Jesucristú*

*(Mt. 10:37-38)*

<sup>25</sup> Te ío cuéhé ñáyiú nchìcú<sup>n</sup>-yu Jèsús, te ní xǎha<sup>n</sup>-gǎ xií-yu:

<sup>26</sup> —Te núu dava nchòhó cuení-ndó chìtnahá ñáhá-ndó xì-í, te cuu iní ñáhá ndìsa-ndo. Te cuèi na dándóo-ndo tǎtá-ndó, ndìhì náná-ndó, ndìhì ñadihí-ndó, ndìhì déhe-ndo, ndìhì ñaní-ndó, ndìhì cúha-ndo, te cani iní-ndó sǎ cuèi na cùú-ndó sǎ cuèndá-í, te duca<sup>n</sup> te cuu ndìsa-ndo cuè ñáyiú tnàhá tnúhu ndìhì-í.

<sup>27</sup> Te nchaa ñáyiú vá cǎnchícú<sup>n</sup> nihnu ñaha xì-í cuèndá sá yùhú-yu ndohó-yu dàtná ndoho-í, ñáyiú-á<sup>n</sup> vǎ cúú-yu ñáyiú tnahá tnúhu ndìhì-í.

<sup>28</sup> Te núu ì<sup>n</sup> nchòhó ná cǎni iní-ndó dàcaa-ndo ì<sup>n</sup> vehe ducú<sup>n</sup>, ¿te náa ñá díú díhna-gá cada cuèndá-ndó nǔu ndědau díhú<sup>n</sup> cuu, duca<sup>n</sup> te cutnùní iní-ndó nǔu tnahá díhú<sup>n</sup>-ndó càa vehe-á<sup>n</sup> àdi ñáhá?

<sup>29</sup> Chì núu vá dúcá<sup>n</sup> càda-ndo, te na ngüíta-ndo tàusaha-ndo te vá xǐnu cada-ndo, te nchaa ñáyiú na cùndehe ñaha xii-ndo, te cáhá<sup>n</sup> cuèhé-yu cuèndá-ndó.

<sup>30</sup> Te cachí-yu: “Tée-ǎ<sup>n</sup> ní ngüíta-dé dácàa-dé ì<sup>n</sup> vehe te ñá ní ndàcu-dé xínu”, cachí-yu.

31 Àdi te núu ìí<sup>n</sup> téé yìndaha ñaha xii ñáiyu cuení-dé nàá-dé ndìhi ingá tucu téé yìndaha ñaha xii ñáiyu, ¿te náa ñá díú dǐhna-gá cada cuendá-dé te núu ndacu-dé ndìhi úxí mǐl cue sandàdú-dé nàá-güedé, ndìhi ócó mǐl cue sandàdú ingá tucu téé yìndaha ñaha xii ñáiyu cùu úhú iní tnáhá ndìhi-dé-á<sup>n</sup>?

32 Àdi te núu xìto-dé sá vǎ ndácú-dě ñá, te òré vátá cùyàtni ñaha-gá téé cùu úhú iní tnáhá ndìhi-dé-á<sup>n</sup>, te tendaha-dě ìí<sup>n</sup> téé quíhí<sup>n</sup>-dé quíhu-dé tnúhu ndàhú núú tǎe-á<sup>n</sup> cuendá sá vǎ nàá-güedé.

33 Te duha càhá<sup>n</sup>-í chi núu nchòhó vá cádá ndèe iní-ndó dàña-ndo nchaa sá ndécú ndìhi-ndo cuendá chitnahá ñáhá-ndó xii-í, te vá cúu-ndó cuè ñáiyu tnáhá tnúhu ndìhi-í.

*Ñí<sup>n</sup> ñí nduu víxi<sup>n</sup>  
(Mt. 5:13; Mr. 9:50)*

34 Te ñí<sup>n</sup> chi ío váha, dico núu na ndùu víxi<sup>n</sup>-xi, ¿te nása-gá cada-o nándíhi-o te núu duca<sup>n</sup>-í?

35 Chi ñá túú-gǎ nándíhi-xi nì sá dàcá ñuhu, te nì sá dàcá sahá<sup>n</sup>, chi cuendá-nǎ dǎngoyo-o. Te nchaa nchòhó ñáiyu ní xíndedóho tnúhu ní cáhá<sup>n</sup>-í-a xìni ñuhu-xi ío váha cuáha-ndo cuendá — càhí-gá xáha<sup>n</sup>-gǎ xii-yu.

## 15

*Cuendá ìí<sup>n</sup> mběé quiti ní xíta  
(Mt. 18:10-14)*

<sup>1</sup> Te cue téé cuihna ìní-xi quide cobrá ñáhá xii ñáiyu cuendá impuèstú ndìhi cue dava-gá ñáiyu

ndècu ichi cuehé ichi duha ní quexió-yu núú ndécú Jèsús cuendá cundedóho-yu tnúhu càhá<sup>n</sup>-gá.

<sup>2</sup> Te ní nguíta cue téé cùu fariséú, ndihì cue téé dàcuaha ñaha xii ñáyiú nchaa tnúhu ní chídó tnùnì ndíi Moisés xícáhá<sup>n</sup> cuèhé-güedé cuendá-gá, te cächí-güedé:

—Tée-a quèhe<sup>n</sup> cuendá-dé ñáyiú ndècu ichi cuehé ichi duha, te xèxi ndihì ñaha-dé xií-yu —cächí-güedé xitnàha-güedé.

<sup>3</sup> Te Jèsús ní cani-gá ì<sup>n</sup> cuendú nàcuáa tecú tnùnì-güedé tnúhu-gá, te xáha<sup>n</sup>-gá xii-güedé:

<sup>4</sup> —Ì<sup>n</sup> téé ndècu ì<sup>n</sup> ciendú mběé-dě, te ní xíta ì<sup>n</sup>-dì, te nchòhó sa cùtnunì iní-ndó nàcuáa cada téé-á<sup>n</sup>, chi dándóo-dé cúmídícó sǎhú<sup>n</sup> cúmí-dì ì<sup>n</sup> yucu, te cúnúndúcú-dě quitì ní xíta xía<sup>n</sup> ndèé ndéé naníhí-dě-dì.

<sup>5</sup> Te òré ní naníhí-dě-dì te ní dácáá-dě-dì chíó-dě ní docó-dé-dì sá cúdǎ iní-dé.

<sup>6</sup> Te òré ní nasáá-dé vehe-dé, te ní dátàcá-dé nchaa cue téé càhá<sup>n</sup> ndihì-dé, ndihì nchaa ñáyiú ndècu yatni ndihì-dé, te ní xáha<sup>n</sup>-dě: “Chí ná cùdíí iní-ó vitna, chi ní naníhì-í mběè-í quitì ní xíta ni cùu”, cachí-dé xǎha<sup>n</sup>-dě xií-yu.

<sup>7</sup> Te yúhú cächí-í sá ìo-gá cúdǎ iní Yǎ Ndiǒxí ndihì cue espíritú xínú cuèchi núú-gǎ nǔu ì<sup>n</sup> ñáyiú ndècu ichi cuehé ichi duha na ndìxi cuèchi iní-yu cuendá nchaa sá ñà túú vǎha quidé-yu ndécú-yu te tnií-yu ichi-gá, dàcúúxí cùmídícó sǎhú<sup>n</sup> cúmí ñáyiú sa ní tuha ichi-gá, chi ñà túú-gǎ xíní ñùhu-xi ndìxi cuèchi iní-yu chi sa ndécú-yu ichi-gá —cächí-gá xáha<sup>n</sup>-gǎ xii-güedé.

*Cuendá díhú<sup>n</sup> nǐ xíta*

8 Te ní cani Jèsús ìngá cuèndú núú-güedě, te xáha<sup>n</sup>-gă:

—*Ï<sup>n</sup>* ñadìhí ndécú ndìhi-a<sup>n</sup> úxí dǐhú<sup>n</sup> cuèxí<sup>n</sup>, te ní dácũta-a<sup>n</sup> *Ï<sup>n</sup>* te ní teñuhú-a<sup>n</sup> iti, te ní ngũita-a<sup>n</sup> nàtihu-a<sup>n</sup> vehe, te súúní vǎha vǎha ní nanducu-a<sup>n</sup> nděé ní naníhí-a<sup>n</sup>.

9 Te òré ní naníhí-a<sup>n</sup>, te ní dátàcá-a<sup>n</sup> nchaa ñáyiu dǐhí càhá<sup>n</sup> ndìhi-a<sup>n</sup> ndìhi nchaa ñáyiu ndècu yatni ndìhi-a<sup>n</sup>, te ní xáha<sup>n</sup>-a<sup>n</sup>: “Chí ná cùdíí ìní-ó vǐtna chi ní naníhí-í dǐhù<sup>n</sup>-í sá ñǐ xíta ni cùu”, cachí-a<sup>n</sup> xáha<sup>n</sup>-a<sup>n</sup> xii-yu.

10 Te yúhú càchí-í sá dúcá<sup>n</sup> ïo cùdíí ìní nchaa espíritú xínú cuèchi núú Yǎ Ndiǒxí, núú *Ï<sup>n</sup>* ñáyiu ndècu ichi cuehé ichi duha na ndìxi cuèchi ìní-yu cuèndá nchaa sá ñà túú vǎha quidé-yu, te tnií-yu ichi-gá —càchí-gá xáha<sup>n</sup>-gă xii-güedě.

*Cuèndá *Ï<sup>n</sup>* téé ñà túú ní quide vǎha*

11 Te ní cani tucu Jèsús ìngá cuèndú núú-güedě, te xáha<sup>n</sup>-gă:

—*Ï<sup>n</sup>* téé ndècu úú déhe ducu<sup>n</sup>-dé,

12 te téé lǐhli-gá ní xáha<sup>n</sup>-dě xii tǎtá-dě: “Táu, taxi-n tǎhú sǎ cúu cuèndá-í”, càchí-dé xáha<sup>n</sup>-dě. Te tǎtá-dě-á<sup>n</sup> ñǐ sǎñaha-dě ndí díí<sup>n</sup> nǔú-güedě sá cúu cuèndá-güedě.

13 Te núú sàcú-ni nduu, te déhe-dé téé lǐhli-gá-á<sup>n</sup> ñǐ nadico-dě nchaa sá ñǐ sǎñaha tǎtá-dě, te ní xica-dé cuáhá<sup>n</sup>-dé *Ï<sup>n</sup>* ñuú xícá, te yàcá<sup>n</sup> ní tnií-dé *Ï<sup>n</sup>* ichi cuehé ichi duha, te ní ndìhi dǐhú<sup>n</sup>-dě ní dándóñùhu-dé ndìhi cue téé càhá<sup>n</sup> ndìhi-dé, ndìhi nchaa ñáyiu dǐhí xǐndecu ichi díí ìní.

14 Te ní ndìhi ndoo dǐhú<sup>n</sup>-dě ní dándóñùhu-dé, te núú sàcú-ni nduu ní sáá tnamá ñuú núú



ndécú-dě-á<sup>n</sup>, te ñá ñihí-gá-dé sá cáxí-dě, te xihí-dé docó.

15 Núu ní xica-dé cuáhá<sup>n</sup> ndúcú chiu<sup>n</sup>-dé núú ì<sup>n</sup> téé ðiu-ni ñuú xía<sup>n</sup>, te téé-á<sup>n</sup> ñí sáha chiu<sup>n</sup> ñaha-dé ì<sup>n</sup> xichi núú ñúhú-dě coto-dé cùchí.

16 Te súúní xihí-dé docó te cuìní-dé caxi-dé nchaa sá sáha-yu cùchí-á<sup>n</sup> ní cùu, dico ñá túú ní sãñàhá-yu xii-dé.

17 Te uu<sup>n</sup>ni ní sani váha iní-dé, te ní cachí-dé: “Ío cuéhé cue téé xínu cuechi vehe tătá-í te ío cuéhé sã xéxí-güedě ndécú, te yúhú duha ndòho-í docó iha!

18 Te ndacuñí-í te núhú-í vehe tătá-í, te cúñaha-í xii-dé: Táu, ñá túú ní quide váha-í núú Yã Ndiöxí te ni ñà túú ní quide váha-í núú-n,

19 te ñá túú-gã tàú-í sá cùu-í déhe-n vitna, te cada ñaha-nă-n xii-í ðàtná ì<sup>n</sup> téé xínu cuechi núú-n”, duha ní sani iní-dé cúñaha-dě xii tătá-dě.

20 Te sátá dúcá<sup>n</sup> ñí sani iní-dé, te ní natnii-dé ichi cuánuhú-dé vehe tătá-dě, te xica-gã cuánuhú-dé ní xiní ñáhá tătá-dě xii-dé te ní cundàhú iní ñáhá-dě, Te xínu tătá-dě-á<sup>n</sup> ñí sáhá<sup>n</sup> nútnahá ñáhá-dě, te ní numi ñaha-dě, te ío váha ní cáhá<sup>n</sup> ndihí ñaha-dě.

21 Te ní xáha<sup>n</sup> dēhe-dé-á<sup>n</sup> xii-dé: “Táu, ñá túú ní quide váha-í núú Yã Ndiöxí te ni ñà túú ní quide váha-í núú-n, te ñá túú-gã tàú-í sá cùu-í déhe-n vitna”, cachí-dé xăha<sup>n</sup>-dě.

22 ‘Dico tătá-dě-á<sup>n</sup> ñí xáha<sup>n</sup>-dě xii cue téé xínu cuechi núú-dě: “Chí queñùhu ndihí-ni dóó văha-gá cuáha-ndo dēhe-í-a na cuìhnu-dé, ndihí ì<sup>n</sup> dehé ná quihí díquí ndáhá-dě, ndihí chàu váha na quihí-dé.

23 Te quíhí<sup>n</sup> nguehe<sup>n</sup>-ndo ì<sup>n</sup> ndicutu numa quiti caváha-gá, te cahni-ndo-di, te na càda-o vico, te na càxi-o-di.

24 Chi déhe-í-a ní sani iní-í sá ñí xihí-dé ní cùu,

te ñáhá chi ndècu vívú-dě, te ní sani tucu iní-í sá ñí xíta-dé ní cùu te ní nasáá méé-dě”, càchí-dé xǎha<sup>n</sup>-dě xii cue téé xìnu cuechi núú-dě-á<sup>n</sup>. Te ní ngüíta-güedé ní quide-güedé vico.

25 Te déhe-dé téé sàcuéhé-gǎ cuáhá<sup>n</sup>-dé yucu, te òré cuándixi-dé tá ndùu yatni-dé vehe, te ní tecú dóho-dé íó yaá cúú vico.

26 Te ní cana-dé ì<sup>n</sup> téé xìnu cuechi, te ní xícá<sup>n</sup> tnúhú-dě núú-dě ná cuendá duca<sup>n</sup> íó yaá.

27 Te téé xìnu cuechi-á<sup>n</sup> ñí xáha<sup>n</sup>-dě: “Ñaní-n tǎe cuáhá<sup>n</sup> ní cùu ní nasáá-dé, te tǎtá-n ñí táúchíú<sup>n</sup>-dě ní xíhí ì<sup>n</sup> ndicutu nùma quiti caváha-gá cuendá sá ñí nasáá váha-dé”, càchí-dé xǎha<sup>n</sup>-dě.

28 Dico ñaní-dé téé sàcuéhé-ǎ<sup>n</sup> ñí cudéé<sup>n</sup>-dě, te ní cachí-dé sá vǎ ndǐhu-dé vehe cundecu-dé vico-á<sup>n</sup> ní cùu, dico ní quee tǎtá-güedé ní cáhá<sup>n</sup> ndáhú-dé núú-dě cuendá ndǐhu-dé.

29 Te ní xáha<sup>n</sup>-dě xii tǎtá-dě: “Táu, cundedóho váha saú-n tnǔhu na càhá<sup>n</sup>-í-a, yúhú ío cuéhé cuǎ ñí cuu xìnu cuechi-í núú-n, te ni ì<sup>n</sup> xito ñá túú quide sáá iní-í núú-n, te ni ì<sup>n</sup> chivá lǐhli ñá túú tàxi-n-di caxi díí iní-í-di ndihí cue téé càhá<sup>n</sup> ndihí-í.

30 Te vitna ní nasáá déhe-n tǎe ní sáhá<sup>n</sup> ní dándóñùhu díhú<sup>n</sup>-n ndihí nchaa ñáyiú xíndecu ichi díí iní. Te ní sahani-n ì<sup>n</sup> ndicutu numa quiti caváha-gá sá cuendá-dé”, càchí-dé xǎha<sup>n</sup>-dě xii tǎtá-dě.

31 Te ní xáha<sup>n</sup> tǎtá-dě xii-dé: “Yòhó déhe-í duca<sup>n</sup>-ni ndècu ndihí ñaha-n xii-í, te nchaa sá ndécú ndihí-í cúú-xí cuendá-n.

32 Te vitna dacuítí tàú-xi sá cádá-ó vico, te cudíí iní-ó, chi ñaní-n-á<sup>n</sup> ñí quide-í cuendá sá ñí xíhí-dé ní cùu, te ñáhá chi ndècu vívú-dě, te sa ní xíta-dé ní cùu, te ní nasáá méé-dě”, càchí-dé xǎha<sup>n</sup>-dě xii

déhe-dé téé sàcuéhé-gă-á<sup>n</sup> —duha cuáhá<sup>n</sup> cuèndú ní cani Jèsús núú-güedé.

## 16

*Nàcuáa ní quide ì<sup>n</sup> téé tàxi tnuní ñáhá xii cue téé xìnu cuechi*

<sup>1</sup> Te Jèsús xáha<sup>n</sup>-gă xii cue téé xica cuu ndihi-gá:

—Ní xíndecu ì<sup>n</sup> téé cuica, te duca<sup>n</sup> ñí xíndecu ì<sup>n</sup> téé ní taxi tnuní ñáhá xii cue téé ní xinu cuechi núú-dě. Te téé-á<sup>n</sup> ñí xíní ñáhá ñăyiu dùhu-dé díhú<sup>n</sup> tée cùu patróó<sup>n</sup>-dě, te cuáhá<sup>n</sup>-dé dándòñuhu-dé, te ní xáhá<sup>n</sup>-yu xii téé cùu patróó<sup>n</sup>-dě sá dúcá<sup>n</sup> quide-dé.

<sup>2</sup> Te téé cùu patróó<sup>n</sup>-dě-á<sup>n</sup> ñí cana ñaha-dě xii-dé, te ní xáha<sup>n</sup>-dě: “¿Ná cuèndá duha càhá<sup>n</sup> ñăyiu cuèndá-n? Yáchí chi na tàxi cuèndá-n nchàa chiú<sup>n</sup> ní quide-n, chi vitna te vá táxí tnuní-gá-n cuè téé xìnu cuechi núú-í”, càchí-dé xăha<sup>n</sup>-dě.

<sup>3</sup> Te téé tàxi tnuní ñáhá xii cue téé xìnu cuechi-á<sup>n</sup> ñí sani iní-dé: “¿Te nása cada-í vitna na quèhndé patròò<sup>n</sup>-í chiú<sup>n</sup>-í? Chi ñá cùndè-gá-í cada-í chiú<sup>n</sup> véé, te cùcaha<sup>n</sup> núú-í cáca<sup>n</sup> ndàhú-í.

<sup>4</sup> Dico duha cada-í cuèndá quehe<sup>n</sup> cuèndá ñáhá ñăyiu vehé-yu òré ná quèhndé duu<sup>n</sup>-ná patròò<sup>n</sup>-í chiú<sup>n</sup>-í”, duha ní sani iní-dé.

<sup>5</sup> Te sátá dúcá<sup>n</sup> te ní cana-dé ì<sup>n</sup> ì<sup>n</sup> cue téé tàú núú patróó<sup>n</sup>-güedé. Te téé díhna ní xícá<sup>n</sup> tnúhú-dě núú-dě, te xăha<sup>n</sup>-dě: “¿Ndèé dau tàú-n núú patróó<sup>n</sup>-i?”, càchí-dé xăha<sup>n</sup>-dě.

<sup>6</sup> Te téé-á<sup>n</sup> ñí xáha<sup>n</sup>-dě: “Tàú-í ì<sup>n</sup> cièndú bàrríl acítí”, càchí-dé xăha<sup>n</sup>-dě. Te téé tàxi tnuní ñáhá xii cue téé xìnu cuechi-á<sup>n</sup> ñí xáha<sup>n</sup>-dě: “Iha náu reciú-n-á, te ndadúha ingá sá ùdico úxí taxi-n”, càchí-dé xăha<sup>n</sup>-dě.

7 Te dătnùní ní xícá<sup>n</sup> tnúhú tùcu-dé núú ìngá-dé, te xăha<sup>n</sup>-dě: “Te yòhó, ǝndèé dau tàù-n-í?”, cǎchí-dé xăha<sup>n</sup>-dě. Te tée tàù-á<sup>n</sup> nǐ xăha<sup>n</sup>-dě: “Ǟ<sup>n</sup> cièndú ngohnchi triú tàù-í”, cǎchí-dé xăha<sup>n</sup>-dě. Te tée tàxi tnuní ñáhá xìi cue tée xìnu cuechi-á<sup>n</sup> nǐ xăha<sup>n</sup>-dě: “Iha náu reciú-n-á, te cadúha ìngá sá cùmídícó-nǎ taxi-n”, cǎchí-dé xăha<sup>n</sup>-dě.

8 Te tée cùu patróó<sup>n</sup>-á<sup>n</sup> nǐ cachí-dé sá ìo váha ñùhu díquí tée dùhu-á<sup>n</sup> nàcuáa cada-dé cundecu váha-dé. Te nchaa ñáyiu xǐndecu ichi cuèhé ichi duha, ío-gá váha ñùhu díquí-yu nàcuáa cadá-yu cundecu váha-yu ndihì nchaa ñáyiu cùndihí-yu dàcúúxí ñáyiu ndècu ichi Yá Ndiǒxí.

9 Te yúhú cǎchí-í sá cadá-ndó sǎ vǎha ndihì nchaa sá ndécú ndihì-ndo ní cuáha ñuyú yǐcá cuèchi-a, te duca<sup>n</sup> te coo cue tée ío váha tnahá tnúhu ndihì-ndo, te òré ná ndihì nchaa sá ío ñuyú-a, te Yá Ndiǒxí quehe<sup>n</sup> cuèndá ñáhá-gǎ xii-ndo, te cundecu-ndo ndihì-gá nǐ caa nǐ quíhí<sup>n</sup>.

10 Te núu Ǟ<sup>n</sup> tée quède ndáá cuèi Ǟ<sup>n</sup> chù<sup>n</sup> líhli na càda-dé, te diu-ni duca<sup>n</sup> quède ndáá-dé cuèi Ǟ<sup>n</sup> chù<sup>n</sup> cahnu na cada-dé. Dico tée ñǎ túú quède ndáá, chi cuèi chù<sup>n</sup> líhli àdi chiu<sup>n</sup> cahnu na cada-dé dico Ǟ<sup>n</sup>-ni quède-dé.

11 Te núu nchòhó vá cadá-ndó sǎ vǎha ndihì nchaa sá nǐ cuáha ñuyú yǐcá cuèchi-a ña, te Yá Ndiǒxí vá táxi-gǎ sá vǎha ndècu ndihì-gá xii-ndo.

12 Te núu vá cadá ndáá-ndó còto-ndo nchaa sá táxi nùu tnahá ñáyiu-ndo, te vá yòo taxi sá ndúú tàhú-ndó.

13 Te nǐ Ǟ<sup>n</sup> tée xìnu cuechi vá ndácú-dě cunu cuechi-dě núú ǔú patróó<sup>n</sup>, chi tée-á<sup>n</sup> cuu váha iní-dé núú Ǟ<sup>n</sup> patróó<sup>n</sup>-dě te tnǐ-dé nchaa tnúhu

càhá<sup>n</sup> pàtróó<sup>n</sup> tée cùu váha iní-dé núu-xi-á<sup>n</sup>. Te núu ìngá tucu pàtróó<sup>n</sup>-dě vá cúú vâha iní-dé, te ni vâ tníí-dě tnúhu càhá<sup>n</sup> pàtróó<sup>n</sup>-dě-á<sup>n</sup>. Te duca<sup>n</sup> sãtnahá-xi cùu nchohó chi vá ndácú-ndó cùnu cuechi-ndo núu Yá Ndiõxí te cuhu<sup>n</sup> iní-ndó nchaa sá íó ñuyú-a —càchí-gá xáha<sup>n</sup>-gã xii-güedé.

14 Te nchaa cue tée cùu fariséú ío ñùhu iní-güedé nchaa sá íó ñuyú-a, te xìndedóho-güedé nchaa tnúhu càhá<sup>n</sup> Jèsús, te ní cáhá<sup>n</sup> yíchí-güedé cuendá-gá.

15 Te Jèsús ní xáha<sup>n</sup>-gã xii-güedé:

—Nchòhó cúú-ndó cuè tée ío váha càhá<sup>n</sup> núu ñáyíu cuendá-ni sá cuìní-ndó cãhá<sup>n</sup> váha-yu cuendá-ndó, dico Yá Ndiõxí xìní ndáá-gá nàcuáa càa iní-ndó ì<sup>n</sup> ì<sup>n</sup>-ndo, te nchaa sá càchí cue ñáyíu ñuyú-a sá ìo nàndíhi, Yá Ndiõxí dáquèe tíhú-gã.

*Cuendá nchaa tnúhu ní chídó tnùní ndíi Moisés*

16 Te nchaa tnúhu ní chídó tnùní ndíi Moisés cúnùu-xi ni cuu, ndíhi nchaa tnúhu ní chídó tnùní cue tée ní xóo cáhá<sup>n</sup> tnúhu Yá Ndiõxí ndée sanaha. Dico cútnàhá ní ngúíta té Juáá tée ní xóo dacuàndute ñaha xii ñáyíu ní cáhá<sup>n</sup>-dé tnúhu-í, ndée dàvá-á<sup>n</sup> ñà túú-gã ní cùnùu nchaa tnúhu ní chídó tnùní ndíi Moisés ndíhi nchaa tnúhu ní chídó tnùní cue tée ní xóo cáhá<sup>n</sup> tnúhu Yá Ndiõxí ndée sanaha. Te ñíu-ni ndée dàvá-á<sup>n</sup> ní quesaha ta təcú tnùní ñáyíu nàcuáa ndíhu ndaha ñàha Yá Ndiõxí xií-yu, te vài ñáyíu ío sàni iní-yu vitna nàcuáa cadá-yu ndíhu ndaha ñàha Yá Ndiõxí xií-yu.

17 Te nchaa tnúhu ní chídó tnùní ndíi Moisés ío ndáá càhá<sup>n</sup>-xi, te ndíhi-gá naa andíu ndíhi ñuyúu dàcúúxí sã ndíhí ì<sup>n</sup> ì<sup>n</sup> tnúhu-á<sup>n</sup> cada-xi nàcuáa càhá<sup>n</sup>-xi.

*Jèsús càhá<sup>n</sup>-gá cuèndá ñáyiú dàña tnaha*  
*(Mt. 19:1-12; Mr. 10:1-12)*

18 Te núu ì<sup>n</sup> téé na dàña tnaha-dé, ndìhì ñadìhì-dé, te tnándaha tucu-dé ndìhì ingá-yu, te nèhé víhì quìde-dé te núu duca<sup>n</sup> na càda-dé, te téé na tnándaha ndìhì ñaha ní dáñá yì-xi, te ñu-ni duca<sup>n</sup> ñà túú cùu-xi sá vâha te núu duca<sup>n</sup> na càdá-yu —càchí-gá xâha<sup>n</sup>-gâ xii-güedé.

*Cuèndá ì<sup>n</sup> téé nàni Lázaru ndìhì cuèndá ì<sup>n</sup> téé cuica*

19 Te xâha<sup>n</sup> tucu-gâ xii-güedé:

—Ní xíndecu ì<sup>n</sup> téé cuica, te ní xóo cuihnu-dé mee-ni dõó vâha dóó vii càa, te nchaa nduu súúni vâha ní xóo cada-dé vico vehe-dé.

20 Te ní xíndecu tucu ì<sup>n</sup> téé ndàhú ní xínani-dě Lázaru, te téé-á<sup>n</sup> ñì cuhú-dé ní xíndeé-dé ñtùhú-dé ndìhyì, te ì<sup>n</sup> nduu ì<sup>n</sup> nduu ní xóo taxinucóo ñaha-güedě xii-dé yuyèhe téé cuica-á<sup>n</sup>.

21 Te téé ndàhú-á<sup>n</sup> ñì xóo cuú-dé docó, te ní xóo cuiní-dé caxi-dé nchaa sá ñà túú-gâ ní xõ yâha caxi téé cuica-á<sup>n</sup>, te ñà túú ní xõ níhí-dě. Te cuèi iná ní xóo quíhí<sup>n</sup>-dì ní xóo nayuu-dì nchaa núú ndìhyì ndèé-dé-á<sup>n</sup>.

22 Te ní sáá ì<sup>n</sup> nduu te ní xíhì téé ndàhú-á<sup>n</sup>, te cue espíritú xínú cuèchi núú Yă Ndiõxí ndécá ñàha-xi xii-dé cuándaa núú ndécú tě Àbrahám cundecu-dé. Te ní sáá nduu ñì xíhì téé cuica-á<sup>n</sup> tnàhá-dé, te ní chindúxi ñaha-güedě xii-dé.

23 Te ní sáá-dé núú xíndecu nchaa ñáyiú ní xíhì ñà túú ní quìde ndáá núú Yă Ndiõxí te xiá<sup>n</sup> ño ndòho-dé ndécú-dě, te ní ndonehe núú-dě te xica ñì xíní-dé té Àbrahám ndìhì té Lázaru-á<sup>n</sup> xíndecu-güedé.

24 Te níhì ní cáhá<sup>n</sup>-dé, te xâha<sup>n</sup>-dě: “Yòhó tătá Àbrahám, cundàhú iní ñáhá xii-í, te cúñaha xii

té Lăzarú ná dândaxi<sup>n</sup>-dé díquí ndáhá-dě, te na quixi-dé dandàxi<sup>n</sup>-dé yàa-í, chí ío ndòho-í ñùhù-í núú ñùhú núú càyú-a”, cächí-dé xăha<sup>n</sup>-dě xii té Àbrahám.

<sup>25</sup> Dico té Àbrahám ní xăha<sup>n</sup>-dě: “Ndàhú yòhó ñanı tnáhà-í, dandàcu iní sá ïo váha ní xíndecu-n ñùyíú, te té Lăzarú ío ndàhú ní ndoho-dé ní xíndecu-dé. Te vitna ní nucúndecu váha-dé iha, te yòhó ndóhó-n vitna.

<sup>26</sup> Te ñá díú-ní să xă<sup>n</sup> tucu, chí cuádava ndècu ñ<sup>n</sup> déhvá cùnú ñùhú nèhu-xi núú ndécú-ó, te cuèi nchaa ñáyíu xíndecu iha na cächí iní-yu quixí-yu núú ndécú-ndó dico vá ndácŭ-yu, te ni nchòhó vá ndácú-ndó quixi-ndo núú ndécú-ndí”, cächí-dé xăha<sup>n</sup>-dě.

<sup>27</sup> Te ní xăha<sup>n</sup> tée cuica-ă<sup>n</sup>: “Te núu duca<sup>n</sup> te cáhá<sup>n</sup> ndàhú-í núú yòhó tătá Àbrahám vitna sá téndàha-n té Lăzarú ná quíhí<sup>n</sup>-dé vehe tătà-í,

<sup>28</sup> chí ndècu úhú<sup>n</sup>-gá ñanı-í, te na cŭñaha-dě xii-güedé sá vă cádá-güedě dàtná ní quide-í cuendá sá vă quixí-güedě tnáhá-güedé núú ndécú-í ndòhò-í-a”, cächí-dé xăha<sup>n</sup>-dě.

<sup>29</sup> Te té Àbrahám ní xăha<sup>n</sup>-dě: “Mee-güedě ndécú ndìhi-güedé nchaa tnúhu ní chídó tnùní ndíi Moisés, ndìhi nchaa tnúhu ní chídó tnùní cue tée ní xóo cáhá<sup>n</sup> tnúhu Yá Ndiòxí ndée sanaha, te nchaa tnúhu-á<sup>n</sup> ná tnèi-güedé nàcuáa cáhá<sup>n</sup>-xi”, cächí-dé xăha<sup>n</sup>-dě xii-dé.

<sup>30</sup> Te ní xăha<sup>n</sup> tùcu tée cuica-ă<sup>n</sup>: “Tătá Àbrahám, dico vá cádá cuendá-güedé nchaa tnúhu-á<sup>n</sup>, dico núu ñ<sup>n</sup> ñáyíu ñá túú-gă ndécú ñùyíú ñ<sup>n</sup> ñáyíu ndècu ndìhi-n quíhí<sup>n</sup>-yu cáhá<sup>n</sup> ndìhi ñàhá-yu xii-güedé

nàcuáa ndùu tnúhu váha, te ndixi cuéchi iní-güedé nchaa sá ñà túú quide váha-güedé ndécú-güedé, te cada váha-güedé”, càchí-dé xáha<sup>n</sup>-dě xii-dé.

<sup>31</sup> Dico té Àbrahám ní xáha<sup>n</sup>-dě: “Te núu ñá túú cuiní-güedé tñi-güedé tnúhu ní cáhá<sup>n</sup> ndii Moisés, ndihí tnúhu ní cáhá<sup>n</sup> cue téé ní xóo cáhá<sup>n</sup> tnúhu Yá Ndiöxí ndéé sanaha ña, te ñu-ni duca<sup>n</sup> càda-güedé cuéi ñ<sup>n</sup> ñáyiú ní xíhí ná ndòtó-yu cúñhá-yu nàcuáa ndùu tnúhu váha, chi vá quindáá iní-güedé”, càchí té Àbrahám xáha<sup>n</sup>-dě xii téé cuica-á<sup>n</sup> —càchí Jèsús xáha<sup>n</sup>-gã xii cue téé cùu fariséú.

## 17

*Quihi iní-ó vǎ cùndècu-o ichi cuehé ichi duha  
(Mt. 18:6-7, 21-22; Mr. 9:42)*

<sup>1</sup> Te Jèsús ní xáha<sup>n</sup>-gã xii cue téé xica cuu ndihí-gá:

—Dacuitíí sǎ cóo cuè téé dacáhá<sup>n</sup>-güedé ñáyiú cadá-yu nándi sá cuèhé sá dúhá, j dico ndàhú ní cuu cue téé duca<sup>n</sup> na dàcahá<sup>n</sup> ñáhá xii-yu cadá-yu nándi sá cuèhé sá dúhá!

<sup>2</sup> Chi váha-gá sá nùu na dàcutu ndeé ñáyiú ñ<sup>n</sup> yúú yódó dúcú<sup>n</sup>-güedé te dàquée ñáhá-yu xii-güedé xití ndute lámár, te ñá díú sǎ cùndècu-güedé dacáhá<sup>n</sup>-güedé ñáyiú cadá-yu nándi sá cuèhé sá dúhá, cuéi ñáyiú ndàhú iní-xi dandàhú-güedé.

<sup>3</sup> Te ío quihi iní-ndó cùndecu-ndo.

Te núu ñ<sup>n</sup> ñaní tnáhá-ndó quide-dé ñ<sup>n</sup> sá ñà túú tàú-dé cada-dé sá cúu-xí-ndó te cáhá<sup>n</sup>-ndó dõho-dé, te núu ní ndixi cuéchi iní-dé sá ñà túú ní quide váha-dé, te cada càhnu iní-ndó sǎ ñ<sup>n</sup> quide-dé.



4 Te cuèi úsá xito na càda-dé nándi sá ñà túú tàú-dé cada-dé sá cúú-xí-ndó ì<sup>n</sup> nduu, te núu na quìxi-dé úsá xito núú-ndó, te cachí-dé sá vǎ dúcá<sup>n</sup>-gǎ cada-dé, te xìni ñuhu-xi cada cahnu iní-ndó-dě —càchí-gá xáha<sup>n</sup>-gǎ xii-güedé.

*Ñáyiú sàndáá ndisa iní-xi*

5 Te ní xáha<sup>n</sup> cuè téé xìca cuu ndìhi Jesús xii-gá:

—Chindee ñàha xii-ndí cuèndá duca<sup>n</sup> te quíndáá-gá iní-ndí sá Yǎ Ndiǒxí ndácú-gǎ quídé-gǎ nchaa sá vǎha —càchí-güedé xǎha<sup>n</sup>-güedé xii-gá.

6 Te ní xáha<sup>n</sup> Jèsús:

—Te núu nchòhó quíndáá ndisa iní-ndó sǔúni cuèdicó luha líí dàtná cuìní-ndó càa ì<sup>n</sup> ndíquí<sup>n</sup> yutnu nàni mostázá, te duca<sup>n</sup> te cuu cúñaha-ndo xii ì<sup>n</sup> yutnu: “Quene-n ìha te quíhí<sup>n</sup>-n cuìhnu-n xití làmár”, duha cúñaha-ndo. Te duca<sup>n</sup> càda-xi te núu na quíndáá ndisa iní ñáhá-ndó xii-í —càchí-gá xáha<sup>n</sup>-gǎ xii-güedé.

*Nàcuáa tàú ì<sup>n</sup> téé xìnu cuechi cada-dé*

7 Te xǎha<sup>n</sup> tùcu-gá xii-güedé:

—Te núu ì<sup>n</sup> nchòhó ndécú ì<sup>n</sup> téé xìnu cuechi núú-ndó, te cuáhá<sup>n</sup>-dé yucu cuángada chiù<sup>n</sup>-dé, àdi cuáhá<sup>n</sup>-dé yucu coto-dé quiti, te òré ní nasáá-dé vehe sá ñí sáhá<sup>n</sup>-dé yucu, te vǎ cúñaha nchòhó cue téé cùu patróó<sup>n</sup>-dě xii-dé: “Yáchí nehé caxi-n dítá”, vǎ dúhá cúñaha-ndo.

8 Chi nchòhó cue téé cùu patróó<sup>n</sup>-dě cúñaha-ndo xii-dé: “Cundihí iní cada túha sá cudìni-í, te díhna-gá-í caxi-í dítá te dàtnùní caxi-n”, duha cúñaha nchòhó cue téé cùu patróó<sup>n</sup> xii-dé.

9 Te òré ná ndíhí chù<sup>n</sup> ní táhú nchòhó cue téé cùu patróó<sup>n</sup> cada téé xìnu cuechi núú-ndó, te ñá túú tàú-ndó ndàcá<sup>n</sup> táhú-ndó núú tée xìnu cuechi núú-ndó.

10 Te duha càhá<sup>n</sup>-í chi núu òré ná ndìhi nchaa chiu<sup>n</sup> ní táhú Yă Ndiõxí cada-ndo, te cachí-ndó: “Nchúhú cúú-ndí cue téé xìnu cuechi núú Yă Ndiõxí, dico ñá túú tàú-gá ndacá<sup>n</sup> táhú-gă núú-ndí, chi mee-ni chù<sup>n</sup> ní táhú-gă ní quide-ndí”, duha cachí-ndó –càhí-gá xáha<sup>n</sup>-gă xii-güedé.

*Jèsús quidé tătna-gá úxí cue téé tnàhá cuéhé sã dátèhyú nihnu-xi yiqui cùñú ñáyiu*

11 Te ñùhu Jèsús ichi cuáhá<sup>n</sup>-gá ñuú Jerusàlén, te ní yáha-gá núú ràyá distritú Sàmariá ndìhi distritú Galiléá.

12 Te ta cùyatni-gá ì<sup>n</sup> ñuú líhli cuáhá<sup>n</sup>, te ní sátnahá ñáhá ùxí tnàhá cue téé cùhú xii-gá, te tnàhá-güedé cuéhé sã dátèhyú nihnu-xi yiqui cùñú-ó dico xica lùha ní ngúnu tní-güedé,

13 te níhi ní cáhá<sup>n</sup>-güedé, te xáha<sup>n</sup>-güedě xii Jèsús:  
—jMèstrú, cundàhú iní ñáhá xì-ndí! —  
càhí-güedé xáha<sup>n</sup>-güedě xii-gá.

14 Te òré ní xiní ñáhá Jèsús xii-güedé, te ní xáha<sup>n</sup>-gă:

—Chí cuáhá<sup>n</sup> núú dütú ná cùndehe ñaha-dé xii-ndo —càhí-gá xáha<sup>n</sup>-gă xii-güedé.

Te ní xica-güedé cuáhá<sup>n</sup>-güedé, te ichi-ni ñùhu-güedé cuáhá<sup>n</sup>-güedé ní ndúha-güedé cuéhé tnàhá-güedé.

15 Te nchaa-güedé ní cutnùní iní-güedé sá ñí ndúha-güedé, dico ì<sup>n</sup>-ni-dé ní nacuico-dě, te ní ngúita-dé níhi ní cáhá<sup>n</sup>-dé, te ní cachí-dé sá ïo càhnu cuu Yă Ndiõxí.

16 Te ní ngüíñí xítí-dě núú Jèsús, te ní nuu núú-dě ndàa núú ñúhú ndàcá<sup>n</sup> táhú-dě núú-gă. Te téé-á<sup>n</sup> cúú-dě téé distritú Sàmariá.

17 Te Jèsús ní cachí-gá:

—Úxí tnàhá-güedé ní ndúha cuéhé tnàhá-güedé. ¿Te ndéé ndécú dàva-gá-güedé-i?

18 ¿Te náa ñ<sup>n</sup>dìi-ni téé ingá ñuú-a ní nacuico-dě ndàcá<sup>n</sup> táhú-dě núú Yă Ndiöxí, te cächí-dé sá ïo càhnu cuu-gá ñă? —cächí-gá.

19 Te ní xáha<sup>n</sup>-gă xii téé-á<sup>n</sup>:

—Ndacuíñí te núhú-n, chi sa ní ndúha-n cuéhé tnàhá-n, chi ní sándáá iní-n Yă Ndiöxí —cächí-gá xáha<sup>n</sup>-gă xii-dé.

*Nàcuáa yìndaha ñaha Yá Ndiöxí*

*(Mt. 24:23-28, 36-41)*

20 Te cue téé cùu fariséú ní xícá<sup>n</sup> tnúhú-güedě núú Jèsús nùu ná ama ngüíta Yá Ndiöxí ndíhu ndaha-gă ñáyiu. Te ní xáha<sup>n</sup>-gă:

—Ñá túú nă cada-xi ñuyíú quiní-ndó cuendá cutnùní iní-ndó să ndíhu ndaha ñaha Yá Ndiöxí xii-ndo.

21 Te ni vă yõo cachí: “Iha ndècu-gá táxí tnùní-gá, àdi yacá<sup>n</sup> ndécú-gă táxí tnùní-gá”, chi tnuú-ndó sà ndecu-gá ndíhi nchaa ñáyiu yìndaha-gá —cächí-gá xáha<sup>n</sup>-gă xii-güedé.

22 Te ní xáha<sup>n</sup>-gă xii cue téé xìca cuu ndíhi-gá:

—Te nchòhó chi sáá nduu, te cachí iní-ndó să sùúní cuèdìcò ñ<sup>n</sup> nduu quiní ñáhá-ndó xii yúhú Téé cùu ñaní tnàhá-ndó nchàa-ndo, dico vá quiní ñáhá-gă-ndó xii-í.

23 Te coo ñáyiu cúñàhá-yu xii-ndo: “Iha ndècu-gá, á<sup>n</sup> yàcá<sup>n</sup> ndécú-gă”, quesàhá-yu

cúñàhá-yu xii-ndo. Dico vá quìndáá iní-ndó quĩhí<sup>n</sup>-ndó ndìhí-yu núú càchí-yu, te ni vǎ cání iní-ndó quĩhí<sup>n</sup> méé-ndó.

<sup>24</sup> Chi dàtná cuíní-ndó quide-xi oré sàá ndúté àndiù, chi uu<sup>n</sup>ni dǎyehé-xi ñihí ñuyíú, duca<sup>n</sup> càda-xi nduu na quixi tucu yúhú Tée cùu ñaní tnáhá-ndó nchàa-ndo, te dàvá-á<sup>n</sup> quini ñáhá nchàa-ndi túhú ñáyiù xii-í.

<sup>25</sup> Dico díhna-gá ndoho v̄hi-í, te daquèè tíhú ñáhá ñáyiù ñuyíú-a xii-í.

<sup>26</sup> Te cadá-yu dàtná ní quide ñáyiù ní xíndecu cútnáhá ní xíndecu té Nǒé, te ñiù-ni duca<sup>n</sup> sǎtnahá-xi cada nchaa ñáyiù ndècu vitna ndéé sáá nduu quixi tucu yúhú Tée cùu ñaní tnáhá-ndó nchàa-ndo.

<sup>27</sup> Chi caxi-ní-yu, coho-ní-yu, te caca cuu-ni cue téè xica ndáhú, te tnǎndaha-ní-yu, chi duca<sup>n</sup> ñi quidé-yu dàvá-á<sup>n</sup> ndéé ní sáá nduu cuǎnguee té Nǒé xití bàrcú, te ní ngüíta-xi ní cuu<sup>n</sup> dáú ñi ndaa ndute ñuyíú, te ncháa-yu ní xihí ní cáhá-yu dàvá-á<sup>n</sup>.

<sup>28</sup> Te ñiù-ni duca<sup>n</sup> ñi quide tucu ñáyiù cútnáhá ní xíndecu té Lǒt, chi xèxí-yu xihí-yu, te sàá<sup>n</sup>-yu te nàdicó-yu, te xǐxitú-yu nándi sá xǐxitú-yu, te nchaa cue téè xídácáá-güedé vehe.

<sup>29</sup> Te òré ní quee té Lǒt ñuú Sòdomá, te ní ngoyo ñuhú andiù, te dàcá yúú sùúni dícó ní nduu ñuhú-ñǎ-xi, te ní xihí nchaandi túhú ñáyiù ñuú-á<sup>n</sup>.

<sup>30</sup> Te ñiù-ni duca<sup>n</sup> sǎtnahá-xi cada ñáyiù na sáá nduu quixi tucu yúhú Tée cùu ñaní tnáhá-ndó nchàa-ndo ñuyíú-a.

<sup>31</sup> 'Te núu ñ<sup>n</sup> ñáyiù càndodó-yu díquí véhě-yu

nduu-ǎ<sup>n</sup>, te nì vá ndǎhu-gá-yu quehé<sup>n</sup>-yu ì<sup>n</sup> ndachìú<sup>n</sup>-yu canehé-yu quíhí<sup>n</sup>, te ñáyiú cuáhá<sup>n</sup> yucu, te nì vá nùhú-gá-yu vehé-yu.

<sup>32</sup> Te chí dándàcu iní nàcuáa ní yáha ñadìhí té Lõt.

<sup>33</sup> Te nchaa ñáyiú cuíní dàcácu nihnu mee-xi ñùyíú-a ña, te cuíta nihnú-yu, te nchaa ñáyiú na cùú sá cuèndá-í, te naníhí tàhú-yu.

<sup>34</sup> Te na càchí tnúhu tucu-í xii-ndo sǎ ndùu-á<sup>n</sup>, te núu úú-yu càa ì<sup>n</sup> núú xǐto, te ì<sup>n</sup>-yu ndanchitá-yu ndaá-yu andiú, te ì<sup>n</sup>-yu quendóo.

<sup>35</sup> Te núu úú ñáyiú dǎhí nchícǒ-yu ì<sup>n</sup>-ni vèhe, te ì<sup>n</sup>-yu ndanchitá-yu ndaá-yu andiú, te ì<sup>n</sup>-yu quendóo.

<sup>36</sup> Te núu úú cue tée yǐhi-güedé yucu, te ì<sup>n</sup>-dé ndànchita-dé ndaa-dé andiú, te ì<sup>n</sup>-dé quendóo — càchí-gá xáha<sup>n</sup>-gǎ xii-güedé.

<sup>37</sup> Te sá dúcá<sup>n</sup> nǐ cáhá<sup>n</sup>-gá nùu ní xícá<sup>n</sup> tnúhú-güedě núú-gǎ, te xǎha<sup>n</sup>-güedě xii-gá:

—Mèstrú, ¿te ndèé duca<sup>n</sup> càda-xi-i? —cachí-güedé xǎha<sup>n</sup>-güedě xii-gá.

Te ní xáha<sup>n</sup>-gǎ:

—Te nchòhó xìní-ndó sǎ ncháá nùú yúcu yìqui cuñú ní xíhí, te yàcá<sup>n</sup> tàcá cue ndixíí xéxí-güedé — cachí-gá xáha<sup>n</sup>-gǎ xii-güedé.

## 18

*Jèsús càhá<sup>n</sup>-gá cuèndá ì<sup>n</sup> juéxí ndihí cuèndá ì<sup>n</sup> ñaha queé*

<sup>1</sup> Te Jèsús ní cani-gá ì<sup>n</sup> cuèndú núú-güedě cuèndá sá vǎ ná tǎhú iní-güedé cáhá<sup>n</sup> ndihí-güedé Yǎ Ndiǒxí nchaa-ni òré.

<sup>2</sup> Te xáha<sup>n</sup>-gǎ:

—H<sup>n</sup> ñuú ndécú h<sup>n</sup> juéxí, te ni ñà túú sàndáá iní-dé Yă Ndiöxí, te ni h<sup>n</sup> tnúhu xáha<sup>n</sup> ñăyiu ñá túú cuení-dé cada cuëndá-dé.

<sup>3</sup> Te ñiu-ni ñuú-á<sup>n</sup> ndécú tùcu h<sup>n</sup> ñadihí ñaha quèé, te ní sáhá<sup>n</sup>-a<sup>n</sup> càhá<sup>n</sup> ndàhú-a<sup>n</sup> núú juéxí-á<sup>n</sup> cuëndá cada ndáá-dé h<sup>n</sup> cuéchi.

<sup>4</sup> Te titní xito ní cuu sàhá<sup>n</sup>-a<sup>n</sup> càhá<sup>n</sup> ndàhú-a<sup>n</sup> núú-dé te ñá túú cuení-dé cada cuëndá-dé tnúhu càhá<sup>n</sup>-a<sup>n</sup> ni cùu, te ndéé núú ñà cúú-gǎ te ní sani iní-dé: “Te cuéi ñá túú sàndáá iní-í Yă Ndiöxí, te ni ñà túú quède cuendá-í nchaa tnúhu càhá<sup>n</sup> ñăyiu cada-í,

<sup>5</sup> dico na càda ndáá-í cuëndá ñaha quèé-a ndihí ñăyiu cùu úhú iní tnáhá ndihí-a<sup>n</sup>, chi vá cùndèe-gá iní-í nuu núu quixi-a<sup>n</sup> dasátú iní ñáhá xì-í”, duha ní sani iní téé cùu juéxí-á<sup>n</sup> —càchí-gá xáha<sup>n</sup>-gǎ xii-güedé.

<sup>6</sup> Te ní xáha<sup>n</sup> tùcu-gá xii-güedé:

—Cada cuëndá-ndó nàcuáa ní sani iní juéxí téé cuihna iní-xi-á<sup>n</sup>.

<sup>7</sup> Te Yă Ndiöxí ío chindee-gá nchaa ñăyiu ní cáhá<sup>n</sup>-gá cundecu ndihí-gá, chi cuéi nduu cuéi niú càhá<sup>n</sup> ndihí ñàhá-yu xii-gá, te vá cúyàa-gá nachinaa-gá nchaa sá quidé ñàha nchaa ñăyiu cùu úhú iní ñáhá xì-yu.

<sup>8</sup> Te ío ndihí duca<sup>n</sup> càda-gá. Te òré ná quixi yúhú Téé cùu ñaní tnáhá-ndó nchàa-ndo, ¿te náa naníhí-gǎ-í ñăyiu sàndáá ndisa iní Yă Ndiöxí-ă<sup>n</sup>? —càchí-gá xáha<sup>n</sup>-gǎ xii-güedé.

*Nàcuáa quède h<sup>n</sup> téé cùu fariséú ndihí h<sup>n</sup> téé cùu cobradór*

9 Te Jèsús ní cáhá<sup>n</sup>-gá núú ñáyiú nàcuáa quide ñáyiú sàni iní sá ïo quide ndáá te dàquee tíhũ-yu tnàha ñáyiú-yu, te xáha<sup>n</sup>-gã xií-yu:

10 —Úú cue tée cuáhá<sup>n</sup>-güedé veñúhu càhnu sá ïo cùnunu cáhá<sup>n</sup> ndihĩ-güedé Yã Ndiõxí, te ì<sup>n</sup>-dé cúú-dě tée cùu fariséú, te ìngá-dé cúú-dě tée cuihna ìní-xi quide cobrá ñáhá xii ñáyiú cuendá impuèstú.

11 Te tée cùu fariséú-á<sup>n</sup> nútnĩ-dé cáhá<sup>n</sup> ndihĩ-dé Yã Ndiõxí, te xáha<sup>n</sup>-dě xii-gá: “Yòhó Dútú Ndiõxí ndácá<sup>n</sup> táhù-í núú-n, chi ñá túú quide-í dàtná quidé dàva-gá-güedé, chi dùhu-güedé, càhá<sup>n</sup> ndihĩ-güedé ñadihí te ñá díú ñadihĩ-güedé cúú-yu, te nándi-gá nchaa sá cuèhé sá dúhá quide-güedé, te ni ñà túú quide-í dàtná quidé tèe cuihna ìní-xi quide cobrá ñáhá xii ñáyiú cuendá impuèstú ndécú ìha.

12 Chi yúhú ñá túú tnàhí ná xéxi-í úú nduu xití samàná cuendá sá càhá<sup>n</sup> ndihĩ ñaha-ĩ xii-n, te nchaa sá nihí-í te càhu-í úxí xichi, te ì<sup>n</sup> xichi tàxi-í xii-n”, càchí-dé xáha<sup>n</sup>-dě xii Yá Ndiõxí.

13 Dico tée cuihna ìní-xi quide cobrá ñáhá xii ñáyiú cuendá impuèstú-á<sup>n</sup> chi xica lùha nutnĩ-dé, te ni lùha ñá túú cùyĩ-dé ndonehe núú-dě andiú cuendá sá ndíxí cuèchi iní-dé nchaa sá ñà túú vãha quide-dé, te ndedí ndaha-dé pèchú-dé sá ndihú iní-dé, te xáha<sup>n</sup>-dě xii Yá Ndiõxí: “¡Yòhó Dútú Ndiõxí cundàhú iní ñáhá xii-í, chi ïo cuèhé sã ñà túú vãha quide-í núú-n!”, càchí-dé xáha<sup>n</sup>-dě xii Yá Ndiõxí.

14 Te na càchí tnúhu-í xii-ndo sã tèe cuihna ìní-xi quide cobrá ñáhá xii ñáyiú-á<sup>n</sup> ni tedóho Yá Ndiõxí nchaa tnúhu ní cáhá<sup>n</sup>-dé, te ní quide càhnu iní-gá nchaa sá ñà túú vãha ní quide-dé, te cuánuhú-dé vehe-dé. Te tée cùu fariséú-á<sup>n</sup> ñà túú ní tédóho

ñaha Yá Ndiöxí xii-dé. Chi nchaa ñáyiú na càda cahnu mee-xi ñuyíú-a te vá cúŷ-yu ñáyiú cùnunu, te nchaa ñáyiú ñá túú quède cahnu mee-xi, ñáyiú-án cunúú-yu —càchí Jèsús xáha<sup>n</sup>-gă xií-yu.

*Jèsús quidé ŷ-gă landú*

*(Mt. 19:13-15; Mr. 10:13-16)*

<sup>15</sup> Te ñ<sup>n</sup> ŷú ñáyiú ndécá-yu landú lĩhli cuáhá<sup>n</sup> núú Jèsús chi cuíní-yu sá téndàha ñaha-gă xii-güexi, te òré ní xiní cue téé xica cuu ndihí-gă sá ndécá-yu landú-án cuáhá<sup>n</sup> núú-gă, te ní ngüíta-güedé ténàá ñáhá-güedě xií-yu, te xăha<sup>n</sup>-güedě sá vă dúcá<sup>n</sup> càdá-yu.

<sup>16</sup> Dico Jèsús ní cana ñaha-gă xii-güedé, te ní xáha<sup>n</sup>-gă:

—Chí dáñá ná quèxi nahi landú lĩhli-án nùù-í-a, te vá càdí-ndó ìchi-güexi, chi dàtná cúú văha iní cue landú lĩhli-án duca<sup>n</sup> cùu văha iní cue ñáyiú yìndaha ñaha Yá Ndiöxí.

<sup>17</sup> Te na càchí tnúhu ndáá-í xii-ndo să nùu vá quèndáá iní ñáhá-ndó dàtná quidé dàva landú lĩhli sàndáá iní ñáhá xì-í, te vá ndĩhu ndaha ñaha Yá Ndiöxí xii-ndo, te vá ndúú táhú-ndó cùndecu-ndo ndihí-gă ni caa ni quíhí<sup>n</sup> —càchí-gă xáha<sup>n</sup>-gă xii-güedé.

*Ɔ<sup>n</sup> téé cuica càhá<sup>n</sup> ndihí-dé Jèsús*

*(Mt. 19:16-30; Mr. 10:17-31)*

<sup>18</sup> Te ñ<sup>n</sup> téé cùnunu ní xícá<sup>n</sup> tnúhú-dě núú Jèsús, te xáha<sup>n</sup>-dě xii-gă:

—Yòhó Mèstrú, cùu-n téé ío văha iní-xi, te cuíní-í nùu vá cùndèe iní-n càchí tnúhu-n nă cúú să văha cada-í cuèndá nduú táhù-í cùndecu-í ndihí Yá Ndiöxí ni caa ni quíhí<sup>n</sup> —càchí-dé xáha<sup>n</sup>-dě xii-gă.



19 Te Jèsús ní xáha<sup>n</sup>-gă xii-dé:

—¿Te cùtnuní iní-n nàcuáa ndùu tnúhu càhá<sup>n</sup>-n sǎ yǔhú váha iní-ǎ<sup>n</sup>? Chi ì<sup>n</sup>dìi díi-ni Yá Ndiòxí váha iní-gá.

20 Te yòhó xìní-n nàcuáa ní cachí Yă Ndiòxí cada ñáyiu, te duha ní cachí-gá: “Nchòhó cue téé vá càhá<sup>n</sup> ndìhi-ndo ñàdìhí te núu ñá díú ñàdìhí-ndó cùú-yu, te duca<sup>n</sup>-ni nchòhó cue ñáyiu dìhí tucu vá càhá<sup>n</sup> ndìhi-ndo tée te núu ñá díú yì-ndo cuu-güedé, te vá cáhni-ndó tnàha ñáyiu-ndo, te ni vǎ dúhú-ndó sǎ ndécú ndìhí-yu, te ni vǎ dácàcu-ndo cuéchi neñúú sá cúú-xí tnàha ñáyiu-ndo, te canehe-ndo sǎ yíñùhu núú tǎtá-ndó ndìhi núú nǎná-ndó”, duha ní cachí Yă Ndiòxí cada ñáyiu —càchí Jèsús xáha<sup>n</sup>-gă xii-dé.

21 Te téé-á<sup>n</sup> nǐ xáha<sup>n</sup>-dě xii-gá:

—Nchaa xiǎ<sup>n</sup> ní ngüíta-í quídè-í ndéé cùtnàhá cúú làndú-í —càchí-dé xáha<sup>n</sup>-dě xii-gá.

22 Te Jèsús ní xáha<sup>n</sup>-gă xii-dé:

—Dico cùmání ìngá núú sǎ cádá-n, vitna te quíhí<sup>n</sup>-n te dico-n nchàa sá ndécú ndìhi-n, te díhú<sup>n</sup>-n cuǎha táhú-n cuè ñáyiu ndàhú, te duca<sup>n</sup> te nduu táhú-n cùndecu váha-n núú ndécú Yă Ndiòxí táxí tnùní-gá, te na yǎha duca<sup>n</sup> càda-n te quixi-n chìtnàhá ñáhá-n xii-í —càchí-gá xáha<sup>n</sup>-gă xii-dé.

23 Te sá dúcá<sup>n</sup> nǐ xáha<sup>n</sup> Jèsús xii-dé, te ío ní cundiyí-dé, chi ío cuica-dě.

24 Te sá nǐ xiní ñáhá Jèsús xii-dé cundiyí-dé, núu ní cachí-gá:

—¡Ío úhú quíndáá iní ñáyiu cuica Yă Ndiòxí cuèndá ndíhu ndaha ñàha-gá xií-yu!

25 Te yáchí-gá yáha ì<sup>n</sup> càméyu yaú ì<sup>n</sup> yìqui tìcú dàcúúxí sǎ quíndáá iní ì<sup>n</sup> ñáyiú cuica Yǎ Ndiǒxí cuèndá ndíhu ndaha ñàha-gá xií-yu –duha ní cachí-gá.

26 Te nchaa ñáyiú ní tecú dóho-xi tnúhu ní cáhá<sup>n</sup>-gá ní xáhǎ<sup>n</sup>-yu xii-gá:

–¿Te yoo naníhí tǎhú te núu duca<sup>n</sup> vǎi<sup>n</sup>? –  
càchí-yu xǎhǎ<sup>n</sup>-yu xii-gá.

27 Te Jèsús ní xáha<sup>n</sup>-gǎ xií-yu:

–Cue ñáyiú ñuyíú-a chi vá ndácǔ-yu ná cadá-yu nàcuáa ndíhu ndaha ñàha Yá Ndiǒxí xií-yu, dico mee-gǎ chi ndacu-gá ndíhu ndaha ñàha-gá xií-yu chi nchaa sá vǎha ndàcu-gá quídé-gǎ –càchí-gá xáha<sup>n</sup>-gǎ xií-yu.

28 Te té Pèlú ní xáha<sup>n</sup>-dě xii-gá:

–Nchúhú ní dándǒo-ndí nchaa sá ndécú ndíhi-ndí, te ní tuha ñaha-ndí xii-n –càchí-dé xǎha<sup>n</sup>-dě xii-gá.

29 Te ní xáha<sup>n</sup>-gǎ xii ñáyiú:

–Na càchí tnúhu ndáá-í xii-ndo sǎ ncháá ñǎyiú na dándóo vehe-xi, àdi tátá-xi, nǎná-xi, ñaní-xi, cúha-xi, ñadihí-xi, déhe-xi cuèndá sá cuíní-yu ndíhu ndaha ñàha Yá Ndiǒxí xií-yu,

30 te ío-gá cuéhé sǎ cuǎñaha-gǎ xií-yu cundecu ndíhí-yu, te ñá díú-ní xǎ<sup>n</sup>, chi tnàhá nduu táhǔ-yu cundecu ndíhi ñàhá-yu xii-í ni caa ni quíhí<sup>n</sup> ná sàá nduu –càchí-gá xáha<sup>n</sup>-gǎ xií-yu.

*Jèsús cáhá<sup>n</sup> tucu-gá sá cáhí ñàha-güedé xii-gá  
(Mt. 20:17-19; Mr. 10:32-34)*

31 Te Jèsús ní taudí<sup>n</sup>-gá ndi ùxúú cue tée xìca cuu ndíhi-gá tnuú ñáyiú, te ní xáha<sup>n</sup>-gǎ xii-güedé:

—Vitna te quíhí<sup>n</sup>-ó ñúú Jerusàlén, chi yàcá<sup>n</sup> cada-xi nchaa nàcuáa sa ní chídó tnùní cue téé ní xóo cáhá<sup>n</sup> tnúhu Yá Ndiǒxí ndéé sanaha nàcuáa yáha yúhú Téé cùu ñaní tnáhá-ndó nchàa-ndo.

<sup>32</sup> Chi cuáha cuendá ñáhá-güedě xii-í núú cue téé ñá túú cùu cue téé israhél, te cudíquí ndeé ñáhá-güedě xii-í, te cúcuèhé ñáhá-güedě, te tiú díí ñáhá-güedě xii-í.

<sup>33</sup> Te caniha-güedě ndíhi ñíi, te dǎtnùní cahni ñaha-güedě xii-í, dico nduu úní sá cùú-í te ndoto-í —càchí-gá xáha<sup>n</sup>-gǎ xii-güedé.

<sup>34</sup> Dico ni ñ<sup>n</sup> tnúhu ní cáhá<sup>n</sup>-gá ñá túú ní tècú tnùní-güedé, chi ío yídáhu tnúhu ní cáhá<sup>n</sup>-gá ñúu xíá<sup>n</sup> ni ñ<sup>n</sup> ñá túú ní tècú tnùní-güedé.

*Jèsús quidé tǎtna-gá núú ñ<sup>n</sup> téé cuáá ñúú Jericó  
(Mt. 20:29-34; Mr. 10:46-52)*

<sup>35</sup> Te òré tá cùyatni Jèsús ñúú Jericó cuáhá<sup>n</sup>, te yuhu ìchi cuáhá<sup>n</sup>-gá-á<sup>n</sup> núcǒo ñ<sup>n</sup> téé cuáá xícá<sup>n</sup> ndàhú-dé.

<sup>36</sup> Te òré ní tecú dóho-dé xícáhá<sup>n</sup> vǎi ñáyíu xíyáha-yu, te ní xícá<sup>n</sup> tnúhú-dě núú ñáyíu ndècu ndíhi-dé ná cuendá duca<sup>n</sup> vǎi-yu yáha.

<sup>37</sup> Te ní xáhǎ<sup>n</sup>-yu sá Jèsús téé ñúú Nazàrét ñúhú-dě ichi.

<sup>38</sup> Te níhi ní cáhá<sup>n</sup>-dé, te xǎha<sup>n</sup>-dě xii-gá:

—jJèsús ñaní tnáhá ndíi Dàvíí, cundàhú iní ñáhá xii-í! —càchí-dé xǎha<sup>n</sup>-dě xii-gá.

<sup>39</sup> Te ñáyíu xíxódó núú ñúú Jèsús ní tenáá ñáhǎ-yu xii-dé, te xǎhǎ<sup>n</sup>-yu sá ná càdí-dé yuhu-dé dico uu<sup>n</sup>-gá níhi ní cáhá<sup>n</sup>-dé xǎha<sup>n</sup>-dě xii-gá:

—jYòhó téé cùu ñaní tnáhá ndíi Dàvíí, cundàhú iní ñáhá xii-í! —càchí-dé xǎha<sup>n</sup>-dě xii-gá.

40 Te Jèsús ní ngüíñí-gá, te ní táuchíú<sup>n</sup>-gă ní sángxuehe<sup>n</sup> ñaha cuè téé ndíhi-gá. Te òré ní quexio-dé núú-gă, te ní xícá<sup>n</sup> tnúhú-gă núú-dě, te xáha<sup>n</sup>-gă:

41 —¿Ná cuìní-n càda ñaha-í xii-n-i? —càchí-gá xáha<sup>n</sup>-gă xii-dé.

Te téé cuàá-á<sup>n</sup> ñí xáha<sup>n</sup>-dě:

—Mèstrú, cuìní-í cada tátna-n nùù-í cuèndá cundehe-í —càchí-dé xáha<sup>n</sup>-dě xii-gá.

42 Te Jèsús ní xáha<sup>n</sup>-gă:

—Sa ní ndúha núú-n chi ní sándáá iní-n Yă Ndióxi —càchí-gá xáha<sup>n</sup>-gă xii-dé.

43 Te òré-ni-á<sup>n</sup> ñí ndúha núú-dě, te ní chinchícú<sup>n</sup>-dé Jèsús, te ní cachí-dé sá ïo càhnu cuu Yá Ndióxi. Te nchaa ñáyiu ní xiní nàcuáa ní cuu ní ndúha núú-dě tnàhá-yu ní cachí-yu sá ïo càhnu cuu Yá Ndióxi.

## 19

### *Jèsús ndíhi ñí téé nàni Zaqueú*

1 Te Jèsús ní sáá-gá ñuú Jericó, te ta yăha-gá xití ñuú-á<sup>n</sup> cuáhá<sup>n</sup>.

2 Te ñuú-á<sup>n</sup> ndécú ñí téé cuica nàni-dé Zàqueú, te cùnuu-dé táxí tnùn-í-dé cue téé cùndíhi-dé, cue téé cuihna iní-xi quide cobrá ñáhá xii ñáyiu cuèndá impuèstú.

3 Te téé-á<sup>n</sup> cuìní-dé quini-dé Jèsús òré-á<sup>n</sup> ní cùu te ñá ní ndàcu-dé, chí ío cuéhé ñáyiu, te ñá túú dùcú<sup>n</sup>-dé.

4 Te xìnu-dé ní ngódó núú-dě te ní sáá-dé díquí ñí yutnu sìcómorú nùtní yatni yuhu ìchi núú yăha Jèsús cuèndá cuìní-dé quini ñáhá-dě xii-gá.

<sup>5</sup> Te òré tá yăha Jèsús xía<sup>n</sup>, te ní ndonehe núú-gă díquí yutnu núú cándòdo-dé-á<sup>n</sup>, te ní xáha<sup>n</sup>-gă xii-dé:

—Zàqueú, tanùu ndíhi díquí yutnu-á<sup>n</sup>, chi tnaví quexìo-í vehe-n ndètatú-í —càchí-gă xáha<sup>n</sup>-gă xii-dé.

<sup>6</sup> Te té Zàqueú-á<sup>n</sup> nǐ nuu ndíhi-dé díquí yutnu-á<sup>n</sup>, te ío ní cudíí ìní-dé ní quehe<sup>n</sup> cuèndá-dé Jèsús vehe-dé.

<sup>7</sup> Te sá nǐ xiní ñáyiú ní quexìo Jesús vehe-dé, te nchaá-yu ní ngúíta-yu càhá<sup>n</sup> cuèhé-yu cuèndá-gă, te xǐtnàhá-yu:

—Tée-a cuánguihu-dé vehe ì<sup>n</sup> tée ndècu ichi cuehé ichi duha —càchí-yu xǐtnàhá-yu.

<sup>8</sup> Te té Zàqueú-á<sup>n</sup> nǐ ndacuíñí-dé tnuú-yu, te xăha<sup>n</sup>-dě xii Jèsús:

—Yòhó Mèstrú, na cuăha-í ñáyiú ndàhú cuádava nchaa sá ndécú ndíhi-í. Te núu yoo ní dándàhú-í ní dúhù-í, te codo ũní-gă tnàhá sá nǐ dúhù-í-yu nacuáñaha-í xii-yu —càchí-dé xăha<sup>n</sup>-dě xii-gă.

<sup>9</sup> Te Jèsús ní xáha<sup>n</sup>-gă xii té Zàqueú:

—Vitna ní naníhí tàhú-n ndíhi nchaa ñáyiú xǐndecu vehe-n, chi tnàhá-n cùu-n ñaní tnàhá ndíi Àbrahám.

<sup>10</sup> Te yúhú Tée cùu ñaní tnàhá-ndó nchàa-ndo véxi-í nándùcu-í ñáyiú ní xíta nihnu cuèndá dàcácu nihnu-í-yu núú ùhú núú ndàhú —càchí-gă xáha<sup>n</sup>-gă xii-dé.

*Nàcuáa ní quide-güedé ndíhi díhú<sup>n</sup> cuàá<sup>n</sup>*

*(Mt. 25:14-30)*

<sup>11</sup> Te nchaa ñáyiú-á<sup>n</sup> nǐ sani iní-yu sá ndíhi-ni ndíhu ndaha ñàha Yá Ndiõxí xii-yu cuèndá sá nǐ

cuyatni Jèsús ñuú Jerusàlén, te xíǎ<sup>n</sup> nõu ní ngüíta Jèsús ní cani-gá ñ<sup>n</sup> cuèndú núǔ-yu cuèndá tecú tnùní váha-yu tnúhu-gá.

12 Te xáha<sup>n</sup>-gǎ xií-yu:

—Ní xíndecu ñ<sup>n</sup> téé cùu ñaná tnáhá ñǎyiu cùnuu, te cuáhá<sup>n</sup>-dé ingá ñuú xíca cuèndá yàcá<sup>n</sup> cuáha ñaha-güedě chiú<sup>n</sup> coo-dé, te dǎtnùní ndixi-dé quíndaha-dě tǐtní ñuú.

13 Te cùmání-gǎ quee-dé quíhí<sup>n</sup>-dé, te ní cana-dé úxí cue téé xínu cuechi núú-dě, te ní sǎñaha-dě ndí díí<sup>n</sup> núú-güedě ñ<sup>n</sup> caa ñ<sup>n</sup> caa díhú<sup>n</sup> cuáá<sup>n</sup>, te ní xáha<sup>n</sup>-dě: “Chí cáda ndǎhú ndihí díhú<sup>n</sup>-ǎ<sup>n</sup> ndèé ná sáá nduu nàsáá-í”, cǎchí-dé xǎha<sup>n</sup>-dě xii-güedé.

14 Dico nchaa ñáyiu ñuú quíndaha-dě-á<sup>n</sup> ñà túú tnáhá iní-yu sá quíndàha ñaha-dé, núu ní tendàhá-yu cue téé nèhe tnúhu cuáhá<sup>n</sup> núú cue téé cuǎñaha chiú<sup>n</sup> coo-dé-á<sup>n</sup>, te ní xáhǎ<sup>n</sup>-yu sá cǔñaha-güedě sá ñà túú tnáhá iní-yu sá tǎe-á<sup>n</sup> quíndaha ñaha-dé xií-yu.

15 Dico dacuítí sǎ ñí sáha-güedé téé-á<sup>n</sup> chiú<sup>n</sup> coo-dé sá díú-dě quíndaha-dě ñáyiu nchaa ñuú-á<sup>n</sup>, te ní nacuico-dě cuánuhú-dé ñuú-dé. Te òré ní nasáá-dé vehe-dé, te ní tendaha-dě ñ<sup>n</sup> téé ní sánúcana ñaha xii cue téé xínu cuechi núú-dě, cue téé ní dándõo ndaha-dě díhú<sup>n</sup> cuèndá cáca<sup>n</sup> tnúhú-dě núú-güedě ñ<sup>n</sup> ñ<sup>n</sup>-güedé nõu ndèé dau ní chídó-xí dǎquí díhú<sup>n</sup> sǎ ñí dándõo ndaha ñaha-dé-á<sup>n</sup>.

16 Te téé ní ndèxio díhna xǎha<sup>n</sup>-dě: “Pàtróón, ní quide-í ndáhú ndihí díhú<sup>n</sup>-n sǎ ñí dándõo ndaha ñaha-n xii-í, te sá íí<sup>n</sup> ñí taxi-n te ní chídó-xí úxí-gá tnáhá te náu-a naquehe<sup>n</sup> cuèndá-n”, cǎchí-dé

xăha<sup>n</sup>-dě.

17 Te tée cùu patróó<sup>n</sup>-dě-á<sup>n</sup> nǐ xáha<sup>n</sup>-dě: “Ío váha tée xìnu cuechi cuu-n chi ío váha ní quide-n, te sá nǐ quide váha-n ndìhì sacú díhú<sup>n</sup> sǎ nǐ dándõ ndaha ñaha-ĩ xii-n, te xǎ<sup>n</sup> nõu yúhú cǎchí-í sá táxí tnùní-n ũxí ñuú vitna”, cǎchí-dé xăha<sup>n</sup>-dě.

18 Te ní ndexìo ingá-dé, te ní xáha<sup>n</sup>-dě: “Pàtróó<sup>n</sup>, ní quide-í ndáhú ndìhì díhú<sup>n</sup>-n sǎ nǐ dándõ ndaha ñaha-n xii-í, te sá ì<sup>n</sup> nǐ taxi-n te ní chídó-xí ũhú<sup>n</sup>-gá tnàhá te náu-a naquehe<sup>n</sup> cuèndá-n”, cǎchí-dé xăha<sup>n</sup>-dě.

19 Te ní xáha<sup>n</sup> tée cùu patróó<sup>n</sup>-dě-á<sup>n</sup> xii-dé: “Te yòhó taxi tnùní-n ũhú<sup>n</sup> ñuú”, cǎchí-dé xăha<sup>n</sup>-dě xii tée xìnu cuechi-á<sup>n</sup>.

20 Te dǎtnùní ní ndexìo tucu ingá-dé, te xăha<sup>n</sup>-dě: “Pàtróó<sup>n</sup>, náu díhú<sup>n</sup>-n-á, te naquehe<sup>n</sup> cuèndá-n chi ní taxúha-í ní chidúcú<sup>n</sup>nuu-í ì<sup>n</sup> pǎñú te ñá túú ní quide-í ndáhú ndìhì díhú<sup>n</sup>-n,

21 chi ní yùhú ñáhà-í xii-n, chi cùu-n ì<sup>n</sup> tée díi, te nàquehe<sup>n</sup>-n ì<sup>n</sup> sá ñà túú ní tàxi ndecu-n, te nàtahu-n ì<sup>n</sup> xichi núú ñà túú ní chìhi-n tatá”, cǎchí-dé xăha<sup>n</sup>-dě xii pàtróó<sup>n</sup>-dě.

22 Te ní xáha<sup>n</sup> pàtróó<sup>n</sup>-dě xii-dé: “Yòhó cúú-n ì<sup>n</sup> tée cuihna iní-xi xìnu cuechi núú-í, te ḍi-u-ni nchaa tnúhu cǎhá<sup>n</sup>-n-ǎ<sup>n</sup> cǎchí tnùní-xi nàcuáa cuu ndáá cuéchi-n. Te núu sàni iní-n sǎ cúú-í ì<sup>n</sup> tée díi, te nàquehe<sup>n</sup>-í ì<sup>n</sup> sá ñà túú ní tàxi ndecu-í, te nàtahu-í ì<sup>n</sup> xichi núú ñà túú nǐ chìhi-í tatá,

23 te núu duca<sup>n</sup> ña, ¿te ná cuèndá ñà túú ní càhu iní-n dàsa<sup>n</sup> nuu-n díhú<sup>n</sup> nǐ taxi-í, te cúñaha-n chăhu-yu díquí-xi, te òré ná nàsáá-í vehe-í, te sa ngódó lùha-gá díquí-xi naquehe<sup>n</sup> cuèndá-í ní cùu-í?”, cǎchí-dé xăha<sup>n</sup>-dě xii tée xìnu cuechi-á<sup>n</sup>.

24 Te ní xáha<sup>n</sup> tée cùu patróón-á<sup>n</sup> xii cue tée xĩndecu xía<sup>n</sup>: “Chí quéndèè díhú<sup>n</sup> cuàá<sup>n</sup> nèhé tée-a, te cuáha-ndo tée nèhe úxí tucu díhú<sup>n</sup> cuàá<sup>n</sup>-á<sup>n</sup>”, càchí-dé xǎha<sup>n</sup>-dě xii-güedé.

25 Te ní xáha<sup>n</sup>-güedé: “Pàtróón, dico sa nèhe-dé úxí díhú<sup>n</sup> cuàá<sup>n</sup>”, càchí-güedé xǎha<sup>n</sup>-güedé.

26 Te ní xáha<sup>n</sup> tée cùu patróón-á<sup>n</sup>: “Na càchí tnúhu-í xii-ndo sǎ cuè ñáyiu íó xii-xi te níhí-gǎ-yu cundecu ndihí-yu, te cue ñáyiu sacú ndécú ndihí cuita ndihí nihnu nchaa sá ndécú ndihí-yu”, càchí tée cùu patróón-á<sup>n</sup> xǎha<sup>n</sup>-dě xii-güedé.

27 Te xǎha<sup>n</sup> tùcu-dé xii-güedé: “Nchaa ñáyiu cùu úhú iní ñáhá xì-í ñá tnàhá iní-yu quindaha-ĩ-yu, te chí cándecá-yu taquixi iha, te cahni-ndõ-yu núù-í-a”, càchí tée cùu patróón-á<sup>n</sup> xǎha<sup>n</sup>-dě xii-güedé —duha cuáhá<sup>n</sup> cuèndú ní cani Jèsús núú ñáyiu.

### *Jèsús cuánguǎhu-gá ñuú Jerusàlén*

*(Mt. 21:1-11; Mr. 11:1-11; Jn. 12:12-19)*

28 Te sátá dúcá<sup>n</sup> ñí cáhá<sup>n</sup>-gá, te ní nucúhu<sup>n</sup> ichi-gá cuáhá<sup>n</sup>-gá ñuú Jerusàlén.

29 Te òré sa ní cuyatni-gá ñuú Bètfaqé, ndihí ñuú Bètania te xía<sup>n</sup> cáá yùcu nani Olívú, te ní xáha<sup>n</sup>-gǎ xii úú cue tée xica cuu ndihí-gá:

30 —Chí cuáhá<sup>n</sup> ñuú cáá yàtni yacá<sup>n</sup>, te òré quexìo-ndo yacá<sup>n</sup>, te naníhí-ndó ì<sup>n</sup> búrru ndètñí-dì, te vátá yõ ì<sup>n</sup>-gá codo ñàha xii-dì, te nandaxi-ndo-dì te candeca-ndo-dì quixi.

31 Te núu yoo na càcá<sup>n</sup> tnúhu núú-ndó ñǎ cuèndá nándàxi-ndo-dì, te cúñaha-ndo xii-yu sá yùhú



Yaá xíca cùu ndihi-ndo xini ñuhu-í-di —càchí-gá xáha<sup>n</sup>-gã xii-güedé.

<sup>32</sup> Te cue téé-á<sup>n</sup> ñí xica-güedé cuáhá<sup>n</sup>-güedé, te nchaa-ni nàcuáa ní xáha<sup>n</sup> Jèsús duca<sup>n</sup> ñí cuu,

<sup>33</sup> chi mei òré nándàxi-güedé búrru-á<sup>n</sup> ñí quexìo cue ñáyiu cùu xítóhó-di xíca<sup>n</sup> tnúhu-yu núú-güedé, te xáhã<sup>n</sup>-yu:

—¿Ná cuèndá nándàxi-ndo búrru-ndí-i? —  
càchí-yu xáhã<sup>n</sup>-yu.

<sup>34</sup> Te ní xáha<sup>n</sup>-güedé xií-yu:

—Nà ndaxi-ndí-di chi Yaá xíca cùu ndihi-ndí xíní ñuhu ñaha-gá xii-di —càchí-güedé xáha<sup>n</sup>-güedé xií-yu.

<sup>35</sup> Te ndèca-güedé-di cuáhá<sup>n</sup> núú ndécú Jèsús, te òré ní quexìo-güedé ndihi-di núú ndécú-gã te ní sacá<sup>n</sup> ndodo-güedé dóó-güedé sátá-di, te ní ngódó ñáhá-gã xii-di.

<sup>36</sup> Te ío cuéhé ñáyiu ta sàcá<sup>n</sup>-yu dóõ-yu ichi cuáhá<sup>n</sup>-gá cuèndá núú dõõ-yu-á<sup>n</sup> yãha-gá ndihi quitì yòdo-gá.

<sup>37</sup> Te ní nucuíta nuu-gá ichi tindúú yucu Òlívú tá cùyatni-gá ñúú Jerusàlén cuáhá<sup>n</sup>, te nchaa ñáyiu sàndáá iní ñáhá xii-gá nchìcú<sup>n</sup> ñáhã-yu te ní ngüíta-yu níhi càhá<sup>n</sup>-yu sá cúdĩ iní-yu, te càchí-yu sá ïo càhnu cuu Yá Ndiõxí cuèndá sá ñí xíní-yu nchaa sá vã yõo tnàhí ndàcu cada ní quide-gá.

<sup>38</sup> Te càchí-yu:

—¡Ío càhnu cuu Yaá véxi quindaha ñaha xii-o, te diu-gá cúú-gã Yaá ní tendaha Yã Ndiõxí véxi quide núú-gã! ¡Te ío càhnu cuu mee-gá! ¡Te andiu ñã túú tnàhí ná cúú! —duha càchí-yu.

39 Te ñú cue tée cùu fariséú ñúhú tnàhá tnuú ñáyiú-á<sup>n</sup> ñí xáha<sup>n</sup>-güedě xii Jèsús:

—Mèstrú, cúñaha nchàa ñáyiú ndihí-n na càdí-yu yuhú-yu —càchí-güedé xáha<sup>n</sup>-güedě xii-gá.

40 Dico Jèsús ní xáha<sup>n</sup>-gã xii-güedé:

—Te na càchí tnúhu-í xii-ndo sã nõu ñáyiú-a na càdí-yu yuhú-yu ña, te nchaa yúú cãhá<sup>n</sup> níhi-xi dàtná ñí ñáyiú —càchí-gá xáha<sup>n</sup>-gã xii-güedé.

41 Te òré ní cuyatni-gá ñúú Jerusalén te ní xiní-gá, te ní ndáhyú-gá cuendá nchaa ñáyiú dii ñúú-xi-á<sup>n</sup> sã ndìhú iní-gá.

42 Te ní xáha<sup>n</sup>-gã xii cue ñáyiú-á<sup>n</sup>:

—Ío cuu váha iní-í te núu dicó nchòhó tecú tnùní-ndó vìtna ñí tnúhu sá cádá váha ñaha xii-ndo, chi ñá túú-gã ná cuu cundecu-ndo, te núu na tècú tnùní-ndó. Dico ñá tècú tnùní-ndó, chi ío yìdáhu tnúhu-a.

43 Te sáá nduu tnündòho tnúhu ndàhú sá cúú-xí-ndó, te nchaa cue tée ñava-gá ñúú cúú ùhú iní tnàhá ndìhí-ndo quixi-güedé chidoco ñàha-güedé xii-ndo, te ñí càndéé núú ndécú-ndó-ã<sup>n</sup> dacàa-güedé ndóho cuendá xíá<sup>n</sup> quihí váha-güedé nàá ndihí ñaha-güedě xii-ndo, te vá dáñá-güedě cunu-ndo.

44 Te cahni ñaha-güedě xii-ndo, te ndihí nchaa vehe-ndo dàngoyo-güedé ndéé cimientú-xi, chi ñá túú ní cuíní-ndó nàcuáha-ndo cuendá òré ní quixi coto ñaha Yã Ndiòxí xii-ndo —duha ní xáha<sup>n</sup>-gã xii ñáyiú ñúú-á<sup>n</sup>.

*Jèsús ñá túú tnàhá iní-gá nàcuáa quidé-yu veñúhu  
(Mt. 21:12-17; Mr. 11:15-19; Jn. 2:13-22)*

45 Te Jèsús cuánguihu-gá xití veñúhu càhnu sá ïo cùnuu, te xití veñúhu-án xĩndecu cue ñáyi quide ndáhú ndihí cue ñáyi xĩsaa<sup>n</sup>. Te ní queñuhu ñaha Jèsús xií-yu quehé.

46 Te ní xáha<sup>n</sup>-gã xií-yu:

—Núú tütú Yã Ndiõxí càhá<sup>n</sup>-xi nàcuáa ní càhá<sup>n</sup>-gá, te duha ní cachí-gá: “Vehe-í cúú-xi nũú càhá<sup>n</sup> ndihí ñaha ñáyi xii-í”, duha ní càhá<sup>n</sup>-gá càchí-xi núú tütú-gá. Dico nchòhó quidé-ndó vèhe-gá vehe ñadúhú —càchí-gá xáha<sup>n</sup>-gã xií-yu.

47 Te Jèsús nchaa nduu dànehé-gá ñáyi xití veñúhu, dico cue tée cùu dútú cùnùu, ndihí cue tée dàcuaha ñaha xii ñáyi nchaa tnúhu ní chídó tnùní ndí Moisés, ndihí cue tée cùnuu ñuú-án ndúcú-güedě nàcuáa cada-güedé cahni ñaha-güedě xii-gá.

48 Dico ñá nihí-güedé nàcuáa cada-güedé, chi cuendá nchaa ñáyi ío cùdí ìní-yu ndèdòho-yu nchaa tnúhu càhá<sup>n</sup>-gá.

## 20

*Jèsús ndécú ndihí-gá tnúhu ndee ìní  
(Mt. 21:23-27; Mr. 11:27-33)*

1 Te ñ<sup>n</sup> nduu yìhi Jesús xití veñúhu càhnu sá ïo cùnuu danehé-gá ñáyi tnúhu sá càhá<sup>n</sup> nàcuáa naníhí tàhú-yu. Te ní quexìo cue tée cùu dútú cùnùu ndihí cue tée dàcuaha ñaha xii ñáyi nchaa tnúhu ní chídó tnùní ndí Moisés, ndihí cue tée cùu sacuéhé nũú ñáyi isràél,

2 te ní xáha<sup>n</sup>-güedě xii-gá:

—Cuíní-ndí cachí tnúhu-n xii-ndí nása ndùu tnúhu ndee ìní ndécú ndihí-n núu quide-n nándi sá

quidé-n. ¿Te yoo duca<sup>n</sup> nĩ taxi tnúhu ndee iní-án xii-n? —càchí-güedé xáha<sup>n</sup>-güedě xii-gá.

<sup>3</sup> Te Jèsús ní xáha<sup>n</sup>-gã:

—Yúhú tnàhá-í cuíní-í cáca<sup>n</sup> tnúhu-í ì<sup>n</sup> sá càcá<sup>n</sup> tnúhu-í núú-ndó, te cachí tnúhu-ndo.

<sup>4</sup> Te chí càchí tnúhu xii-í yoo ní táuchíú<sup>n</sup> nĩ dácuándüte ndí Juàá ñáyiu. ¿Yá Ndióxí à<sup>n</sup> cuè téé ñuyíú-a ní táuchíú<sup>n</sup> dùca<sup>n</sup> ní quide ndí? —càchí-gá xáha<sup>n</sup>-gã xii-güedé.

<sup>5</sup> Te ní ngüíta-güedé xĩtnàha-güedé:

—¿Nása cúñaha-o? Chi núu nà cúñaha-o sã Yã Ndióxí ní táuchíú<sup>n</sup> dùca<sup>n</sup> ní quide ndí Juàá ñá, te quesaha-dě: “¿Ná cuendá ñá túú ní sàndáá iní-ndó tnúhu ní cáhá<sup>n</sup> ndí vèí<sup>n</sup>?”, quesaha-dě.

<sup>6</sup> Àdi te núu nà cúñaha-o sã cuè ñáyiu ñuyíú-a ní táuchíú<sup>n</sup> dùca<sup>n</sup> ní quide ndí ña, te nchaa ñáyiu cuáha ñàhá-yu yúú xii-o, te cahni ñàhá-yu, chi càchí-yu sá ndáá sá Yã Ndióxí ní táuchíú<sup>n</sup>-gã ní cáhá<sup>n</sup> ndí Juàá tnúhu-gá núú ñáyiu —càchí-güedé xĩtnàha-güedé.

<sup>7</sup> Te ní xáha<sup>n</sup>-güedě xii-gá sá ñà túú xìní-güedé yoo ní táuchíú<sup>n</sup> dùca<sup>n</sup> ní dácuándüte ndí Juàá ñáyiu.

<sup>8</sup> Te ní xáha<sup>n</sup> Jèsús xii-güedé:

—Te núu duca<sup>n</sup> te ni yúhú vá càchí tnúhu-í xii-ndo yòo ní taxi tnúhu ndee iní duha quide-í —càchí-gá xáha<sup>n</sup>-gã xii-güedé.

*Cuendá cue téé cuihna iní-xi  
(Mt. 21:33-44; Mr. 12:1-11)*

<sup>9</sup> Te sátá dúcá<sup>n</sup> te ní ngüíta Jèsús ní caní-gá ì<sup>n</sup> cuendú núú ñáyiu nàcuáa tecú tnùní-yu tnúhu-gá, te xáha<sup>n</sup>-gã xií-yu:

—H<sup>n</sup> téé ní xitu-dé mee-ni yòho yaha stilé núú ñúhú-dě. Te ní sáá h<sup>n</sup> nduu quǐngaca cuu xica-dě vài nduu te ní dándõo ndaha-dě sá ñí xitu-dé-á<sup>n</sup> xii h<sup>n</sup> úú cue téé càhá<sup>n</sup> ndihi-dé cuendá cada chiú<sup>n</sup>-güedé, te ní ndatnúhu-güedé sá òré ná cùu te cuu cuendá dava-güedé te duca<sup>n</sup> te ní quee-dé cuáhá<sup>n</sup>-dé.

<sup>10</sup> Te sátá ñí sáá nduu ñí cuu nchaa ndéhé yoho yàha stilé sá ñí xitu-dé-á<sup>n</sup>, te ní xáha<sup>n</sup>-dě xii h<sup>n</sup> téé xìnu cuechi núú-dě: “Cuàhá<sup>n</sup> cécá<sup>n</sup>-n sǎ cúu cuendá-í núú cuè téé ní dándõo ndàha-í nchaa yoho yàha stilé sá ñí xitu-í”, càchí-dé xǎha<sup>n</sup>-dě. Te téé xìnu cuechi-á<sup>n</sup> ñí xica-dé cuáhá<sup>n</sup>-dé, dico cue téé ndéé nchaa yoho yàha stilé-á<sup>n</sup> ñí tñi-güedé téé xìnu cuechi-á<sup>n</sup> te ní caniha-güedě, te ní nacuícú<sup>n</sup> ñáhá-güedě xii-dé, te ñá túú tñàhí ná ní sǎñaha-güedě.

<sup>11</sup> Te dǎtnùní téé cùu xítóhó nchaa yoho yàha stilé-á<sup>n</sup> ñí tendaha tùcu-dé ingá téé xìnu cuechi núú-dě cuáhá<sup>n</sup>-dé, dico diu-ni duca<sup>n</sup> ñí quide ñaha-güedě xii-dé, chi ní xícuèhé ñáhá-güedě, te ní caniha-güedě te ní nacuícú<sup>n</sup> ñáhá-güedě, te ñá túú tñàhí ná ní sǎñaha-güedě.

<sup>12</sup> Te téé cùu xítóhó nchaa yoho yàha stilé-á<sup>n</sup> ñí tendaha tùcu-dé ingá-dé cuáhá<sup>n</sup>-dé, te diu-ni duca<sup>n</sup> ñí quide ñaha tùcu-güedé, chi ní dánícuèhé ñáhá-güedě, te ní nacuícú<sup>n</sup> ñáhá-güedě.

<sup>13</sup> Te téé cùu xítóhó nchaa yoho yàha stilé-á<sup>n</sup> ñí sani iní-dé: “¿Nása cada-í vitna? Váha-gá tendaha-í déhe-í téé ío cùu iní-a núhú-dé, chi cudana te òré quiní ñáhá-güedě xii-dé, te canehe-güedé sá yíñùhu núú-dě”, duha ní sani iní-dé.

<sup>14</sup> Dico òré ní xiní cue téé quide chiu<sup>n</sup>-á<sup>n</sup>

děhe xítohó nchaa yoho yàha stilé-án, te ní xítñàha-güedé: “Tée-ǎ<sup>n</sup> téé véxi nduu táhú ñuhu-a ndihí nchaa sá cáá nǔú-xi, dico cahni-o-dě te mee-o nduu tahú-ó sǎ ndúú tǎhú-dě”, cǎchí-güedé xítñàha-güedé.

<sup>15</sup> Te ní queñuhu ñaha-güedě ñ<sup>n</sup> xio yuhu ñuhu-án, te ní sahní ñaha-güedě xii-dé —duha cuáhá<sup>n</sup> cuendú ní caní Jèsús núú-yu.

Te dátñuní ní xáha<sup>n</sup> tùcu-gá xií-yu:

—¿Te nchòhó sa cùtnuní iní-ndó nàcuáa cada ñaha xítohó ñuhu-án xii cue téé-án ñǎ?

<sup>16</sup> Chí nùhú-dé te cahni-dé cue téé-án, te dàndóo ndaha-dě ñuhu-dé xii cue téé cùtnuní iní-dé cada ndáá —cǎchí-gá xáha<sup>n</sup>-gǎ xií-yu.

Te sá dúcá<sup>n</sup> ñí cáhá<sup>n</sup>-gá, núu ní cǎchí-yu:

—¡Sá vǎ cǎchí Ndiǒxí sá dúcá<sup>n</sup> yǎha-o! —cǎchí-yu.

<sup>17</sup> Te Jèsús ní ndacoto-gá núú-yu, te ní xáha<sup>n</sup>-gǎ:

—Chí cǎchí tnúhu nása quèe-xi nacuáa cǎhá<sup>n</sup>-xi núú tütú Yǎ Ndiǒxí, núú cǎchí-xi:

Yúú sǎ ñí dáquéeé tǐhú cue téé dàcaa vehe ní saa-xi cùu-xi yúú cúnùu vitna.

Duha cǎchí-xi núú tütú-gá.

<sup>18</sup> Te nchaa ñáyiú ñá túú cuíní tñ<sup>ñ</sup> tnúhu-í, te ndohó-yu dátñá ñ<sup>n</sup> ñáyiú tnàhnú duu<sup>n</sup> òré ndùá-yu núú yúú, àdi núu na tàú ñáhá-xí te dàcachi duu<sup>n</sup> ñaha-xi —cǎchí-gá xáha<sup>n</sup>-gǎ xií-yu.

### *Cuendá impuèstú*

(Mt. 21:45-46; 22:15-22; Mr. 12:12-17)

<sup>19</sup> Te cue téé cùu dútú cúnùu, ndihí cue téé dàcuaha ñaha xii ñáyiú nchaa tnúhu ní chídó tnùní ndíi Moisés ní cuíní-güedé tñ<sup>ñ</sup>-güedé Jèsús òré-ni-á ní cùu, chí ní cutñuní iní-güedé sá cuendá-güedé ní cáhá<sup>n</sup>-gá, dico ní yùhú-güedé cuendá sá ïo vǎi ñáyiú.

20 Te ní ndúcú-güedě nàcuáa cada-güedé tñi ñaha-güedě xii-gá, te ní tendaha-güedě cue téé cuáhá<sup>n</sup> ngoto dayuhu ñaha xii-gá, te cuáhá<sup>n</sup>-güedé dàtná cue téé váha iní-xi, te ndücu-güedé nàcuáa cada-güedé nñu cáhá<sup>n</sup>-gá ñ<sup>n</sup> tnúhu sá ñà túú tàú-gá cáhá<sup>n</sup>-gá cuendá duca<sup>n</sup> te candeca ñaha-güedě xii-gá quíhí<sup>n</sup> cuáha cuendá ñáhá-güedě núú tēe cùnūu.

21 Te ní xáha<sup>n</sup>-güedě xii Jèsús:

—Mèstrú, ñihí-ndí tnúhu sá dánèhé-n ñǎyiu mee-ni tnúhu váha, te cuēi ndědani càa ñáyiu ñ<sup>n</sup>-ni càhá<sup>n</sup>-n ndihí-yu, te càhá<sup>n</sup> ndáá-n nàcuáa càhá<sup>n</sup> Yá Ndiõxí cundecu-o ñùyíú-a.

22 Te cachí tnúhu xii-ndí nñu váha-ni cháhu-ndí té Cèsár téé ío cùnūu cuendá impuèstú ñ<sup>n</sup> ñáhá — càchí-güedé xáha<sup>n</sup>-güedě xii-gá.

23 Dico Jèsús ní cutnùní iní-gá sá xító ndèé ñáhá-güedě xii-gá, núu ní xáha<sup>n</sup>-gá xii-güedé:

24 —Chí dánèhé ñáhá xii-í ñ<sup>n</sup> díhú<sup>n</sup> cuixí<sup>n</sup> te cachí tnúhu-ndo nñu yoo núú-xi ndèé, ndihí yoo diu-xi ndèé —càchí-gá xáha<sup>n</sup>-gã xii-güedé.

Te ní xáha<sup>n</sup>-güedě xii-gá:

—Núú tē Cèsár ndèé ndihí diu-dé —càchí-güedé xáha<sup>n</sup>-güedě xii-gá.

25 Te ní xáha<sup>n</sup> tucu-gá xii-güedé:

—Te núu duca<sup>n</sup> te chí nàcuáha té Cèsár sá cúú cuendá-dé, te sá cúú cuendá méé Yá Ndiõxí, te xiá<sup>n</sup> nacuáha-ndo-gã —càchí-gá xáha<sup>n</sup>-gã xii-güedé.

26 Te ñá ní ndàcu tnahí-güedé datìcànūu ñaha-güedě xii-gá núú tnúhu càhá<sup>n</sup>-gá, chí òré ní cáhá<sup>n</sup>-gá, te da ní cuñúhu-güedé nchaa tnúhu ní cáhá<sup>n</sup>-gá, te váha-gá ní sadí-güedé yuhu-güedé.

*Cuendá nchaa ñáyi ndoto*  
(Mt. 22:23-33; Mr. 12:18-27)

27 Te sátá dúcá<sup>n</sup> te ní sáá ñ<sup>n</sup> úú cue téé cùu saducéú núú ndécú Jèsús. Te cue téé-á<sup>n</sup> ñà túú sàndáá iní-güedé sá ndótó cue ñáyi ní xíhí, te ní xáha<sup>n</sup>-güedě xii-gá:

28 —Mèstrú, ndíi Moisés càchí ndíi núú tütú ndècu vitna sá nñu ñ<sup>n</sup> téé na cùú, te quendóo ñadìhí-dé te ñá túú dèhe-dé ní xõ ndihí-a<sup>n</sup>, te téé cùu ñaní-dé naquehe<sup>n</sup>-dé ñaha ní quendóo quèé-á<sup>n</sup> cuendá coo déhe-dé ndihí-a<sup>n</sup> cuendá ñaní-dé téé ní xíhí-á<sup>n</sup>.

29 Te ní xíndecu úsá tnàhá cue téé mee-ni ndí ñaní-güedé. Te téé díhna ní níhí ñadìhí-dé, dico ñá túú ní cùdí-dé cundecu-dé chi ní xíhí-dé, te ni ñ<sup>n</sup> déhe-dé ñá túú ní xõ ndihí ñadìhí-dé-á<sup>n</sup>.

30 Te téé cùu uú ní naquehe<sup>n</sup>-dé ñaha ní quendóo quèé-á<sup>n</sup> dico ní xíhí tucu-dé, te ni ñ<sup>n</sup> tucu déhe-dé ñá túú ní xõ ndihí ñaha-á<sup>n</sup>.

31 Te téé cùu uní ní naquehe<sup>n</sup> tucu-dé ñaha ní quendóo quèé-á<sup>n</sup>, te diu-ni duca<sup>n</sup> ñí xíhí-dé, te ní xínu ndí ùsá-güedé ní cándeca ñaha-güedě xii ñaha-á<sup>n</sup>, dico ni ñ<sup>n</sup>-güedé ñá túú ní xõ déhe-güedé ndihí-a<sup>n</sup>, te ní ndihí-güedé ní xíhí.

32 Te ndéé núú ñí ndihí-ná ní xíhí tnàhá ñadìhí-á<sup>n</sup>.

33 Te na sáá nduu ndòto-güedé ndihí ñaha-á<sup>n</sup> ¿Te ndédacàa-güedé ñadìhí-güedé cuu-a<sup>n</sup>-i? Chi ndí ùsá-güedé ní cándeca ñaha-güedě xii-a<sup>n</sup> — càchí-güedé xáha<sup>n</sup>-güedě xii-gá.

34 Te Jèsús ní xáha<sup>n</sup>-gã xii-güedé:

—Nchaa ñáyi ñuyíú-a tnàndahá-yu.

35 Dico nchaa ñáyi ní nduu táhú ndoto díhna nuu ñáyi-á<sup>n</sup> cundecu-yu ndihí Yá Ndiõxí ni caa ni



quíhí<sup>n</sup>, te yàcá<sup>n</sup> ñá túú-gă sá cándèca tnahá-yu.

<sup>36</sup> Te ni ñà túú-gă tnúhu xihí, chi cuu-ná-yu dàtná cue espíritú xínú cuèchi núú Yă Ndiöxí cuendá sá ní ndotó-yu, chi cùú-yu déhe-gá.

<sup>37</sup> Te ndéé ndíi Moisés ní chídó tnùní ndíi núú tütú ndíi sá ncháá ñăyiu ní xihí ndotó-yu, te diu-ni xía<sup>n</sup> càhá<sup>n</sup>-xi cuendá tnutàú nchìcú<sup>n</sup> ñuhú, te diu-ni xía<sup>n</sup> càchí tucu-xi sá Yă Ndiöxí cúú-gă Ndiöxí ndíi Àbrahám, ndíi Isàac, ndihí ndíi Jàcób.

<sup>38</sup> Te cue téé-á<sup>n</sup> chi cuèi ní xihí-güedé sá cúú-xí nchòhó, dico sá cúú-xí Yă Ndiöxí chi ndècu vívú-ni-güedě. Chi cùtnuní iní-ó să Yă Ndiöxí cúú-gă Ndiöxí mee-ni cuè ñăyiu xĩndecu vívú, te ñá túú cùu-gá Ndiöxí cue ñăyiu ñá túú ndècu vívú. Te sá cúú-xí mèe-gá chi nchaa ñăyiu ndècu ndihí-gá ndécú vǐvǔ-yu cuèi sa ní xihí-yu núú ñùyíú-a —càchí-gá xáha<sup>n</sup>-gă xii-güedé.

<sup>39</sup> Te ñ<sup>n</sup> téé dàcuaha ñaha xii ñăyiu nchaa tnúhu ní chídó tnùní ndíi Moisés ní xáha<sup>n</sup>-dě xii Jèsús:

—Mèstrú, váha-ni càhá<sup>n</sup>-n —càchí-dé xáha<sup>n</sup>-dě xii-gá.

<sup>40</sup> Te ñá túú-gă ní cùyí-güedé caca<sup>n</sup> tnúhú-güedě ni ñ<sup>n</sup> tnúhu núú-gă.

*Yoo déhe-xi cùu Cristú*

*(Mt. 22:41-46; Mr. 12:35-37)*

<sup>41</sup> Te Jèsús ní xáha<sup>n</sup>-gă xii-güedé:

—¿Te nása càchí-tu-yu sá Cristú Yaá tendaha Yă Ndiöxí quixi ñuyíú-a cùu-gá déhe ndíi Dàvíí?

<sup>42</sup> Te mee ndíi Dàvíí-á<sup>n</sup> ní cachí ndíi núú libré Sălmú:

Dútú Ndiöxí ní xáha<sup>n</sup>-gă xii Yaá cúú Xĩtohó-í:

“Ngóo xio cùha-í,

43 te yúhú cada-í te nchaa sá cúú ũhú iní ñáhá xii-n  
canehe-xi sá yíñùhu núú-n.”

Duha ní xáha<sup>n</sup> Dütú Ndiõxí xii Yaá cúú Xítohó-í  
càchí ndíi núú librú Sălmú.

44 ¿Te nása cùu Cristú déhe ndíi Dàvií, te mee ndíi  
ní cachí ndíi sá cúú-gă Xítohó ndíi-i? —càchí Jèsús  
xáha<sup>n</sup>-gă xii-güedé.

*Jèsús càhá<sup>n</sup>-gá cuendá cue tée dàcuaha ñaha xii  
ñáyiu nchaa tnúhu ní chídó tnùní ndíi Moisés  
(Mt. 23:1-36; Mr. 12:38-40; Lc. 11:37-54)*

45 Te òré ndátnùhu Jèsús ndíhi cue tée xica  
cuu ndíhi-gá xíndedóho ñaha ñáyiu, te xáha<sup>n</sup>-gă  
xii-güedé:

46 —Cada cuendá-ndó vă cádá-ndó nàcuáa quide  
cue tée dàcuaha ñaha xii ñáyiu nchaa tnúhu ní  
chídó tnùní ndíi Moisés, chi tnàhá iní-güedé  
cuihnu-güedé dóó nání să sácuihnu cue tée cùnuu.  
Te nchaa núú tàcá ñáyiu cuiní-güedé sá ndíhi  
tnúhu yíñùhu cáhá<sup>n</sup> ndíhi ñàhá-yu xii-güedé, te  
nàcáxi-güedé xilé sácõo nchíhi cue tée cùnuu-gá xití  
veñúhu conchíhi-güedé, te duca<sup>n</sup>-ni quide-güedé  
cuèi òré quíhu-güedé mèsá caxi-güedé òré  
ndécú-güedé ì<sup>n</sup> vico, chi mee-ni núú sácõo cue  
tée cùnuu-gá cuiní-güedé coo-güedé.

47 Te quèndeé-güedé vehe nchaa ñáyiu dîhí ñáyiu  
quèé, te ío naha càhá<sup>n</sup> ndíhi-güedé Yă Ndiõxí  
cuendá cuiní-güedé cáhá<sup>n</sup> váha-yu cuendá-güedé.  
Te sá dúcá<sup>n</sup> quide-güedé te sáá nduu te ío-gá  
ndoho-güedé núú ùhú núú ndàhú dàcúxí dàva-gá  
ñáyiu —càchí-gá xáha<sup>n</sup>-gă xii-güedé.

## 21

*Díhú<sup>n</sup> nduu táhú Yă Ndiõxí ní dáquěe ì<sup>n</sup> ñaha ndàhú ñaha quèé*  
(Mr. 12:41-44)

<sup>1</sup> Te Jèsús ní xiní-gá xítí veñúhu xǐdáquěe cue tée cuica díhú<sup>n</sup> nduu táhú Yă Ndiõxí xítí alcanciá.

<sup>2</sup> Te ní xiní-gá tnàhá ì<sup>n</sup> ñaha ndàhú ñaha quèé ní dáquěe-a<sup>n</sup> úú díhú<sup>n</sup> còbrí,

<sup>3</sup> te ní xáha<sup>n</sup> Jèsús xii cue ñáyiú xǐndecu-á<sup>n</sup>:

—Na càchí tnúhu ndáá-í xii-ndo sǎ ñàha ndahú ñaha quèé-a ío-gá nándìhì díhú<sup>n</sup> nǐ dáquěe-a<sup>n</sup> xítí alcanciá nduu táhú Yă Ndiõxí dàcúúxí díhú<sup>n</sup> nǐ dáquěe dava-gá-yu.

<sup>4</sup> Chi nchaa ñáyiú-á<sup>n</sup> nǐ dáquěe-yu mee-nǎ sá nǐ ndóo-ná, dico ñaha quèé-a cuèi ndàhú-a<sup>n</sup> dico ní dáquěe-a<sup>n</sup> nihì díhú<sup>n</sup> sǎ cuáá<sup>n</sup>-á<sup>n</sup> sǎ cáxí-á<sup>n</sup> ní cùu —cachí-gá xáha<sup>n</sup>-gǎ xií-yu.

*Jèsús càchí-gá sá ngóyó vèñúhu*  
(Mt. 24:1-2; Mr. 13:1-2)

<sup>5</sup> Te ì<sup>n</sup> úú ñáyiú xǐcáhá<sup>n</sup>-yu cuendá veñúhu càhnu sá ìo cùnuu sá ìo vii càa nchaa yúú yíhì, ndìhì cuendá nchaa sá nǐ sǎñaha táhú ñáyiú yìhì xítí-xi. Te Jèsús ní xáha<sup>n</sup>-gǎ xií-yu:

<sup>6</sup> —Sáá nduu te nchaa sá cúñùhu-ndo-a vǎ cúndùu-gá-xi dàtná cáá-xí vǐtna, chi ni ì<sup>n</sup>-gá yúú vǎ códó nchìhì tnaha-gá-xi chi ndìhì ngoyo —cachí-gá xáha<sup>n</sup>-gǎ xií-yu.

*Nàcuá cada-xi nduu ta cùyatni naa ñuyúú*  
(Mt. 24:3-28; Mr. 13:3-23)

<sup>7</sup> Te cue tée xǐndecu-á<sup>n</sup> nǐ xícá<sup>n</sup> tnúhú-güedě núú Jèsús, te xáha<sup>n</sup>-güedě xii-gá:

—Mèstrú, ¿te ná nduu dùca<sup>n</sup> cada-xi ngoyo veñúhu, àdi nándi cùu sá cáda-xí cuendá cutnùnì iní-ndí sá sà ta cuyatni nduu duca<sup>n</sup> cada-xi-i? — cachí-güedé xáha<sup>n</sup>-güedě xii-gá.

<sup>8</sup> Te Jèsús ní xáha<sup>n</sup>-gă xii-güedé:

—Ío quihi iní-ndó cùndecu-ndo, te vá dáñá-ndó mè-ndo dandahú ñáhá ñáyu xii-ndo. Chi ío cuéhé cue tée coo ñuyíú-a, te danàni-güedé méé-güedě dàtná nàni-í te cachí-güedé: “Yúhú cùu-í Crístú Yaá ní tendaha Yă Ndiöxí véxi ñuyíú-a”, duha cachí-güedé. Te cachí tucu-güedé: “Vitna sa ní sáá nduu càda-xi nchaa nacuaá ní cáhá<sup>n</sup>-í”, duha cachí-güedé. Dico vá quindáá iní-ndó, te nì vá túhá-ndó-güedě.

<sup>9</sup> Te òré ná ñhí-ndó tnùhu sá titní nació<sup>n</sup> xñàá-güedé te dava ñuú xñàá-güedé ndi mèe-güedé, te vá yùhú-ndó chi dacuití sã dúcá<sup>n</sup> càda-xi, dico vátá sàá-gá nduu nà ñuyíú òré duca<sup>n</sup> càda-xi —cachí-gá xáha<sup>n</sup>-gă xii-güedé.

<sup>10</sup> Te xáha<sup>n</sup> tùcu-gá xii-güedé:

—Nchaa cue tée ñhí nació<sup>n</sup> nàá-güedé ndihi cue tée ingá nació<sup>n</sup>, te titní ñuú ngüíta-güedé nàá-güedé.

<sup>11</sup> Te titní xichi ñuyíú ñhi vñhi tnáa, te titní tucu xichi ñuyíú coo tnamá, te titní tucu xichi ñuyíú quixi cuéhé, te titní núú sã cáda-xí àndi, te yùhú ñáyu.

<sup>12</sup> Te òré cúmăní-gă cada-xi nchaa nàcuáa càhá<sup>n</sup>-í-a, te cue tée cùu úhú iní ñáhá xii-ndo tñi ñaha-güedé, te candeca ñaha-güedě xii-ndo quiñí<sup>n</sup> xití veñúhu-güedé cada ndáá-güedé cuéchi-ndo, te chihi ñaha-güedě vecaá xii-ndo, te candeca

ñaha-güedě quíhí<sup>n</sup> núú cuè téé cùnūu yindaha nació<sup>n</sup> àdi núú dàva-gá cue téé cùnūu sá cuendá-í.

13 Te òré duca<sup>n</sup> na càda ñaha-güedé xii-ndo, te òré-á<sup>n</sup> tàú-xi cáhá<sup>n</sup> váha-ndo cuendá-í núú-güedě.

14 Te vá cání iní-ndó nüü nása cundūu tnúhu cúñaha-ndo xì-güedé cuendá cácu nihnu-ndo.

15 Chi yúhú dacàhu iní ñáhà-í xii-ndo tnúhu cúñaha-ndo xì-güedé, te taxi-í sá vátá quíní tnùn-í-gá-ndó, te ni ì<sup>n</sup> ñáyiū cūu úhú iní ñáhá xì-ndo vá nìhí-gá-yu tnúhu cúñáhá-yu xii-ndo.

16 Te ndéé tātá-ndó, ndìhì ñaní-ndó, ndìhì cue ñáyiū cūu ñaní tnáhá-ndó, ndìhì cue ñáyiū càhá<sup>n</sup> ndìhì váha-ndo cuàha cuendá ñáhă-yu xii-ndo nüü cuè téé cūchiu<sup>n</sup>, te dava-ndo càhni ñaha-güedé xii-ndo.

17 Te ío cuéhé ñáyiū cuu úhú iní ñáhă-yu xii-ndo sã cuendá-í.

18 Dico Yá Ndiõxí ío coto ñaha-gă xii-ndo chi ndéé idi díquí-ndó còto-gá.

19 Te núu na càda ndee iní-ndó cànchicú<sup>n</sup> nihnu ñaha-ndo xì-í, te nduu táhú-ndó cūndecu-ndo ndìhì Yá Ndiõxí nì caa nì quíhí<sup>n</sup>.

20 Te nduu na quín-í-ndó ñùhu doco sandadú nì càndéé yuhu ñúú Jerusalén, te sa cutnùn-í iní-ndó sã sà ní cuyatni nduu dànaa-güedé ñuú-á<sup>n</sup>.

21 Te dàvá-á<sup>n</sup> nchaa ñáyiū xĩndecu distritú Júdeá xíní ñùhu-xi cunú-yu quíhí<sup>n</sup>-yu xití yucu, te nchaa ñáyiū xĩndecu ñuú Jerusalén queé-yu xití ñuú-á<sup>n</sup>, te ñáyiū ñá túú xĩndecu ñuú-á<sup>n</sup> vã ndìhu-gá-yu.

22 Chi dàvá-á<sup>n</sup> cuu-xi nduu tnũndòho tnúhu ndàhú, te duca<sup>n</sup> càda-xi chi duca<sup>n</sup> ndéé tnùn-í núú tütú Yá Ndiõxí nàcuáa dandòho ñaha-gá xí-yu.

23 ¡Te ndàhú ní cuu nchaa ñáyiú dìhí ñúhú dēhe-xi, ndìhì nchaa ñáyiú ndèca déhe vitna sàdi na sáá nduu dùca<sup>n</sup> cada-xi! Chi ío cuéhé tnùndòho tnúhu ndàhú coo núú ndécũ-yu dàvá-á<sup>n</sup>, te xiá<sup>n</sup> cuu-xi ì<sup>n</sup> tnùndòho tendaha Yá Ndiõxí quixi sá cúú-xĩ-yu.

24 Te dava cue téé cuú-güedé cahni ñaha-güedě, te dava-güedé tñi ñaha-güedě candeca ñaha-güedě quíhí<sup>n</sup> nchaa ñuú xícá, te cue téé dava-gá ñuú cunuu-güedě ñuú Jerusálén, te mee Yá Ndiõxí cachí-gá te núu ná daha nduu cunuu-güedě ñuú-á<sup>n</sup>.

*Nàcuáa cada-xi òré quixi tucu Téé cùu ñaní tnáhá cuè ñáyiú*

*(Mt. 24:29-35, 42-44; Mr. 13:24-37)*

25 "Te cada-xi ì<sup>n</sup> sá vātá quíní-gá ñáyiú núú nchĩcanchii, ndìhì núú yóó, ndìhì núú nchàa chódíní, te ñuyíú-a coo tnúhu ndìhú iní-xi te vá cútnùní iní-yu nása cadá-yu cuendá sá ío dusa<sup>n</sup> càda ndute lamár òré candaundéé tnáhá-xí.

26 Te nchaa ñáyiú cuneé-yu sá yùhú-yu, ndìhì sá ndìhú iní-yu cuendá nchaa sá cadá-xí ñùyíú-a, te quidi-xi andiú.

27 Te sátá dúcá<sup>n</sup> te quiní-ndó yùhú Téé cùu ñaní tnáhá-ndó nchàa-ndo quee-í andiú quixi-í ichi xití vícò, te dàvá-á<sup>n</sup> quiní ñáhá nchàa ñáyiú sá ío cùnuu-í te ndàcu-í quìde-í nchaa sá vǎha.

28 Te òré ná ngüíta-xi duca<sup>n</sup> càda-xi, te cuita cundee-gǎ iní-ndó quíhí<sup>n</sup>, te quihì iní-ndó chi sa ní cuyatni vií-nǎ nduu cǎcu nihnu-ndo vǎ cúndècu-gá-ndó núú ñùyíú yícá cuèchi-a —càchí-gá xáha<sup>n</sup>-gǎ xii-güedé.

29 Te ní cani-gá ñ<sup>n</sup> cuèndú núú-güedě nàcuáa tecú tnùní váha-güedé tnúhu-gá, te xáha<sup>n</sup>-gă xii-güedé:

—Chí cùndèhe yutnu ngúxí ndìhi nchaa dava-gá yutnu.

30 Chi nàtahú ndaha-xi, te òré duca<sup>n</sup> quìde-xi te càchí-ndó sã sà ní cuyatni nuu cahni.

31 Te ñi<sup>n</sup>-ni duca<sup>n</sup> sãtnahá-xi cùu oré ná quìní-ndó càda-xi nchaa nacuaa càhá<sup>n</sup>-í, te sá dúcá<sup>n</sup> te cutnùní iní-ndó sã sà ní cuyatni nduu ndíhu ndaha ñàha Yá Ndiõxí xii-ndo.

32 Te na càchí tnúhu ndáá-í xii-ndo sã òré vátá cùú-gá cue ñáyiu xĩndecu ñuyíú-a vitna, te cada-xi nchaa nàcuáa ní càhá<sup>n</sup>-í.

33 Te andi<sup>n</sup> ndìhi ñuyíú-a chi ndìhi nihnu-xi, dico tnúhu-í chi vá ndíhi nihnu-xi, chi cùu-xi tnúhu ndáá.

34 Te quihi iní-ndó vã cùndècu-ndo ichi cuehé ichi duha, te vá cúú-ndó ñáyiu quihu, te vá cúhú<sup>n</sup> ìní-ndó mèe-ni nchaa sá ió ñuyíú-a, chi núu duca<sup>n</sup> na càda-ndo te nacuaana-ndo sã sáá nduu càda-xi nacuaa ní càhá<sup>n</sup>-í. Te uu<sup>n</sup>ni sáá nduu-ã<sup>n</sup>,

35 te cada-xi dàtná cuìní-ndó quìde ñ<sup>n</sup> trampá chi uu<sup>n</sup>ni ngáva-xi, te duca<sup>n</sup> càda-xi nchaa ñáyiu xĩndecu ñuyíú-a, chi uu<sup>n</sup>ni sáá nduu-ã<sup>n</sup>.

36 Te nchòhó cundecu túha-ndo te ió càhá<sup>n</sup> ndìhi-ndo Yá Ndiõxí cuèndá ndacu-ndo yãha-ndo nchàa tnúndòho quixi ñuyíú-a, te duca<sup>n</sup> te nasáá-ndó cùndecu-ndo núú ndécú yùhú Tée cùu ñaní tnáhá-ndó nchàa-ndo —cachí-gá xáha<sup>n</sup>-gă xii-güedé.

37 Te nduu ndùu ní xóo danèhé Jèsús ñáyiu tnúhu-gá xití veñúhu càhnu sá ïo cùnuu, te niú niú ní xóo quíhí<sup>n</sup> ngúdú-gá xití yucu Òlívú.

38 Te nehé nehé ní xóo quíhí<sup>n</sup> nchaa ñáyiú veñúhu-á<sup>n</sup> ñí xóo cundedóho-yu nchaa tnúhu càhá<sup>n</sup>-gá.

## 22

*Ndùcu-güedé nàcuáa cada-güedé cahni-güedé Jèsús*

*(Mt. 26:1-5, 14-16; Mr. 14:1-2, 10-11; Jn. 11:45-53)*

<sup>1</sup> Te sa ní cuyatni nduu tnàhá vico pàscuá, te vico-á<sup>n</sup> xéxí ñáyiú pàá sá ñà túú yìhi levadurá.

<sup>2</sup> Te cue téé cùu dútú cúnùu, ndìhi cue téé dàcuaha ñaha xii ñáyiú nchaa tnúhu ní chídó tnùnì ndíi Moisés ndúcú-güedě nàcuáa cada-güedé cahni-güedé Jèsús, te dícó-ni sá xǐyùhú-güedé ñáyiú.

<sup>3</sup> Te yucu ñávãha ní dácáhú ìní ñáhá-xí xii té Jüdás déhe té Iscàrioté, te núú tnàhá téé-á<sup>n</sup> cúú ùxúú tnàhá cue téé xìca cuu ndìhi-gá ní cùu.

<sup>4</sup> Te té Jüdás-á<sup>n</sup> ñí sáhá<sup>n</sup>-dé ní ndatnúhu-dé ndìhi cue téé cùu dútú cúnùu, ndìhi cue téé tàxi tnuní ñáhá xii cue téé quìde cuendá veñúhu nàcuáa cada-dé cuáha cuendá-dé Jèsús núú-güedě.

<sup>5</sup> Te ío ní cudíí ìní-güedé, te ní xáha<sup>n</sup>-güedě xii-dé sá cuãñaha-güedě díhú<sup>n</sup>,

<sup>6</sup> te ní xáha<sup>n</sup>-dě sá cúú quèhe<sup>n</sup>-dé díhú<sup>n</sup>-ã<sup>n</sup>, te ní ngüíta-dé ndúcú-dě nàcuáa cada-dé cuáha cuendá-dé Jèsús núú-güedě òré ñá túú ñáyiú.

*Cùdini Jèsús ndìhi cue téé xìca cuu ndìhi-gá*

*(Mt. 26:17-29; Mr. 14:12-25; Jn. 13:21-30; 1 Co. 11:23-26)*



7 Te ní sáá nduu ñi quesaha vico xexí-yu pàá sá ñã túú yìhi levadurá, te ñiu-ni nduu-ã<sup>n</sup> sáhní-güedě ì<sup>n</sup> mběé lĩhli xèxí-yu.

8 Te Jèsús ní xáha<sup>n</sup>-gã xii té Pèlú ndìhi té Juàà:

—Chí cuáhá<sup>n</sup> chi cada túha-ndo nũú cúdini-o sacuaa nduu vico pascuá —càchí-gá xáha<sup>n</sup>-gã xii-güedé.

9 Te ní xícá<sup>n</sup> tnúhú-güedě núú-gã, te xãha<sup>n</sup>-güedě xii-gá:

—¿Te ndèé cáá vehe cuiní-n càda túha-ndí-i? —càchí-güedé xãha<sup>n</sup>-güedě xii-gá.

10 Te ní xáha<sup>n</sup> Jèsús xii-güedé:

—Chí cundèdóho na càchí tnúhu-í xii-ndo nàcuáa cada-ndo. Óré quíhu-ndo xití ñuú núú quíhí<sup>n</sup>-ndó, te naníhí-ndó ì<sup>n</sup> tée tànehe ì<sup>n</sup> yoó ndute, te tée-án candéndaha-ndo-dě quíhí<sup>n</sup>, te núu ndèdacàa vehe na ndíhu-dé te xía<sup>n</sup> quíhu-ndo.

11 Te cúñaha-ndo xì xítóhó vehe-án: “Yaá cúú Mèstrú càchí-gá nũu ndèdacàa xichi xití vehe-n cuãñaha nũu-n xii-gá cudini-gá ndìhi cue tée xica cuu ndìhi-gá sacuaa nduu vico pascuá”, duha cúñaha-ndo.

12 Te dàtnùní danèhé ñáhá-dě xii-ndo ì<sup>n</sup> quartú cáhnú càa núú ñnu, chi vehe yòdo tnaha cuu-xi, te sa ní quide túha-dé nchaa sá ná ndìhi, te nchòhó dícó-nã sá cúdini-o cada túha-ndo —càchí-gá xáha<sup>n</sup>-gã xii-güedé.

13 Te ní xica-güedé cuáhá<sup>n</sup>-güedé, te nchaa-ni nàcuáa ní xáha<sup>n</sup> Jèsús xii-güedé ní cuu, chi nchaa sa ndècu túha, te ní quide túha-güedé sá cúdini-güedé ndìhi-gá sacuaa nduu vico pascuá-án.

14 Te sáta nǐ tnahá òré cudìni Jesús ndìhi cue téé ní táúchíú<sup>n</sup>-gǎ cáhá<sup>n</sup> tnúhu-gá núú ñǎyiu, te cuánguihu ndìhi ñaha-gǎ xii-güedé mèsá.

15 Te xáha<sup>n</sup>-gǎ xii-güedé:

—jDuca<sup>n</sup>-ni ïò sàni iní-í sá cudìni ndìhi ñaha-í xii-ndo sàcuaa nduu vico pascuá òré cúmǎní-gǎ sáá nduu ndòho-í te cuú-í!

16 Te na càchí tnúhu-í xii-ndo sǎ vǎ dúhá-gǎ caxi ndìhi ñaha-í xii-ndo ndùu vico pascuá, chi ndéé òré ná sáá nduu nàsáá-ndó núú táxí tnùní Yǎ Ndiöxí cundecu-o, te dǎvá-á<sup>n</sup> cada iní-ndó sǎ dǎtná sá cǎxí tucu-o chi ío váha cuu iní-ó cundecu-o —cachí-gǎ xáha<sup>n</sup>-gǎ xii-güedé.

17 Te ní quehe<sup>n</sup>-gǎ ï<sup>n</sup> vàsú ñúhú ndùdí ndéhé yoho yàha stilé, te ní ndacá<sup>n</sup> táhú-gǎ núú Yǎ Ndiöxí, te dǎtnùní ní xáha<sup>n</sup>-gǎ xii-güedé:

—Chí quéhé<sup>n</sup> vàsú ñúhú ndùdí ndéhé yoho yàha stilé-a, te coho-ndo lùha luha nchaa-ndo.

18 Te na càchí tnúhu tucu-í xii-ndo sǎ vítná-nǎ duha xìhi ndìhi ñaha-í xii-ndo ndùdí ndéhé yoho yàha stilé-a te vá cóhó ndìhi ñaha-gá-í, dico na sáá nduu nàníhí tnáhá-ó núú ndécú Tǎtà-í Dútú Ndiöxí táxí tnùní-gǎ, te dǎvá-á<sup>n</sup> cada iní-ó sǎ dǎtná sá cóhó ndìhi ñaha tucu-í xii-ndo, chi ío cudíí iní-ó —càchí-gǎ xáha<sup>n</sup>-gǎ xii-güedé.

19 Te sáta nǐ túhú cóhó-güedě ní cudìni-güedé, te ní quehe<sup>n</sup>-gǎ pǎá te ní ndacá<sup>n</sup> táhú tucu-gǎ núú Yǎ Ndiöxí, te dǎtnùní ní táhú cuèchi-gǎ, te ní dǎcǎhñu ñaha-gǎ xii-güedé, te xáha<sup>n</sup>-gǎ:

—Pǎá-a cùu-xi datná yiquí cùnú-í, chi cahni ñaha-güedě xii-í sá cuèndá-ndó, te duca<sup>n</sup>-ni càxi-ndo paá-a cuèndá ndacu iní ñáhá-ndó xii-í —càchí-gǎ xáha<sup>n</sup>-gǎ xii-güedé.

20 Te diu-ni duca<sup>n</sup> ñ quide-gá ndihì vàsú ñúhú ndùdí ndéhé yoho yàha stilé, chí ní quehe<sup>n</sup>-gá te òré sãñaha-gã xii-güedé coho-güedé, te ní xáha<sup>n</sup>-gã:

—Ndudí ñúhú vàsú-a cada iní-ndó sã cúú-xí dàtná níñì-í sá cáti òré cahni ñaha-güedě xii-í. Te sá dúcá<sup>n</sup> càti níñì-í xiã<sup>n</sup> cutnùní ndáá sá Yã Ndiöxí cada-gá ingá núú sã vãha sá cúú-xí-ndó.

21 Dico vitna chi iha tnàhá tée cuáha cuèndá ñáhá xii-í núú cuè tée cùu úhú iní ñáhá yìhi-dé mèsá.

22 Te yúhú Tée cùu ñaní tnáhá-ndó nchàa-ndo ñuhu ichi-í cuáhá<sup>n</sup>-í cuú-í dàtná ní cachí Yã Ndiöxí, jDico ndàhú ní cuu tée duca<sup>n</sup> na cuãha cuèndá ñáhá xii-í núú cuè tée cùu úhú iní ñáhá! —càchí-gá xáha<sup>n</sup>-gã xii-güedé.

23 Te ní ngüíta-güedé ndúcú tnùhu núú tnáhá-güedě nùu ndèda càa-güedé duca<sup>n</sup> càda cuáha cuèndá ñáhá xii-gá núú cuè tée cùu úhú iní ñáhá.

### *Xĩndatnúhu-güedé ndèdacàa-güedé cunuu-gã*

24 Te sátá dúcá<sup>n</sup> te ní ngüíta-güedé xĩndatnúhu-güedé nùu ndèdacàa-güedé tàú-güedé cunuu-güedě.

25 Dico Jèsús ní xáha<sup>n</sup>-gã xii-güedé:

—Nchaa cue tée yìndaha ñaha xii ñáyiú ío tàxi tnuní-güedé, te mee-güedě cuiní-güedé sá càhá<sup>n</sup> vãha ñáyiú cuèndá-güedé.

26 Dico nchòhó vá dúcá<sup>n</sup> càda-ndo, chí núú ì<sup>n</sup>-ndo cùnuu te cada-ni-ndo sã ñà túú cùnuu-ndo, àdi cuu-ndo ì<sup>n</sup> tée tàxi tnuní ñáhá xii cue tée xìnu cuechi, te cada-ni-ndo sã cúú-ndó ì<sup>n</sup> tée xìnu cuechi-á<sup>n</sup>.

27 Te vá cächí-ó sǎ tǎe xìnu cuechi cunuu-gá-dé, chi tée quíhu mèsá cúnùu-gá-dé. Dico yúhú ndécu ndìhi ñaha-í xii-ndo dàtná ì<sup>n</sup> tée xìnu cuechi.

28 Te nchòhó duca<sup>n</sup>-ni ndècu ndìhi ñaha-ndo xii-í, te tàyáha ndìhi ñaha-ndo xii-í nchaa sá táyãha-í véxi.

29 Te Tǎtà-í Dútú Ndiǒxí ní cachí-gá sá táxí tnùn-í, te yúhú cächí-í xii-ndo sǎ sǎá nduu te tnàhá-ndó tàxi tnuní-ndó.

30 Te dàvá-á<sup>n</sup> caxi-o coho-o càda-o núú táxí tnùn-í, te yàcá<sup>n</sup> ngüíta-ndo càda ndáá-ndó cuèchi ndi ùxúú xichi ñáyiú isràél —cächí-gá xáha<sup>n</sup>-gǎ xii-güedé.

*Jèsús càhá<sup>n</sup>-gá sá tǎ Pèlú cúñaha-dǎ xii ñáyiú sá ñà túú xini ñáhá-dǎ xii-gá*

*(Mt. 26:31-35; Mr. 14:27-31; Jn. 13:36-38)*

31 Te Xítohó Jesucristú ní xáha<sup>n</sup>-gǎ xii té Xímú:

—Yòhó Xímú, cundedóho váha ì<sup>n</sup> tnúhu na càhá<sup>n</sup>-í-a, chi dàtná cuìní-n quide táchí triú sàcá<sup>n</sup>-xi duha sàcá<sup>n</sup>-xi dàcá<sup>n</sup>, duca<sup>n</sup> quèsaha yucu ñávãha cada ñaha-xi xii-ndo. Chi coto ndeé ñáhá-xí xii-ndo te núú ndisa sàndáá iní ñáhá-ndó xii-í.

32 Dico yúhú xicá<sup>n</sup> táhù-í núú Yǎ Ndiǒxí cuendá-n, cuendá sá vǎ dáñá ndèé-n quìndáá iní ñáhá-n xii-í. Te òré ndixi túu iní-n sǎ ñà túú ní quide váha-n, te quíhí<sup>n</sup>-n cuãha-n cuè tée cündihí-n tnúhu ndee iní cuendá canchicú<sup>n</sup> nihnu-ni-güedé ichi Yá Ndiǒxí —cächí-gá xáha<sup>n</sup>-gǎ xii-dé.

33 Te ní xáha<sup>n</sup>-dǎ xii-gá:

—Mèstrú, sa ndècu túha-í sá quíhí<sup>n</sup> ndìhi ñaha-í xii-n vècaá, àdi cuéi na cùú ndìhi ñaha-í xii-n —cächí-dé xáha<sup>n</sup>-dǎ xii-gá.

34 Te Jèsús ní xáha<sup>n</sup>-gǎ:

—Pèlú, na càchí tnúhu-í xii-n sǎ cùmání-gǎ cana ñ<sup>n</sup> líhi te úní xito cáhá<sup>n</sup>-n nǔú ñǎyiu sá ñà túú xìní ñáhá-n xii-í —càchí-gá xáha<sup>n</sup>-gǎ xii-dé.

*Sa ní cuyatni ndoho Jèsús*

<sup>35</sup> Te Jèsús ní xáha<sup>n</sup>-gǎ xii-güedé:

—Te cútnàhá ní tendaha ñaha-í xii-ndo ñí sáhá<sup>n</sup>-ndó chù<sup>n</sup>-í, chi ñá túú ní cǎnehe-ndo ni ñ<sup>n</sup> sá cùhú<sup>n</sup> dǐhú<sup>n</sup>-ndó, te ni ñ<sup>n</sup> sá cùhú<sup>n</sup> ndàchiu<sup>n</sup>-ndo ñá túú ní cǎnehe-ndo. Te chí cǎchí tnúhu núu lò ñ<sup>n</sup> sá ñí cumání xii-ndo —càchí-gá xáha<sup>n</sup>-gǎ xii-güedé.

Te ní xáha<sup>n</sup>-güedé:

—Ñáhá, chi ni ñ<sup>n</sup> sá ñà túú ní cùmání xii-ndí —càchí-güedé xǎha<sup>n</sup>-güedé xii-gá.

<sup>36</sup> Te ní xáha<sup>n</sup>-gǎ:

—Te vitna núu ndècu ndìhi-ndo sá sácǔhu<sup>n</sup> dǐhú<sup>n</sup>-ndó, àdi sá sácǔhu<sup>n</sup> ndachìu<sup>n</sup>-ndo te canehe-ndo. Te núu ñá túú ndècu ndìhi-ndo machití, te nadico-ndo dǒó tǐcachi ñihnu-ndo te cuaa<sup>n</sup>-ndo.

<sup>37</sup> Te na cǎchí tnúhu-í xii-ndo sǎ dàcuítí sǎ yǎha-í nàcuáa càhá<sup>n</sup>-xi núu tǔtú Yǎ Ndiǒxí núu cǎchí-xi: “Í<sup>n</sup>-ni ñí quide ñaha-güedé xii-gá, ndìhi cue téé ndècu cuéchi-xi”, duha cǎchí-xi núu tǔtú-gá. Te ñá díú-ní xǎ<sup>n</sup> yáha-í chi nchaandi túhú nàcuáa càhá<sup>n</sup>-xi núu tǔtú-gá yáha-í —càchí-gá xáha<sup>n</sup>-gǎ xii-güedé.

<sup>38</sup> Te xǎha<sup>n</sup>-güedé:

—Mèstrú, iha ndècu úú machití —càchí-güedé xǎha<sup>n</sup>-güedé xii-gá.

Te ní xáha<sup>n</sup>-gǎ:

—Chí návì-ñǎ yuhu-ndo, vá càhá<sup>n</sup>-gá-ndó —càchí-gá xáha<sup>n</sup>-gǎ xii-güedé.

*Jèsús càhá<sup>n</sup> ndihí-gá Yă Ndiöxí yucu Òlívú  
(Mt. 26:36-46; Mr. 14:32-42)*

<sup>39</sup> Te Jèsús ní quee-gá cuáhá<sup>n</sup>-gá yucu Òlívú, chi duca<sup>n</sup> tnàhí quide-gá. Te cue téé xica cuu ndihí-gá nchìcú<sup>n</sup> ñáhá-güedé xii-gá cuáhá<sup>n</sup>.

<sup>40</sup> Te òré ní quexìo-gá xíá<sup>n</sup>, te ní xáha<sup>n</sup>-gă xii-güedé:

—Chí càhá<sup>n</sup> ndihí Yă Ndiöxí cuèndá sá vă dácàhá<sup>n</sup> ñáhá yùcu ñávâha xii-ndo càda-ndo sá ñà túú tàú-ndó càda-ndo —cachí-gá xáha<sup>n</sup>-gă xii-güedé.

<sup>41</sup> Te sátá dúcá<sup>n</sup> te ní quee dîi<sup>n</sup>-gá tnuú-güedé cuáhá<sup>n</sup>-gá ì<sup>n</sup> xio, te sa ñùnchíí luha ní xica ndehe-gá núú ndécú-güedé, te xíá<sup>n</sup> ñí ngüíñí xítí-gă càhá<sup>n</sup> ndihí-gá Tătá-gă Dútú Ndiöxí.

<sup>42</sup> Te xáha<sup>n</sup>-gă:

—Táu, te núú dicó cachí-n te taunihnu ñaha-n xii-í cuèndá sá vă ndóhò-í ná sàá òré, dico vá cadá-n nàcuáa càchí iní mée-í, chi cada-n nàcuáa càchí iní mée-n —càchí-gá xáha<sup>n</sup>-gă xii Tătá-gă Dútú Ndiöxí.

<sup>43</sup> Te sátá dúcá<sup>n</sup> te ní quexìo ì<sup>n</sup> espíritú xínú cuèchi núú Yă Ndiöxí ní sãñaha-gă-xi tnúhu ndee iní xii-gá.

<sup>44</sup> Te òré súúní ndìhú iní-gá, te uu<sup>n</sup>-gá súúní ñè yuhu ñè iní-gá càhá<sup>n</sup> ndihí-gá Dútú Ndiöxí, te tnée-gă cáá dàtná cáá ñíí te ngóyó núú ñúhú.

<sup>45</sup> Te sátá ñí yáha ní cáhá<sup>n</sup> ndihí-gá Tătá-gă Dútú Ndiöxí, te ní ndacuíñí-gá cuánuhú-gá núú ñí dándõo-gá cue téé-á<sup>n</sup>, te òré ní nasáá-gá te xíxídí-güedé cuèndá sá ïo cuéhé tnúhu sàni iní-güedé cuèndá-gá.

<sup>46</sup> Te xáha<sup>n</sup>-gă xii-güedé:

—¿Ná cuendá xidí-ndó? Chí ndácõo, te cáhá<sup>n</sup> ndihí-ndo Yă Ndiõxí cuendá sá vă dácáhá<sup>n</sup> ñáhá yùcu ñávâha xii-ndo càda-ndo sá ñà túú tàú-ndó càda-ndo —cachí-gá xáha<sup>n</sup>-gă xii-güedé.

*Ní tn#-güedé Jèsús ndécá ñàha-güedé cuáhá<sup>n</sup>  
(Mt. 26:47-56; Mr. 14:43-50; Jn. 18:2-11)*

<sup>47</sup> Te cáhá<sup>n</sup> dúcá<sup>n</sup>-ní Jèsús ní quexìo vai cue téé, te ì<sup>n</sup> téé xìca cuu ndihí-gá nání Jùdás cúnùu-dé yódó nùu-dé núú-güedě ní quexìo ndéé núú-gă, te ní teyuhu ñàha-dé xii-gá, te núú tnàhá téé-á<sup>n</sup> cúú ùxúú cue téé xìca cuu ndihí-gá.

<sup>48</sup> Te ní xáha<sup>n</sup> Jèsús xii-dé:

—Jùdás, ¿te yòhó cuáha cuendá ñáhá-n xii yúhú Téé cùu ñaní tnáhá-ndó nchàa-ndo núú cue téé cùu úhú iní ñáhá xii-í cáhá<sup>n</sup>-n nùu duha tàyuhu ñaha-n-á<sup>n</sup>? —càchí-gá xáha<sup>n</sup>-gă xii-dé.

<sup>49</sup> Te sátá nǐ xiní nchaa cue téé cùndihí Jesús nàcuáa cùu cue téé ní quexìo-á<sup>n</sup>, núu ní xícá<sup>n</sup> tnúhú-güedě núú-gă, te xăha<sup>n</sup>-güedě xii-gá:

—Mèstrú, ¿cuu nàá-ndí ndihí-güedé ndihí machítí-a ñă? —càchí-güedé xăha<sup>n</sup>-güedě xii-gá.

<sup>50</sup> Te ì<sup>n</sup>-dé ní xehndé-ni-dé lóho xio cùha ì<sup>n</sup> cue téé ní quexìo-á<sup>n</sup>, te téé-á<sup>n</sup> xínú cuèchi-dé núú dǔtú cúnùu-gá, te ní quendeé duu<sup>n</sup> lóho-dé.

<sup>51</sup> Te Jèsús ní xáha<sup>n</sup>-gă xii-güedé:

—Chí dáñá-güedě, vá dúcá<sup>n</sup> càda-ndo —cachí-gá xáha<sup>n</sup>-gă xii-güedé.

Te ní dácáá-gá ndaha-gá ní tendaha-gă núú nǐ xíndeé lóho téé-á<sup>n</sup>, te ní nduu váha dàtná-ni càa.

<sup>52</sup> Te nchaa cue téé cùu dǔtú cúnùu, ndihí cue téé tàxi tnuní nchaa cue téé quìde cuendá veñúhu sá ìo cùnùu, ndihí cue téé cùu sacuéhé nǔú ñăyiu isràél,

nchaa cue téé-án vëxi tñi ñaha-güedě xii-gá, te ní xáha<sup>n</sup>-gã xii-güedé:

—Nchòhó, nèhe-ná-ndó màchití, nèhe-ná-ndó càrrutí véxi-ndo nũú ndécù-í, dàtná quidé-ndó ì<sup>n</sup> ñadúhú quidé ñàha-ndo xii-í.

<sup>53</sup> Te duca<sup>n</sup>-ni nĩ xiní-ndó nĩ xíndecu-í xití veñúhu càhnu sá ìo cùnuu ní xóo danèhé-í ñáyiú, te ní lùha ñá túú ní cùu tnándeé ñáhá-ndó xii-í òré-án, te vitna ní sáá òré duca<sup>n</sup> càda-ndo, te cada sácuíhná nàcuáa cùu iní-xi —càchí-gá xáha<sup>n</sup>-gã xii-güedé.

*Té Pèlú càhá<sup>n</sup>-dé núú ñáyiú sá ñà túú xiní-dé Jèsús (Mt. 26:57-58, 69-75; Mr. 14:53-54, 66-72; Jn. 18:12-18, 25-27)*

<sup>54</sup> Te ní tñi-güedé Jèsús, te ndèca ñaha-güedé xii-gá cuáhán vehe téé cùu dútú cùnùu-gá, te té Pèlú xica xica-ni nchicú<sup>n</sup> ñáhá-dě xii-gá cuáhán.

<sup>55</sup> Te òré ní quexìo-güedé xía<sup>n</sup> te ní dátñahá-güedé ñuhú quehé vehe-án, te ní càndéé yuhu nùhú-án nĩ ngóo teté-güedé, chi quide víxi<sup>n</sup>-xi, te tnàhá té Pèlú ní ngóo teté ndihì ñaha-dě xii-güedé.

<sup>56</sup> Te xía<sup>n</sup> ndécú ì<sup>n</sup> xíchí xínú cuèchi vehe-án, te òré ní xiní-xi nùcóo teté tnàhá té Pèlú, te ní ndacoto-xi núú-dě, te ní xáha<sup>n</sup>-xi xii-güedé:

—Tnàhá téé-a xica cuu ndihì-dé téé ndèca-güedé cuánguihu-án —càchí-xi xáha<sup>n</sup>-xi xii-güedé.

<sup>57</sup> Dico té Pèlú ñá túú ní nũnuu-dé, te xáha<sup>n</sup>-dě xii-xi:

—Yúhú ñá túú xiní-í téé-án —càchí-dé xáha<sup>n</sup>-dě xii-xi.

<sup>58</sup> Te tna tnaa-ni ní cuu, te ní xiní ñáhá tùcu ì<sup>n</sup>-dé, te xáha<sup>n</sup>-dě:

—Yòhó tnàhá-n xica cuu ndihì-n téé ndèca-güedé cuánguihu-án —càchí-dé xáha<sup>n</sup>-dě xii-dé.



Dico té Pèlú ní xáha<sup>n</sup>-dě:

—Ñáhá, ñá díú yùhú xícá cùu ndihí-í-dé —  
càchí-dé xáha<sup>n</sup>-dě.

<sup>59</sup> Te sa ní cuu dàtná ì<sup>n</sup> òré te càchí tucu ingá-dé:

—Ndáá sá tée-a xìca cuu ndihí-dé tée ndèca-güedé  
cuánguìhu-ǎ<sup>n</sup>, chí tnàhá-dé cúú-dě tée distritú  
Galileá —càchí-dé xáha<sup>n</sup>-dě xii-güedé.

<sup>60</sup> Te té Pèlú ní xáha<sup>n</sup>-dě xii tée-á<sup>n</sup>:

—Yùhú ñá túú cùtnuní iní-í nása ndùu tnúhu  
càhá<sup>n</sup>-n —càchí-dé xáha<sup>n</sup>-dě.

Te ní vǎtá xǐnu duca<sup>n</sup>-ǎ tnúhu càhá<sup>n</sup>-dé ní  
cana-ni ì<sup>n</sup> líhi.

<sup>61</sup> Te Xítohó Jesucristú ní nchócótó-ǎ núú-dě, te  
òré-ni-á<sup>n</sup> nǐ ndacu iní-dé tnúhu ní xáha<sup>n</sup>-ǎ xii-dé  
sá cùmání-ǎ cana ì<sup>n</sup> líhi, te úní xito cáhá<sup>n</sup>-dé sá ñà  
túú xíní ñáhá-dě xii-gá.

<sup>62</sup> Te té Pèlú ní quee-dé tnuú-güedé cuáhá<sup>n</sup>-dé ì<sup>n</sup>  
xio, te ní ndáhyú víhí-dě ní ndixí cuéchi iní-dé.

*Cùdiquí ndeé-güedé Jèsús*

*(Mt. 26:67-68; Mr. 14:65)*

<sup>63-64</sup> Te cue tée ndèé ñáhá xii Jèsús ní cudíquí  
ndeé ñáhá-güedě xii-gá, te ní dádǎhu-güedé  
núú-ǎ, te ní caniha-güedě xii-gá, te xáha<sup>n</sup>-güedě:

—¡Cáhá<sup>n</sup> ná cótó yòo ní caniha xii-n! —  
cachí-güedé xáha<sup>n</sup>-güedě xii-gá.

<sup>65</sup> Te cuéhé víhí-ǎ tnúhu cuéhé ní xáha<sup>n</sup>-güedě  
xii-gá.

*Jèsús ndécú-ǎ jùndá*

*(Mt. 26:59-66; Mr. 14:55-64; Jn. 18:19-24)*

<sup>66</sup> Te sátá nǐ túndaá, te ní tacá cue tée cùu  
sacuéhé núú ñǎyiu isràél, ndihí cue tée cùu dútú  
cúnùu, ndihí cue tée dàcuaha ñaha xii-yu nchaa

tnúhu ní chídó tnùní ndí Moisés, te ndèca-güedé Jèsús cuáhá<sup>n</sup> núú cádá-güedě jùndá, te òré ní quexìo-güedé ndíhi-gá núú cádá-güedě jùndá-á<sup>n</sup>, te ní xáha<sup>n</sup>-güedě xii-gá:

<sup>67</sup> —Cuìní-ndí cachí tnúhu-n xì-ndí nũu diu-n cùu-n Cristú Yaá ní tendaha Yă Ndiõxí véxi ñuyíú-a —càchí-güedé xáha<sup>n</sup>-güedě xii-gá.

Te ní xáha<sup>n</sup>-gă xii-güedé:

—Te núu na càchí-í sá díù-í cúú Cristú ñá, te nì vá quìndáá iní-ndó,

<sup>68</sup> àdi te núu ñ<sup>n</sup> sá ná càcá<sup>n</sup> tnúhu-í núú-ndó, te nì vá càchí tnúhu-ndo, te nì vă dáñá ñàha-ndo.

<sup>69</sup> Dico vitna ní cuyatni nduu ngóo yúhú Tée cùu ñaní tnáhá-ndó nchàa-ndo xio cuha Dútú Ndiõxí Yaá ío cùnuu —cachí-gă xáha<sup>n</sup>-gă xii-güedé.

<sup>70</sup> Te dătnùní nchaa-güedé ní xícá<sup>n</sup> tnúhú-güedě núú-gă, te xáha<sup>n</sup>-güedě xii-gá:

—¿Te yòhó cúú-n Dêhe Yá Ndiõxí te núu duca<sup>n</sup> vání? —càchí-güedé xáha<sup>n</sup>-güedě xii-gá.

Te ní xáha<sup>n</sup> Jèsús:

—Ndáá sá díú Dêhe-gá cúù-í dătná càchí mée-ndó-ă<sup>n</sup> —càchí-gă xáha<sup>n</sup>-gă xii-güedé.

<sup>71</sup> Te ní xítnàha-güedé:

—Ñá túú-gă xíní ñùhu-xi cue tée cáhá<sup>n</sup> nũu ndáá sá ndècuéchi-dé àdi ñá túú ndècuéchi-dé chi yuhu mee-dé ní cáhá<sup>n</sup>-dé vitna ní xíndedóho-o —càchí-güedé xítnàha-güedé.

## 23

*Jèsús ndécú-gă núú tĕ Pilatú*

*(Mt. 27:1-2, 11-14; Mr. 15:1-5; Jn. 18:28-38)*

1 Te nchaa-güedé ní ndacuíñí-güedé, te ndèca-güedé Jèsús cuáhá<sup>n</sup> núú tǎ Pilatú,

2 te núú tǎe-á<sup>n</sup> nǐ ngüíta-güedé sàcá<sup>n</sup> cuéchi-güedé cuèndá-gá, te xǎha<sup>n</sup>-güedé:

—Ní naníhí-ndǐ tée-a dándahú-dé ñáyiú ñuú-ó, chi xǎha<sup>n</sup>-dǎ xií-yu sá vǎ chǎhu-gá-yu impuèstú xii té Cèsár tée ío cùnuu, te càchí-dé sá díú-dǎ cúú-dǎ Crístú Yaa ní tendaha Yǎ Ndiǒxí véxi ñuyíú-a te yíndaha-dé ñáyiú càchí-dé —càchí-güedé xǎha<sup>n</sup>-güedǎ xii-dé.

3 Te té Pilatú ní xícá<sup>n</sup> tnúhu-dé núú-gǎ, te xǎha<sup>n</sup>-dǎ xii-gá:

—¿Ndáá sá díú-n cùu-n tée yíndaha ñaha xii ñáyiú isràél-ǎ<sup>n</sup>? —càchí-dé xǎha<sup>n</sup>-dǎ xii-gá.

Te Jèsús ní xáha<sup>n</sup>-gǎ xii-dé:

—Díu-í yíndàha-í-yu —càchí-gá xáha<sup>n</sup>-gǎ xii-dé.

4 Te té Pilatú ní xáha<sup>n</sup>-dǎ xii nchaa ñáyiú, ndíhi cue tée cùu dútú cúnùu:

—Yúhú cútnùnǐ iní-í sá ñà túú nǐ ñ<sup>n</sup> cuéchi tée-a —càchí-dé xǎha<sup>n</sup>-dǎ xií-yu.

5 Dico níhi-gá ní cáhá<sup>n</sup>-güedé, te xǎha<sup>n</sup>-güedǎ:

—Càchí-ndǐ sá ío dusa<sup>n</sup> xǐquide ñáyiú cuèndá nchaa sá dánèhé ñáhá-dǎ xií-yu, te ní quesaha-dǎ ndéé distrítú Galileá, te ní yáha-dé nihì distrítú Júdeá dánèhé-dé ñáyiú, te vitna ní sáá-ni-tu-dé ndéé ndíha dānehé-dé-yu —càchí-güedé xǎha<sup>n</sup>-güedǎ xii té Pilatú.

### *Jèsús ndécú-gǎ núú tǎ Hèrodés*

6 Te sá dúcá<sup>n</sup> nǐ tecú dóho té Pilatú ní cacu nehé-yu distrítú Galileá, núu xiǎ<sup>n</sup> ní xícá<sup>n</sup> tnúhú-dǎ núú-yu núu tée Galileá cúú-gǎ.

<sup>7</sup> Te ní xáhă<sup>n</sup>-yu sá díú tĕe yàcá<sup>n</sup> cúú-gă, núu xíă<sup>n</sup> ní na dàyáha ñaha-dĕ xii-gá ndaha té Hèrodés tĕe cùu gobiernú distritú Galileá chi nduu-ă<sup>n</sup> ndécú-dĕ tnàhá-dé ñúú Jerusàlén-á<sup>n</sup>.

<sup>8</sup> Te òré ní xiní té Hèrodés-á<sup>n</sup> Jèsús te ío ní cudíí iní-dé, chi ní cunaha dùca<sup>n</sup>-ni cuiní-dé quini ñáhá-dĕ xii-gá te ñá túú tnàhí xiní ñáhá-dĕ xii-gá ní cùu, chi cuendá-ni tnúhu ñihí-dé cuendá-gá, te ndĕtu-dé sáá ì<sup>n</sup> nduu quini ñáhá-dĕ xii-gá, te cada-gá ì<sup>n</sup> sá vă yǒo tnàhí ndàcu cada cundehe-dé ní sani iní-dé.

<sup>9</sup> Te vài sá ñí xícá<sup>n</sup> tnúhú-dĕ núú Jèsús, dico ni ì<sup>n</sup> tnúhu ñá túú ní cǎhá<sup>n</sup>-gá.

<sup>10</sup> Te xíă<sup>n</sup> xĩndecu tnàhá cue tĕe cùu dútú cúnùu, ndihí cue tĕe dàcuaha ñaha xii ñáyiu nchaa tnúhu ní chídó tnùní ndíi Moisés, te cue tĕe-á<sup>n</sup> sũúni ìo iní-güedé sàcá<sup>n</sup> cuéchi-güedé cuendá-gá.

<sup>11</sup> Te té Hèrodés ndihí cue tĕe cùu sandadú-dé ñá túú ní cùu vâha iní-güedé núú Jèsús, te ní cudíquí ndeé ñáhá-güedé xii-gá, te ní dâcuíhnú ñaha-güedé dóó vâha xii-gá dàtná cáá dǒó sâcuíhnu cue tĕe sâquĩndaha ñaha xii ñáyiu. Te dâtnùní té Hèrodés ní dánùhú ñáhá tùcu-dé xii-gá ndaha té Pilatú.

<sup>12</sup> Te nduu-ă<sup>n</sup> ñí tnàhá tnúhu té Pilatú ndihí té Hèrodés, chi cùu úhú iní tnáhá-güedé ní cùu.

*Càhí-güedé sá cáhní-güedĕ Jèsús*

*(Mt. 27:15-26; Mr. 15:6-15; Jn. 18:39-19:16)*

<sup>13</sup> Te té Pilatú ní nadatácá-dé nchaa cue tĕe cùu dútú cúnùu ndihí dava-gá cue tĕe cùnùu, ndihí nchaa ñáyiu ñúú-á<sup>n</sup>,

<sup>14</sup> te ní xáha<sup>n</sup>-dĕ:

—Nchòhó ndécá-ndó tĕe-a véxi ní taxi cuendá-ndó-dĕ iha, te càhí-ndó sǎ ìo dusa<sup>n</sup> quidĕ

ñáyiú cuendá nchaa sá dánèhé ñáhá-dě xíi-yu, te núú-ndó ndùcu tnúhu-í núú-dě nũu ná ní quide-dé. Dico yúhú cútnùní iní-í sá ñà túú nì ì<sup>n</sup> cuèchi-dé dàtná càhá<sup>n</sup>-ndó-ǎ<sup>n</sup>.

15 Te cuèi té Hèrodés diu-ni duca<sup>n</sup> càhá<sup>n</sup>-dé sá ñà túú cuèchi-dé nũu ní techiú<sup>n</sup> ñaha tucu-dé cuándixi-dé iha. Te vitna sa ní cutnùní iní-ó sá ñà túú tàú-xi cahni-o-dě chi ñà túú cuèchi ní quide-dé.

16 Te na dândoho-ni-í-dé te dàcácu-í-dé —càchí-dé xǎhá<sup>n</sup>-dě xíi-yu.

17 Te ndi tnahá nduu vico pascuá te dacuítíi sǎ dàcǎcu té Pilatú-án ì<sup>n</sup> cue téé yìhi vecaá, chi duca<sup>n</sup> tnàhí quide-dé.

18 Dico nchaá-yu ní cuáá-yu, te xǎhá<sup>n</sup>-yu xii-dé:

—¡Queñuhu téé nàni Jesús-án, te cahni-n-dě! ¡Te dàcácu-n tǎ Barrábás! —càchí-yu xǎhá<sup>n</sup>-yu xii-dé.

19 Te té Barrábás-án ñi sanu ichi-dé ñáyiú ñuú ingá ichi, te ní ngúita-yu ndihi-dé ní cuu úhú iní-yu cue téé cùchiu<sup>n</sup>, te ní sahani-dé ndíyi núu xǎ<sup>n</sup> ní chihi ñaha-güedě vecaá xii-dé.

20 Te té Pilatú cuiní-dé dàcácu-dé Jèsús nũu xǎ<sup>n</sup> càhá<sup>n</sup> ndihi ñaha tucu-dé xíi-yu ní cùu,

21 dico uu<sup>n</sup>-gá níhi ní cuáá-yu, te ní xǎhá<sup>n</sup>-yu xii-dé úú xito:

—¡Cata caá-dé núú cùrúxí! ¡Cata caá-dé núú cùrúxí! —càchí-yu xǎhá<sup>n</sup>-yu xii-dé.

22 Te xito cuu úní ní xáha<sup>n</sup> tǎ Pilatú:

—¿Te ná cúú cuèchi ní quide-dé te núu duca<sup>n</sup> cuiní-ndó càda-í-dé-i? Te yúhú cútnùní iní-í sá ñà túú cuèchi ní quide-dé nũu xǎ<sup>n</sup> ñà túú tàú-xi cahni-o-dě, te na dândoho-ni-í-dé te dàcácu-í-dé —càchí-dé xǎhá<sup>n</sup>-dě xíi-yu.

23 Dico níhi-ni càhá<sup>n</sup>-yu xǎhǎ<sup>n</sup>-yu sá ná càta caa ñaha-dé xii-gá núú cùrúxí, te ñáyiu-á<sup>n</sup> ndihí nchaa cue tée cùu dútú cúnùu xícáhá<sup>n</sup> níhi-güedé ndihí-yu ndéé ní xínu iní té Pilatú cada-dé nàcuáa càchí iní-yu.

24 Te ní xáha<sup>n</sup>-dě xii-yu sá cúú càda-dé nàcuáa xǎhǎ<sup>n</sup>-yu.

25 Te duca<sup>n</sup> te ní dácăcu-dé té Barrábás tée ní sanu ichi ñáyiu ñuú ingá ichi, te diu-ni-dé ní sahani-dé ndíyí núu xǎ<sup>n</sup> ní xíhi-dé vecaá, te dătnùní ní táuchíú<sup>n</sup>-dě cada-güedé Jèsús nàcuáa xǎhǎ<sup>n</sup>-yu.

*Sàta caa-güedé Jèsús núú cùrúxí  
(Mt. 27:32-44; Mr. 15:21-32; Jn. 19:17-27)*

26 Te ndèca-güedé Jèsús cuáhá<sup>n</sup> núú cátá càa ñaha-güedé xii-gá, te ichi cuáhá<sup>n</sup>-güedé ndihí-gá ní tñi-güedé ì<sup>n</sup> tée ñuú Cìrené nání-dě Xímú ñúhú-dě ichi duha cuándixi-dé ní sáhá<sup>n</sup>-dé yucu, te ní dácuídó ñaha-güedé xii-dé cùrúxí nchídó Jèsús, te ní ngúíta nchicú<sup>n</sup>-dé sátá-gǎ.

27 Te ío cuéhé ñáyiu nchìcú<sup>n</sup> ñáhá xii-gá cuáhá<sup>n</sup>, te vài ñáyiu dñí ío níhi ndàhí-yu sá ndihú iní-yu cuendá Jèsús.

28 Te Jèsús ní nchócótó-gǎ núu-yu, te ní xáha<sup>n</sup>-gǎ:  
—Nchòhó ñáyiu dñí ñuú Jerusálén, vá ndàhyú-ndó cuendá-í chí ndàhyú cuendá méé-ndó ndihí cuendá déhe-ndo.

29 Chi sáá nduu quèsaha ñáyiu: “Sá vǎha táhú nchaa ñáyiu ñá túú càcu déhe-xi, ndihí nchaa ñáyiu vátá quíní-gá cuhu<sup>n</sup> déhe-xi, chi ni ñà túú xìní-yu dacadí-yu”, duha quesàhá-yu.

30 Te dàv-á-án cǔñaha ñǎyiu xii nchaa tǎndúú ndihi nchaa núú xìquí: “Chí tǎcùu<sup>n</sup> ngónchihi ñaha-ndo xì-ndí”, duha cǔñàhá-yu.

31 Te núú yúhú téé quǐde ndáá duha quǐde ñaha-güedé xii-í vitna, te ndèé-gá cada-güedé nchaa ñáyiu ndècu ichi cuehé ichi duha —càchí-gá xáha<sup>n</sup>-gǎ xií-yu.

32 Te ndèca tucu-güedé úú tnhá cue téé ndècu ndisa cuéchi-xi cuáhá<sup>n</sup> cuèndá cahni ñaha-güedé xii-güedé ndihi Jèsús.

33 Te òré ní quexìo-güedé ndihi-gá ì<sup>n</sup> xichi núú nání Yìquí Díquí Ndǎyi, te xiá<sup>n</sup> nǐ sata caa ñaha-güedé xii-gá núú cùrúxí, ndihi úú cue téé ndècu ndisa cuéchi-xi-á<sup>n</sup>, te ì<sup>n</sup>-dé ní sata caa-güedé xio cùha-gá te ìngá-dé ní sata caa-güedé xio dàtni-gá ðiu-ni núú cùrúxí tucu.

34 Te ní xáha<sup>n</sup>-gǎ xii Tǎtá-gǎ Dútú Ndiǒxí:

—Táu, cada càhnu iní sá quǐde-güedé, chi ñá túú cùtnuní iní-güedé ná cúú sǎ quǐde-güedé —càchí-gá xáha<sup>n</sup>-gǎ.

Te cue téé cùu sandadú ní xito ndéé-güedé nǔu ndédacàa-güedé cuu cuèndá-güedé dóó-gǎ.

35 Te nchaa ñáyiu xǐndecu-á<sup>n</sup> ndéhě-yu nàcuáa quǐde-güedé Jèsús, te nchaa cue téé cùnuu ní cudíquí ndeé ñáhá-güedé xii-gá, te ní xǐtnàha-güedé:

—Te dava ñáyiu ní ndacu-dé ní dácăcu nihnu-dé, te vitna na dàcăcu nihnu-dé méé-dě, te núu ndisa sá Crìstú Yaá ní tendaha Yǎ Ndiǒxí véxi ñuyíú-a cùu-dé —càchí-güedé xǐtnàha-güedé.

36 Te tnàhá cue téé cùu sandadú ní cudíquí ndeé ñáhá-güedě xii-gá, chi ní sándehe yatni-güedé núú táca-a-gá sãñaha-güedě ndudí íá còho-gá ní cùu,

37 te ní xáha<sup>n</sup>-güedě xii-gá:

—Te núu yòhó cúú-n tée yìndaha ñaha xii ñáyiú isràél, te dàcácu nihnu mee-n —càchí-güedé xãha<sup>n</sup>-güedě xii-gá.

38 Te ní taxi ndecu-güedé ì<sup>n</sup> sá ndeé lètrá ndàa díquí-gã te ndeé úní núú tnũhu, tnúhu griégú, ndìhi tnúhu látín, ndìhi tnúhu hèbreú, te duha quèe-xi ndi nuní núú tnũhu-á<sup>n</sup> “Tée-a cùu-dé tée yìndaha ñaha xii ñáyiú isràél”, duha quèe-xi.

39 Te ì<sup>n</sup> tée ndècu ndisa cuéchi-xi, tée ní sata caa-güedé dìñi-gá xǐcuèhé ñáhá-dě xii-gá, te xãha<sup>n</sup>-dě:

—Te núu yòhó cúú-n Crìstú Yaá ní tendaha Yã Ndiõxí véxi ñuyíú-a, te dàcácu nihnu mee-n, te dàcácu nihnu ñaha xii nchúhú tnàhá-ndí tucu —càchí-dé xãha<sup>n</sup>-dě xii-gá.

40 Dico ìngá tée cùndìhi-dé tée tàcaa ìngá xio dìñi-gá ní tenáá ñáhá-dě xii-dé, te xãha<sup>n</sup>-dě:

—¿Te náa ñá túú ndàcu iní-n Yã Ndiõxí vitna duha càa-o ndoho-o ndìhi tée nàni Jesús-a ñã?

41 Chi nchoo tàú ndisa-o sã dúhá ndòho-o nacháhu-o cuéchi-o, dico Jèsús-a chi ñá túú cuéchi-dé —càchí-dé xãha<sup>n</sup>-dě xii tée tàcaa ndìhi-dé-á<sup>n</sup>.

42 Te dãtnùní ní xáha<sup>n</sup>-dě xii-gá:

—Jèsús, ndacu iní ñáhá-n xii-í òré ná quèxi-n taxi tnuní-n ñuyíú-a —càchí-dé xãha<sup>n</sup>-dě xii-gá.

43 Te Jèsús ní xáha<sup>n</sup>-gã:



—Na càchí tnúhu ndáá-í xii-n sǎ méi ndùu vitna cundecu ndìhi ñaha-í xii-n nùú nǐ nduu táhù-í cundecu-í —càchí-gǎ xáha<sup>n</sup>-gǎ xii-dé.

*Ní xíhí Jèsús*

*(Mt. 27:45-56; Mr. 15:33-41; Jn. 19:28-30)*

<sup>44</sup> Te òré ní cuu cuádava nduu. Te ní cunee nìhì ñuyíú, te duca<sup>n</sup>-ni càa ní cuu ndéé caá úní sacuaa.

<sup>45</sup> Chi ñá túú-gǎ ní dàyehé nchícanhii te ní ndátá dǒó cúú còrtiná veñúhu càhnu sǎ ïo cùnuu ní quée dava ndáá.

<sup>46</sup> Te níhi ní cáhá<sup>n</sup> Jèsús, te xáha<sup>n</sup>-gǎ xii Tǎtá-gǎ Dútú Ndiǒxí:

—Táu, naquehe<sup>n</sup> cuèndá-n espíritú-í —càchí-gǎ xáha<sup>n</sup>-gǎ xii Tǎtá-gǎ.

Te tnúhu-ná-á<sup>n</sup> nǐ cáhá<sup>n</sup>-gǎ te ní xíhí-ni-gǎ.

<sup>47</sup> Te òré ní xiní téé cùu capitá<sup>n</sup> sǎ dúcá<sup>n</sup> nǐ cuu, te ní ndacu iní-dé Yǎ Ndiǒxí, te ní cachí-dé:

—Sǎ ndáá ndisa sǎ tǎe-a cùu-dé ì<sup>n</sup> téé ïo quide ndáá ndécú ñùyíú-a ni cùu —duha ní cachí-dé.

<sup>48</sup> Te chitu ñǎyiu ní tacá xíá<sup>n</sup> chi cuení-yu cundèhé-yu nása cada-güedé Jèsús. Te sátá nǐ yáha ní xiní-yu nàcuáa ní quide ñaha-güedě xii-gǎ, te ní ndìhí-yu ní ndaca ta càní-yu pèchú-yu cuánuhú sǎ ndìhú iní-yu.

<sup>49</sup> Dico ndècu tnahá cue ñáyiu xìní tnahá ndìhi Jesús, ndìhi ñáyiu dìhí ní chinchícú<sup>n</sup> ñáhá xì-gǎ ndéé distritú Galileá, te ñáyiu-á<sup>n</sup> xica-ni xǐxínutnǐ-yu xǐndéhě-yu nchaa nàcuáa ní quide ñaha-güedě xii-gǎ.

*Chìndúxi-güedé Jèsús*

*(Mt. 27:57-61; Mr. 15:42-47; Jn. 19:38-42)*

50 Te ndècu ìí<sup>n</sup> téé ñuú Arimàtéá nání-dě Chèé, te ñuú-á<sup>n</sup> yíndèhu-xi distritú Jùdeá, te ío váha iní-dé te quide ndáá-dé núú Yá Ndiòxí, te tnàhá-dé cúú-dě chiu<sup>n</sup> te ní xíndecu-dé jùndá cue téé isràél.

51 Te ñá ní tnàhá tnàhí iní-dé nàcuáa ní cáhá<sup>n</sup>-güedé núú jùndá nàcuáa cada-güedé Jèsús. Te téé-á<sup>n</sup> ndétú-dě sáá nduu ndíhu ndaha ñàha Yá Ndiòxí xii-dé ndíhí ñáyi.

52 Te téé-á<sup>n</sup> ñí sáhá<sup>n</sup>-dé núú tē Pilatú te ní xáha<sup>n</sup>-dě sá ñúú vá cùndèe iní-dé dañ-dě chindúxi-dé yiqui cùñú Jèsús. Te té Pilatú-á<sup>n</sup> ñí sáha-dé tnúhu.

53 Te ní nunehe-dé yiqui cùñú-gá núú cùrúxí, te ní chidúcú<sup>n</sup>nduu-dé ìí<sup>n</sup> dóó cuìxí<sup>n</sup>, te ní chihi-dé ìí<sup>n</sup> yaú nchìí yiqui naha càva, te vátá yõo ìí<sup>n</sup>-gá nguíndǔxi yaú-á<sup>n</sup>.

54 Te cùu-xi nduu vispré nduu ndetátú ñáyi, núu xíquide túha-ná-yu sá cúú ìngá nduu.

55 Te nchaa ñáyi dèhí ní chinchícú<sup>n</sup> ñáhá xii Jesús ndéé distritú Galileá ndëndàhá-yu té Chèé ní sáhá<sup>n</sup> núú nchìí yaú-á<sup>n</sup>, núu ní xiní-yu nàcuáa ní sacá<sup>n</sup>-dé yiqui cùñú-gá xití yaú-á<sup>n</sup>.

56 Te duca<sup>n</sup> te cuánuhú-yu vehé-yu, te ní quide túha-yu acití sáhá<sup>n</sup> tnámí, ndíhí pomàdá, te ní ndetátú-yu ìngá nduu-ǎ<sup>n</sup> ñí quidé-yu nàcuáa càhá<sup>n</sup> tnúhu Yá Ndiòxí.

## 24

### *Ní ndoto Jèsús*

*(Mt. 28:1-10; Mr. 16:1-8; Jn. 20:1-10)*

<sup>1</sup> Te ndumìngú nehé víhí-ní cuáhá<sup>n</sup> tucu ñáyi dèhí núú nchìí yaú ní chihi-güedé yiqui cùñú

Jèsús, te nèhé-yu nchaa sá sàhá<sup>n</sup> tnámí nǐ quide túha-yu-á<sup>n</sup> cuǎhá<sup>n</sup>, te tnàhá tucu ñ<sup>n</sup> ũú-gá tnàha ðihí-yu nchìcú<sup>n</sup> ñáhá xii-yu cuáhá<sup>n</sup>.

<sup>2</sup> Te òré ní quexió-yu yuhu yàú-á<sup>n</sup> te ní xiní-yu sá yúú ndèdí ñ<sup>n</sup> xio-ná ndécú,

<sup>3</sup> te ní quíhu-yu xití yaú-á<sup>n</sup>, dico ñá túú-gǎ yiqui cùñú Jèsús yíhí.

<sup>4</sup> Te ñá ní cùtnuní tnàhí iní-yu ndèé ichi cuáhá<sup>n</sup> yiqui cùñú-gá, te ní xiní-yu úú espíritú xínú cuèchi núú Yá Ndiòxí xĩnutnĩ-xi ðiñí-yu te xixĩhnu-xi dóó chàhnchí.

<sup>5</sup> Te ní yùhú-yu te ñá túú ní cùyí-yu cundèhé-yu cue espíritú-á<sup>n</sup>, te cue espíritú-á<sup>n</sup> nǐ xáha<sup>n</sup>-xi xii-yu:

—¿Ná cuèndá nándùcu-ndo Jesús Yaá ndécú vǐvú núú yĩndũxi ñáyiú ní xihí-i?

<sup>6</sup> Te ñá túú-gǎ yiqui cùñú-gá ndécú ìha chi sa ní ndoto-gá, te chí dándàcu iní nàcuáa ní cáhá<sup>n</sup>-gá cútnàhá ní xĩndecu-ndo ndìhi-gá distritú Galileá,

<sup>7</sup> chi ní cachí-gá sá méé-gǎ cúú-gǎ ñaní tnáhá-ndó nchàa-ndo, te dacuití cuǎha cuèndá ñáhá-güedě xii-gá núú cuè téé ndècu ichi cuehé ichi duha, te cata caa ñaha-güedě xii-gá núú cùrúxí, te núú cùrúxí-á<sup>n</sup> cuú-gá dico nduu úní sá cúú-gá te ndoto-gá, duha ní cachí-gá xii-ndo.

<sup>8</sup> Te òré-á<sup>n</sup> nǐ ndacu iní-yu tnúhu ní cáhá<sup>n</sup> Jèsús.

<sup>9</sup> Te sátá dúcá<sup>n</sup> te ní naquehé<sup>n</sup>-yu ichi cuánuhú-yu, te ní caní-yu cuèndú núú ndì úxí ñ<sup>n</sup> cue téé ní táúchíú<sup>n</sup> Jèsús cáhá<sup>n</sup> tnúhu-gá, ndìhi núú dàva-gá ñáyiú.

<sup>10</sup> Te ñáyiú duca<sup>n</sup> nàha tnúhu cuánuhú núú-güedě-á<sup>n</sup> cúú tǎ Màriá Magdalèná, ndìhi tá

Juǎná, ndihí tá Màriá nǎná tǎ Jàcobó, ndihí dava-gá ñáyiú dǐhí.

<sup>11</sup> Dico cue téé-á<sup>n</sup> ñí sani iní-güedé sá dǐcó cáhú iní-yu tnúhu xǎhǎ<sup>n</sup>-yu xii-güedé ñúú ñá túú ní sàndáá iní-güedé nàcuáa ní xáhǎ<sup>n</sup>-yu.

<sup>12</sup> Dico té Pèlú ní quee-dé xínú-dě cuáhá<sup>n</sup> cuándéhé-dě yaú núú ñí chihi-güedé yiquí cùñú Jèsús, te ní sáá-dé te ní ngáundeyi-dé xító ñihni-dé xítí yaú-á<sup>n</sup> te ní xiní-dé sá méé-nǎ dóó ñí xíducú<sup>n</sup> nuu-gá yúcú ñ<sup>n</sup> xio, te ío ní cuñúhu-dé sá dúcá<sup>n</sup> ñí cuu, te ní natnǐ-dé ichi cuánuhú-dé vehe núú xǐndecu-güedé.

*Ichi ñúú Emàús*  
(Mr. 16:12-13)

<sup>13</sup> Te dǐu-ni nduu-ǎ<sup>n</sup> ñúhú úú cue téé ní xica cuu ndihí Jèsús ichi cuáhá<sup>n</sup>-güedé ñ<sup>n</sup> ñúú nání Emàús, te sàcúhu<sup>n</sup>-güedé dàtná úú òré ichi ndéé ñúú Jerusálén, te ndéé ñúú Emàús.

<sup>14</sup> Te ta ndàtnúhu-güedé cuáhá<sup>n</sup> nchaa nàcuáa ní cuu,

<sup>15</sup> te ñini dùca<sup>n</sup> xícáhá<sup>n</sup>-güedé, te Jèsús ní natnahá ñáhá-gǎ xii-güedé te ndéca tnaha-gá ndihí-güedé cuáhá<sup>n</sup>.

<sup>16</sup> Te cuèi ndèhe ñaha-güedé xii-gá dico dàtná ñ<sup>n</sup> sá ndèdí núú-güedé, chi ñá ná quñí ñáhá-güedé xii-gá ní cùu.

<sup>17</sup> Te Jèsús ní xícá<sup>n</sup> tnúhú-gǎ núú-güedé, te xáha<sup>n</sup>-gǎ:

—¿Ná tnúhu xícáhá<sup>n</sup>-ndó ñùhu-ndo ichi núú duca<sup>n</sup> ío cùu ndiyí-ndó-í? —càchí-gá xáha<sup>n</sup>-gǎ xii-güedé.

<sup>18</sup> Te ñ<sup>n</sup> téé nàni Cleofás ní xáha<sup>n</sup>-dě xii-gá:

—¿Te ná cuendá nchaa ñáyiú íchí nǐ sáá ñuú Jerusálén xìní-yu nchaa nàcuáa ní cuu, te ñ<sup>n</sup> òi-ná yòhó ñá túú xìní-n-í? —càchí-dé xáha<sup>n</sup>-dě xii-gá.

19 Te ní xáha<sup>n</sup>-gǎ xii-güedé:

—¿Te ná ní cuu-i? —càchí-gá xáha<sup>n</sup>-gǎ xii-güedé.

Te ní xáha<sup>n</sup>-güedě xii-gá:

—Cuendá Jèsús téé ñuú Nazàrét càhá<sup>n</sup>-ndí, chi téé-á<sup>n</sup> cúú-dě ñ<sup>n</sup> téé càhá<sup>n</sup> tnúhu Yá Ndiöxí, te ío váha ndùu tnúhu càhá<sup>n</sup>-dé ní cùu, te quide-dé sá vǎ yòo tnàhí ndàcu cada nacuáa cudíí iní Yá Ndiöxí ndihí ñáyiú nǐ cùu.

20 Te cue téé cùu dútú cúnùu, ndihí cue téé cùnùu taxi tnuní ñháá xii-ndí ní sáha cuendá ñháá-güedě xii-dé núú tǎ Pilatú te ní sata caa ñaha-güedě te núú cùrúxí-á<sup>n</sup> nǐ xíhí-dé.

21 Dico vitna sa ní cuu úní nduu sá nǐ xíhí-dé, te nchúhú ní sani iní-ndí sá tǎe-á<sup>n</sup> dàcácu ni-hnu ñaha-dě xii nchúhú ñáyiú isràel núú nchaa tnúndòho tnúhu ndàhú ndécú-ndí.

22 Dico ío cùñúhu-ndí cúú, chi ñ<sup>n</sup> ùú ñáyiú òihí ní tuha ñaha xii-dé ndécú ndihí-ndí ní sáhá<sup>n</sup> ngotó-yu ndéxuehe tàcuíhndá-gá yaú núú nǐ chihi-güedé yiqui cùñú-dé,

23 te ní nasáá-yu càchí-yu xii-ndí sá ñà túú-gǎ yiqui cùñú-dé yíhí xití yaú-á<sup>n</sup>. Te ní xini-yu espíritú xínú cuèchi núú Yá Ndiöxí, te ní xáha<sup>n</sup>-xi xii-yu sá ndécú vǐvú-dě.

24 Te sátá dúcá<sup>n</sup> te ñ<sup>n</sup> ùú cue téé cùndihí-ndí ní sáhá<sup>n</sup> ndéhé-güedě yaú-á<sup>n</sup>, te ní xini-güedé sá ndáa cúú-xí nchaa tnúhu ní cáhá<sup>n</sup> ñáyiú òihí-á<sup>n</sup>, dico ñá túú ní xini-güedé téé-á<sup>n</sup> —càchí-güedé xáha<sup>n</sup>-güedě xii-gá.

25 Te Jèsús ní xáha<sup>n</sup>-gǎ xii-güedé:

—Íó cùmání sǎ xìní tñuní-ndó, chí íó cuèé sàndáá iní-ndó tñuhu ní cáhá<sup>n</sup> cue téé ní xóo cáhá<sup>n</sup> tñuhu Yá Ndiǒxí ndéé sanaha!

26 ¿Te náa ñá túú tàú-xi sá ndóhó Crìstú òré cùmání-gǎ sáá nduu ndàa-gá andiú nǔú ndécú Dǔtú Ndiǒxí cundecu-gá-ǎ<sup>n</sup>? —càchí-gá xáha<sup>n</sup>-gǎ xii-güedé.

27 Te ní ngüíta-gá xáha<sup>n</sup>-gǎ nàcuáa quèe-xi nchaa tñuhu càhá<sup>n</sup>-xi núú tütú Yá Ndiǒxí cuendá-gá, te díhna-gá ní cáhá<sup>n</sup>-gá nàcuáa ndùu nchaa tñuhu yòdo tñuní núú tütú ndíi Moisés, te dǎtnùní ní cáhá<sup>n</sup>-gá nàcuáa ndùu nchaa tñuhu yòdo tñuní núú tütú nchaa cue téé ní xóo cáhá<sup>n</sup> tñuhu Yá Ndiǒxí ndéé sanaha.

28 Te òré ní quexìo-güedé yuhu ñùú núú cuahá<sup>n</sup>-güedé-án, te Jèsús ní quide-ni-gá sá yǎha-gá quíhí<sup>n</sup>-gá ingá xichi ni cùu.

29 Dico ní cáhá<sup>n</sup> ndàhú-güedé núú-gǎ sá quéndõo-gá xía<sup>n</sup> ndetatú-gá ndihí-güedé, te xǎha<sup>n</sup>-güedě xii-gá:

—Quendóo ndihí ñaha xì-ndí iha ndetatú-n chí sa ní cuaa, te tnaví cundiquí<sup>n</sup> —càchí-güedé xǎha<sup>n</sup>-güedě xii-gá.

Te xía<sup>n</sup> cáá ì<sup>n</sup> vehe cuánguihu-güedé ndetatú-güedé ndihí-gá.

30 Te òré sa yìhi-güedé mèsá ndihí-gá cùdini ndihí ñaha-güedé, te ní quehe<sup>n</sup>-gá pàa te ní ndacá<sup>n</sup> táhú-gá núú Yá Ndiǒxí, te ní táhú cuèchi-gá te dǎtnùní ní dácǎhñu ñaha-gǎ xii-güedé.

31 Te òré-án ñí naquiní ñáhá-güedě xii-gá ní cùu, dico uu<sup>n</sup>ni ní ndóñúhú-gǎ.

32 Te ní xítñàha-güedé:

—Te ndáá sá sũúní cùdíí ìní-ó òré tá ndàtnúhu-o ndìhi Jesús véxi ichi, te ta dànehé ñáhá-gã xii-o nchàa nacuáa quèe-xi tnúhu càhá<sup>n</sup>-xi núú tütú Yă Ndiõxí —càchí-güedé xítñàha-güedé.

33 Te ñá túú-gã ní xĩndetu-güedé chi ndìhi-ni ní natnii-güedé ichi cuánuhú-güedé ñúú Jerusalén, te ní nasáá-güedé núú xĩndecu ndi ùxí ì<sup>n</sup> cue téé ní táúchíú<sup>n</sup> Jesús cáhá<sup>n</sup> tnúhu-gá, ndìhi dava-gá ñáyiu.

34 Te cue téé xĩndecu-á<sup>n</sup> xãha<sup>n</sup>-güedě:

—Ndáá sá ñi ndoto Yaá cúú Mèstrú, chi ní xini ñáhá tẽ Xímú —càchí-güedé xãha<sup>n</sup>-güedě.

35 Te cue téé ní nasáá-á<sup>n</sup> ñi cani-güedé cuèndú nàcuáa ní cuu ichi, ndìhi nàcuáa ní cuu ní naquiní-güedé Jèsús òré ní táhú-gã pàá ní dácãhũ ñaha-gã xii-güedé.

*Jèsús ní quexìo-gá núú xĩndecu cue téé ní xica cuu ndìhi-gá*

*(Mt. 28:16-20; Mr. 16:14-18; Jn. 20:19-23)*

36 Te càhá<sup>n</sup> dúcá<sup>n</sup>-ní-güedě nàcuáa ní cuu ní quexìo Jesús ní ngúnutnii-gá ndéé tnuú-güedé, te xáha<sup>n</sup>-gã xii-güedé:

—Yá Ndiõxí chíndèe ñaha-gã xii-ndo ïo váha cùu ìní-ndó ndècu-ndo —cachí-gá xáha<sup>n</sup>-gã xii-güedé.

37 Te da ní yùhú-güedé, te ní sani ìní-güedé sá dìcò ì<sup>n</sup> espíritú cúú sã ndéhé-güedě ní cuu.

38 Dico Jèsús ní xáha<sup>n</sup>-gã xii-güedé:

—¿Ná cuèndá yùhú-ndó, te sàni ì<sup>n</sup> sani úú ìní-ndó-í?

39 Chí cùndèhe ndaha-í ndìhi sáhà-í te quiní-ndó nã ñiu-ni-í. Te chí téndàha ñaha xii-í te cundehe-ndo, te núú ì<sup>n</sup> espíritú ndécú

yìquì cuñú-xi dàtná ndécú ndìhì yúhú —càchí-gá xáha<sup>n</sup>-gã xii-güedé.

40 Te sátá dúcá<sup>n</sup> ñí xáha<sup>n</sup>-gã te ní dánèhé ñáhá-gã xii-güedé ndaha-gá ndìhì sáhá-gã.

41 Te ío ní cuñúhu-güedé, te ní cudíí ìní-güedé sá ndécú-gã tnuú-güedé dico sàni #<sup>n</sup> sani úú ìní-güedé, te ní xáha<sup>n</sup> Jèsús xii-güedé:

—¿Ndècu ndìhì-ndo luha sá caxí-ó ìha ñá? —  
càchí-gá xáha<sup>n</sup>-gã xii-güedé.

42 Te ní sáñaha-güedé xii-gá luha chácá ñí chíhó, ndìhì dítá ñúñú ñúhú ndùdí,

43 te ní quehe<sup>n</sup>-gá te ndèhe-güedé ní xexi-gá.

44 Te dàtnùní ní xáha<sup>n</sup>-gã:

—Nchaa sá ñí yáha-í-a cùu-xi sá ñí cachí tnúhu-í xii-ndo cùtnàhá ndécú ndìhì ñaha-gá-í xii-ndo, chi ní cachí-í sá dàcuítíí càda-xi nchaa nacuáa càhá<sup>n</sup>-xi núú tütú ndíi Moisés, ndìhì núú tütú ndéé tnúhu ní cáhá<sup>n</sup> cue téé ní xóo cáhá<sup>n</sup> tnúhu Yá Ndiöxí ndéé sanaha, ndìhì núú librú Sálmú —càchí-gá xáha<sup>n</sup>-gã xii-güedé.

45 Te òré-á<sup>n</sup> ñí sáñaha-gã sá xìní tnùnì-güedé, te ní tecú tnùnì-güedé nchaa tnúhu càhá<sup>n</sup>-xi núú tütú Yá Ndiöxí.

46 Te ní xáha<sup>n</sup>-gã xii-güedé:

—Duca<sup>n</sup> ndéé tnuní núú tütú Yá Ndiöxí sá dàcuítíí sã yúhú Cristú cuú-í, te nduu úní ndoto-í.

47 Te ñihì ñuyíú cùténuu tnúhu ní cáhá<sup>n</sup>-í, dico díhna nuu-gã ñúú Jerusalén ngúita-yu cacunehe ñáhá-yu xii-í, te cáhá<sup>n</sup>-yu nacuáa ní dánèhé-í-yu, te cúñàhá-yu xii cue ñáyíu sá ná dándixi túu-yu ìní-yu sá ñà túú quide váha-yu, te dàñá-yu nchaa ichi cuèhé ichi duha ndécú-yu, te natnìí-yu ichi Yá



Ndiöxí, te duca<sup>n</sup> te cada càhnu iní-gá nchaa yíca cuěchi-yu.

<sup>48</sup> Te vitna nchòhó cuu-ndo cuè téee cáhá<sup>n</sup> ndáá nchaa nàcuáa ní cuu chi ní xiní núú-ndó.

<sup>49</sup> Te yúhú tendaha-ĩ Espíritú Yă Ndiöxí quixi cundecu ndihí-ndo, chi duca<sup>n</sup> nĩ cachí-gá. Dico chí cùndècu-ni ñuú Jerusàlén-á<sup>n</sup> ndèè ná quèxio Espíritú Yă Ndiöxí ngúndecu ndihí-ndo cuèndá chindee ñàha-xi xii-ndo cada-ndo nchaa nacúaa ní cáhá<sup>n</sup>-í —càchí-gá xáha<sup>n</sup>-gă xii-güedé.

*Jèsús cuánda-gá andiù*

*(Mr. 16:19-20)*

<sup>50</sup> Te Jèsús ní queñuhu ñaha-gă xii-güedé ñuú Jerusàlén ndécá ñàha-gá cuáhá<sup>n</sup> ñuú Bètaniá, te xíá<sup>n</sup> nĩ ndonehe-gá ndaha-gá núú nĩnu, te ní xíca<sup>n</sup> táhú ñàha-gá xii-güedé núú Yă Ndiöxí.

<sup>51</sup> Te sátá nĩ xíca<sup>n</sup> táhú ñàha-gá xii-güedé núú Yă Ndiöxí, te ní quee-gá tnuú-güedé cuánda-gá andiù.

<sup>52</sup> Te ní ngúita-güedé ní cachí-güedé sá ïo càhnu cuu Jesús, te ní natni-güedé ichi cuánuhú-güedé ñuú Jerusàlén, te súní cùdí ìní-güedé ñúhú-güedé ichi.

<sup>53</sup> Te nchaa nduu ní xíndecu-güedé veñúhu càhnu sá ïo cùnuu ní ndacá<sup>n</sup> táhú-güedé núú Yă Ndiöxí, te ní cachí-güedé sá ïo càhnu cuu-gá. Duha ní cuu dàvá-á<sup>n</sup>.

**Tnúhu ní cáhá<sup>n</sup> yă ndiöxí xito cùu uú**  
**New Testament in Mixtec, Peñoles (MX:mil:Mixtec,**  
**Peñoles)**

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

**Copyright Information**

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Peñoles

**© 2002, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

872f7754-0986-5ecd-a059-925a708a6939